

ЎЗБЕКИСТОН ЁЗУВЧИЛАР УЮШМАСИ

Ўзбекистон Республикаси давлат
мустақиллигининг 30 йиллигига
бағишиланади



РЗУЛАР
ХИЁБОНИ

Ҳикоялар

ТОШКЕНТ
«ADABIYOT»
2021

ЎЎК: 821.512.133-1

КБК: 84(5Ў)7

М 95

Орзулар хиёбони [Матн]: Ҳикоялар. – Тошкент:
“ADABIYOT” нашриёти, 2021. – 352 б.

Масъул мұхаррир:
Собир Ўнар

Тұплаб нашрға тайёрловчилар:
Мұхиддин Абдусамад, Мансур Жумаев

Юртимиз мустақиллигининг ўттыз үйлік түйи араfasида бир қанча таниқлы адебілар, шунингдек ёш ёзувчиларнинг Ватан, она замин, миллий тилимиз, айни пайтда қадриятларимиз, осори-атиқаларимиз ифода этилган сара ҳикояларини жамладык. Бир муқова остида түпланған мазкур асарлар сони ортиши, мундарижаси тағын ҳам кенгайиши мүмкін зеdi. Бироқ үкүвчилар вакыт ҳамда тоқатини инобатта олған қолда ушбу ҳикоялар түплемес билан чекландик. Умид қиласызки, адабиётта тан олинған ва эътиборга молик ушбу асарлар Сиз азиз китобхонларни беғарқ қолдирмайды.

*Китоб Ўзбекистон Ёзувчилар уюшмаси
жомийлигидә чоп этилди.*

ISBN 978-9943-5567-1-3

© “ADABIYOT”, 2021

Шукур ХОЛМИРЗАЕВ



КҮК ДЕНГИЗ

- Недин не тату?
- Суу тату. (- Оламда энг тотли нарса нима? – Сув.)

Олтой топишмоғи

Н. вилоятидаги «Дружба» деган совхозда расм чи-зib, бүёкчилик ҳам қилардим. Тирикчилик-да, ака. Қишлоқнинг бир четида музей бор эди: хўжаликнинг тарихи, яъни ютуқлари акс эттирилган. Ўшанинг бир ҳужрасида ётиб турардим. Манзара яхши, лекин ёни-мизда бир хавфли тепалик бор, унинг бир ёни куйиб кетган – ўт ўсмас эди. Тепаликнинг у ёғида даҳшатли бир кўл ястаниб ётибди. Қадимда Кўк кўл дейилган, ҳозир эса Қора кўл дейишади. Тоғ этагидаги кимё за-водидан чиққан оқава-ювинди сувлар қўйиб юборил-ган: кўлда сув эмас, эритилган қора мум бордек ялти-раб ётарди. Ўлай агар, устидан шундоқ юриб кетиш мумкиндай. Қайсиdir йили ёғин кўп бўлиб кўл тош-ганда, бир ариқ сув оқиб чиққан-у ҳалиги ёнбағирдан пастга энган. Ўшанинг ўрнидан гиёҳ унмас эди: куйиб кетган-да! Кейин тупроғини ҳар қанча қиртишлаб ташласалар ҳам ўнгланмаган. Ҳе, ўша кезлар кўп мол-лар ҳам қирилиб кетган экан...

Хуллас, бир куни хўжалик директори чақириб қолди. Идорасига. Яхши одам эди бечора. Кейин синиқиб-гина: «Ука, гап шундай-шундай...» деди.

Қишлоқда бошқа миллат вакиллариям кўп эди-да: ўрис, армани, карес...

Директорнинг айтишича, ўттиз тўққиз миллат вакили яшарди. Нимагаки, ҳар йили бир миллат вакилига кўпайтириш плани бор экан... Кулманг, биласиз-ку!

Ўша киши илтимос қилди-да: «Ука, сиз жаҳонгашта одамсиз. Гаплашишни биласиз... Бизда бир миллат вакили йўқ экан: олтойлик. Бир амаллаб биттасини опкелмасангиз, буёғи чатоқ бўлади. Мана, пул... Ваъдани қуюқ қилинг: уй дейдими, иш дейдими – бор денг. Оиласи биланми, ёлғизми – фарқи йўқ...»

«Йўқ» дейёлмадим. Бунинг устига, Олтой – ҳарқалай, бош боболаримиз яшаган юртлардан.

Йўлга чиқдим.

Барнаулга бордим. Ҳе, ўзимизнинг шаҳарлардан фарқ қилмайди. Уни қандайдир ўрмон ичида, деб... Қайда! Хуллас, ака, кўчаларида қанча кезганим, кимларнинг мендан ҳайиқиб қочганларини айтиб ўтириш имтиҳони қилинганини муродлаб олиб ўтказдиган ортиқча. Қайси бирига: «Паедиш к нам в Узбекистан?» десам, жиннига қарагандай тикилади. Биттаси мени ким-нима деб ўйлади, урмоқчиям бўлди. Бир-иккитаси кулиб қўйди. Энди, тўсатдан сўрасанг, ҳайрон бўлар экан-да. Ўз ихтиёри билан келса, бошқа гап: ана, ҳар қаёқдан келиб ётипти.

Қисқаси, ўзидан қолган биронта дарвиши-пиёнистаси бўлсаям опкетаман деб бир кечаси кўчага чиқдим. Етти қават-тўққиз қаватли иморатлар орасида юрган эдим, бир иморатнинг ертўласидан чиқиб келаётган ёшгина – ўн бир-ўн икки яшар болани қўриб қолдим. Иккита бўш шишани бағрига босиб олган. Мени кўрди-ю, қочиб қолди. Аста зинапоя бошига бордим. Пастдан нур кўринди. Биласиз-ку, катта шаҳарларда, ўзи-

миздаем шундай биноларнинг ертўласини ҳар хил қаланғи-қасанғи бангилар макон қилган... Шояд биронта ёввопгача йўлиқаманми деб секин зиналардан пастлай бошладим. Пастдан ғудир-ғудир овоз келяпти. Бир ёқдан кўрқаман денг: чиқиб, айлантириб солиб қолса...

Охириги пиллапоядан мундай саҳнчага тушдим. Ертўла эшиги шу ерга очилади. Эшик абор, тирқишлиаридан нур тушаётган экан. Аста очдим. Пастга яна уч-тўртта зина кетган, ўёғи – кенг майдончадай жой.

Шу майдончанинг ўнг томонида ўтиришган экан: уч-тўртта бола тагларига қути қўйиб, кимнингдир сўзини тинглаяпти. Сўзлаётган киши кўринмасди. Ўртада шам ёниқ... Энди денг, ёмонам бадбўй жой экан.

Шунда болалар бирдан мени қўриб қолишди-да, сапчиб-сапчиб туриб кетишиди.

– Ассалом алайкум! – дея зинадан тушдим. Шунда сўзлаётган кишини кўрдим. Эгнида қора-исқирт пахталик, бошяланг, сийрак соқоли ўsicқ, ёшини билиб бўлмас эди.

– Ў-ў, к нам кўнак пожаловал! – деб у ўрнидан турди-да, калта ҳассасига суюниб четга чиқди.

– Да, я қўнақ, қўнақ, – дедим. – Из Узбекистан!

– Ў-ў, озбек? – деди у. – Какими судьбами?

– Сейчас скажу, – дедим. Бориб, у билан кўришдим. Кўли тошдек. Ҳалиги ҳид унгаям ўрнаб қолган экан. Кейин у менга ўтиргани жой кўрсатди, яъни, ўзи ўтирган ёғоч катга ишора қилди. Каравотга эски тўшак солинган, устидан ёпилган чойшабга қараб бўлмас эди. Кутилардан бирига ўтириб, фотиха ўқидим. – Ўтиринглар сизлар ҳам, – дедим болаларга.

– Отур, отур, – деди у кишиям. – Озбек-да турк... – Кейин ўзиям жойига чўкиб, шам қошидаги ёрлиқсиз шишасини четга суриб қўйди.

– Гап шундай, – дедим. – Ўзбекистонга бормайсизми?

У гангиб қолди. Кейин:

– А почему? Что я вам делал? – деди.

Гапини қаранг.

– Вы мне ничего не делали. Вы понравились мне, – дедим. Ўрисчани эплолмайман, буёгини ўзбекча қилдим: – Гап шундаки, оға, биз ўзбеклар меҳмондўст халқмиз. Бизга бошқа миллат вакиллари қанча кўп борса, шунча хурсанд бўламиш!

– Не ушун? – деб сўради у ёнидан узун трубка олиб.

Кечирасиз, мен «трубка» дедим. Олтойчада «қангза» дейишаркан муштукни.

– Дружба, дўстликни яхши кўрамиз-да! – деб уқтиридим. – Мана, давлатимиз ҳам шуни талаб қилали... Бизнинг совхознинг номиям – «Дружба», у ерда ўрислар...

– Понятно, – деди у. – А почему именно я...

– Э, менга барибир! – дедим. – Борасизми? Рози бўлсангиз, ҳозир вокзалга чиқамиз.

– Интересно.

– Интересно эмас... Я прошу, сапхоз просит... Тушуняпсизми?

– Ҳа-я, мен тушунят, – деди у. Кейин ҳалиги винони олиб, оғзидан қулқиллатиб ичди-да, тиржайиб сўради: – Арақи бор по?

– Бор, бор! – дедим. – Хоҳлаганча ичасиз! Текинга, ҳа, текинга!

– Вот так просто?

– Ҳа-да!

– Ну-у. – У муштларини тиззасига тираб, бошини сарак-сарак қилди. – А квартира?... Ўчак, ўчак?

– Ҳе, квартира сизни кутиб турипти!

– Ў-ў, тенгерим! – деб у шифтга қаради. – Бу кижи кам, каманлайт.

Бу гапи – «Бу киши шаман, мени шаманлаяпти», яъни, авраяпти дегани экан.

– Ишонмаяпсизми?

У киши ўйга толиб қолди-да, кейин болаларга нимадир деганди, биттаси катнинг бош томонидан балдоқли пиёла олиб берди. Киши винодан пиёлaga қўйди ва чайқалиб ўрнидан турди. Сўнг ҳассасини биқинига тираб қўйиб, кир бармоқларини ичимликка тиқди, сўнгра рўпарасига қаратиб чертди.

– Кўк тенгериме! – Кейин яна бармоқларини ҳўллаб ўнг томонига чертди, яъни, вино юқини сачратди. – Суу тенгериме! – Кейин чап томони ва орқасига қаратиб чертди. – Туу тенгериме, Чол тенгериме! – Сўнгра винони ичиб қўйди.

«Туу»» дегани – тоғ, «чол» дегани – йўл экан. Уларнинг назарида, буларнинг, шу – осмон, сув, йўл ёки тоғнинг ҳам тангриси бўларкан.

Балки шуларнинг ўзини – тангри деб ўйлашар? Аниқ айттолмайман, тарихни яхши билмайман.

Лекин шу ишларни қилаётганида болалар ҳаяжонга тушиб, у қараган томонга ялт этиб қарашар, қиёфаларидан қандайдир илоҳиётга бўлган ҳурмат-эҳтиромлари шундоққина билиниб турарди.

Тўғриси, мени ҳам қандайдир ҳаяжон чулғаб олганди.

Киши, ниҳоят, пиёлага яна қўйиб, менга тутди.

– Кечирасиз, мен ичмайман, – дедим. – Раҳмат, ўзингиз олаверинг.

У ўйчан бош ирғаб:

– Так, значит... мен сизлара кўнак бўлам? – деди.

– Э, яшайсиз! – дедим мен. – Бир умр яшайсиз! Кечирасиз, бола-чаقا борми?

У бирдан бошини эгди.

– Пала йок, хатун йок, – деб ғўлдиради-да, инқилаб юборди. – Йўрт йок!

Ҳозироқ айтсан тузук: у кишининг хотиниям, қизиям бор экан. Аниқроғи, бўлган экан. Хотинининг исми – Тарлоон, қизининг оти – Сирғ(ғ)а экан.

Ўзи... Олтой муаллимлар тайёрлов институтида – дорилмуаллиминда ўқитувчи, халқ оғзаки ижодидан дарс бераркан. Олтмишинчи йилларнинг бошида, умуман, Олтой ўлкасида ерли халқ мактабларидаям дарслар ўрис тилига кўчирилади ва Умрзоқ ака (у кишининг исмлари шундай) Московга арзномалар ёза бошлайди. Жавоб келавермагач, аламини «арақи»дан олишга тушади. Шундай кунларнинг бирида битта ўрис йигит билан айтишиб қолиб қамалади. Иши судга оширилгач, унга ғалати айблар қўйилади: «Миллатчи... Некомпетентний... хулиган» ва ҳоказо.

Нима дейсизки, домла ўн йилга кесилади. Қамоқдан чиққач, табиий, уни ишга қабул қилмайдилар. Ва энг ёмони... уйига – ўз уйига ҳам «прописка» бўла олмайди: буниям тақиқлаб қўйишган бўладилар...

Хотини Тарлоон ва қизи Сирғ(ғ)а билан хўшлашиб, шаҳар четидаги маҳаллада (квартирада, аникроғи, («кўй»да) фаррошлиқ қила бошлайди.

Бу вақтда, энди, у одамгарчиликдан чиққан бўлади: мақсад – кун ўтказиш ва кўнгил яраларига «арақи»дан малҳам қўйиш, аникроғи, бу дунёни унутиш...

Бироқ, у бир нарсага содик қоладики, уни кейинроқ айтаман.

Шундай қилиб, унинг «Пала йок, йўрт йок» деганидан кейин мен:

– Э, бизнинг юрт ҳам сизнинг юртингиз-ку! – дедим. – Борайлик, бола-чақаям бўлади, уй-жой ҳам!

У бир нафас анграйиб қолди-да, кейин менга қўл узатди.

– Умрзак Иван Иванович.

– Йўлчибой, – деб унинг қўлини олдим... Ким билади, тилимга шу ном келди-да. Кейин сўрадим: – Нимага «Иван Иванович?» Ота-боболарингизни ўрисга яқинлиги борми?

– Ай! – деб қўл силтади у. – Йок. Биз – шаман, кам...

Алтай. Турк... Но бизим кијилар аз... Всего шестьдесят тисяча остались! Ў-ў! И то они ўрус тилинда сўзлаят... Биз йок оламиз. Мы вымирающий народ...

Мен бу томонларини билмас эдим. Кўнглим бузилиб:

– Ўйқ, – дедим. – Сиз ўлмайсиз! Бизнинг юрт – сизнинг-да юртингиз!

Умрзоқ ака ғамгин жилмайиб, шишани кўтарди, тағин оғзидан бир-икки қултум ичди. Сўнг менга синовчан тикилиб қолиб, қутиларда қўзларини лўқ қилиб ўтирган болакайларга бир нима деганди, улардан бири менга қараб:

– Ачу, ачу, не ачу? – деди.

Ғира-шира тушундим: бизнинг ўлкада «аччиқ» сўзи шевада албатта: «Ачув» деб талаффуз қилинади. Шуни аниқлаштириб олмоқчийдим, Умрзоқ ака ўзи англатди:

– Что горько в жизни?

Мен елка қисдим. Болалар бўлса қувонишиб-кулишиб:

– Ў(о)лум, ўлум, ўлум, – дейишди.

Шунда менга топишмоқ берганини фаҳмладим-да:

– Биздаям топишмоқ айтишади, – дедим. – Топишмоқ кўп. Борсангиз эшитасиз.

Умрзоқ ака бу гапидан қаноатланиб ва чамаси илҳомланиб, болаларга тағин бир нималар деганди, улардан яна бири чулдиради:

– Эртен тура – тўрт бутту, туште – эки бутту, энгирде – уч бутту. Бу не, тап?

Этларим жимирилашиб кетди.

– «Бут» – оёқми? – деб сўрадим.

– О, да! – деб хитоб қилди ертўла соҳиби.

– Одам, – дедим.

Болалар «одам» сўзини тушунмади, Умрзоқ ака эса:

– Тапту! – деди. – Ҳи-я, кижи, кижи.

Илгариям эшитиб юрардим-у, бу ерда яна ишондимки, олтойликлар тилида араб, форс сўзлари жуда-жуда оз экан. Ислом у ерларга етмаган, тожик билан алоқаси йўқ. Биласиз-ку?.. Сўнгра улар «япти», «ётири» деган қўшимчаларният қўллашмас экан.

Ана шунда мен Умрзоқ акадан бир амаллаб сўрадим:

– Нега менга топишмоқ айтяпсиз? Ёш бола бўлмасам... Тушунолмадим?

Умрзоқ ака менинг саволимга жавобан бутун бошли бир маъруза ўқиди.

Унинг айтишича, топишмоқ, яъни, «табышкак» – Олтой халқ оғзаки ижодининг «калити» экан. Чунки топишмоқларда Олтой элининг, яъни, қадимдан то яқин-яқинларгача овчилик ва чорвачилик билан шуғуланиб келган элнинг энг ибтидоий – «яширин тили» тўла-тўқис акс этаркан. Илло, олтойликлар атроф-муҳит – ўрмон, сув, ҳайвонлар ва паррандаларнинг шубҳасиз Руҳи бор, лекин Руҳлар кўзга кўринмайди, уларни сира-сира ғазаблантирмаслик керак. Руҳлар ранжиса – халқ оч қолади, яъни, ов барор олмайди, рўзғордан – «ўчоқ»дан файз-барака кўтарилади деб ишонишар экан. Ана шунинг учун улар қадим-қадимдан табиат бобида «эзоп тили»га ўхшаш – яширин лаҳҗада гапиришиб келишар экан, бунинг маъноси шулки, биронта жониворниям асл номи билан аташмас экан... Масалан, «илон-йилон»ни – «қамчи, қайиш», «бўри-бору»ни – «кўк ит, узун қуйрук», дейишаркан.

Умрзоқ ака шундай мисолларни айтар экан, менинг юрагим гурс-гурс уриб, жуда тўлқинланиб кетдим: ҳе, ёшлигимизни эслайман.

«Бўри»ни – «жондор» деб аташарди бизда. «Илон» – «арғамчи», «айик»ни – «полвон»...

Айниқса, тунлари булардан бирининг ҳам номи тилга олинмас эди.

Топишмоқларнинг, умуман, топишмоқ айтиш ва топишнинг бошқа буюқ ҳикматлариям айтилди: жумладан, топишмоқни топиш – нақ зукколик, донолик белгиси саналажаги, айрим ҳолларда, дейлик, қонли жангларнинг ҳам олди олинажаги. Эсланг-е, бор-ку, яна: пошшо учта топишмоқ айтитти. Ким топса, ўшанга қизини берармиш... Ёки бўлмасам...

Эсладим: кўёвларнинг ҳам ақл-фаросатини шу тариқа синовдан ўтказишаркан...

Дарвоқе, Олтойда яқингача келинлар куёвдан тортиб, унинг қариндош-урұғларигача – бирини ҳам номи билан чақирмас экан...

Вой, улар билан ўзимизнинг орамизда қандай яқинлик-қариндошлик бор-а!

Туркий деганлариям шудир.

Хуллас, Умрзоқ аканинг маърузасидан кейин шундай фикрга келдим: бу одамнинг менга топишмоқ бердиришдан муроди – мени синаб кўриш, пироварди, ўзимиз томонни оз бўлса-да билиш экан. Шундан сўнг ўзим ҳам унга олтойликлар табишкаги билан балки ўйғун келадиган ўзбек топишмоқларидан ҳам айтдим.

Оқибат, у киши:

– Мен борам, – деб винодан тағин ҳўплади-да, ғилтиллаган кўзларини менга тикиди. – Сизда кок кол бар по?

Кўз олдимга қишлоқ устидаги тепалик, унинг ортидаги – ҳалиги кўл келди.

– Бор, бор! – деб юбордим. – А, нимайди?

– Очунда уч кол бар! – деди кўзлари қандайдир жовдираб. – Оқ кол, Қора кол, Кўк кол... Тоес: тенгис, тенгис. Понял? Белое море, Черное море, Синее море.

Қаердадир ўқиганимни эслаб қолдим: қадимда Орол денгизини – Кўк денгиз ёки Кўк кўл деб аташган... Шунчалар зилол бўлган у!

– Рост айтасиз, оға, – дедим. – Ўша Кўк денгиз ҳам биз томонда.

У болаларга шодон чулдираб бир нималарни тушунтириди. Сўнг:

– Кок кол-да учта! – деб хитоб қилди. – Бири бизда олган... – Умрзоқ aka тағин ғамгин тортиб қолди. – Ул талай, талай, – деди. – Талай-да – кол, тенгис... Ондаги ўртоликде, тоес в острове жил один шаман. Старий-старий! Сууда балық коп ўлган. Улус, курсак тўк... Народ жил хорошо! Кетин ўрус... ну, Алтай албати Россияга кирген тужунда... Ну, когда Россия завоевал нашу родину, шаман видит сон. Сон это – кижининг уйқудаги ўйи... Он видит, что в озере не осталось балык. Осталось! Но очень мало и им нечего есть.

– Хўш? – дедим.

– Сонра ул шаман ўзини сууге берген.

– Тушида?

– Да, во сне! Уйқуда... Потом он ушёл от этих мест! В Улусай! И действительно сейчас Кўк кол мёртв. Балық аз. Шаман йок. Бу улусчун олум...

Мен унинг фожиасини, ҳалқининг фожиасини тушундим-да, кўнглини кўтаргим келди.

Бироқ қандай қилиб?

Қангзасини тутатиб, бир муддат ўйланиб қолган Умрзоқ aka бирдан:

– Нукерларим! – деб, кўзлари ола-кула бўлиб турган болаларга қаради. – Мен кетяят... Озбекистана! – Кейинги гапларидан англадимки, «У ёқда Кўк кўл бор! У ўлкада – ўз юртимиз! Мен у кўлнинг бўйида шаман бўлиб яшайман!..» деди.

Шунда болалар тағин чулдирашиб қолишли. Биттаси кўзига ёш ҳам олди.

Бу орада ертўлага тағин бир бола – чамамда, боя мени кўриб қочиб кетган бола тушиб келди. Қўлтиғида бир шиша «Чашма» бор экан, Умрзоқ акага берди.

Сўнгра болалар уни ўзларининг ҳаяжонли гап-сўзларига тортишди.

Умрзоқ ака эса, энди бу шишани очиб ва оз-оздан ютиб, мени ҳайрон қолдирган баъзи бир саволларга жавоб берди: анави боланинг мендан қочишига сабаб – мени ҳалигидай маҳкаманинг одами деб ўйлаган экан...

Қолаверса, бу ердаги бошқа болакайлар ҳам, ҳатто Умрзоқ аканинг ўзиям мени «ўшанақа» деб ўйлапти олдин. Умуман, бунинг ҳайрон қоладиган жойи йўқ. Қандайдир бир исқирип, пиёниста, қамоқдан чиққан кимса яшайдиган сассиқ ертўлага ким ҳам ўз фарзандининг кириб, ўша сондан чиққан, демак, ишонч-сиз-хавфли одам билан ўтириши, унинг маза-бемаза гапларини эшлишига қараб туради?

Бунинг устига, ўша кимса миршаблар ҳисобида туришини маҳалла-кўйдаги ота-оналар яхши билишса: ахир, улар Умрзоқ акага фаррошлиги ва қоровуллиги учун ойига бир сўмдан йифиб беришаркан. Демак, уларнинг баъзилари «шундоқ-шундоқ иш» бўлаётганидан кўйдаги соқчибошисини огоҳ қилган бўлиши керак.

Мен «бўлиши керак» дедим. Аслида, бўлган экан: ҳа, айрим ота-оналар ҳатто болаларини излаб, бадбўй ертўлага ҳам тушишган ва фаррошга яхшигина танбех бериб ҳам чиқишган экан.

На иложки, болалар Умрзоқ аканинг гурунгига ўрганиб қолишган экан.

Энди, «гурунг» – Умрзоқ аканинг «маза-бемаза» гапларига келсак, у гаплар болаларга айтиладиган қадим Олтой ривоятлари, эртаклари ва... топишмоқлари бўлиб, хусусан, топишмоқ биринчи ўринда экан.

Мен пастроқ пардада айтдим бу гапни. Аслида, бу машғулот – ёшларга олис тарихдан сўзлаб бериш, юртга, элга боғлиқ томирларини мустаҳкамлаш, бу

нарсани ўйин-айтишувлар орқали-да сингдириш со-биқ олимнинг умр ғояси экан десам бўлади.

Шуниси ҳам борки, менинг назаримда, Умрзоқ ака-нинг ўзиям ўша олис-топталган ўтмиш билан яшарди: бугунги кун ҳақида бирон-бир мулоҳазасини эшитма-дим...

Рухсат этсангиз, шу ўринда мен бир мулоҳаза айт-сам: Умрзоқ ака мен билан жўнади – қангзаси, муқова-ланган қандайдир қўлёзмаси (унингча, бичик), битта чўлтоқ қалами (карандаш-қара таш), беш тийинлик уч кути тамаки ва игна (ийне), ип ҳамда бир-икки ҳовуч кедр ёнғоғи (мёштинг тобогоси) солинган халтасини (қапини) кўтариб жиларкан, «нукерларим, нукерла-рим», дея кўзи ёшланганини кўриб: «Демак, бу одам-ни ҳалиги машғулотидан ҳам кўпроқ ўзига тортди-да биз томон, – деб ўйладим. – У Кўк қўлмикан?» Ундан десам, бу машғулот унинг умр ғоясидай эди.

Балки бизда ҳам ўз қондошларининг яшashi қи-зиқтиргандир? Балки, балки у айтмиш... «кварти-ра – ўчак» ва одамлар ҳисобига кириб, одамга ўхшаб яшаш...

Хуллас, вокзалга жўнадик.

Поездда Умрзоқ аканинг қилган хархашаларини айтиб ўтирамайман.

Шиша... унга гўдакнинг сўрғичидай бўп қолган экан.

Вино сассиқ, тамакининг бадбўй ҳидигаям тоқатим йўқ... «Жиндак ичманг, дам олинг» десам, қовоғини со-либ қолади. Бир гал қаттиқ маст бўлганда: «Алтайга ке-тем!» деб туриб олди. Ялинаман-алдайман. Мени тағин хижолат қилгани – бир-икки марта йўлакка чиқариб қўйилган бўш шишаларни териб юргани бўлди.

Бир амаллаб туманимиз марказига етказиб кел-дим. Поезддан тушибоқ кийимлар дўконига опкир-дим. Ўзи танлаган костюм-шим, пойабзal харид қил-

дим. Арзимаган нарсалар... Соқолини олдириб, газакхонадан ярим стакан ичирдим-да, бир таксини ёллаб «Дружба»га ҳайдатдим.

У кишининг кайфи чоғ, йўл четида пахта тераётганларга ғуурур билан қарап:

– Ў-ў, белое золото! – деб қўярди. Кейин пахта ҳақида гап кетди: унинг меҳнати оғирлиги – экиш, бегона ўтлардан тозалаш ва ҳоказолар ҳақида сўзлаётгандим, у қизиқ бир гапни айтиб қолди. Маъноси шуки, Олтойда «бегона ўт»ларни «ернинг ўлон»лари дейишаркан. «Ёввойи ҳайвонлар»ни ҳам – «ердинг (ерлик) тътдулар», уй ҳайвонларини эса «асранда» деб аташар экан.

Менимча, улар ҳақ.

Умрзоқ ака соқол олдираётгандадаёқ мен «Дружба»-га қўнғироқ қилиб, «қирқинчи вакил»ни олиб бораётганимни ва Иван Ивановичнинг феъл-аворидан тортиб касб-коригача сал-пал ахборот бергандим. Директор хурсанд бўлиб, томорқали уйлар тушаётган янги маҳаллага опкелишни айтган эди.

Тўғри ўша жойга бордик.

...Шу ўзбекларимиз қизиқ-да: ўзи емай меҳмонга тутади, деганиям рост. Уйида аза бўлсаям меҳмонга билдирамайди, деган гапдаям жон бор.

Ўзингиздан қолар гап йўқ, уй-жой масаласи тупканинг тубидаги қишлоқдаям муаммо...

Меҳмонлар эса тайёр уйларга бепўшт-пўшт...

Тўғри, ўша вақтларда шундоқ эди, яъни, уйидан ҳайдаб чиқарсанг ҳам, «раҳмат» дейишга мажбур эди.

Хуллас, борсак... эҳ-ҳе, яқинда пардоздан чиққан уч хонали алоҳида иморат қошида талай одам. Болалар ҳам бор (Ҳалигидай ўн бир-ўн икки яшар болалар). Ҳамманинг лабида кулги. Фақат карнай-сурнай этишмайди...

Уф, уялиб кетасан киши.

Директор бизга пешвоз чиқди. Тантана билан машинадан тушдик. Кейин жиндак йифгин бўлди.

Директор – мени Олтойга юбораётганда ўшандоқ гапларни мажруҳлик билан айтган одам:

– Дўстлар! Мана, бу киши ҳақиқий Олтой фарзанди Иван Иванович Умрзоқ aka бўладилар! – деб гўёки терисига сифмай шодумонлик билан сўз бошлади. – Элга эл қўшилса, бойлик дейдилар: бизнинг бойлигимиз – дўстликда! Умрзоқ aka, хуш келибсиз! Мана, шу уй сизники!..

Ва ҳоказо...

Шуни айтишим керакки, бу «иш»лар комедия эканини шу ердаги ҳар бир одам билиб турарди. Лекин буни билдиришмас, мийғларидағи истеҳзоли табасум ҳам самимият никоби остида эди. Тағин уларнинг қарсак чалиб юборганлари...

Одам сийраклашгач, уйга кириб, хоналарни кўздан кечирдик: жиҳозлариям бинойи.

Ошхонада – икки оташхонали газ-плита ёнида бир кути сабзи, пиёз, картошка, карам ҳам бор экан. Умрзоқ aka гангид-гарангсиб қайтиб чиқаркан:

– О, маркоп, картоп, капуста! – деди. Сўнгра бизга қараб тушунтирди: Олтойга ўрислар билан бирга кириб келган емакми, нарса-предметми борки, улар ўз номи билан аталаркан. Масалан, «соат»ниям – «час», «жухарини»ям – «кукуруза» дейишаркан... Шу кути бошида унинг нима иш қилажагиям тайин бўлди.

Умрзоқ aka кути ёнида ётган янги супургига тикилиб қолди-да, бирдан уни олиб:

– Сибирги, сибирги! – деди қадрдонини топгандек. Кейин директорга муддаосини айтди: – Я буду сторожом! Каравул... – Кейин тахтаполни супургандек қилиб, қаддини кўтарди-да, энди директор бобони сина-моқчидек: – Юз қўйди пир чивикла кажирдим. Бу не, тап? – деди. Сўнг топишмоғини ўрисчага ағдарди.

Директор хўрсинди.

– Шу қишлоқни бердим, ўзинг айт.

Умрзоқ ака бу гапни эшитиб, шундай роҳатланиб кулдики, охири кўксовдек йўталиб қолди. Сўнгра Олтойда ҳам топишмоқни тополмаган киши «шаҳар бериши»ни ёхуд кулгили бир лақаб билан аталишга рози бўлишини айтди. Сўнг супургини салмоқлаб, тепага кўтарди.

– Сибирги!

Биз тушундик.

Иморатнинг атрофида талай қари дарахтлар бор, тақир ерда уларнинг япроқлари тўшалиб ётар, теварак ҳали бирон тўсиқ билан ўраб олинмаган эди.

Хув узоқ-яқындаги айрим уйларга одамлар кўчиб киришган, табиий, ўзларининг уйлари олдини супуриб-сидиришар, демоқчиманки, бу янги маҳаллада фаррош учун иш йўқ ҳисоби эди: чунки хонадон эгалари асосан ўзбеклар ва тожиклар эдики, ўзингиз биласиз, супуриш-сидириш уларнинг келинларидан ҳам ортмайди.

Шу боисдан, директор кетаётганида шу тўғрида гап очгандим, у киши бу масалани биз келгунча ҳал этиб кўйгандай тупроқ йўл туташган асфалът кўчанинг нариги бетидаги беш қаватли иморатларни кўрсатди.

– Тушундим, – дедим.

Кейин директор Умрзоқ ака билан хўшлашди.

– Ҳозирча хайр, ўртоқ Иван Иванович... Бизнинг идора ҳув жилғанинг бўйида. Томига қаранг, қизил байроғи бор. Агар бирон гап чиқиб қолса, марҳамат!

– Кейин қулиб, меҳмоннинг қўлини сиқди... – Биз сизни уйлантириш масаласиниям ўйлаб кўрамиз... Хўш, нима бўлсаям ўзимиздан, ҳим, қавмларимиз юртидан келгансиз... Лекин энди Ўзбекистон ҳам сизнинг юртингиз бўлди. Ҳа-ҳа, яшасин дружба! Ҳинди русу бхай-бхай...

Кейин менга қишлоқнинг у ёқ-бу ёғини кўрсатишни, ичкилик зарил бўлса «Ҳабиб бупитчи»га айтиб қўйганини тайинлаб:

– Пахта теримига ҳуши бўлса, унгаям хўп, – деди.

Мен Умрзоқ акани эргаштириб, ўша иморатлар томонга бошладим. Уч-тўртта болакай нари-берида туришган эди, улар ҳам изимиздан тушди. Кўнглимдан ҳар хил ўй ўтади денг: болаларни чакириб, топишмоқ айтсамми? Уни қувонтирган «белое золото»ни териш, о, ярим соатда уни белдан қолдиришини тушунтирамсамми?

Шунда Умрзоқ aka бирдан тўхтаб, бетон ариқقا энгашди. Ариқнинг ифлос сувидан ҳўл бир каламуш чиқиб қочди. Шунга энгашдими десам, у бўйни чиқиб турган бир шишани оляпти. Шартта қўлидан тортдим.

– Қўйинг уни! Бўлди энди... Бу ер сизга Барнаул эмас! Айтдим-ку, бу ерда ароқ ҳам текин!

У дам хўрсиниб, дам тамшаниб, бироз жим-паришон юрди-да, тағин бирдан тўхтаб, йўл четини кўрсатди.

– Ура! Ура!

Ҳайрон бўлдим: «Нимага «ура!» деяпти?» Эътибор қиласам, битта иморатнинг ертўласига ишора қиляпти.

– Ҳа, подвал эсга тушдими?

– Аа-да! – деди у кўзлари ўйнаб. – Ура у.

– Э-э, ўра... йўқ, – дедим. – Сизнинг ўйингиз бор, Умрзоқ оға. Ўчақ бор... Энди бошқача яшайсиз. Тушуняпсизми? Одамга ўхшаб...

У киши худди ароғини олиб қўйганимдек қовоғини солиб олди. Сўнг атрофга боқиб чуқур хўрсинди-да, болаларга кўзи тушиб, бирдан тиржайди.

– Кел, кел, – деди уларни имлаб. Ва бемалол чўнқайиб, тағин ертўлани қўли билан кўрсатди. Болалар ҳам югуришиб келиб, ертўлада бир нарса бордек тикилишди. Сўнг Умрзоқ aka менга жилмайиб қўйиб: – Кўлонқози йок қара ат. Бу не, тап? – деди. Кейин болаларга бир-бир кўз тикиб, ўрнидан турди.

– Рассом амаки, бу қозоқ нима деялти? – деб сўра-ди болалардан бири.

– Топишмоқ айтди, – дедим. – Кўланкаси йўқ қора от. Нима? Топинглар!

– Вей, шунаقا от ҳам бўладими?

Бўғинларим бўшашиб кетди: билардим, бизнинг ҳозирги болалар бунақа топишмоқ-мопишмоқларга қизиқишишмайди... Нимага, ака? Бунга эҳтиёж сезишмайдими? Ёки муаллимлар, мактаб... Ҳа-ҳа, биз табиатдан узоқлашиб кетганимиз... Лекин Барнаулдаги болакайлар билишади-ку? Ҳолбуки, улар ҳам она табиатларидан... Ана бу гапингиз маъқул, Умрзоқ ака-дай...

Топишмоқнинг жавобини... мен ҳам билмасдим. Ана, раҳмат. Сиз ҳам билмайсиз.

Умрзоқ ака ниҳоят:

– Ўра, о-ора, – деди. – Ертола... – Кейин менга таъна назари билан боқди.

Ҳабибнинг «бупити» бу иморатларнинг адoғида эди. Бизни кўрибоқ пештахта олдига чиқди. Бир қўлини ортидан олмай, бирини кўксига босиб салом берди. Кейин:

– Дод! – деб хитоб қилди. – Приезжайте к нам в Узбекистан! – Сўнг анави қўлида бир шиша «Русская водка» бор экан, Умрзоқ акага дангал узатди. – Прошу, не откажи, атес! Яна нима хизмат бор, рассом ака?

Умрзоқ ака кўзларига ишонмагандек бирпас тек қотди-да, кейин Ҳабибга иршайиб:

– Уни яраш ул, не, тап? – деди.

Ҳабиб менга қошини учирди.

– Топишмоқ айтди. Ичи тўлиб кетган топишмоқ-қа, – дедим. Кейин Умрзоқ акадан «табишкакти» ўрисчага ағдариб айтишини сўрадим. У ҳозиржавоблик қилди:

– С прекрасным голосом юноша-красавец!

Олтойликнинг ҳавосини ола бошлаган эдим.

– Уни... яъни, товуши ярашган... ўзига ярашган ул, яъни ўғил, – деб шарҳладим.

Шунда Умрзоқ ака шишани кўрсатди.

– Бу не?

– Арак, – деди Ҳабиб.

– Шу.

Ҳабиб кулиб юборди.

– Ў-ў, алкаш!

Мен толиқкан эдим. Йўлдангина эмас, шу одам билан мулоқотдан ҳам: дам ғашинг келади, дам раҳминг. Ҳурмат ҳам қиласан, силтаб кетгинг ҳам келади. Бундан ташқари, менинг ишларим ўлда-жўлда қолиб кетган эди: тирикчилик...

Умрзоқ акани уйига киритдим-да, хайрлашдим. Тез-тез келиб туришимни айтдим, у фаррошлиқ қила-диган жойни эслатдим, жуда зарил бўлиб қолсам, директордан сўрайсиз, дедим.

Буюртмалар ҳам қўпайиб қолган экан. Байрам яқин. Кўп шиорлар қайтадан ёзилиши керак.

Хуллас, орадан ўн кунлар ўтди. Қўшни қишлоқда эдим, почтага чақириб қолишибди. Телефонга. Дастакни олсам – директор:

– Ҳе, ука, бу меҳмонингиз ҳеч ўхшамаяпти. Бу бош-қачаси экан. Одам хижолат бўляпти... – деди.

Мен гап нимадалигини ўзимча тахмин қилдим. Ва ҳақиқатан шундай бўлиб чиқди: уйига келсам, эшик берк, калит тутқичига боғлаб қўйилган. Ҳалиги имо-ратлар орасидан ҳар ёққа... ертўлаларга-да... ҳа, кечаси... подвалларга кўз солиб боравердим. «Ўра» деганимга етганда тўхтаб, зинапоя бошига бордим. Шушу: пастдан чироқ шуъласи кўринди.

Директор бекорга шу ерларни супуриб-сидириб юрсин демаганди. Айниқса, ўрис биродарлар яшайдиган уйларнинг атрофига қараб бўлмайди. Билмадим, боғ-роғ, экин-тикинга қизиқмайдими булар... Хуллас,

бу ертўланинг олдида Барнаулдаги «ўра»нинг «ўлса ўлиги» ортиқ эди.

Шам тополмаганми – пахта мойли шишанинг оғзи-ни лойлаб, пилик эшиб солинган: милтиллаб ёнепти. Ҳар хил қутиларни бир-бирига тақаб кўйиб, ётса бўла-диган кат ясади. Кат устида эшакка жул бўлмайди-ган бир тўшак. Ўтирипти Умрзоқ ака. Соқоли яна ўсиб кетган. Эгнида... Ўша исқирт пахталик. Кўлида қангза-си, бутлари орасида бир шиша «Чашма».

Мени кўриб Умрзоқ аканинг кичкина кўзлари кат-тариб кетди. Ҳассасини олмаёқ ликонглаб қолди... Са-сиб-бижиб кетган, қандайдир шишган.

Кучоқлаб ўпмоқчи бўлаётганди, бир амаллаб жо-йига ўтқаздим. Ўзим ҳам бир қутини опкўйиб ўтиридим.

– Хўш, Олтойга қайтасизми? – деб сўрадим дабду-рустдан.

Унинг кўзлари ялтиллаб кетди-ю:

– О-о, йок... Кўк колга опор, – деди. – Сен яхши кижи. Директор-да яхши кижи...

– Болалар-чи? – дедим. – Кеп туришадими?

У чуқур хўрсиниб:

– Олар табишкак билмаят... Оларди атази, энези кўймаят... Я не могу жить. Вот всё! – деди. – Покажи мне Кок кўл. Прошу тебя. Здесь никто не знает...

Ҳақиқатан ҳам, ул қадимда Кўк кўл дейилгандир. Лекин бунинг мақсадини билганлар ҳам оборишга эрингандир... Қолаверса, у ерга бориш таъқиқланган: шунинг учун кўлнинг бутун атрофи тиканли симде-вор билан ўраб қўйилган эди.

«Э, мендан нима кетади?»

– Юринг, Умрзоқ ака!

У қопи билан ҳассасини олиб, менга эргашди. Чироқни ўчириб, гугурт чақиб, тепага чиқиб олдик. Ҳаво совиб қолган эди. Тупроқ ўйлга тушиб, кейин кўча-ларни кесиб ўтиб, музейга чиқиб бордик.

Тасаввур қиласизми, бу одам хурсанд эди! Ўз ти-лида бижиллаб бир нималар дер, сўнгра «тенгерим, тенгерим» деб қўярди. Топишмоқ ҳам айтувди, ўзими-ни эшитмаганга олдим. Хафа эдим-да, ака. Дунёнинг бадкорликларидан кўнглим абгор эди: бу одам ўз юртида, ўша... Улусойга кетиб қолган камшаман ҳам ўша Кўк кўлдаги оролда яшаб қолавериши мумкин эди-ку?

Ҳа-ҳа... Бу одамнинг ахир хизмат жойи, уйи-ўчоги, хотини Тарлоон, қизи Сирға...

Кечаси у икки-уч марта туриб сув ичди. Мен бу-к-лама каравотда эдим, у ерда ётган бўлсаям билинди. Хурракниям отар экан. Саҳарлаб яна уйғотди.

– Янгмар яаады!

Ташқарига чиқсан, чиндан ҳам ёмғир савалаяпти.

Умрзоқ aka яна халтасини кўтариб олди: худди бу ерга қайтмайдигандай!

Ҳалиги – кўл суви оқиб чиққан жойга етганимизда яна топишмоқ айтиб қолди-ку:

– Қизиқ элик ятган ердин ўлон чикпас! Тап!.. Ну, там, где лежала красная косуля, трава не растет.

– Не знаю, – дедим.

– Кўк колди бердинг?

– Кўк денгизниям бердим.

У таққа тўхтаб қолди-да, ҳассаси билан халтасини кўтариб бир айланди. Кейин:

– Это же «след от пожара!» – деди. – «Орттинг орни!.. вот, смотри, здесь же был пожар, да?»

– Ҳа, – дедим. – Рост айтасиз... Ўлмасак кўрамиз, бу қишлоқдаям бир куни пожар бўлади.

Симтўсиқнинг майишиб қолган жойидан ўтиб ол-дик. Ўркачга чиққач, этакда кўл кўринди: қоп-қора, ялтирайди, пойабзалга суртадиган қора мойнинг ўзи...

– Мана, Кўккўл!

У турган ерида шилқ этиб ўтириб қолди. Кейин нари-берига думалай бошлади. Сўнгра атрофимда ўрмалаб:

- Чиндик сўзинг по? – деди.
- Чин сўзим, – дедим.

Шунда у бўридай увлаб юборса бўладими! Тахта бўлиб қолдим. Тағин жаврагани:

- Ўлум, ўлум, ўлум...
- Рост, оға.
- Э, тенгерим! – У бошига муштлай бошлади. – Кол йок, йўрт йок, чол йок...

Мениям қўзимга ёш келиб ўтириб олдим. Лекин кўл учун у... мендан юз чандон ортиқ куймоқда эди.

Ана шунда ишондимки, бу одам ҳақиқатан ҳам... аввало, шу кўл учун келган экан, шуни деб таклифимга унаган экан. Демак, уни уй-жой, хотин, ҳатто текин арақ ҳам унчалик тортмаган экан... Балки бу кўл унга истиқбол чироғи бўлиб кўрингандир?

«Чашма»сидан уч-тўрт қултум олгач, бир маҳал ўзига келди. Мен уни чалғитиш учун сўрадим:

- Сизлар олдин ҳам ароқ ичармидинглар?
- О, да! – деди у. – Биянинг судидан арақи қилят... «Арақи» – биизди сўз. Турк сўзи. – Кейин: – Эй, яхши кижи, – дея халтасини кавлаб балдокли пиёласини чиқарди, унга винодан қуийб, менга узатди. – Ал аяқти. Ич. Мен тамада... – Сўнг қувнабгина тушунтириди: – Тамада – тама-ада. Тамаа – тамақ, атдазн – атаси. Тамақ ата – тамада.

Барибир ичолмадим.

У мийигида кулимсираб, тоғ бағридаги завод томонга – оқ-совуқ тутунга боқиб қолди.

- Бу йўрт Озбекистон по?
- Албатта, – дедим.
- Йок, – деди у кулимсирашини қўймай. – Бу йўрт –

Дружба... – Сўнг ҳиқиллаб пичирлай бошлади: – Бизим Олтойда «дружба-дружба» деб йок олду...

– Биз ундей бўлмаймиз, – дедим. – Чунки халқимиз ҳамма нарсани тушуниб турипти.

– Ҳўй нукерим.

Узр, биргина изоҳ: асл олтойлик оддий одамниям «нукер», яъни «навкар» деб атар экан, нега бундайлигини ўйласанг, хаёлинг мозийларга оғади...

Кейин Умрзоқ ака бўшаган шишани Қора кўлга отиб юборди. Шиша «сув»га ботди-ю, қорайиб ёнбошлилаб қолди. Айтмасам бўлмас: бу кўл ҳам жуда сассик, шунинг учунми дейман, устидан қушлар ҳам учиб ўтмас эди.

– Мен Кўк тенгисе кетиям! – Умрзоқ ака туйқус шундай деб ўрнидан турди.

– Ў-ӯ, у денгиз жуда йироқда! – дедим. Кейин қолганиниям айтдим: – У Орол кўли-ку?

У ҳорғин бош иргади.

– Ҳи-я, ҳи-я... Но, Кўк тенгиз – моя мечта! – деб хитоб қилди кейин.

– А, вы знаете её состояние? – сўрадим ундан. – Кўк тенгис қурият. Балик йок.

– Бар! – деди у жаҳл билан. – Кўк тенгис пака тири! Онда орталктар бар... Там буду жить и шаманит, ака Алтайский шаман! Балыктар ач олса, озумни берем!

Мен, ҳар қалай, совхоз директорининг олдидан ўтиш лозимлигини айтдим. Аммо...

...У келмади.

Эртаси эшитсак, Умрзоқ акани «Н» вокзалида кўришибди танишлар. Эгнида «қап»и, ликонглаб юрганмиш. Кейин «Тошкент – Кўнғирот» поездига ўтириб кетибди.

Ўткир ҲОШИМОВ



ЎЗБЕКЛАР

Маҳаллада қайси кампирни уйидан тополмасангиз, тўппа-тўғри Отинойиникига бораверинг! Отинойининг ҳовлиси паст кўчанинг этагида. Уйи ҳам бошқаларникидан ажралиб туради. Иккита деразали пастак уй. Бошқаларнинг деразаси олдида гилос бўлса, Отинойиникида икки туп тут бор. Бошқаларнинг томи тунука бўлса, Отинойининг томи шифер. Ҳамманинг томида телевизор антеннаси бор, Отинойиникида йўқ. Аммо унинг уйи ҳамиша ҳамманикidan гавжум бўлади. Доимо очиқ турадиган пастак дарвозадан киришингиз билан энг аввал димоғингизга гуп этиб район иси урилади. Кейин бир маҳалла хотиннинг гангур-гунгур сухбатини, болаларнинг қий-чувини эшиласиз. Машина сифмайдиган (унга машинанинг нимаям кераги бор) тор йўлакдан ўтиб, қутидеккина шинам ҳовлига кирасиз. Ариқ тортиб экилган районлар белга уради. Ош район, сада район, оқ район, қора район. Ҳовли этагида, эски бостирма олдида бир туп ўрик бор. Довучча тукканидан бошлаб туршак бўлгунча маҳалланинг қора-қура болалари шоҳдан-шохга тармашади. Отинойи ўрикни қизғанганидан эмас, болаларга ачинганидан чирқиллади: «Ҳой, уйингга буғдой тўлгур такалар, туш, йиқилиб кетасан!» «Такалар» парво қилмайди. Биладики, Отинойининг тути

ҳам, ўриги ҳам уларники! Умуман, бу ҳовли ҳамманики. Эрта кўкламда сумалак шу ерда бўлади. Исмалоқ сомса, ялпиз сомса Отинойининг бостирмасидаги тандирда ёпилади. Кейин тут пишади. Кетидан ўрик. Маҳалладаги хотиноши борми, чалларми, бешик тўйи борми, куда чақириқми – ҳаммасининг маслаҳати шу ерда пишади. Қанча нон ёпилади, қанча гуруч дамланиди. Кудаларга «тўққиз-тўққиз»да нималар тортиш керак...

Тўғри, у отинликдан кўра кўпроқ ходимлик қилган. Аммо уни ходим хола эмас, Отинойи дейишади. Қолаверса, ҳозир дастурхончиликни ташлаган. Уч йил бўлди. Кексайиб, кучи етмай қолди. Лекин ҳалиям Отинойи дейишади. Ёзда ўрик тагидаги эски сўри, қишида «чийлампа» сувоқ қилинган пастак шифтли, токчалигига баркашлар, чегаланган қадимий «гардим» лаганлар териб қўйилган уй ҳамиша гавжум бўлади.

Ҳозир ёз. Думбул бўлган ўрик шохida одатдаги-дек қўшни болалар кир майкасининг қўйнига ўрик тўлдирияпти. Биттасини оғзига ташлайди, биттасини қўйнига солади. (Ҳар эҳтимолга қарши.) Отинойи пастак шифтли уйида оғзи очилган эски сандиқ олдида чўккалаб ўтирибди. Уйни куядори ҳиди тутиб кетган. Ўртадаги хонтахта атрофида Йной гарангнинг хотини Баҳри хола, заводда ишлайдиган «гиroy» Аҳмаднинг онаси Муаттар хола, «Келинпошша» ўтиришибди. Отинойи сандиқдан бирма-бир ўлимликлари ни олиб «кўз-кўз» қиляпти.

– Мана бу – кафанлик, – дейди у бежирим қилиб ўралган докани кўрсатиб.

Муаттар хола доканинг бир учини чимчилаб кўради.

– Яхши, мисқоли дока экан.

– Искандарим атайлаб Масковдан обкелган. – Отинойи керилиб қаддини ростлайди. – Мана буни йир-

тишга берасила. – У тағин бир тугунни очади. – Аммо-лекин рўмоллардан сал кўнглим тўлмай турибди. Ҳаммаси бир хил бўлгани яхши. Мана, ўттизтаси кўк, йигирматаси мошранг. Майли, Искандаримга айтаман, обкелиб беради.

– Кўйинг, овсин пошша, ҳали кўп юрасиз, – дейди Баҳри хола минфирилаб. У минфириламасдан гапиролмайди. Димоғи шунақа бечоранинг. Айниқса «п»ни айттолмайди, «м» дейди. Сал фийбатчироқ-ку, аммо яхши хотин, кўнгли бўш. Қўшнининг мушуги туғсаям, «жони оғригандир», деб йиғлайди. У рўмолининг учени мижжасига босиб хўрсинди. – Қараб туринг, ҳали қўша-қўша неваралар кўрасиз, тўйлар қиласиз, овсин мошша! – У «пошша» деганда овози «мошша» бўлиб чиқади.

– Айтганингиз келсин. – Отинойи маъюс жилмаяди. «Ўлимлигини» тартиб билан яна сандиқقا жойлади. – Худо Искандаримгаям қўчкордек ўғиллар берса ажабмас. Кечаям келиб кетди, болам бояқиш.

– Отинойи сандиқни қайтадан титкилайди. – Мана, – дейди икки лўппи ялтироқ қофозли совунни олиб. – Полча деган жойдан мозор босиб келган. Искандарим обкелди.

У совуннинг биттасини Баҳри холага, биттасини Муаттар холага беради.

– Вой, мунчаям яхши! – Муаттар хола «польский» совунни ҳузур қилиб ҳидлайди. Баҳри хола ҳам ҳидлаётганида Муаттар холадан дашном эшигади.

– Ис билмайсиз-ку, ҳидлаб ниманинг фарқига бордингиз...

– Ўғлимни дуо қилинглар, – дейди Отинойи астойдил ялиниб. – Ўзидан кўпайсин, денглар, яхши фарзандлар берсин, денглар.

Боядан бери индамай ўтирган «Келинпошша» жилмаяди.

– Менга-чи, Отинойи? Мозор босиб келган «Полча» совундан менга бермайсизми!

– Сиз совунни нима қиласиз, Келинпошша, ўзингиз ойдайсиз. Ундан кўра бориб чой дамлаб келинг.

«Келинпошша» – Отинойининг девор-дармиён қўшниси. Ўртадан туйнук очиб қўйишган. Эри проводник. Маҳалладаги ёш-яланглар уни Келинойи деб чақиришади. Отинойи учун у «Келинпошша». Яхши жувон, бечора. Саккизта боласи бор. Энг кичкинаси энди йўлга кирди. «Келинпошша» шу кўклам тағин бошқоронғи бўлди: довуччага. Ҳовуч-ҳовуч довучча еб эси кетди бояқиши. Келинпошша «дик» этиб ўрнидан туради. Отинойи кетидан тайинлаб қолади:

– Искандарим обкеган чойдан дамланг, болам. Дутор чалиб турганидан.

«Келинпошша» бир зумда чой дамлаб келади.

– «Полча» совунни тўяна қиласиз, Отинойи, – дейди кулиб. – Ақининг тўйига!

Ақида «Келинпошша»нинг тўнғич қизи. Ҳамшира бўлиб ишлайди. Яқинда узатишмоқчи. Янгийўллик пахта бригадирига фотиҳа қилишган.

– Тўяна сиздан айлансин! – Отинойи ҳам кулимсирайди. – Ақи қизимнинг тўйи бўлади-ю, мен қараб турармидим. Совун нима бўпти, ҳали Искандаримга айтсан, гилам олиб беради.

Искандар – Отинойининг ёлғиз ўғли. Катта жойда ишлайди. Оқ машинада юради. Марказда тўрт хонали уйи бор. Отинойининг айтишича, ваннаси чиннидан эмиш. Искандар яхши бола. Домга олиб кетаман, деб уввало ялинсаям, Отинойи кўнмайди: ҳовлисига ўрганиб қолган. Отинойининг биттаю битта орзуси бор. Шу – Искандарининг ақалли биттагина боласини бағрига босса, оёқ-қўлини bemalol узатиб кетарди.

– Майли, тўй бўлсин, – дейди у негадир хўрсиниб. – Энди... Тирик жон-да, ўргилайлар. Вақти қазоим етса,

болам бечора югургилаб қолмасин, дейман-да, иши оғир, лак-лак одамга хўжайин бўлиш осонми?

* * *

Искандар Ваҳобович «вертушка» гўшагини жойига қўйди-ю, ичидан хўрсиниқ келди. Министр ўринбосари телефонда йигирма минут «қовурди». Юбилей объекти ўлда-жўлда бўлиб ётгани учун Искандар Ваҳобович бошчилик қилаётган трест айбдор эмиш. Искандар Ваҳобович ётифи билан тушунтиromoқчи эди, замминистр, «баҳона изламанг», деб жеркиб берди.

У сирқиллаб кетаётган чаккаларини кафти орасига олиб бир зум кўзларини ярим юмганча стол қиррасига тикилиб ўтириди. «Ҳар куни бир ғалва!»

Эшик ғийқиллаб очилди. Искандар Ваҳобович оstonада турган дўмбоқ котибага «ҳа, тағин нимагап!» дегандек зардали қаради.

– Шаҳар телефонида сўрашяпти, – деди котиба хуркиброқ.

– Ким?

Котиба қуюқ бўялган киприкларини пирпиратди.

– Танишиман, дейди.

«Падарига лаънат танишларниям, нотанишларниям! Қайси бирининг иши тушса, дарров «таниш» бўлиб қолади». У олчаранг телефон гўшагини шахт билан кўтарди.

– Ҳа!

Шу заҳотиёқ шанғиллаган овоз қулоғини тешиб юборай деди.

– Искандармисан?

«Қанақа саводсиз бу! Бақиради, сансирайди!»

– Ким ўзи бу? – деди Искандар Ваҳобович қони қайнаб. Жавоб ўрнига яна савол эшитди.

– Искандармисан?

– Ҳа? Ўзингиз кимсиз?

Гўшак яна шанғиллади:

– Холматман! Қўшнинг...

Искандар Ваҳобович беихтиёр қўшниларини бир-бир эслаб кўрди, Холмат деган қўшниси йўқ. Жинни бўлганми бу одамлар?!

– Қиласиган ишингиз бўлмаса, телефонни жойига қўйинг! – Шундай деб энди гўшакни улоқтирмоқчи эди, бояги овоз яна шанғиллади:

– Отинойимнинг аҳволи оғир!

Искандар Ваҳобович эсанкираб қолди. Ахир Отинои... ўзининг онаси-ку! Бўлди-бўлди! Холмат ака уларнинг девор-дармиён қўшниси. Проводник!

– Нима бўлди?! – деди бирдан юрагига ғулғула тушиб. – Ойимга нима бўлди?

– Аҳволи оғир.

– Шошманг, ҳозир «скорий» чақираман.

– «Скорий»ни нима қиласан? – Холмат ака тағин бақирди: – Ўзинг кел, тезроқ!

Телефон узилиб, «тут-тут-тут» деган қисқа товуш эшитила бошлади. Искандар Ваҳобовичнинг ичидаги бир нима узилиб кетгандек бўлди. Наҳотки онаси...

У югуриб қабулхонага чиқди. Машинка чиқиллатётган котибага буюрди:

– Диля! Тезроқ машина чақиринг! Подъездга!

...Оқ «Волга» гавжум кўчалардан шиддат билан учиб борар, Искандар Ваҳобович орқа ўриндиқда ўтирганча юраги гурсиллаб бир саволни хаёлан қайтарарди. «Наҳотки!»

Машина чорраҳаларда ҳадеб тўхтар, у хаёлига келган даҳшатли ўйни ҳайдашга, «тоблари қочгандир-да», деб ўзини юпатишга уринар, аммо ўша заҳоти бояги шафқатсиз савол яна вужудини тешиб ўтар эди. «Наҳотки!»

Машина чойхўрлар чақчақлашиб ўтирган гузар олдидан ўтаётганида у бир қадар таскин топгандек бўлди. «Хайрият, тинчлик экан». У билади. Худо кўрсатмасин, бирон кор-ҳол бўлса, чойхонада одам қолармиди? Аммо машина паст кўчага кириши биланоқ юраги музлаб кетди. Ана, ўша шифер томли пастак уй, ана икки туп тут, ранги унниқиб кетган тахта дарвоза. Дарвоза олдида беш-олти эркак тўдалашиб туришибди. Аллақандай аёл тут тагини супуряпти.

«Наҳотки!» Бу савол унинг миясига сўнгги бор чақмоқдай урилди-ю, мажолсиз оёқларини аранг судраб, машинадан тушди. Шу ондаёқ Холмат ака югуриб келиб, уни қучоқлади.

– Онамиздан айрилиб қолдик-ку, укам! – У Искандар Ваҳобовични бағрига босганча бирдан ўкраб йиғлаб юборди. – Айрилиб қолдик!

Искандар Ваҳобовичнинг кўз ўнги қоронғилашиб кетди. У караҳт бўлиб қолган, Холмат аканинг елкаси муттасил силкинаётганини, мўйлови ўзининг юзига тегиб ғашини келтираётганини сезиб турар, аммо бошқа нарсани идрок этолмас, хаёлида фақат бир фикр чарх уради. «Ойим!» «Ойим!» У амаллаб Холмат аканинг қучоғидан чиқди-да, гандираклагудек бўлиб уй томон йўналди. Дарвоза олдида турган кишилар негадир унга тик қарамас, бири бошини хам қилиб турар, бири юзини ўғирганга ўхшарди. Бироқ ҳозир у бунга эътибор берадиган аҳволда эмасди.

Чайқалиб-чайқалиб ғиштин зиналардан чиқди-ю, салқин даҳлиздан ўтиб, уйга отилиб кирди. Қандайдир аёллар (Искандар қарамади) унга йўл бўшатишиди.

Искандар ялтироқ қуббалари занглаб кетган сим каравотда ётган онасини кўрди. Устига оқ чойшаб ёпиб қўйилган. Онаси қандайдир осойишта ётар, худди ухлаётганга ўхшарди. Искандар ҳозир «Ойи!» деб чақирса, уйғониб кетадигандек.

У шундай қилди. Каравот олдига, наматга тиз чўк-канча илтижо қилди:

- Ойи! Ойи-и!

Йўқ, онаси қўзини очмади. Шунда у чойшабни очиб ташлади-ю, онасининг қўлини, йиллар заҳматидан бармоқлари қингир-қийшиқ бўлиб кетган қўлини чанглалаб ўпди. Қизиқ, онасининг қўли муздек эди!

- Ойи! Ойижо-он! – деди ҳайқириб. Кейинги сўзлар бўғзидан йиғи аралаш отилиб чиқди. – Ойи-и!

У кўз ёшларидан хўл бўлиб кетган лаблари билан онасининг қўлларини ўпа бошлади. Кейин нима учундир икки қўллаб намат тўшалган ерни муштлади.

- Нега! Ойи, айтинг, нега?

У эсдан оғиб қолганга ўхшар, ҳадеб ерни муштлар, аммо бу хитоб онасига қаратилганми, ўзигами, ақли етмас эди. У чўккалаган кўйи тағин онасининг қўлларига ёпишди. Муздек, дағал қўлни юзига босиб, ўкраб юборди.

...Бу қўллар унинг бошини силаган, кўп силаган. Кўнгли ўксиганида, бетоб бўлганида, илк бор мактабга борганида, мактабни олтин медаль билан битирганида... Институтга кирганида, битирганида... Ниҳоят... уйланганида... Бу қўллар унинг бошини кўп силаган. Ўзи-чи, ўзи онасининг бошини силаганми? Бирон марта, ақалли бирон марта силаганми?!

Юрагининг туб-тубидан отилиб чиқсан бу савол аъзойи баданини ўртаб юборди.

- Ойи-и-и-и! – деди инграб.

Бу қўллар уни йўргаклаган, унга кўкрак тутган, шамоллаганида баданига кўй ёғи сурган. Бу қўллар сигир соққан, таппи қилган, кир ювган, овқат пиширган, нон ёпган...

Нон! Онасининг назарида нондан табаррук нарса йўқ эди. Қўни-қўшниларнинг гўдак боласи йўлга кирса оёғи орасидан кулча юмалатиб, бошқа болаларга

обқочтирарди. Никоҳ түйидан аввал икки ёшнинг пок турмушидан нишона бўлсин деб нон ушатарди. Бостирмадаги тандирда кунора нон ёпарди. Зоғорами, арпа нонми, ишқилиб, нон-да! Тандир ёнида ўралашиб юрган Искандарга энг аввал пишган нонни юзига сув сепиб узиб берарди...

У ёш тўла кўзлари билан беихтиёр каравот устига, шифт томонга тикилди. Ана, ана ўша нон! «Чийлампа» қилиб сувалган шифт остида, девордаги михга илиғлиқ турибди. Бир чети тишланган. Ана, ўша тиш излари. Бу – дадаси тишлаган нон. Қип-қизил...

У онасининг нонни арта-арта жойига илиб қўйганини кўрган. Михдан ҳадеб олиб қўйилавергани учун тешиги кенгайиб кетган. Аммо нон ҳамон турибди. Моғор босмаган, қип-қизил...

Бир маҳал у кимдир оҳиста туртганини идрок этиб, елкаси оша бурилиб қаради. Таниди: Баҳри хола. Кўк рўмол танғиб, кўк кўйлак кийиб олибди. Йиғлайвериб, шишиб кетибди.

– Бандалик-да, болам, – деди у минғирлаб. – Оллонинг иродаси, жон болам! Ювғувчи келди... – Шундай деди-ю, ҳиқиллаб йиғлаганча кўк рўмолини юзига босди.

Искандар чиқиб кетиши кераклигини тушунди. Остонага борганида тўхтаб қолди. Онасига термилди. Онаси қуббалари занглаб кетган сим каравотда ётар, гўё ухлаётгандек, ҳозир ўрнидан туриб, уни бағрига босадигандек, икки кафти билан икки юзидан ушлаб, пешонасидан ўпадигандек эди. У доим шундай қиларди. Шу уйда, шу каравотда онаси уни бағрига босиб ухлатган. Эрталаб пешонасини силаб уйғотган.

...Эсида, ўшанда Искандар биринчи синфда ўқирди. Ўрик гуллаган кун эди. Мактабдан иситмалаб келди. Онаси минг зўрламасин, бир пиёла чой ичди-ю, худди мана шу каравотга чўзилди. Уйда хотинлар кўп

эди. У иситма аралаш Баҳри холанинг димоғи билан минғирлаб айтаётган гапларини эшитиб ётарди.

«Энди, овсинмошша, Худодан ҳам, бандасиданам қарзингиз қолмади. Уруш битди. Келганлар келди. Ўлганларни жони жаннатда бўлсин. Ёш умрингизни хазон қилманг. Болагаям ота керак, ўргилай. Сизга оғиз солаётганлар таг-зоти кўрган одамлар...»

Искандар онасининг жавобини эшитмади. Ухлаб қолдими, хушидан кетдими, ўзи билмасди. Умуман, бу гапларни маъносини тушунмасди. Фақат эртасига онаси куйиб-ёниб айтган сўзлар қулоғига ўрнашиб қолди.

«Иккинчи унақа гапларни гапирманглар! Худони қаҳри келди. Боламга қизамиқ тошиб кетди. Дадаси омон бўлса келар, келмаса пешонамдан кўрдим. Ёлғиз эмасман, шукр, олдимда болам бор...»

– Искандаржон, жон болам, – Баҳри хола унинг елкасига қоқди. – Чиқа қолинг, қоқиндиқ.

Искандар (у энди Искандар Ваҳбовиҷ эмас, Искандар, оддий Искандар бўлиб қолганди, негаки, ўлим ҳаммани баравар қилиб қўяди) вазмин қадамлар билан салқин даҳлизга чиқди.

Пешайвон устунидаги михларга онасининг бутун «бисоти» илиб қўйилиби: битта янги, иккита эски кўйлак, унниқиб кетган баҳмал нимча, бир бурчи тешилган жун рўмол, ҳали тикилмаган бир кийимлик штапель, шол дастурхон...

Кавшандозда онасининг кавуши турибди. Қизиқ, бу кавушни Искандар уч йил илгари олиб берган эди. Нега яп-янги турибди?

Холмат аканинг хотини – Келинойи йиғидан қизарган кўзлари билан унга термилди. Искандар кавушга тикилиб турганини сезди шекилли, тушунтириди:

– Аяб юрардилар. Тўйга борсалар ёнбошларига – кўрпачанинг тагига беркитиб ўтирадилар. Искандарим оберган, деб мақтанаардилар.

Искандар ҳамон кавушдан кўз узмасди. Келинойи-нинг саволини дафъатан яхши эшитмади.

– Нима қиласайлик, маставами, шўрвами?

Искандар ҳеч нимага тушунмади.

– Нима? – деди гарангсиб.

– Ҳали-замон уйни одам босади. Иссиқ овқат қилиш керак, – Келинойи кўйманиб тушунтириди. – Ўлик чиққан уйда қозон қайнатиб бўлмайди. Бизникида қиламиз. Сўрамасам ҳам бўларди-ку, сиз – ўзимизнисиз, укам.

Искандарни Келинойининг саволи эмас, ўзини ўртаётган муаммо қийнар эди.

– Нима бўлди? – деди инграб. – Ойим соппа-соғ эдилар-ку!

Келинойи ўпкаси тўлиб хўрсинди.

– Туппа-тузук эдилар, – деди бурнини тортиб. – Эрталаб ўйнаб-кулиб ўтирилар. Ўлимликларини кўрсатдилар. Ҳазиллашдик. Мен айтдим: «Ўлимни ўйламанг. Ақининг тўйини... – Келинойи ҳиқиллаб қолди. – Ақида-нинг тўйини ўзингиз бош бўлиб ўтказасиз», дедим. Хўп, дедилар. Кейин бирдан, ғалати бўп кетяпман, дедилар. Каравотга ётқизган эдик...

Искандар кавшандозга ўтирганча бошини чанглади. Бу қандай гап! Бу қандоқ адолатсизлик! Нимага? Туппа-тузук юрган онаси нимага тўсатдан...

Келинойи ҳамон ҳиқиллаган кўйи унинг бошига эгилди.

– Шўрва қила қоламиз.

Ажаб, шу топда таом ўтадими томоқдан! Дарвоқе, онаси шўрва пиширишга уста эди. Тўйда, маъракада хотинлар унинг овқатини мақташса қувониб кетарди. Айниқса, мохорани кўп қиларди. Бу таомни Искандар ҳам еган. Кўп еган! Онаси бева қолганидан кейин жамоат уни Отинойи қилди. У мактабда фаррош бўлиб ишлар, лекин уйда ҳам тинчи йўқэди. «Келин тушди»га

қовурма чучвара пишириш борми, «тўққиз-тўққиз»га қатлама қилиш борми, никоҳ тўйида «тортишмачоқ» бўладими, куёв-келиннинг бошидан сочқи сочишми, келин саломда қуда-қудағайларга салом беришми – ҳаммаси онасининг зиммасида эди. У тўйдан, албатта, тугунча олиб келар, тугунчада нон, монпаси, қовурма чучвара, кейин... албатта – мохора бўларди. Баъзан ярим кечалари эшик тақиллаб қолар, Искандар онасининг дик этиб ўрнидан туриб кетганидан уйғонар, зум ўтмай онаси қайтиб кирарди. «Жон болам, Ислам чўлоқ омонатини топширибди, бормасам бўлмайди, сен қўрқмайсан-а, катта йигитсан-ку», деб пешонасидан ўпиди чиқиб кетар, шу кетганча эртасига пешинда қайтиб келар, ўзича қуръон ўқир: «Жойи жаннатда бўлсин», деб юзига фотиҳа тортар эди.

...У онаси ётган уйга оқсоқланиб кириб кетаётган паранжили кампирни кўрди-ю, гарангсиб ҳовлига тушди. Димоғига райҳон ҳиди кирди. Негадир онасининг иси келгандек бўлди.

Келинойи ҳовлидаги райҳонлардан шоша-пиша юлганча уйга кириб кетди. Искандарнинг хаёлига ярқ этиб бир фикр урилди: «Гуляга айтиш керак. Хабари йўқ-ку ҳали».

У энди эшик томон йўналган эди, хотинига қўзи тушди. Гуля, қўлида оқ сумкача, худди тўйга келгандек ясаниб олган, водолазка кийган, қулоғида бриллиант зирақ ялтираб турарди. «Қаёқдан эшитиби бу!» деган хаёлга борди-ю, унинг орқасидан сумка кўтариб келаётган шофёри Шавкатни кўриб, ҳаммасини тушунди: «Шавкат хабар қилган».

– Искандар aka! – Гуля унинг елкасига бошини қўйиб қучоқлади. – Бечора ойим! – У бир зум шу алфозда турди-да, негадир тескари қараб кафти билан юзини чангллади. Шоша-пиша оқ сумкаласидан рўмолча олиб кўзига босди.

«Сен айбдорсан! – деб ўйлади Искандар вужуди титраб. – Ҳаммасига сен – қанжик айбдорсан!» У хотинидан чириллатиб юзини ўғирди-да, бурчакда, ўрик остида турган сўрига бориб ўтирди.

Шу ондаёқ шафқатсиз бир савол аъзойи баданини сирқратиб юборди. «Ўзинг-чи, ўзинг!»

Унинг уйланиши қизиқ бўлди. Қурилиш факультетида Искандар Ваҳобовнинг олдига тушадиган талаба йўқ эди. Аълочи, жамоатчи... Тўртинчи курсда ўқиётганида СНОда «Граждан қурилишини маҳаллий шароитга мослаш» деган мавзуда маъруза қилди. У шу қадар дадил фикрларни ўртага ташладики, муҳокама жанжалга айланиб кетди. Бирорлар уни модернист деди, бошқалар донишмандга чиқарди. Шунда кафедра мудири, Фанлар академиясининг мухбир аъзоси, профессор Зариф Ҳодиевич уни ҳимоя қилди. «Ёш дўстимиз Искандар Ваҳобовичдан келгусида етук олим чиқади», деди комил ишонч билан. Ростдан ҳам шундай бўлди. Зариф Ҳодиевич уни ўз тарбиясига олди. Искандар аспирантурада қолди. Биринчи бор домланинг қизи – жинси шим кийиб юрадиган Гуляни кўрганида эътибор бермади. Тўғрироғи, эътибор бермасликка ҳаракат қилди. Кимсан, академикнинг қизи қаёқда-ю, маҳалла отинининг ўғли қаёқда! У шундай деб ўйлар, лекин домла билан олча соясида ўтириб суҳбатлашаётганда ичкарида рояль чалаётган, баъзан хиёл бўғиқ, аммо юракни ўртовчи овозда қўшиқ айтиётган Гуландом – Гуляга кўнгли талпинаётганини сезиб турарди. Гуля консерваторияда ўқир, замонавий, ўқтам қиз эди. Хуллас, Гулянинг ўзи унга кўнглини ёрди.

Тўй ресторанда ўтди. Келиннинг дугоналари паст кўчадаги кулбага келишганида Искандарнинг етти номуси ерга букилди. Назарида, Отинойи келинининг бошидан сочган сочқилар ҳам, пиширган мохораси ҳам

ўта бачкана, ўта ғарип кўринар эди. Буни қарангки, Зариф Ҳодиевич мард одам экан! Худди шу ҳовлида, худди шу сўрида ўтириб (Отинойи катта охурдан ем еган қудаларидан уялиб, ресторанга бормаган, аммо уйда чиройли дастурхон тузаб қўйган эди), қизига насиҳат қилди: «Искандарни ўзинг танладингми, энди билиб қўй, шу оиласининг жирини жирлайсан. Онанг бечора бир кўз билан ўғил ўстирибди. Менинг ҳам бир болам иккита бўлди, Отинойининг ҳам».

Отинойи бу гапдан боши осмонга етди. Тоғдек сунячниқ топганига қувониб, қудасининг елкасига бош қўйиб йиғлаб юборди.

Ярим йилча яхши туришди. Отинойи келини уйғонмасидан аввал печкага кўмир қалаб қўяр, атайлабдан тандирда нон ёпар, кечқурун эр-хотин ишдан қайтишига овқат тайёр тураган эди... Бошқа пайтларда у тўйгами, маъракагами чиқиб кетар, аллапаллада бир лаган совиган ош, бир коса мохора, бир чеккаси ушатилган қатлама олиб келиб, ўртага қўяр, тантана билан эълон қилар эди. «Олинглар, болажонларим! Сизларният тўйга етказсин!» Кейин бир кийимлик читми, сатинми келинига узатарди: «Обқўйинг, келинпошша, Худо хоҳласа, ўғил тўйи қилсангиз керак бўлади!»

Гуля қайнонасиининг олдида бир нима дея олмас, кечаси Искандарни эговларди: «Онангиз тиланчиликни бас қилсин! Менга бирор тишлиган қатламалар, бирор садақа қилган латталар керакмас».

Катта жанжал арзимаган нарсадан бошланди. Бир куни Искандар ишдан келса, хотини диванга мук тушиб йиғлаб ётибди. Искандар унинг елкасидан оҳиста тутган эди, Гуля диван суюнчиғини муштлади, ёшдан туши эриб кетган кўзида ғазаб чақнади:

«Йўқолинг! – деди йиғлаб. – Тиланчи онангиз билан қўшмозор бўлинг! Гиламим! Гиламимни нима

қилди? Икки минг сўмлик гилам эди! Ирим-сиримларинг бошингда қолгурлар!»

Искандар эсанкираб қолди. Девордаги ипак гиламга қаради. Йўқ, ҳаммаси жойида. Кейин, ерга тўшалган «Туркман» гиламини синчиклаб текшира бошлади. Қараса Гулянинг гапи рост. Гиламнинг бир бурчи тешилиб қолибди. Тангадек тешик. Искандар гўё шу билан тешик бекилиб қоладигандек бармоғини тиқиб кўрди. Юраги сиқилиб уф тортди. Бошини кўтарса, тепасида онаси турибди. Отинойи, «бу ёқقا кел», дегандек уни имлади. Искандар ҳамон диванда юзтубан ётган хотинига ўғринча қараб қўйди-да, онасиға эргашди.

«Айб манда, – деди онаси шивирлаб. – Кеча тўйда бир уй хотин Гуландомни мақтади. Келинимга кўз тегмасин, деб исириғ тутатгандим. Хокандоз ўлгурдан чўғ тушганини билмай қолибман. – У бир зум ўйланиб турди-да, тушунтириди: – Хотинингни кўнглини ол. Хапа бўмасин. Жа бўмаса, пенсиямдан йиғиб-йиғиб олиб берарман!»

На иложки, бу билан жанжал тугамади. Гуля масалани кўндаланг қўйди: «Ё мени денг, ё тиланчи онангизни! Кетаман! Дадамниги кетаман! Онам мени кўмирнинг сассигини ҳидласин, деб туққан эмас».

Охири эр-хотин бошлишиб Зариф Ҳодиевичнинг олдига боришди. Маслаҳат сўрашган эди, қайнотаси Искандарни жеркиб берди: «Қанақа эркаксиз ўзи! Бир йил турмасдан онангизни ташлаб қочишни мўлжаллаб қолдингизми? Хотин деганни қаттиқ ушлаш керак-да, бундоқ!»

Дадасининг гапи Гулянинг жон-жонидан ўтиб кетди. «Уйингизга сифмасам, ижарага квартира оламан», деб йиғлади. Қизиқ, шунда яна Отинойининг ўзи ёрдамга келди. «Болаларимга ёрдам беринг, жой олишсин. Гуландомим катта охурдан ем еган, менинг

чолдеворимда турса уят бўлади», деб қудасига ялинди.

Шундоқ бўлди. Зариф Ҳодиевичнинг кўмагида шаҳар марказидан уй олишди. Эр хотин «Юринг биз билан», деб Отинойини ҳол жонига қўйишмади. Аммо Отинойи кўнмади. «Қорада кўрсам қорним тўқ, ўзларингдан кўпайинглар. Мен чолимнинг чироғини ўчириб кетмайман».

Тўғри, Искандар онасини қаровсиз қолдирмади. Лойсувоқ том устига старапил ўрнатиб, шифер ёптириди. Уй «замонавийроқ» бўлди. Кейин... кейин газ киргизиб берди. Тўғри, табиий эмас, баллонли... Отинойи уларнинг «дом»ига борса кўп ўтиrolmas, маҳалладаги бирон тўйними, маъраканими баҳона қилиб, тезгина тура қоларди.

Аввалига эр хотин бу ҳовлига бот бот келиб туриши. Кейин Искандарнинг ишлари кўпайди. Искандар энди кимсан Искандар Ваҳобовичга айланди, фан кандидати, трест бошқарувчиси... Ажаб, унинг иши кўпайгандан кўпайиб борар, бироқ ҳаммасига улгурап эди. Фақат бир нарсага, онасини кўришга вақт тополмасди. Бунга бир чеккаси Гуля ҳам сабабчи эди. Эр хотиннинг умри ўтиб бораради. Фарзандлари йўқлиги аввалига билинмаса ҳам бора бора Гуля серзарда бўлиб қолди. Бир куни эрига пичинг қилди: «Ойингиз сизга янги хотин излаб юрганиши. Эшикма эшик тентираб ўрганиб қолган да! Топса топадиям!»

Искандар ўшанда хотинини биринчи марта сансиради. «Уят борми санда», – деди ғазабдан титраб. Онаси ҳар доим бир гапни қайтарарди: «Хотинингни хафа қилма, болам. Умид билан бир ёстиқقا бош қўйган». Гуля ҳар эҳтимолга қарши «профилактика» учун шундай деганини билиб, Искандар баттар ғазабланди: «Уят борми санда?» – Гуля кинояли қулди: «Уят нима қиласи менда, ҳаммасини йиғишириб сизга берган».

«Мана энди ҳаммаси тамом бўлди. Ҳаммаси». Искандар ҳовлида одамлар куйманиб юрганини пайқар, аммо ҳеч нимани» кўрмас эди.

Чеккиси келди. Шимининг чўнтағига қўл суқса, си гарет йўқ. Ҳали ишхонада стол устида қолиб кетаверибди. У маъносиз нигоҳини рўпарасидаги бостиurmaga тикиди. Лойсувоқ том юпқалашиб қолибди. Каталакдек деззанинг бир кўзи синган, ойналари хиralашиб кетган.

Ажаб, охирги марта қачон келувди бу ҳовлига? Ҳа, байрам арафасида, еттинчи мартда келган эди. Тушлик танаффусидан фойдаланиб, бирров келдию кетди. Одатдагидек шошиб турарди. Кейин, Гуля меҳмон келади деб қўйган... Онасини тўртта чой, совун билан кутлади. Машина кутиб турганини баҳона қилиб туфлисини ҳам ечмади. Онаси шошиб қолди. Ялпиз сомса қилган экан. Мажбур қилиб шундан биттасини едирди. Искандар машинага ўтирганда ҳарсиллаб югуриб чиқди. Рўмоли қийшайиб елкасига тушиб кетган. Қўлида эски газетага ўроғлик бир нима. «Ма, – деди машинанинг қия очиқ эшигидан узатиб. – Гуландомниям оғзи тегсин». Искандар газета остидан иссифи сезилиб турган сомсаларни машинанинг орқа ойнаси тагига ташлаб эшикни ёпди... Ўшанда онасини охирги марта кўраётганини билса эди! Бугун нечанчи ўзи? Ўн иккинчи июль. Бундан чиқди уч ойдан ошибди. Уч ой! Наҳотки шунча вақт ичиди бир соат вақт тополмади? Топарди, хоҳласа, албатта, топарди...

У аллаким ўзининг отини айтиб чақираётганини идрок этиб, бошини кўтарди. Қараса, жинси шим кийган талабанамо йигит елкасида картон кути кўтариб турибди. Искандар уни танимади. Талмовсираб қараган эди, йигит сўради:

– Қаёққа қўйай?

Искандар ҳеч нимага тушунмади. Юки оғирроқ бўлса керак, йигит кутини қўш қўллаб чираниб елка-

сидан олди-да, сўри бурчагига – сояга қўйди. Искандарнинг кўзи кутига ёпиштирилган этикеткага тушди. «Қорақум». Зум ўтмай бояги йигит тағин бир қути кўтариб келди. Униям сўри устига, бояги кутининг ёнига қўйди.

– Майиз, – деди секин.

Шундагина Искандарнинг хаёлига келди: «Пулини бериш керак».

– Шошманг, – деди чўнтагини кавлаб. – Неча пул бўлади?

Йигит тўхтаб қолди. Ҳайрон бўлиб унга тикилди.

– Неча сўм? – деди Искандар овози хириллаб. Йигит негадир ерга қаради.

– Отинойим... – Шундай деди-ю, у ёғини гапирмади. Кўзига шу қадар маъноли тикилиб қарадики, Искандар беихтиёр пулни қайтиб киссасига солди. Йигит оҳиста бурилди-да, индамай кетаверди. Қизик, нима демоқчи бўлди у! «Отинойим менинг ҳам онам эди, сен пасткаш ҳамма нарсани пулга чақасанми», дедими! Ким ўзи бу йигит? Нимага Искандар уни танимайди? Умуман, ўзидан бошқа – Искандар Ваҳобовичдан бошқа кимни танийди?!

Бир маҳал у кавшандозда Келинойи имлаб чақираётганини кўрди. Паранжили ювғувчи оқсоқланиб зинадан тушиб келарди. Келинойи ёшдан қизарган кўзларини Искандарга тиқди.

– Отинойимнинг зиракларини ювғувчига бердик, – деди секин. – Ўзлари васият қилгандилар.

«Ювғувчи», «vasият...» Бу сўзлар Искандарга хунук, совуқ эштиilar, гўё бу гаплар ҳаммаси ёлғондек, тушида бўлаётгандек эди. Ҳозир уйғониб кетади-ю, енгил тортади.

– Мана... Олиб қўйинг...

Искандар меровсираб Келинойининг қўлига қаради. Икки лўппи чой. «Индийский».

– Иккитасини ювғувчига бердик. Рози бўлинг. – Келинойи титраётган лабини тишлади... – Тўртта эди. Саккизинчи мартда олиб келган экансиз. Отинойим... Отинойим... – Келинойи энтикиб қолди. – Баркаш орқасига бекитиб қўйган эдилар. Бирор келса, Искандарим обкелган чойдан дамланг, дутор чалиб турган чойдан, дердилар. Мен бошқа чой дамлардим. Бунисини Отинойим ҳар куни ҳидлаб-ҳидлаб баркаш орқасига бекитиб қўярдилар.

Искандар боши ғувиллаб бораётганини, ҳозир ийқилиб кетишини ҳис этиб туради. Келинойи «дутор чалиб турган» ҳинд чойини пешайвон тахтасига қўйди. Бурнини торта-торта йиғлаганча қўйлагининг ёқасидан қўйнига қўл суқиб, эски газета қоғозига ўроқлик алланима чиқарди.

– Олиб қўйинг, – деди қоғозни узатиб. – Ўлимлигим деб, ёстиқларининг орасига тиқиб қўйган эдилар. Сиз ташлаб кетган экансиз. Қирқ сўмини ювғувчига бердик. Икки юз олтмиш сўм қолди. Санаб олинг. – У газета қатини очиб, бир сўмлик, уч сўмлик пулларни Искандарга узатди.

Қачон, қачон шунча пул берганди у онасига! Бу қандоқ жазо! Бу қандоқ бедодлик! Шу кунидан кўра онаси эмас, ўзи ўлгани яхши эмасмиди!!! Онаси бир сўмлаб йиққан пенсия пулини ҳам Искандарим берди деган. Шу гапга ўзиям ишонган, бошқаларниям ишонтирган. Қани энди кўкрагини шундоқ йиртса-ю, юрагини суғуриб олиб ерга улоқтиrsa!

Ич-ичидан отилиб келган бўғиқ йифидан титраб, пулни ташлаб юборди. Бир сўмлик, уч сўмликлар паришон пирпираб кавшандозга тушди.

...Искандар ҳовлига, ундан йўлакка отилди. Узун атлас лозим кийган қандайдир келинчак тор йўлакка «шакароб» қилиб сув сепар, сачрамаслик учун қўлидаги пақирни борган сайин пастроқقا эгар эди. Очиқ

дарвозадан забардаст йигит кириб келди. Искандар унинг афтини кўрмади. Йигит майкачан елкасига йўл-йўл дастурхон ташлаб олган, елкаси аралаш гарданига ортилган бир қоп ун залвари остида икки букилиб келарди. Искандар бир томонга, сув сепаётган келинчак бир томонга четлаб йўл беришди. Йигит яланг оёқларини гурс-гурс босганча Искандарнинг олдидан ўтиб, ҳовлига кириб кетди.

Искандар дарвозадан чиқди-ю, тўхтаб қолди. Эшик олдига тумонат одам тўпланган, тор қўчага машина сифмай кетганди. Қизиқ, қаёқдан келди шунча машина! «Ишхонадан бўлса керак», деган ўй хаёлидан лип этиб ўтди. Аммо ўша ондаёқ булар «Жигули», «Москвич» машиналари эканини, ишхонадан фақат ўзининг машинаси бир чеккада турганини пайқади.

Нарироқда юк машинаси турибди. Машина устида икки ўспирин туриб олиб, йиғма столларни, харракаларни узатиб беряпти. Пастда эса тўрт йигит столларни пайдар-пай туширишиб, бир чеккага олиб қўйишияпти.

Искандар тут панасида турган тобутни кўриб, кўнгли узилиб кетди. Тобутдан берироқда, ҳозиргина машинадан туширилган харракалarda салла ўраган, яктақ кийган чоллар ўтиришибди.

– Бандалик-да, укам!

Искандар ёнида турган маҳалла оқсоқоли Шокир акага маъносиз қараб қўйди.

– Ҳамманинг бошида бор, – оқсоқол хўрсинди. – Онамиз бошқача эдилар-да, жаннати хотин эдилар.

Кейин оқсоқолнинг похол шляпа кийган «зами» Искандарнинг қўлини қисди.

– Неча ёшда эдилар? – деди секин.

«Бунинг нима аҳамияти бор?! – Искандар шуни ўйлади-ю, дафъатан хаёлига бошқа фикр келди. – Дарвоқе, неча ёшда эди онаси! Ҳа, ўн саккизинчи йил эди.

Ўзи қирқ иккинчи йилда туғилган бўлса, демак, онаси йигирма тўрт ёшда бева қолган экан».

Ўзини қучоқлаган тўнли кишини Искандар дафъ-атан таний олмади. Кейин билди: қайнотаси. Зариф Ходиевич унинг пешонасидан оҳиста ўпди.

– Бардам бўлинг, ўғлим, – деди секин. – Ота-она ўл-моғи фарз...

Кейин кимдир елкасига туртди. Қараса Холмат ака.

– Бу ёқقا юр, – деди-ю, уни йўлакка бошлаб кирди. Девор тагидаги курсида ётган тўнни кийгизди, белига белбоғ ўради. Қати бузилмаган дўппи узатди, – кийиб ол!

Дўппи кичкина экан. Искандар кафти билан бо-сиб-босиб ташқарига йўналаркан, Холмат ака яна пи-чирлади:

– Лайлактепага олиб борамиз-да, а! Ўзлари айтган эканлар.

Искандар юк машинаси фақат стол-стулни олиб келишга мўлжалланмаганини тушунди. Лайлактепа олис, тўрт чақирим келади. Оёғи остида ўралашаётган ўн-үн икки яшар болакайлар ҳам тўн кийиб, белини боғлаб олганига аввал ҳайрон қолди-ю, кейин тушунгандай бўлди. Эҳтимол, Холмат аканинг болаларидир, эҳтимол, кўшни болалардир...

... Олд томонига паранжи, орқасига мурсак ёпилган тобутни олиб чиқишганида ҳаммаёқ дилни ўртовчи фарёдга тўлиб кетди. Келинойи, Баҳри хола, Муаттар хола, аллақандай қизлар, келинларчуввос солиб тобут кетидан югуришди.

– Вой онам!

– Рўшнолик кўрмаган онам!

Тўн кийиб, белбоғ боғлаган болакайлар кўзидан дув-дув ёш оқиб: «Бувижоним, бувижоним!» деб чириллашар эди. Холмат аканинг мўйлови хўл бўлиб кетган, нуқул титрарди.

– Ҳаммамизнинг онамиз эдингиз-а!

Йўқ, Искандар ўйлагандек тобутни машинага ортишмади. Елкада кўтарганча йўлга тушишди. Искандар тобут бандидан ушлаб олти-етти қадам юрган эди, уни сиқиб чиқаришди. У тобут бандига ҳадеб кўл чўзар, аммо навбат тегмас эди. Таниш-нотаниш одамлар гоҳ олдинга, гоҳ орқага ўтиб талашиб-тортишиб тобутга ёпишар, ҳар ким иложи борича кўпроқ кўтаришга, елкасини узокроқ тутиб беришга ҳаракат қиласлар эди.

Бекатга чиқишиганда троллейбус келиб қолди. Тўхташи билан дув этиб ўттизтacha эркак тушдию тобутга ёпишди.

– Ким? – деб сўради зиёлиномо кўзойнакли йигит Искандарнинг ёнида кўз ёшини тўнининг енгига артиб-артиб кетаётган Холмат акадан.

– Отинойим!

– Ие! – кўзойнакли йигит ранги ўчганча тобутга қайтадан тирмашди.

Энди катта кўча одамга тўлиб кетган, орқада троллейбус тўхтаб қолган, рўпарадан келаётган енгил машиналар чеккага чиқиб тўхтар, ҳайдовчи ҳам, йўловчилар ҳам шу томонга югуришар эди.

– Ким?

– Отинойим!

– Ие!

Кўчада ҳаракат бутунлай тўхтаб қолди. Бурилишга етганларида Искандар беихтиёр орқасига қаради. Одамлар оқими икки бекат орасига чўзилиб, бутун кўчани тўлдириб келар, тобут уларнинг елкасида осойишта тебраниб борар, оқимга эса янгидан-янги одамлар келиб қўшилар, қўшилар, қўшилар эди...

Эркин АЪЗАМ



НАВОЙНИ ЎҚИГАН БОЛАЛАР

Ҳазрат Навоий ҳамда бир навоийшуносга бағишиланади.

1

Маликанинг «кетаман» деганига парво қилмаб-миз – на мен, на Жаноб. Парво қилгулик ҳолатда эмас эдик: ўйин-кулги, сармастлик. Янги йил кирган, янги йил бошланган. Ёш умринг яна бир йили, узундан-узоқ. Шунинг дастлабки кечаси, бир кечагинаси. Ялдо кеча, ялло кеча. Вақт дегани, соат миллари гүё бир нуқтада тўхтаб қолган – ёшликка, ёшлик завқлари-га маҳлиё. Қўшиқ айтиб чарчамаймиз, тинглаб чарчамаймиз, томоқлар бўғилмайди, бош оғримайди, ирғишлайвериб толмас оёқлар баттар хуружу хумор қилади. Майли, вақт ўтса ўтаверсинг, олдинда мўл. Фақатгина тонг отмаса – бас.

– Ойим дори ичиб ўтирган бўлсалар керак, мен кетдим!

Кўчага чиққанимизда дунёни қор босган эди. Тў-зон, туман. Бир қадам нарини кўз илғамайди. Шу қиёматда Яланғочга етиб бориш керак. Илож йўқ, ойиси дори ичиб ўтирибди. Яна бирпастгина кутса-ку олам гулистон эди – ҳадемай тонг отади. Ана ўшандадори

ичадими, сирками – кўнгли тортгани. Инжиқ, бесабр хотин экан. Онасини кўргину қизини ол. Йўқ, Малика... яхши барибир!

Жаноб Маликанинг тўрвасини (Янги йил базмига сомса пишириб келган эди) кўтариб олган. Хушомад. Садоқатли ит. Хира пашша. Ҳам ғашим келади, ҳам кулгим қистайди: зарурга-ку зарур, қудағай хола, сизга нима зарур?

Шунаقا бир аломат тоифа бор. Доимо эргашиб, суйкалишиб юради. Соя, шарпа. Ўзи мустақил ҳолда бирон ишнинг уддасидан чиқолмайди. Севиб-севолмайди, кетиб-кетолмайди. Мудом бировларнинг маъшуқасига кўз тиккани тиккан. Кулгили ва аянчли жойи шундаки, гоҳида ўша ошиқ-маъшуқлар ўртасида воситачилик ҳам қиласиди: гап ташиш, хат-пат дегандек. Оқибат – пинҳона умидлар билан юра-юра, доғда қолиб кетади.

Бечора Жаноб! Қўлида каттакон тўрва, машина тутаман деб елиб-югуришини қаранг. Жони жабборники. Майли, юзта жони бўлса, бари-бари ўшанинг, яъни – Маликанинг йўлида нисор! Шу қилиқларини юзига солсангиз, «Сен учун-да, жўра! Бирга ўқиймиз-ку, жўра!» дейди ерга қараб. Мехрибон жўра, шум рақиб!

Қор қўйнида, ҳарир-кўкиш тўзон ичра хира миллиллаган учта чироқ базўр судралиб келаётир. Ниҳоят! Иkkитаси ер бағирлаган, учинчиси тепароқда. Икки қўлида иккита дур, пешонасида олтин жиға...

Жаноб йўлнинг ўртасига чиқиб фидойиларча туриб олади.

Кўқ белбоғли сариқ машина, милисанинг машинаси. Ичиди икки одам, ҳокимият вакиллари – ёнламасию кўндалангига камар таққан, елкаларида заррин тасма, пешонада тўға, мис тўға... Худо урди!

Жаноб тап тортмайди. Ановинаقا ашё-анжомлардан унда йўқ, албатта, лекин ғурури ўзига яраша,

тил-жағдан ҳам Худо қысмаган. Бир ёқда Маликанинг олдида мулзамлик, боз устига ўлгудек совқотиб кетяпти.

- Янги йил муборак, тақсирлар!
- Қуллуқ, қуллуқ.
- Бизларни лутфандайланғочга олиб бориб ташланглар, илтимос.
- Қизилидан битта бўладими?
- Инсоф қилинг-да, тақсир!
- Эшикни ёп! Тақсири!..

Хайрият, савдомизни Малика эшитмайди. У бозор жойидан нарироқда – бекатда қунишибгина, мушфиқ бир қиёфада турибди. Ўн сўм эмиш-а! Ўн сўмга ўн марта бориб келса бўлар Яланғочга. Шу тобда иккаламизнинг чўнтағимизни қоқиштириб қараганда ҳам ўн сўмга етиши гумон. Ўзимизни қўшиб ҳисоблагандага ҳам. Айниқса, ҳозир, шу юпун, мирқуруқ ҳолимизда. Лекин – кўнгил қурғур осмони фалакда, осмон баробар ғуруру даъвога тўла. Қиздан пул сўрамоқ – гуноҳи азим, ўлимнинг ўзгинаси. Биримиз шоиру, биримиз Жаноб бўлсак! Яна дeng – иккаламиз ҳам ошиқ. Биримиз ошкора, биримиз пинҳона. Чўнтаклар бу аҳвол. Маъшуқа бекатда совуқдан дийдираб турибди. Ойиси уйда дори билан сувнинг нисбатини чамалаяпти. Ўжар, ўзбошимча қиз эса, хушторлари бўлмиш икки ландавурнинг ношудлигига чидаб, қорбўрон кечаси аллақаёқларда тентираб юрибди.

Кўп ўтмай бошқа бир машина кўринади.

– Беш сўмингни чаккангга ёпиштир, ука! Яланғоч дунёнинг кетида-ю!

Кўчада қоровуллик қилаётганимизга бир соатлар бўлай деяпти. Яна андак чидаб берсак тонг отади. Маликамизнинг кўзига кўринмаслик учун иккаламиз ўйлнинг икки ёқасига гўёки арқон тутганмиз.

Яна бир машина. Олдинги ўриндиқларда пўстинга ўранган икки йигит. Жаноб жонҳолатда ойнага ёпишиб, ёлворади:

– Жон оғайнилар, илтимос!..

Инсоф дегани бор экан-ку!

Апил-тапил кириб машинага ўрнашамиз. Икки пўстин ўзаро фўнғир-фўнғир қиласди. Гаплари қулогимизга кирмайди – изғирин этни увада, устихонларни илма-тешик қиласган. Маликанинг қўлини кафтларим орасига олганман: муз, бармоқлари зириллайди.

– Қайси томонга, акахонлар? – деб сўрайди пўстинлардан бирори.

– Айтдик-ку, Яланғоч тарафга!

– Булар-чи?

– Ўша ёқقا.

– Сизлар-чи?..

Машина негадир йўл ёқасида тўхтайди. Гап сўраган пўстинли Жанобдан «бир минутга» чиқишини илтимос қиласди. Улар сал нари кетиб, нима ҳақдадир сўзлаша бошлайди. Бир маҳал эшик шартта очилиб, Жаноб қўлимдан тортади:

– Тушинглар! Тез! Бу машинада кетмаймиз!

Малика икковимиз ҳанг-манг бўлиб машинадан тушамиз. Машина шу заҳоти кийим-бошимизга қор аралаш шалтоқ сочиб шиддат билан жўнаб қўяди.

– Нима бўлди ўзи? – дейман гангигб.

Жаноб мени четроққа бошлайди.

– Бизларни, сен билан мени уй-уйимизга олиб бориб қўймоқчи...

– Нега... Малика-чи?

– Уни... уни.. – Жаноб юзини четга буради. «Биз опкетайлик», дейди мараз!

Баттар, товонимга қадар музлаб кетаман. Алам, таҳқир ва совуқдан дод деб юборгим келади. Қани, овоз чиқса! Чиққанида ким эшитарди? Эшитганда нима!

Энди машина кутиш бефойда. Маликани ўртага олиб чор-ночор яёв йўлга тушамиз. Йўл тойғоқ, манзил узоқ. Бир-биримизга суюнишиб кетиб боряпмиз. Сўз йўқ, садо йўқ. Совуқданми, чарчоқданми, шу қадар караҳт бўлиб қолибмизки, аллақандай машина ёнгинамизга келиб тўхтаганини ҳам пайқамабмиз. Қордек оппоқ «Волга».

– Йўл бўлсин, ёшлар?

Умидсиз, ҳафсаласизлик билан, аммо учаламиз баравар жавоб берамиз:

– Яланғочга.

– Ўтиринглар.

Тушимизми бу, ўнгимиз? Ишонар-ишонмас машинага кирамиз. Ичкарида, ҳайдовчининг биқинида бир жувон ҳам бор экан. Эгнида қорқизлар киядиган ёқа-енги пахмоқ пўстинча, бошини ихчамгина қилиб оқ шолрўмол билан танғиб олган.

– Яхшимисизлар? Янги йилинглар билан! – деб қўяди у эшитилар-эшитилмас овозда.

Хижолатдан шоша-пиша биз ҳам уларни байрам билан қутлаган бўламиз.

Машина секин қор кечиб жилади. Иссиқдан аъзотий баданларимизга жон оралай бошлайди. Орқадаги кўринмас карнайлардан ўйчан бир наво таралмоқда. Танбур. Хушбўй атир ҳиди... Жаноб иккаламизнинг ҳам хаёлимизда бир ўй: бу роҳат-фароғат ҳали қанчага тушаркан? Камида юз сўм сўрайди-ёв. Майли, Маликани уйига элтиб қўяйлик, қолгани бир гап бўлар. Бор-будимизни қоқишитириб берамиз. Беш сўм ҳам чиқмаса керак. Сўка-сўка тушириб юборар. Бу ёғи тонг яқин, ўлиб қолмасмиз. Ўлиб қолсак ҳам Малика кўрмас. Унамаса, изза қиласмиш, ёнидаги жувондан уялар. Аёл кишининг олдида биздақа қашшоқ талабалар билан савдолашиб ўтирас, ўлдими! Хушрўй жувонга ўхшайди. Маъшуқасимикан? Ўзи қари-ку, ўттиз беш-

ларда бор... Бўлмаса кими? Қайси аҳмоқ байрам кечаси хотинини бундай даврон қилиб машинага солиб юради?!

Тўпори Жаноб ҳеч қутилмагандага эҳтиросли товуш билан байтхонлигини бошлаб қолади:

*Ошиқ ўлдум, билмадим, ёр ўзгаларга ёр эмиш,
Оллоҳ-оллоҳ, ишқ аро мундоғ балолар бор эмиш...*

Тун. Қор. Машина шаҳар маркази бўйлаб оҳиста елади. Икки ёнда, бошлар узра рангин чироқлар силсиласи. Биз тушган кема ана шу турфа ёғдулар бағрида сузиб бораётир. Қулоқлар остида танбур навоси. Тантанавор бир намойиш. Олдинда бир жуфт ошиқ-маъшуқ, орқада бир жуфт. Биргина одам ортиқча. Лекин бу сафар базмини, бу фусункорликни шу кимсанинг дардли овози, ўқиётган оташин мисралари уйғунаштириб, обод этиб турибди.

*Ўртаниурмен, кўнглига андин асар бўлғайму деб,
Бўлса таъсир, анга ҳолимдин хабар бўлғайму деб...*

Билдик, Маликанинг олдида ўзларини кўрсатмоқчи! Изҳори муҳаббат, очиқ-ошкор! Қарасам, ҳаддидан ошяпти, тобора хиралашиб кетяпман. Ёдаки бисотимни кавлаштириб, «Санго-манго» лақабли домламиз тазийқ остида ўргатган ғазаллардан айни шу вазиятда кинояномузроқ жаранглайдиган бир байти хаёлимга келади:

*Ишқ айлади юз оқибу фарзонани расво,
Не айб, агар қилди бу девонани расво.*

Шу тариқа зимдан кураш бошланади: сен зўрми, мен зўр? Малика, ўзинг баҳола! Малика эса таажжубда:

бир бало бўлганми буларга, фавқулодда ғазалхонлик, бегона бировнинг машинасида!..

«Бегоналар»га бизнинг бу қилиғимиз негадир эриш туюлмайди, далда берган каби жувон қараб-қараб кўяди. Чамаси, бу ҳол уларнинг ҳам кўнглига ҳамоҳанг.

Сираси, биз – икки талабгор ҳозир истиҳола ни-малигини билмасдик. Кўр эдик, кар эдик. Бизнинг илоҳимиз ҳозир – яккаш муҳаббат, байт, ғазал, қўшиқ. Бунга эса айни тобда ҳамма нарса муҳайё эди.

– Ке, энди «жон» пайровига ўтамиз, – дейди оташин қиёфага кирган Жаноб.

Шоҳ байтлар. Навоий бобо қулоғимизга шивирлаб турибди.

Жаноб бошлайди:

*Жонға йўқ кўнглумдину кўнглумға йўқ жондин хабар,
Менга не ўздин хабар, не кўнглум олғондин хабар.*

Мен курсимиздаги Сафар нўноққача ҳамма ёд биладиган машхур байтни шафе келтираман:

*Жисм айларму фиғон, бўлғоч нафас жондин жудо,
Айлагил ондин жудо, қилғунча жонондин жудо.*

Жаноб тап-тайёр:

*Жонға зулмунгни нечаким кўнглунг истар, онча қил,
Мен чека олғонча демон, сен қила олғонча қил.*

Навбат меники. Аммо ҳадеганда мендан садо чиқавермагач, яккам-дуккам бисотим адо бўлганини сезиб, рақибим мушоира майдонида ёлғиз қолади. Баттар авжу тантана қиласди у:

*Меҳр кўп қўргуздим, аммо меҳрибоне топмадим,
Жон басе қилдим фидо, оромижоне топмадим.*

Шунда мен ҳам бўш келмасликка тиришаман:

*Жонимдин ўзга ёри вафодор топмадим,
Кўнглумдин ўзга маҳрами асрор топмадим.*

– Э, хўш-е, саломат бўлгайлар! – дейди Жаноб тирсагимдан чимдиб. – Мирзо Бобур-ку бу!

– Навоийники эмасми?

Жанобнинг жиғибийрони чиқади:

– Навоий деганинг нимаси! Табаррук зотларнинг номларини тоқ айтиб бўлмайди. Шаккоклийка ётади бу. Низомиддин Мир Алишери Навоий, мухтасарроқ айтиш лозим бўлганда – мавлоно ёки ҳазрати Навоий деган маъқул.

– Маъқул, маъқул, – деб қўяман иримига, бемаврид бу сабоқдан энсам қотиб.

Биз бугун йигирма биринчи аср бўсағасида турибмиз. Ўтган асрлар адабиётию уларнинг намояндалари олисда қолиб кетган. Биз энди Лорка, Хименес, Уитмен, Неруда руҳида яшамоққа ошиқамиз. «Навоий замонида қолиб кетган» ёлғиз одам курсимизда мана шу – Жаноб, Жанобиддин Сайфиддинов; лақаби – Жанобиддин Савдоий ёки жаноб Жаноб. У ҳамон Навоий замонида яшайди, ўша қадим Ҳирот муҳитидан нафас олади. Шундан, гап-сўзлари одамга эришрок, ўзи ҳам пича савдоириқ туюлади. (Қайдам, ўз навбатида биз унинг назарида ҳавойиларга ўхшаб кўринсан керак.) Қизларимиз уни очиқдан-очиқ «ненормальний» деб атайди, биз эса масхара аралаш – «навоийшунос».

Дарҳақиқат, унинг гапирган гапи – Навоий, Навоийга доир бирон янгилик топмаган куни дарсга келмайди. «Менга қолса, ҳазрати Навоийни ўқиганга –

номзодлик, уққанга докторлик унвонини берардим, – дейди. Кейин ўзича куюниб, комил ишонч билан таъкидлайди: – Токи ул зотни ўқимас экан, уқмас экан, бу халқ одам бўлмайди». Бирор нимадан нолиб, ҳасрат қилсангиз ёки бесабаб, бемаврид суюнсангиз – хуллас, унга шарҳи дил айласангиз, мудом бир хил, қисқагина маслаҳат оласиз: «Ҳазрати Навоийни мутолаа қилинг, ҳамма жавобни ўша кишидан топасиз». У туриб-туриб, масалан, оламшумул бир жиддият билан гапириб қолади: «Кеча тун бўйи камина ўзимча фикр этдим ва шундай хуносага келдимки, Навоий ҳазратлари одам боласи эмас эканлар...» «Ие-ие, бу нима деганинг?» «Авлиё эканлар, пайғамбар! Негаким, оддий одам боласининг қувваи иқтидори бунчаликка қодир бўлмас. Йўқ, ишонмайман, ҳаргиз!»

Биз, оддий одам болалари, ҳали айтилганидек, дарсда Навоийни ўтиб бўлганмиз, Жаноб эса ҳамон ўша муҳит, ўша мавзулар билан машғул: курс иши, эски-туски қўлёзмалар, илмий жамият, навоийшунослар йигини... Қандайдир тўпламда бир-иккита кичик-кичик мақолалари чиқиб, «Санго-манго» домламизning яқин маслаҳатгўйига айланди, курсда ҳам бирмунча обрў қозонгандек бўлди.

Бизни боғлаб турган нарса – у билан иккаламиз бир юртданмиз, бирга ўқиймиз, кейин... йўқ, бу бизни боғлаб турмасди, бизни ўзаро рақибга айлантирган эди. Мана, шу байтбаракнинг мазмунидан ҳам аён.

Уни деб шунчалик жангу муҳораба кетяпти-ю, Маликанинг парвойи фалак, тўғрироғи, хаёли бошқа ёқда: ойиси бор дориларини ичиб битирмай уйга етсам дейди...

Манзилга етганимизда қизиқ бўлди. Маликалар-нинг торкӯчаси бошида машинадан тушиб, Жаноб икковимиз иймана-иймана чўнтакларимизни титкилаётган эдик, машинанинг эгаси қўл силтади:

– Кўйинглар-кўйинглар, керакмас!

Бизнинг ўзи қуруқ «раҳмат»дан бўлак ҳеч вақомиз йўқ эди.

– Ўзларингга раҳмат. Омон бўлинглар, – деди у машинасини изига буриб оларкан. – Навоийни... ҳазрат Навоийни унутмаган ўзбек болаларидан пул олсак, уят бўлар, гуноҳ! Шунаقا эмасми?

Учаламиз кўча бошида серрайиб туриб қолдик.

– Ана, қаранглар, – деди Жаноб ҳаяжон билан, – ҳазрати Навоийнинг руҳи поклари бизни қўллади!

Афсуски, бундан бу ёғига уни ҳеч кимнинг руҳи қўлламади: Малика менга майл билдиргани кўриниб турар, уни энди бир ўзим кузатишим лозим эди. Шунда, хайрлашув палласи Жаноб икковимиз бир дақиқа бир-биришимизга тикилиб, боя бошлаган мушоирамизни хаёлан яқунлаган бўлдик.

Жаноб:

*«Вою юз минг войким, марки муҳаббат қилди ёр,
Билмайин қолдим мену қилмай хабар айрилди ёр».*

Мен:

*«Қилди душман раҳм баским, қилди жавр изҳор дўст,
Эй кўнгул, душман топ эмди, тутмағил зинҳор дўст».*

Жаноб:

*«Кўнглунг истар ёрлар бирла ҳамиша шод бўл,
Мендину кимдинки, кўнглунг истамас, озод бўл».*

2

Мен Малика билан яқинлашган сари Жаноб мендан узоқлашарди. Мендангина эмас, жамоатдан ҳам.

Хеч кимга аралашмайдиган одамови, яккамоховга ўхшаб қолди. Энди кўрган-кўришганда совуққина салом-алик қиласардик, холос. Бу орада ўқишиларни битирдик, кўча-кўчасини топиб ҳар ким ҳар ёққа тўзиб кетди. Юртдошлиқ, курсдошлиқ ҳурмати, бир пайтлардаги чатиш хотиралар ҳаққи, атайин хабар юборганимга қарамай, Жаноб тўйимизга келмади. Балки тўғри қилгандир, унинг ўрнида мен бўлганимда ҳам бормас эдим.

Шу тариқа бегоналашиб, Жанобиддин менинг, Малика иккимизнинг ҳаётимиздан гўё чиқиб кетди. Худди ўзаро келишиб олгандек, умумий бир гуноҳимиздек, уни эсламай ҳам кўйдик. Айтишларича, шарқшунослик институтида юрганимши. Эски қўлёзмаларнинг чангини артиб. Узоқ йили қайси бир жамоат йифинида кўрдим ҳам. Кўзойнак тақиб олибди. Фан номзоди. Навоийшуносликка оид баҳсталаб мавзуларда шарҳлари чиқиб туради. Шу борада шов-шувли бир масалани қўзғаб юргани ҳам қулоғимга чалинган эди.

Уйланмади. Эштишимча, «Ҳазрати Навоий туттган йўриқдан бориб, тоқ ўтмоқни ихтиёр этдим», дер эмиш...

Кейин – мана шу хабар...

3

...Ўша куни у кечки рейс билан Самарқандга учиши керак экан. Кўлида Навоий даврига оид кашфиёт даражасида муҳим хужжат, навоийшунослар анжуманида қатнашиши, маъруза қилиши лозим. Илмий сессия эртага эрталаб иш бошлайди.

Лекин аэропортда нима ҳамдир бўлади-ю, самолётга чиқиши олдидан «Кечикдингиз, одам тўлиб қолди» деган баҳона билан уни рейсдан қолдириб юборадилар. Бу сўнгги рейс экан. Аламига чидаёлмаган

навоийшунос тўполон кўтаради, йўлини тўсган ҳалиги маъмур билан жиққамушт бўлишгача боради. Можарога шу атрофда айланиб, жамоат ўртасида тартиб ўрнатиб юрган милиция капитани аралашади. Машғулот топилганидан қувониб, у шартта келиб навоийшуноснинг қўлинин қайириб олади. Тартиббузарни хосхонасига элтиб, хужжатларини текширади, сўроқ қилган бўлади. Гап-сўзлари бирмунча ҳавойироқ туяулганига қарамай, дарду даъвосини эшитгач, юмшайди, юпатади: «Ҳечқиси йўқ, оғайни. Бунақаси бўлиб туради бизда. Бирортасини шошилинч учириб юбориш керак бўлгандир-да. Сизга маслаҳат: бу кеча уйга бориб маза қилиб дамингизни олинг. Эртага аzonлаб келсангиз, мен ўзим тонгги рейс билан жўнатиб юборраман».

Бу ваъдани омонат чўнтаигига жойлаб сал-пал ҳовуридан тушган навоийшунос, капитаннинг ҳузуридан чиққач, ўйлаб боши қотади. Ижара уйи шаҳарнинг нариги чеккасида, аzonлаб бу ерга етиб келмоғи даргумон. Боз устига хўжайкаси билан айтишиб қолиб, бошқа жойга кўчмоқчи, уч кундан бери эса бир талаба ҳамқишлоғининг каталагида тунаб юрибди. Щўппайиб бу кеч ҳам кириб бориши ноқулай – эрталаб хайрлашиб чиққан.

Дафъатан хаёлида бир фикр туғилиб, аэропортнинг биқинидаги баланд бинога қараб юради. Бир ҳисобда самолётдан қолиб кетгани фойдага. Бу кеча шу ерда бафуржа ўтириб қўлидаги қоғозларни саранжомлайди, анжуманда баён этажак мулоҳазаларини пухталаб олади...

Қачон, қайси меҳмонхонада бўш жой бўлган?! Аммо, навоийшунос хиралик қилиб ёпишиб олгач, маъмур хотин ийгандек бўлиб унинг паспортини вараклаб кўради-ю, башарасига отиб юборади: «Пропискангиз шаҳарда-ку, боринг, уйингизга бориб ётинг!»

Масаланинг бу жиҳатини ўйлаб кўрмаган навоийшунос саросимада қолади. Кейин зўр бериб ялинмоқقا тушади. Фойда чиқмагач, дўқ-сиёсатга ўтади. Маъмур хотин ҳам бўш келмайди, таҳдид чорасини қўллади: «Ҳозироқ бу ердан даф бўлмасанг, милиса чақираман!» «Милисани мен ўзим чақираман», дейди навоийшунос кўнглида бир илинж билан ва меҳмонхонадан чиқиб бояги маслаҳатгўйининг олдига югуради. Капитанга аҳволни тушунтириб, «Меҳмонхонага сим қоқиб, бир кечага жой олиб беринг, тақсир, – дея илтимос қилади. – Навоийшуносликка ҳисса қўшган бўласиз».

Капитан нимадандир диққат бўлиб ўтирган экани, боядан бери қимматли вақтини ўғирлаб безор қилган бу нусханинг ўзини тутиши, гап-сўзлари энди шубҳалироқ туюлиб, ижирғаниш билан сўрайди: «Нималар деяпсиз ўзи, оғайни? Қанақа навоийшунослик?» «Шеър, ғазал деганини тушунасизми ўзи? – дейди навоийшунос унинг беписанд оҳангидан ранжиб. – Мир Алишер Навоий деган зотни эшитганмиз?» «Ҳа, «Муножот»ни ёзганми?» Навоийшунос бу гапга сал тиришади-ю, сир бой бермай: «Мана, у киши нима дебдилар...» дея ғазал ўқимоқقا киришади.

Шеър оҳангি таъсир қиладими ё оми кўрингиси келмайдими, капитан: «Бизнинг улуғимиз ҳам ёзадилар, у киши қўшиқ ёзадилар! – дейди фахр-ифтихор билан ва тортмасидан пиёзнинг пўстидек юпқагина бир китобча олиб, меҳр билан авайлаб столга қўяди: – Мана, у кишининг китоблари! Айниқса, битта қўшиқлари бор, зўр! Эшитгандирсиз, «О-о, кечалар...» деб айтади».

«Ҳа энди, сизнинг улуғингиз қаёқда-ю, ҳазрати Навоий қаёқда! – дейди навоийшунос, дарди-ҳоли эсида йўқ, астойдил баҳсга киришиб. – Унақалар бугун бор – эртага йўқ. Ўтади-кетади. Ҳазрати Навоий эса... Мана, қулоқ солинг...»

Ҳазрат Навоийнинг даври ўтган, бугун ўзгача даврон экан. Капитан ана шу давроннинг фидойи, кўру кар гумашталаридан эди. У қўшиқнавис улуғининг мухлиси, мухлиси не, садоқатли қули, саноқсиз мирғазларидан бири эди. Бир муддат одамшаванда бўлиб кўринган бу кимса, мирғазаблиги эсига тушиб, яна аслига қайтади. Яқин бир соатдан буён бошини қотираётган мана бу телбанамонинг андишасизлигига аччиғи келади. Ўзидан пастроқ бир мирғазабга буюрадики, бу шаккокни анови хонага олиб кириб боплаб адабини берсалар, то улуғнинг улуғвор қўшиқларига ҳамнавоз бўлмагунича дарраласалар...

*«Кимсани дард аҳли деб, сирримга маҳрам айладим,
Ўз-ўзумни қуч билан расвои олам айладим».*

Шаккок болтадан қайтмайдиган хилидан бўлиб чиқади. Ҳаммаёғи мўматалоқ, оғзи-бурни қон ҳолига, бояги лафзини қўймайди: «Улуғинг шоир-поир эмас, ўткинчи! Ўшанга сифинган сенлар эса – қонхўр жаллод!» Кейин ўз-ўзидан совуқ илжайиб байт ўқийдими-ей, ғазал ўқийдими-ей...

*«Даҳрдин меҳру вафо қилма ҳавас,
Элидин ғайри жафо қилма ҳавас».*

Ҳибсхонага оқ халат кийган иккита норғул-норғул йигит кириб келганда шаккок, кўзларида ёши шашқатор, ҳамон овозини баралла қўйиб ғазал ўқиётган бўлади. Норғуллар уни таппа ерга босиб, оёқ-қўлинни боғлашади, аъзойи баданини омбирдек сиққан аллақандай ридога ўраб, «Тез ёрдам» машинасига тиқишиади.

Шаккок бу ерда беморга айланиб, бир эм билан беш кун кўзини очмай ётади. Олтинчи куни ўзига келиб,

ховлига ўрмалайди. Қаерга тушиб қолганини қўриб, хўнг-хўнг йиғлайди. Аммо ҳеч ким парво қилмайди, ҳеч ким ҳайрон ҳам бўлмайди. Чунки бу ерда ундан ҳам қаттиқроқ хўнграб йиғлайдиганлар сероб экан.

Шу зайл аста-секин аҳволига кўникади, бундаги тартиб-қоидага бўйсuna бошлайди; ўзига ўхшаган биродарларига аралашиб, элакишиб, байту ғазаллар ўқиб юради. Улар орасида «Навоий», «шоир» деган лақаблар орттиради. Илк дафъа бундан хабар топганида, яъни – кимдир «Хў Навоий» деб чақирганида у бирдан кўкариб кетади, сўнг шифохонани бошига кўтаргудек тўполон қиласди. Шунда уни тутиб олиб яна эмладилар...

Бир куни йўлақда фаррош кампирга пул қистириб, шарҳи аҳволи баён этилган мактубни жўнатишни сўрайди.

Хизматдош ҳамкаслари ҳеч гапдан бехабар, унинг Самарқандда бунчалик узоқ қолиб кетганига ажабланиб, ўша ёқда касал-пасал бўлиб қолдимикан, деган гумон билан юришган экан. Тезда бу ерга етиб келишибди. Аҳволни кўриб, аввал ҳайрон, сўнгра дарғазаб бўлишибди: бу қандай шафқатсизлик, бу қандай қабоҳат! Ўша куниёқ зудлик билан ишхоналаридан ваколатномаю кафолатнома уюштиришибди. Бироқ шифохона маъмурияти бу қоғозларни инобатга олмабди: бошқа жойдан бошқа кўрсатма келган экан.

Ниҳоят, йигирма кунлардан кейингина унга жавоб берилади. Кутимаганда рухсат теккани боис, ёнида бирга кетадиган ҳеч ким йўқ, ўзи ёлғиз экан.

Оқибати шу бўлибдики, ижара уйига кетаётиб, метронинг охирги бекатига келганда, «Бу ўзимнинг уйим-ку, нега бўшатар эканман?!» дея даъво қилиб турриб олибди...

Яна ўша мирғазблар, яна ўша оқ халатли нор-половонлар, яна эм... Кейин...

4

...Дафн маросимидан эзилиб қайтдим.

Шўрликнинг сўрайдиган киройи кимсаси йўқ – бе-сойиб; амакисими, тоғаси бор экан, у ҳам етиб келол-мади шекилли, шаҳардаги қабристонлардан бирига дафн этилди.

Мозордан қайтишда баъзи бировлар ўлими таф-силотини муҳокама қилишди: ўшандоқ жойда қандай рўй бериши мумкин бундай ҳодиса, бепарволик, со-вуққонлик; наҳотки, ҳеч ким кўрмаган бўлса; арқон-ни қаёқдан топди экан... Марҳум Самарқандга олиб жўнаган ўша муҳим ҳужжат ҳақида гап борди, ҳар хил тусмол-тахминлар айтилди, баҳс бўлди: кўллёзма чин-дан ҳам кашфиётмиди; қаерда қолди экан; тақдири нима кечди; наҳотки, шундай ноёб ҳужжат йўқолган бўлса... Бу борада ҳеч ким тайнинли бирор гап айтол-мади.

Кейин кимдир марҳумнинг феъл-авторига оид эҳтиётсизроқ бир гап қилган эди, дафн аҳли ўша ки-шига бараварига ўқрайиб қаради.

5

Уйга келгач, Маликани кўриб яна безовта бўлдим. Бу ҳодисани унга айтгим келаверди. Аммо... тилим бормади. Келиб-келиб энди, рашикка ўрин қолмаган бўлса-да (қабоҳат-ку бу!), айтолмадим. Кўрқдим, ни-мадандир кўрқдим. Ҳануз кўрқаман...

Лекин ўша тушдек қорбўрон кечасини ҳаётимиз-дан ўчириб ташлаб бўлмаслигига ҳам ақлим етади. Ўшанда бизга унутилмас бир ҳиммат кўрсатган ким-санни эслаб эса кўнгил таскин топгандек бўлади.

Хайриддин СУЛТОН



ОНАМНИНГ ЎРТИ

Ниҳоят, онамнинг юртига жўнар бўлдик.

Онамнинг юрти!

Эсимни танибманки, бу сўз хотирамга олис эртак бўлиб, маъюс алла бўлиб ўрнашган. То ҳануз қулоқларим остида сўнмас бир қўшиқ янглиғ жаранглайди у.

Шу пайтгача онам тилидан унинг таърифинигина эшитардик. Шу пайтгача унинг қайдалигини, қандай жой эканини билмасдик; онамнинг юрти – онамнинг ўтли армони эканини сезардик, холос.

Онам етти-саккиз яшар гўдак чоғида юртидан айрилган экан.

«Адоғи йўқ тупроқ йўлдан аравага тушиб келганим ёдимда, – дерди онам ва шу заҳоти қўзларидан дувиллаб ёш оқиб кетарди. – Отам билан онамни элас-элас эслайман. Отам соқоллари узун-узун, қизил юзли одам эди. Онам жудаям новча эди, ўрнидан турганида, бошини кунга уриб олмасайди, деб қўрқардим...»

Онамнинг юрти кунчиқардами, кунботардами, дарё ортидами, тоғлар бағридами, дашту биёбонлар қўйнидами – бирортамиз билмас эдик. Фақат, унинг тенгсиз гўзал бир маскан эканини англардик. У юртда осмон – осмон эмас, мушфиқ она; тоғлар – тоғ эмас, меҳрибон падар; гуллар – гул эмас, мунис ҳамшира; у ерда одамларни хўroz қичқириғи эмас, булбул навоси уйғотади.

Орадан не бир замонлар – олтмиш олти йил ўтганига қарамай, онам ҳамон тақдирига тан бермас, ҳамон уфқдан қўзи ва кўнглини узолмас, ҳамон юртининг таърифини тилдан қўймас эди. Биз ҳам бунга ўрганиб қолган эдик. Баъзан тоғу тошлар аро кўмилиб ётган шу кичкинагина қишлоғимиз зериктирганда, баъзан нимадандир ранжиганимизда, гоҳ эса юрагимиз бесабаб ғуссага тўлганда онамнинг олис, номаълум ва сирли юртига бош олиб кетгимиз келарди.

Мана, ниҳоят, унинг дараги топилди!.. Онамнинг қувончини сизга қандай тасвирлаб берай? Йўқ, чамалаб кўрдим, қўлимдан келмас экан. Буни тасаввур қилмоқчи бўлсангиз, яхшиси, онангиз қувонган кезларда, аникрофи, уни ўзингиз бир оғиз ширин сўз биланми, бир савоб иш биланми қувонтирган дамларингизда аста кузатинг. Афсус, минг афсус, бундай онлар ҳаётимиизда қанчалар кам: биз – фарзандлар, оналаримизга шодлик ўрнига аксар ранжу алам етказамиз, холос.

Хуллас, юртининг дарагини эшитди-ю, онам бир кечада яшариб кетди. Ҳар кеча сирқираб азоб берадиган оёғининг оғригини ҳам унутгандек бўлди. Энди унинг етмиш учга кирганига ҳеч ким, ҳатто ўзи ҳам ишонмас эди.

«Наҳот туғилган юртимни бир кўрмай кетсам?» дерди онам мудом хўрсиниб. Мен эса, гоҳ қулиб, гоҳ жиддий тортиб, энди мусофиру муҳожир деган гаплар қолмаганини, мана шу бепоён мамлакат, шу ажиб диёр барчамизнинг ягона ватанимиз эканини ётиғи билан уқтиromoқчи бўлардим. Онам гапларимни жимгина тингларди-ю, кўз ёши тинмасди.

Билардим, унинг дарди пинҳон, кўнгли ярим, бирорқ уни бутун қилмоққа ожиз эдим: урушда нобуд бўлган икки оғамни тирилтиролмасам, на юрагидаги, на оёғидаги оғриқни суғуриб ололмасам...

Онам ҳадемай чевара кўради, лекин ҳануз мени ҳимоясиз гўдак билади – худди тўрт яшар болани асраб-авайлагандек тежаб-тергайди; ҳали-ҳозир жиндек кеч қолсам, иягини ёстиққа тираганча йўлимни пойлайди, қорамни кўриши билан беозор койиб қўяди: «Намозшом арвоҳдай шу пайтгача тентираб юрибсанми? Соат неча бўлди?» «Бир», дейман бамайлихотир уст-бошимни ечарканман. «Э, гапирма-е! – дейди онам ранжиб. – Бир қолдими, аллақачон ўн бўлгандир!»

Онам соатни билмасди – юртини, наслу насабини билмаганидек.

Авваллари ёш эдим, онамнинг дарди дилини англамас эканман. Фақат қўп йиллар кейин, бошимдан турли савдолар кечиб, оқ оралаган соchlарим бир-бир тўкила бошлагандагина бу ҳақда бот-бот ўйлайдиган бўлиб қолдим.

Ва шундан сўнг онамнинг юртини излашга киришдим.

Онам ёшлик йиллари, жамалаксоч қизча пайтида эл қатори бурчоқ тергани чиққан. Бурчоқ териб юриб адашган. Адашгану қайтиб на ота-онасини, на юртини кўрган. Ёдида қолгани – баланд араваю узун тупроқ йўл.

Онамнинг юртини goҳ интизор бўлиб, goҳ умидизлика тушиб, сабр-чидам билан узоқ изладим. Кўшнимизнинг Раззоқ деган бир ўғли Тошкентда, радиода ишларди. Шу йигит қўп ёрдам қилди. Биргалашиб ёздиник, биргалашиб кутдиник. Астойдил йиғлан эканмизми, ниҳоят, сўқир кўздан ҳам ёш чиқди – онамнинг юритидан дарак келди!

Шунда мен онам узоқ йиллар мобайнида хўрсиниб сўзлаган юртни хаёлан аниқ-таниқ кўрдим, ўзимни гўё минг йиллардан бўён ўша ерда яшагандек, яшайдигандек ҳис қилдим – шунчалар қон-қонимизга сингиб кетган эди у.

«Жой бўлмай қуриб кетсин, – дерди онам баъзан зорланиб, – лоақал юз юварга суви бўлмаса-я! Эсиз-эсиз, юртимдаги дарё-дарё сувлар...»

Унинг ранжу койишлари бежиз эмасди. Тангу тор, тоғу тош қишлоғимизда бир томчи сув гавҳарга тенг, гавҳар нима, одамнинг хуни билан баравар эди: ичкилик сувни ҳам етти-саккиз чақирим олисдан ташиб келтирадик. Лекин, таажжубки, онамдан бўлак ҳеч кимсага бунинг оғирлиги билинмасди.

Билсам, онамнинг юрти чиндан ҳам улуғ дарё соҳилларида экан.

«Дўзах бўлиб кетди-ку, – деб нолирди онам баъзан. – Ҳаҳ, юртимнинг шамоллари-я...»

Бу атроф-жавонибда бизнинг қишлоқдан қўра салқинроқ жойни топмоқ амримаҳол, саратон қунлари не-не шаҳарликлар шу ерда жон сақлайди, ҳар нечук, онамнинг бу гапи ношукрлик эмасмикан?

Билсам, онамнинг юрти ҳур шамоллар маскани – зумрад водий қўйнида экан...

Хушхабар келган куни уйимизда тўй бўлиб кетди. Фақат, онамнинг кўз ёшларигина бу тантанани хиёл бузиб турарди.

Мактуб жанубий воҳалардаги қишлоқларнинг биридан жўнатилган, уни онамнинг ота уруғи – амакиваччаси Омонқул деган киши битган эди.

«...Тоғамнинг Улбўсин отлиқ бир қизи мундан кўп йиллар бурун йўқолиб эди. Бизнинг хешлар бари, дом-дараксиз кетган, деб юргич эди. Қай бир қун радиодан айтиб қолди. Авлодимиздаги қари-қартанглар ўй ўйлаб, ўша Улбўсин бўлса керак, деди. Агар чиндан ҳам эгачимиз Улбўсин бўлса, келинг, дийдор кўришайлик, биз борайлик, топишайлик, қайтадан хеш бўлайлик».

Сўнг, онамнинг қай йўсин адашганию қандай ғойиб бўлгани хусусидаги бизга ёд бўлиб кетган тафси-лотлар ҳижжалаб баён этилган эди.

Онамга қолса, ҳозироқ – күз ёши қуrimасданоқ қанот боғлаб учмоққа шай. Аммо Рассоқ иккаламиз маслаҳатлашиб, гапни бир жойга қўйдик: у ишхонасидан икки-уч кунга ижозат олиб, биз билан бирга борадиган бўлди. «Ажойиб тақдирлар» деган очерк ёзман, зўр чиқади», деди.

Индими тонг саҳарда йўлга тушдик.

Поездда юрдик, автобусда юрдик, енгил машиналарда юрдик, йўл юрсак ҳам мўл юрдик, дашту биёбонлардан, шахру қишлоқлардан ўтдик, поёнсиз пахтазорлар, яшил тутзорлар, боғу боғчалар, қадимий сардобалар, паст-баланд қирлар ортда қолди ва бир куни чошгоҳ чоғи онамнинг юртига кириб келдик.

Шалоғи чиққан такси шағал каръерининг кўхна биноси олдида тўхтади. Бирин-кетин тушдик.

– Шу ердан сўрарсизлар, – деди занжидек қоп-қора шофёр ва машинасини ортига буриб, ёв қувгандек жўнаб қолди.

Кўз ўнгимда уфқ қадар чексиз, сарғиштоб бир яланглик ястаниб ётарди. Унда-бунда пастак ихота дараҳтлари яккам-дуккам тиккайган.

Автобус бекати ҳам шу ерда экан. Майдонча кимсасиз. Олисларда ҳовур жимирлайди, кўз тинади. Ёғоч ўриндиқда қалпоғини бостириб кийган бир чол қопчиғини ёнбошига қўйиб мудрайди.

Аста онамга разм солдим: тўрт томонга ҳайрон боқади, мижжалари нам, лаблари титраб-титраб қўяди.

– Келдик, она! – дедим атай бардам товушда.

Онам шошиб бош иргади, кулимсирагандек бўлди.

Бекат майдончасида бир зум гангиг бурдик. Кўлимдаги адресда бундан бошқа гап йўқ эди. Бошим қотиб Рассоққа қарадим, Рассоқ менга. Шу пайт ердан чиқдими, осмондан тушдимн, билмайман, қаршимизда бир тўда одам пайдо бўлди-да, олағовур бошланиб

кетди. Дарров қўнглим сезди: онамнинг қариндошлари... қариндошларим!

Мудраб ўтирган чол чўчиб тушди, кўзларини очиб, норози хўмрайди, сўнг шартта терс ўгирилиб олди.

Шовқин қандай бошланган бўлса, бирданига шундай тинди. Ҳамма бир-бирига аланглар, гап-гапга қовуша қолмас, ётсираш ҳукмрон эди. Онам Омонқул амаки билан кўришаётганида барча ўзини тутолмади, аёллар ошкора йиғлади, эркаклар кўз ёшини яшириб, тескари қаради.

Онам аста энгашди, қоқсуяқ кафтини ерга теккизаб, юз-кўзларига суртди:

– Етказганига шукур! – деди ўпкаси тўлиб.

Онамнинг авлоди ўзига ўхшаш суюги бузук, дали-ғули одамлар экан. Омонқул амаки айниқса менга маъқул бўлди: қизилмағиз, барваста, юрт сўраган одамлиги кўриниб турибди.

Боя негадир пайқамаган эканмиз: бекатнинг шундоқ орқасида чоғроқ бир қишлоқ бор экан. Қирқ-эллик уй қатор тизилган. Ҳовлилар теграсида девор-тош йўқ, на эшик, на қулф кўринади.

Янги топишган қариндошларимиз бизни шовқин-сурон, иззат-икром билан олиб кетишиди. Ҳайҳотдек бир ҳовлига кирдик. Тумонат одам, кўйлар сўйилган, дошқозонлар қайнаган... Бу – Омонқул амакимизнинг ҳовлиси экан.

Уйма-уй, хонадонма-хонадон тинмай зиёфат.

Тўртинчи кунига бориб мен чарчадим, Раззоқ зериқди. Бироқ онам...

Эрталаб чойдан кейин аста ҳовлига чиқдик. Омонқул амакимнинг ўғли – ўттиз бешлар чамасидаги малла йигит, йўлакдаги «Белорусь»ни кавлаштираётган экан, бизни кўриб, хуш-хандон илжайди.

– Ҳа, бўла?

– Бўлар энди, Файзиқул, – дедим ҳорғин кулимсираб. – Сафаримиз ҳам қариди.

– Э, қўйинг-э, бўла! – Файзиқул қўлини мойлаттага шоша-пиша артиб, югургилаб олдимга келди. – Нима бу! Ҳали мундай бир гурунг қилганимиз ҳам йўқ.

– Мана, топишиб олдик, гурунглашаверамиз-да. Бу ёқ ишга борадиган, – дедим Раззоққа имо қилиб.

– Иш бўлаверади-да, ака, – деди Файзиқул Раззоққа юzlаниб. – Ҳали сизлар ухлаб ётганингизда Бобоназар aka билан Маҳкам келиб айтиб кетди. Бир пиёла чой ичиб чиқмасангизлар, уят бўлади.

Яна «бир пиёла чой!» Яна зиёфат! Э, тавбангдан кетай! Наҳот дунёнинг бор гапи дастурхондан иборат бўлса?!

– Менга қаранг, бўла, – дедим барибир мулоим оҳангда, – биз энди бугун қайтамиз. Ҳа, бўлак иложи йўқ. Шошманг-да. Агар бизга жуда ҳиммат қилмоқчи бўлсангиз, бир айлантириб келмайсизми?

– Э-э, жоним билан-э, мана ҳозир! – Файзиқул ҳовли ўртасида турган сариқ «Жигули»га қараб юрди.

– Машинани қўйинг, бўла, – дедим енгидан тортиб. – Ҳа, шундай бир, пиёда... Йўқ-йўқ, шу маъқул. А, Раззоқ?

– Улбўсин холамни ҳам олайлик, бўлмаса? – деди Раззоқ ўйланиб.

– Унда, мен машинани опчиқай, – деди Файзиқул киссасини кавлаб.

– Қани, олдин онамдан бир сўрайлик-чи, – дедим.

Онам ичкари уйда, хотин-халаж даврасида ташвишманд ўтирган экан.

– Бир юрtingизни айланниб келайлик энди, – дедим.

– Собирингни туш кўриб юрибман, – деди онам. – Тинчмикан ишқилиб? Қайтақолсак ҳам бўларди. Кўзларинг киртайиб қопти, иссифинг борми? – У қоқсуяк кафтини пешонамга қўйди.

Она, онажон!

- Бир айланиб келсак, девдим...
Онам айвон устунига суюниб ўтириди.
- Ўтган куни Омонқул амакинг билан атрофларни
кўриб келдим.

Онамнинг қиёфаси, ранг-рафторида шу пайтгача
кўринмаган хушнудлик бор эди.

- Хурсандмисиз, ахир?
- Хурсанд бўлмайманми, болам? Отамнинг мозо-
рини зиёрат қилдим, онамнинг... Ота авлод, она авло-
димнинг дийдорига тўйдим. Етказганингга шукр!

Тушдан кейин жўнар бўлдик.
Файзиқул бизни айлантириб келгани бошлади.
Қишлоқ сиртдан каттагина кўринган экан, холос.
Битта узун кўча, ўн беш минутда адогига етдик. Этак-
даги сўнгги уйдан нарида чексиз-чегарасиз яланглик.

- Бундан нарида нима бор? - деб сўрадим Фай-
зикулдан.

- Даشت.
- Ундан нарида-чи?
- Мен бормаганман. Етимтоғ бор, дейишади.
- Жийдатепа қаерда, Жийдатепа?
- Жийдатепа? Ҳа, у... хув темирийўлнинг нарёғи-
да, - деди Файзиқул кафтини пешонасига соябон қилиб.
- Борайлик, - дедим.

- Э, анча узоқ-да?
- Майли, майли.

Жийдатепа - дўппидек келадиган пастак бир те-
палик экан. Ёнбошида ўтинга айланган уч туп қари
жийда.

«... бир жийдазор боғки, боши-адоги йўқ. Жийда гул-
лаганда ичига кирсанг, адашиб қоласан. Гуллари сап-са-
риқ, гуркираб ётади, бошларинг айланиб кетади...»

Онамнинг юрти!..
Наҳот онам шу яйдоқ ялангликларга, шу зебсиз
масканларга умр бўйи таъриф тополмай ўтган бўлса?

Шу бефайзгина оувулнинг афсонамакон эканига наҳот ўзи ҳам ишонган, бизни ҳам ишонтирган бўлса?

Дарё-дарё сувлар дегани – шу бўтана ариқми?

Хур шамоллар дегани – шу қутурган гармселими?

Ойдин оқшом дегани – чивин тўла кечаларми?

Бир жийдазор боғ дегани...

Онамнинг қариндошлари... қариндошларим билан хўшлашдик.

Сарпо-сурук, иззат-икром билан кузатиб қолдилар. Энди уларнинг борар ваъдасини олиб, жўнадик. Файзиқул машинасида поезд станциясигача кузатиб қўйди.

Поезд дашту биёбонларни, шаҳру қишлоқларни, поёнсиз пахтазорлар, яшил тутзорлар, боғу боғчалар, қадимий сардобалар, паст-баланд қирларни ортда қолдириб, онамнинг юртидан она юртим сари елиб бормоқда.

Нега юрагим орзиқиб кетяпти? Во ажаб! Она юрт дегани – онанинг юртигина эмас экан-да?

Чидаёлмадим, онамга кўнглимни очдим:

– Юрtingиз яхши экан, она, лекин барибир ўзимизниича келмайди, а?

Онам ярқ этиб қаради, шодумон қулиб келаётган кўзларида ғалати бир ҳайрат учқунланди, узоқ ўйланди:

– Юртнинг яхши-ёмони бўлмайди, болам.

Шунда мен онамнинг безовта кўзларига тикилдим ва нигоҳим қархисида шовиллаб ётган ҳудудсиз буғдойзорларни, ғарқ гуллаган жийдазор боғларни, зумрад адирлар узра хандон отиб кулаётган баҳтиёр бир қизалоқни кўрдим!

Раззоқ дераза олдида жимгина ўтирас, таажжуб билан бизга термилиб қолган эди.

...Қишлоққа ярим кечаси этиб келдик. Ҳаммаёқ қоронғи, тоғлар, боғлар сукутда – гўё нафасини ичига ютиб, бизни хавотирланаб, интизор кутаётгандек.

Неъмат АРСЛОН



РАЗ ҚИЗИ

Кўлбола мусаллас тайёрлашнинг янгича усулини ўргатган эди бир танишим. Гарчи бу соҳада уқувим ҳам, қизиқишим ҳам бўлмаса-да, танишим ўргатган усулни синаб кўриш учун эмас, ёки бир неча шиша текин мусалласга эга бўлиш учун ҳам эмас, азбаройи ток навдаларида чанг босиб ётган узумларга ачинганимдан худонинг неъмати исроф бўлмасин деган хаёл билан уч-тўрт челак узум уздим. Эшик ва унинг ёнидаги деразам олдида қатор ўсган ва менинг бўйрадеккина ҳовличамни бутунлай ўз тасарруфига олган ток навдаларида беҳисоб узум. Афсуски, истеъмолга деярли яроқсиз улар. Афсуски, хўраки нав эмас. Қора жанжал, хусайнин деб сотишган эди менга бу ток кўчатларини ниҳол бозорида. Олиб келиб экдим, бир йил, икки йил кутдим, учинчи йил нишона берди. Ток гуллади. Ва кўп ўтмай мosh ва нўхат катталигида ғўралар пайдо бўлди ток навдаларида. Уларга ҳар кун ўн марталаб ва балки юз марталаб қарайман, сабрим косаси лиммо-лим тўлган. Ва мана, ниҳоят июлнинг ўрталаридан бошлаб август ойининг биринчи деқадасида ғўралар тўлишиб рангга кира бошлади. Сабрсизлик билан бир ғужаласини узиб чангини артдим-да, оғзимга солдим. Нордонгина сувдан, уч дона данакдан ва уларни ўраб турган пўстдан иборат эди узум доналарининг борлиғи. Балки яхши пишса бошқача бўлар

деган умид билан ой охиригача кутдим ва шу давр орагида дам-бадам бир-икки шинча узиб таъмини татиб кўрардим. Узум ширага энди, аммо егулиги йўқ. Мана энди чумчуқлар, майналар ва ариларнинг қовоқхонасига ва балки майкадасига айланди менинг токзорим. Ана шундай кунларнинг бирида ўша танишим келиб қолди-да, бу узумнинг “Винний сорт” лигини айтиб, кўлбона мусаллас тайёрлашни маслаҳат берди. Унинг айтганини қилиб узумнинг чангини ювмасдан, думчаларидан тозаламасдан идишларга бостиридим, яхшилаб эздим ва чуваралари билан тўппасини токи шарбати тугагунча сиқиб, шарбатини сиздирмасдан машрапаларга солиб оғзига шланг тиқдим-да, хамир билан ҳаво кирмайдиган қилиб беркитдим. Унинг айтганларига оғишмай амал қилиб шлангнинг иккинчи учини сув тўлдирилган бошқа бир идишга солиб қўйдим. Машрапада ачиш жараёни бошланди ва шланг иккинчи идишдаги сувга онда-сонда бир-икки ҳаво пуфакчалари пуркаб қўярди. Кунлар ўтди. Бир кеча тун ярмидан оғиб, тонг оқара бошлагандан ниманингдир шарпасидан уйғониб кетдим ва сув ичиш учун ошхонага ўтдим. Одатдагидай шу ердаги стол устида турган курилмага қарадим-у, сув тўлдирилган идиш ичидан пайдо бўлиб қолган ажабтовур курилмага кўзим тушди. Унинг нималигига ақлим етмади дафъатан. Минглаб ва балки юз минглаб қўнғир тусдаги ва бир хил катталиқдаги, шаклу шамоили ҳам бир хил “ғиштчалар”. Афсонавий меъмор уларни ўзи чизган тарҳ бўйича терган ва қандайдир антиқа шакл берган.

Шиша тагида ҳосил қилинган сатҳ бепоён саҳрого монанд. Худди моҳир рассом мўйқалами билан чизилгандай. Олдинги қисмида нисбатан иирикроқ жисмлар кўзга ташланади, уфққа томон борган сари бу жисмлар майдалашиб қўнғир тусдаги текислик ҳосил қилган. Бутун вужудидан хаёл ва мунг ёғилиб турган ҳалиги антиқа қурилма... Қурилма десам тўғри бўлар-

микин? Унинг мўйлаби ҳам бор. Таг қисми саҳронинг қўнғир рангли кумлоқ сатҳига қўшилиб кетган, гўёки шу сатҳдан ўсиб чиққандай. Атрофи гир айланга учи ўткир ва осмонга томон тик юксалган ўнлаб кичикроқ тоқлардан иборат. Алоҳида қаср кўринишида улар. Ҳар бир кичик қаср орқа ва ён томони билан ўртадаги асосий иншоотга туташ. Ари инидай минглаб шинаклар, тирқишилар, деразаларда қоронғулик ва сукунат. Эътибор билан қараб иншоот қурилиши ҳали ниҳоясига етмаганини англадим. Дарҳақиқат, эртаси кун бино деворлари бир қадар юксалганини ва такомиллашганини кўрдим. Қаср атрофидаги майдонда ҳам янгиланиш бор. Кўзга кўринмас меъморлар туни билан ишлаган ва афсонавий иншоотнинг олд томонидан сув йўли ўтказиб, унинг устига кўтарма кўпприк қурган. Сув йўли тошқин тоғ дарёси кўринишида. Шу кунларда мени ҳайратга соляпти бу антиқа қурилма. Дам-бадам унга қарайман. Баъзан кун бўйи кетолмай қоламан унинг олдидан. Худди шундай иншоотни ҳали кўрмасдан туриб “Эшнинг ғаройиб кашфиёти” деган новелламда тасвирлагандим. Бугун ана шу кашфиёт ўта фантастик кўринишда кўз ўнгимда намоён. Дунёда рўй берадиган ҳодисалар баъзан инсон шуурида аввалроқ зухур этиб, кейин реал борлиқقا тушадигандай. Сифими уч литрли шиша банканинг ичидаги унинг макони. Шакли конуссимон, яъни қаландарлар кулоҳи кўринишида. Туси – қорамтири қўнғир. Учига томон борган сари ранги бироз рангсизланиб оч қўнғир тус олади. Энг тепасида оқимтири қалпоқчasi бор. Вулқон кратерига ҳам ўхшайди ўша қалпоқча. Учи ингичка, юқорига томон қайириб қўйилган. Бу жиҳатдан ўрмонда яшайдиган гномларнинг худди ўзи. Бошқа томондан қараганда шундай кўринади. Айрим пайтлар, тўғрироғи, сутканинг маълум бир қисмида (балки бу хона ҳароратининг ўзгариши билан боғлиқдир) ердан, яъни шиша банка

тагидан уч сантиметрлар юқорига кўтарилиганча муаллақ ҳолатда туриб қолади. Кундузи, куннинг иккинчи ярмида рўй беради бу ҳолат. Кейин пастлайди у ва ерга қўнади. Иншоотнинг ҳайратланарли яна бир томони пастдан юқорига тик кўтарилиган бурмалариридир. Бир ҳафтадирки уни кузатаман. Бугун Танзилани чақириб, унга ҳам кўрсатдим. Сўнгра банкани, яъни у яшаб турган оламни секин ярим доира айлантиргандим, буни пайқади иншоот. Иншоот дейиш тўғри бўлармикин, ҳаракатланиб, ҳамма нарсани: ҳаво ҳароратини ҳам, банкани оҳиста қимирлатганимни ҳам ва ҳаттоқи менинг кўз қарашимни ҳам пайқаб ва мен билан муносабатга киришиб, яъниким, менинг хатти-ҳаракатларимга жавоб айтиб турган жонзотни.

Бугун 27 август. Банкани кафталарим орасига олиб, чамаси икки дақиқалар турганимдан сўнг менинг бундай ҳаракатимга қарши норозилик билдириб мўйлабларини йиғишириб олди. Афтидан унинг мўйлаби бир қатор тушунчаларни ва иддаоларни, кези келгандা, қандайдир ҳиссиётларни ҳам ифодалар ва мўйлабининг бундай ҳожатбарорлигидан сўз ўрнида фойдаланарди Жонзот. Бамисоли Пуаронинг мўйлабидай. Қўлимни олмай туравердим. Баландроқ кўтарилиди, бурмалари орасидаги чизиқлар чуқурлашди, ҳозир шу ҳолатда қотиб турибди.

Соат 3. Тадқиқотни давом эттиromoқдаман. Диққат билан узоқ муддат ундан кўз узмай қараб, иншоотнинг билинар-билинмас силкинаётганини аниқладим. Кўзойнагим устидан яна бир кўзойнак тақиб қарагандим, (лупа йўқ эди менда) унинг вужуди майин чанг зарраларидан ташкил топгани маълум бўлди. Қанотларини ўша йиғишириб олган кўйи ҳали ёйгани йўқ. Банкага тегиниб унинг тинчини бузганимдан пушаймонман.

Соат 3/15. Назаримда, иншоот шимол томонга бироз оғандай. Бурмалари аниқ кўриняпти. Бошидаги

қалпоқчаси ҳам бироз оқарган. Юзасини чанг босган қорқопламасига ўхшайди. Банка тубида чексиз текислик. Ундаги суюқлик эса, нимранг ва кучсиз олма шарбатини эслатади ва қўнғир туманлиқдай тасаввур қолдиради.

Соат 4/15. Иншоот пастлаяпти. Аммо мен уни сира ҳам иншоот дегим келмайди. Ерга қўнишига 2 сантиметр бор. Ўнг томондаги ғилдиракчasi ерга тегай деб турибди. Чап ёнида учи юқорига томон қайрилган ихчамгина этикча. Унинг устида учи ўткир учбурчак шаклидаги аллақандай мўғиз. Худди каркидоннинг шоҳидай. Этикча ўша мўғизни юқорига томон тепиб юборадигандай ҳолатда. Умуман, иншоот жанубга томон қадам ташлаб бораётган улкан инсонни эслатади. Босхига ташлаб олган матоҳ оёқларигача тушиб турибди. Монах. Нариги хонадан мусиқа овози эшитила бошлади. Танбур навоси. Аммо мен мусиқани дастлаб эшитмадим. Иншоотнинг ҳолатида рўй бераётган ўзгаришни кўрдим дастлаб, бунинг сабаби нима? Иншоот титраётгандай ва унинг ичида қандайдир куч ташқарига ёриб чиқишига интилиб, хона деворларига босим ўтказаётгандай. Ана шунда ҳақиқий мўъжиза рўй берди. Қаср ичи ёришди. Тепада улкан қандиллар нур сочиб турибди. Ерда ўртаси яшил, икки четида қизил ҳошияли пойандоз. Адоғи кўринмайди унинг. Пойандознинг нариги чети туманликка қўшилиб кетган. Шундай бўлса ҳам, атрофга аланглаганча битта-битта босиб боравердим. Ҳамон эшитилиб туради жозиб куй. Англадимки, мени шу куй тортиб бормоқда. Уни ким чалаётгани, қайси хонадан эшитилаётгани қизиқтиради мени. Қаср деразаларидаги шишалар турли рангда. Шу боис пойандоз устига яшил, бинафша ранг, қизил ранглар, яъни нурлар тушиб турибди. Кўзим қамашади бу рангларнинг тиниқлигидан. Уларда ҳам чалинаётган куйнинг таъсири бор. Айниқса, яшил нурнинг четлари титраб куйнинг амплетудаси ва частотасини акс эттираётгандай. Ди-

лимни маҳзунлик қамраб олган. Менинг дилим ҳам қуйга монанд титраётганини ҳис этиб турибман. Рўпарада олтин суви югутириб нақшланган қўш табақали эшик намоён бўлди. Тутқич балдоқлари тиллодан. Эшикнинг кесакисига узум доналари катталигида қимматбаҳо топшлар қадалган. Остонада ўз аксимини кўрдим. Биллур ойна пойимда тиниқ сувдай кўринса-да, унинг сув эмас, ойналигини билиб турардим. Лекин нима сабабдан остона биллур ойнадан ясалганига ақлим етмай туриб қолдим. Гўзал Билқис ёдимга келди. Аёллар мамлакатининг маликаси Билқис! Не-не машаққатлар билан эришганди бу гўзал ва қайсар маликага ҳазрати Сулаймон. Билқис ғоят гўзал эди, аммо мутаносиблик бирозгина бузилган эди бу қизда, мен унинг оёқларини назарда тутмоқдаман. Ривоят қилишларича – ҳар тўқисда бир кусур деганларидаи – Билқиснинг оёқлари товусникига ўхшарди. Шу боис узун кўйлак кийиб юрарди. Аниқ ёдимда йўқ, Ҳазрат Сулаймон бўлсалар керак, қизнинг оёқларини кўриш учун мармар пол устини сувга бостириб кўядилар. Агар кузатган бўлсангиз, аёлларда қизиқ бир одат бор, улар тўпиққа ҳам чиқмайдиган сувдан ўтиш учун шоша-пиша кўйлаклари этагини тизза баробар кўтариб оладилар. Биллур остона ҳам шу мақсадда, яъниким ундан ўтаётган аёлларнинг оёқларини кўриш мақсадида қилинмаганмикин. Бир лаҳзалик ўйлар сўнгида чўчиб тепага қарадим. Бир бош узум. Офтобда қизара бошлаган ток новдасида осилиб турибди. Шаклан “Келин бермоқ” деб ном берилган узумга ўхшайди. Хусайнини узумнинг шундай тури бор. Ва ерга қараб биллур остоная унинг аксини кўрдим. “Хуш келибсан, Неъмат Арслон!” деган майин ва маст қилувчи овоз қулоғимга чалинаркан, бошим гангиди чор-атрофга алангладим. Ва ниҳоят, овоз эгасини кўрдим. Аммо кўзларимга ишонмадим. Овоз эгаси тепада, нақ осмон буржида осилиб турган ўша бир бош узум.

– Раз қизимисан, эй соҳибжамол? – дедим овозим титраб.

– Билиб туриб нега сўрайсан?

– Исминг ғоят ёқимли, такрор ва такрор айтгим келади, шу боис сўрадим.

– Билмадим, мени ҳазрат Навоий шундай атаганлар.

– Ўқиганман, нега сени пардадар ва маккора дея таърифлаганлар? Мана эшит:

Қилма раз фарзандидин, к-у ҳамдаму дамсозким,

Пардадардур асру бу шоҳидвашу маккора қиз.

Қиз кўксини тўлдириб нафас олди. Яъниким хўрсинди. Бу хўрсиниқда мен маккора эмасман, аслида пардадар ҳам эмасман, мени эзиб-мижиғлаб кўзага жойлаганлар шу ҳолга солганлар деган афсус бор эди.

– Кўнглингда шубҳа қолмаслиги учун буни ўз кўзинг билан кўришинг керак.

Шундай дея йўл бошлади қиз. Хумлар қатор тизилган хона, кўзачалар ва қадаҳлар... ҳаммаси биллурдан. Ҳаммаси узум боши ва доналари ва шинчалари кўринишида. “Бир хўша узум...” Навоий бир бош узумни бир хўша узум деб атаганлар. Яхши аниқ ва тиник сўз. Лекин нега Раз қизи?.. Узум билан қиз ўртасида боғлиқлик борми? Аввало, ана шу фикр таъсирида, ундан кейин, қизнинг дилидаги хижилликни тарқатиш учун Ҳазрат Навоийнинг мана бу мисраларини ўқидим:

Боғбонга чун ғино айлаб насиб иҳсонинг илги,

Хўша-хўша гаҳ зумуррад, гоҳ лаъли ноб осиб раз.

Табассум жилваланди унинг лабларида ва бир лаҳза кут дегандай ишора қилиб, зумрад япроқлар ортига паналади-да, зум ўтмай қаршимда намоён бўлди. Энди лаъл рангидаги шаффоғ кўйлақда турарди. Ерга тиз чўкиб унинг шабадада ҳилпираб турган этакларини ўпмоқчи бўлдим, аммо улгурмадим. Раз қизи яна ток навдалари ортига ўтди ва бу сафар қора либосда чиқиб

келди. Мен эса ҳамон тиз чўккан ҳолатда туарар ва бе-ихтиёр шивирлардим: “Гўзал Қора!”, “О, Гўзал Қора!..”

– Менинг бундан ҳам чиройли кўйлакларим бор, кийиб чиқайми?..

Бу савол менга эмас, унинг ўзига берилганини англаб сукутга бордим. Раз қизи бироз ҳаяллади бу сафар, ва ниҳоят, ўзидан аввал унинг этагига қўзим тушиб юрагим ҳаприқиб кетди. Таърифу тавсифга ҳам, қоғозга ҳам сифмасди унинг эгнидаги хилъатнинг ранги: қизғиш ва қорамтири ранглар қоришмаси! Қишлоғимизда бир қиз худди шундай кийинарди. Қизил баҳмал нимчаси бор эди ва бир ўрим қопқора сочи ана шу қизил “сайҳонлик” устида тўлғаниб ётарди. Менинг назаримда, катта бир мамлакат эди унинг елкаси... Ва дунёда бошқа бундай уйғунликни, рангларнинг бунчалик мутаносиб алоқасини ўйлаб топиб бўлмайди. Тагоби қорага табиат нафақат ана шундай бетакрор ранг берган, балки бетакрор таъм билан ҳам таъминлаган. Қора кишишдай ўта ширин эмас бу узум, қанди ўртача, серсув ва хушбўй... Бу бизнинг Шаҳрисабз ва Китоб томонларда етиштириладиган, хусусан, Тагоб қишлоғида яхши ўсадиган “Тагоби қора” эди. Бобо Занги ҳазратларининг номларига қасам ичиб айтаманки, кезиб чиқинг бутун дунёни, Вассарғами, Саперавими, Баян ширейми, мен номини билган-бilmagan узумлардан татиб кўринг, лекин пировардида Тагоби қорани қўмсаб Ўзбекистонга қайтасиз.

Абу Аъло ал-Мааррий “Жаннат ҳақида мактублар” асарида май ҳақида ғазал битган ўnlаб шоирларнинг исмларини келтириб, май тўғрисида ҳаммадан ўткариб шеър ёзган шоирларнинг номларини тилга оладилар. Хаёлимга келган шу фикрлар таъсирида хумлар оралаб борардим. Кейин биз осмонга парвоз этдик. Йиқилиб тушмаслигим учун қўлимдан маҳкам ушлаб борарди Қиз. Қайтиб ерга тушганимизда тонг оқара

бошлаганди. Кўзимни очиб ўзимни сифими уч литрли машрапа олдида кўрдим. Ердан уч сера чамаси (уч сатиметр) кўтарилган кўйи муаллақ турарди қаср... Узоқ вақт таъсирланиб юрдим.

Шиша ичида рўй берган жараён хушу фикримни қамраб олганди. Бу сирнинг тагига етиш мақсадида ўша мусаллас тайёрлашни ўргатган танишимникига бордим. Ва бўлган воқеани гапириб бердим. Бунинг ҳеч қандай мўъжизалик жойи йўқ, ачиш жараёнида ҳамиша шундай бўлади, деди бепарволик билан танишим ва мусаллас-нинг қандай чиққанига қизиқди. Зўр дедим, гарчи татиб кўрмаган бўлсам-да, мен ҳам бепарволик билан.

- Бориб олиб келишинг мумкин.

- Ўзинг-чи?

- Мен... Раз қизи билан қоламан.

- Юрагингдан урганга ўхшайди бирортаси.

Уйга қайтиб эшик тепасини ўраб олган вайишга қарадим. Ток новдаларида хўша-хўша узум...

...Кўп ўтмай ҳаёт тарзим ўзгариб кетди. Оилавий муаммолар сабаб бўлиб, яшаб турган уйимизни сотишга тўғри келиб қолди. Олди-сотди шартномасидан ке-йин бир ой рухсат беришди бизга, ана шу бир ой ичида уйни янги эгаларига бўшатиб беришимиз керак. Ора-дан йигирма тўққиз кун ўтганда янги хўжайин эшик олдида ҳозир бўлди. Ва эртага кўчиб келишини бил-дирди. Март ойининг охирлари эди ўшанда. Мен яна ўн кун муҳлат сўрадим. “Ҳали уй ололганингиз йўқми?” деди уйнинг янги соҳиби энсаси қотганини яширмай.

- Олганман.

- Унда нега ўн кун муҳлат сўраяпсиз?

- Апрелнинг биринчи декадасида ток гуллаши ке-рак.

- Токнинг нима алоқаси бор, яъни айтмоқчиман-ки... Ток гуллайди деганингизга тушунмай қолдим. Ток ҳам гуллайдими?

- Гуллайди.
- Атиргул гуллайди, ўрик гуллайди, лекин ток?... -
Елка қисди сұхбатдошим.
- Ток жуда чиройли гуллайди.
- Бөғимиз тұла вайиш, тонналаб узум оламиз, аммо токнинг гуллашини умримда күрмаганман.

- Бұғдойни-чи?
- Бұғдой?..
- Анжирни-чи?
- Анжир гулламайди. Бу аниқ.
- Анжир жуда чиройли гуллайди.

Ақлу ҳұшим жойидалигига шубҳа қилғандай би-роз үзини орқага олди сұхбатдошим. Анжирнинг митти-митти қизил гул очишини, фақат унинг гуллари инсон қалбіда яширин сақланадиган энг тоза севгидай, мевасининг ичіда пинхон сақланишини бу одамга тушунтириб ўтирадым. Биз әшик олдіда туриб ғаплашардик. Ҳали қуруқ чүпгә ўхшаб турған, аммо вужуди ер қаъридан сўриб олаётган шарбатта тұла ток танасига ва новдаларига қараб қўйди сұхбатдошим.

...Баҳорда яна гуллади менинг токларим. Кўзга деярли чалинмайдиган чанг зарраларидай майда ва кўримсиз гуллар ҳеч кимнинг эътиборини тортмас ва токнинг ҳам гуллаши ҳақидаги гап ҳатто эриш туюларди одамларга. Мен эса ана шу гуллар ичіда... Раз қизининг ана шу гуллар ичіда туғилишидан хабардор эдим. Гуллаётган ток новдаларига қарадим, вайиш тагида ўтириб Раз қизига бўлган муҳаббатимни нима биландир ифодалагим келди ва француз шоири Андре Теръенинг икки мисра шеърини таржима қилдим:

*Ток новдаси гуллар бардавом,
Тўламан йигирма ёшга бу оқшом.*

Хуршид ДАВРОН



АМИР ТЕМУР ЎҒЛИНИНГ ЎЛИМИ ҲАҚИДА РИВОЯТ

I

Қиши билан баҳор жанги – аямажуз кечаларидан бирида мен сизларга Амир Темур ҳақидаги афсоналарнинг бирини ҳикоя қилиб бериш мақсадида қўлимга қалам олдим.

Бу афсонани тўқиганлар унга қандай ном берганларидан бехабарман, мен уни “Амир Темур ўғлининг ўлими” деб атадим. Менга уни бир дўстим гапириб берган эди, дўстимнинг айтишича, бу қадим афсонани у талабалар шаҳарчасида яшаган афғонлардан эшитган экан.

Афсонани ҳикоя қилиб беришдан аввал, икки нарса ҳақида бироз бўлса-да, тўхталиб ўтмоқчиман. Энг аввало, “Афсона ўзи нима?” деган саволга жавоб изла-моқчиман. Одатимни канда қилмаган тарзда, ўзининг номукаммалиги билан машхур “Ўзбек тилининг изоҳли луғати”га қарайман. Мана, луғатнинг 1-жилд, 63-бетидаги “Афсона” сўзига ёзилган изоҳ: “1. Авлоддан авлодга, оғиздан оғизга ўтиб келган фантастик, баъзан диний мазмундаги ҳикоя, ривоят, достон... 2. Кўчма: асоссиз гап, ёлғон-яшиқ уйдирма... 3. Кўчма: ақл бовар қилмайдиган, ақлга сифмайдиган мислсиз

нарса, иш". "Афсонавий" сўзига оид изоҳ: "1. Афсона жанрига мансуб бўлган, фантастик. 2. Фақат афсоналарда мавжуд бўлган, одатда йўқ, хаёлий. 3. Кўчма: Уйдирма, тўқима. 4. Кўчма: Ақл бовар қилмайдиган, ақлга сиғмайдиган, мисли кўрилмаган, мислсиз".

Агар эътибор берган бўлсангиз, бу изоҳларга "уйдирма" сўзи асос қилиб олинган. Аслида, шундаймикан? Бир ўрис шоири "Афсона – бу ҳақиқатнинг синиқ парчалари" деб ёзган эди. Агар, "афсона" сўзига изоҳ беринг десалар, мен мана шу сўзни такрорлаган бўлардим. Зоро, ҳар қандай хаёлий ёки тўқима афсона ҳам, аслида, содир бўлгани аниқ, маълум бир тарихий шахс ҳаёти билан узвий боғлиқ бўлади. Бобил минорасининг қурилиши, Нуҳ тўфони ёки Самарқанддаги Шоҳизинда мозори билан боғлиқ афсона бўлсин, уларнинг ҳар бирининг асосида тарихий далил – ҳақиқат ётган бўлади. Шунинг учун ҳам жуда кўп қадимий битикларимиз қуидаги жумла билан бошланган: "Бул ҳикоят агарчи афсона тусида эрса-да, ул ҳақиқатдан йироқ эмасдур".

Инглиз адаби Честертон битганидек, афсона ҳар қандай далилдан ҳам тарихийроқдир. Далил ёлғиз бир одам ҳақида сўз юритса ёки у одамлар қатнашган воқеа ҳақида маълумот берса, афсона юзлаб ва миллионлаб одамлар тақдири ҳақида, воқеани юзага чиқарган одамлар ҳақида ҳикоя қиласи. Далил баъзан замон алмашиши билан ўз моҳиятини, ўз рангини ўзгартириши мумкин, аммо афсона абадий ўзгармас ҳақиқатдир. Тарих фақат халқ хотираси рамзи бўлмиш асттирлар (афсона ва ривоятлар) ёрдамидагина мозий моҳиятини, демак, унинг юрагини кашф эта олади. Хотирасиз инсон юраги ҳам қуруқ ҳужжатлар йиғиндисидан фарқ қилмайди. Тарих вақт ҳақида эмас, вақт мобайнида яшаган инсон ҳақида ҳикоя қилмоғи зарур. Демак, у вақт ҳужжатларига эмас, инсон хотира-

сига суянгандагина ҳақиқатни очади. Инсон хотираси афсоналарга ҳамнафас бўлгандагина тириқдир. Фақат шундагина тарихий далил тирилади. Афсона билан ҳужжат (далил)нинг ўзаро боғланиши аслида инсон билан вақт боғланишидир. Тарих, деб ёзади Николай Бердяев, том маънодаги афсонадир...

Тўхтамоқчи бўлган иккинчи масала мен сизга сўзлаб бермоқчи бўлган ривоят Амир Темур ҳаёти-нинг қайси тўхтамида бўлиб ўтган воқеалар билан боғлиқ бўлиши мумкин деган саволни ойдинлаштиришдир. Тарихий битикларнинг гувоҳлик беришича, Амир Темурнинг тўрт ўғли бўлиб, уларнинг исмлари: Жаҳонгир мирзо (1356–1376), Умаршайх мирзо (1356–1394), Амироншоҳ (Мироншоҳ) мирзо (1367–1408), Шоҳруҳ мирзо (1377–1447) бўлган. Яна шу нарса маълумки, улуғ Соҳибқирон тириклик пайтида, у олиб борган жангу жадалда унинг ёлғиз бир фарзанди – Умаршайх мирзо 1394 йилнинг қишида Шом уруши пайтида, Хармату қалъаси остонасида – тор бир дара-да ўқ тегиб ҳалок бўлгани ҳақида тарихий далил бор. Тўнгич ўғли бўлмиш Жаҳонгир мирзо ўз ажали билан 20 ёшида оламдан ўтган. Амир Темур вафотидан сўнг уч йил ўтгач, 1408 йилнинг кўкламида унинг ўртанча ўғли Мироншоҳ мирзо Қора Йусоф туркман билан бўлган жангларнинг бирида, Табриз яқинида ўлдирилган.

Хўш, Амир Темур ўғлининг ўлими билан боғлиқ афсона қайси воқеалар билан боғлиқ бўлиши мумкин. Агар уни Умаршайх мирзо ўлими билан боғлайдиган бўлсак, бу афсонани далили бўладиган воқеаларни Шом юриши баёнидан тополмадим. Ўйлашимча, бу афсонани афғонлар орасида мавжуд бўлиши боис, у Амир Темурнинг Ҳиндистонга қилган юриши даво-мида рўй берган воқеалардан туғилган бўлиши керак. Охир-оқибатда узоқ изланишдан сўнг “Темур тузукла-

ри"да бу афсонага бевосита боғлиқ маълумотларни топишга муваффақ бўлдим. Бироқ уларни сўзлаб беришдан аввал мен Ҳиндистон юриши қандай бошланганини мухтасар бўлса-да, ҳикоя қилмоқчиман.

Хижрий саккиз юзинчи, милодий 1398 йилнинг баҳорида Амир Темур янги боғи – Дилқушода мислсиз тантаналар билан Хизрхўжахоннинг қизи ўн икки яшар Тўкалхонимни ўз никоҳига қабул қилди. Тўй ўчоқларидағи кул совиб улгурмай, унинг амри билан Самарқанд ва Кеш оралиғида жойлашган Тахти Қора-ча довони оша ўтадиган йўлни тузатиш ва тоғ этагида яна бир ғаройиб бир боғ бунёд этиш ишлари бошланди. Соҳибқироннинг ўзи бўлса Кешга яқин бир ўлангда қурултой чақириди. Мақсади азалий орзуси: Ҳиндистон юриши маслаҳатини ўртага солиш эди. Салтанатнинг муҳим тадбирлари, бўлажак ҳарбий юришлар режала-ри муҳокама этиладиган қурултой Амир Темур давлатининг олий кенгashi эди. Шу билан бирга қурултой мамлакатнинг бош тантанаси бўлиб, Соҳибқирон қўли остида бирлашган ўлкаларни бошқариш билан банд амирзодалар ва бошқа давлати арконлар учун худди жанг майдони билан баравар, ҳатто ундан юқо-ри турадиган ўзига хос синов майдони ҳам эди. Агар жанг майдонида диловарлик синалса, бу кенгашда фаросат ва тадбиркорлик синовдан ўтарди. Бу сабаб-дан бўлса керак, жанг майдонида қўркув нималигини билмаган айрим амирлар ва амирзодалар қурултой чақирилганда саросимага тушиб қолишар, унда қайси бир тадбир ўртада муҳокама бўлишини билиш учун бор воситаларни ишга солардилар. Илло, жаҳонгир жанг майдонида қилич чопқилашдаги моҳирликни, қурултойда эса ўйлаб айтилган сўзни маъқул кўрар, ким аравани қуруқ олиб қочса, машваратдан қувиб чиқаришдан ҳам қайтмасди. Аммо бу галги қурултой қай мақсадда чақирилаётгани ҳеч кимга сир эмасди.

Ҳар галгидек қурултой кўпчилик учун қурилган улкан чодирда ўтди. Амир Темур одатдаги расм-руслар адо этилиши билан, гапни чўзиб ўтирмай, Ҳиндистон юриши олдидан ўғиллари ва амирларнинг кўнгли, ўй-фикрларини билиш мақсадида уларни маслаҳатга чақирганини айтди. Туркий сулолаларнинг азалий тартиби ва мукаррам дастури шундай эдиким, катта оғалари ва хешлар ҳаёт экан, ҳеч ким улардан ўтиб салтанат тахтига қадам қўёлмасди. Мана шу боболар одатига биноан қурултойдаям ёши улуғ шаҳзодалар биринчи фикр билдириш ҳуқуқига эга эдилар. Шунинг учун ҳам даврада Соҳибқироннинг кенжা ўғли Шоҳруҳ мирзо ўтирган бўлса ҳам, биринчи сўзлаш ундан ёш жиҳатдан улуғ Муҳаммад Султон билан Пирмуҳаммад Жаҳонгир ихтиёрида эди. Пирмуҳаммад Жаҳонгир бобосига бир қараб олди-да, унинг “Хўш” дегандек синчков тикилиб турганини кўриб гап бошлади:

- Ҳазрати Соҳибқирон, Ҳиндистонни олмоқ ер юзида ўтган барча подшоларнинг орзуси бўлмиш. Агар ани забт этсак, аниг олтинлари ила етти иқлимни олажакмиз. Мен юришга тайёрдурмен.

Туғишган биродарининг бу гапини эшишиб амирзода Муҳаммад Султон ҳам ўрнидан турди. У инисидан бир ёш улуғ бўлса-да, қотмадан келганлиги сабабли ундан анча ёш кўринар, буни билган амирзода кўпроқ овозига зўр бериб, катталарга хос мулоҳаза истагида ҳар бир сўзга алоҳида урғу бериб гапириш лозим, деб ўйларди. Амир Темур оға-ини ўртасидаги баҳсни ма-роқ билан кузатар ва бевақт шаҳид бўлган ўғлига кўрсатолмаган меҳр-марҳаматини улардан аямасди.

- Олампаноҳ, – дея улуғворлик ила сўз бошлади Муҳаммад Султон, – иним Пирмуҳаммад Жаҳонгир айтгани ростдур. Ҳинд мулки бафоят бой юрт. Аммо сиз берган сабоқ ҳамиша ёдимда. Яъниким ҳар бир ишни

қилишдан аввал унинг амалини ўйлаш жоиздур. Китоблардан маълумдирким, Ҳиндистон йўли кўп машиқатлидур. Энг аввало, бир неча қор босиб ётган тоғлару кечиб ўтиш мушкул дарёлар, ундан кейин чеки йўқ ўрмону тўқайзорлар бордур. Иккиласми, мақсадга етгунча бебош афғонлар билан жанг қилиш ҳам зарур бўлғай. Яна китобларда айтилмишким, Ҳиндистонда одамхўр филлар ҳам жуда кўп бўлармиш...

Амир Темур инисининг мулоҳазаларини эшитган Пирмуҳаммад Жаҳонгир безовталана бошлаганини сезди. Аммо буни билдирамай, набирасининг мулоҳазаси қандай таклиф билан тугашини кутди. Қурултой расм-русми ҳар бир сўзни эътибор билан эшитиш лозимлигини талаб қиласарди. Хўш, қани, тўнғич набираси нима демоқчи экан, шуни билсин-чи. Аммо Муҳаммад Султон ҳам инисининг аҳволини сезган бўлса керак, одатига хилоф равишда шошиб сўзини якунлади:

– Бу мулоҳазаларим ила Ҳиндистон юришига пухта тайёргарлик кўриш лозим демоқчиман. Мен урушга шаймен. – У сўзини тугатиб, инисининг ёнидан жой оларкан, унинг юзидағи мамнуниятни сезиб, кўнгли жойига тушди.

Шундан сўнг соҳибқиронга қизидан туғилган набира бўлмиш амирзода Султон Ҳусайн навбат олди. Амир Темур қизи Оғабегим ва малика Туман оғонинг биродари амир Муҳаммад ибн Мусодан бўлмиш бу амирзода бағоят мард, аммо беоқибат бўлиб вояга етганини яхши билса-да, ҳар гал қизининг сўзини қайтаролмай, бу бадбаҳт йигитнинг гуноҳидан ўтиб келарди. Ўз ўғиллари ва уларнинг фарзандларига бағоят қаттиқ турган Соҳибқирон бу ҳовлиқма амирзодани жазосиз қолдириб келаётганини ҳамма билар, аммо сабабидан бехабар эдилар. Наҳотки, қиздан туғилган набира ўғиллардан суюклироқ бўлса? Амир Темурнинг бу набирасига лоқайдлигини унинг қизига

кўрсатган карами бўлмай, балки Султон Ҳусайннинг салтанат таҳтига ўтиришга лойиқ бўлмаганлар тоифасига киришидан эди.

- Ҳазрат Соҳибқирон, – деди тантанавор оҳангда Султон Ҳусайн. – Агар биз Ҳиндистонни илгимизга кирита олсак, тўрт иқлимга – Туркистону Турон, Эрону Ҳиндга хукмрон бўлурмиз. Қолғон уч иқлим: Рум, Шом, Чинни эса олмоқ қийин эмасдур, албат олғаймиз.

Султон Ҳусайн санаб ўтган иқлиmlарни худди ўзи оладигандек, аллақандай ички кибр билан даврадагиларга кўз ташлаб, ўрнини эгаллади. Бобоси вафтидан сўнг мана шу кибр унинг бошига кўп ғавғолар солишидан у ҳали бехабар эди.

Амир Темур сўз навбатини олган кенжা ўғли Шоҳрух мирзога диққат билан тикилди. Бу фарзанди бошқа зурёдларига қараганда, китобга ўч чиқди. Унга китоб бўлса бас, қилич чопқилашни унутади. Аммо китобхонлигиданми, сўзи, мулоҳазалари пишиқ, ўзи ҳам кўпни кўрган қариядек босиқ эди. Айтадиганини пухталаб олмаса, оғиз очмасди.

- Падари бузрук, ҳазрати Соҳибқирон, – дея гап бошлади Шоҳрух мирзо шошмасдан. Унинг ҳатто гапираётган пайтидаям нималарнидир ўйлаётганини сезиб Амир Темурнинг ғаши келди. – Мен аждодларимиз бўлмиш туркларнинг қонунлари битилган китобларда ўқиган эдимки, жаҳонда бешта шон-шавкатли подшоҳ бўларкан. Ривоят қилғайларким, бу подшоҳларнинг улуғлигини алоҳида таъкидлаб, уларнинг номларини атамай, лақабларини олиб айтғонлар. Яъниким Ҳинд подшосини – рой, Рум подшосини – қайсар, Чуну Мочин подшосини – фағфур, Туркистон подшосини – хоқон, Эрону Турон подшосини – шаҳоншоҳ атайдилар. Биз хукм юргизган юрт ҳукмдори, яъниким шаҳоншоҳ ҳукми ҳамиша Ҳиндистон мамлакатларига жорий этилмиш. Токим Эронзамину Ту-

ронзамин бизнинг илкимизда экан, Ҳиндистонни ҳам ўзимизга тобе этмоғимиз жоиздур...

Амир Темур кенжা ўғлининг сўзларини тинглар экан, бир зум сўнгги пайтларда юрагини туну кун безовта қилган валиаҳд ташвишига берилди. Тўрт ўғлидан иккиси бевақт кўз юмди. Шоҳруҳ бунаقا, Мироншоҳ бўлса, ўйламай иш қиласидиганлар тоифасидан. Маст бўлиб, отдан йиқилиб калласи лат егандан буён унинг бетайин қилмишлари яна ошди. Суюкли келини Хонзодабегим яқинда эрининг зулмидан дод уриб, унга бош уриб келди. Мироншоҳнинг валиаҳд бўлиши мамлакатни вайрон бўлиши демакдир. Бунга эса асло йўл қўйиб бўлмайди. Нобакор ўғилни жазолашни кўнглига тугган соҳибқирон бу тадбирни Ҳиндистон юришидан кейинга қолдиришга мажбур эди.

Амир Темур секин Пирмуҳаммад Жаҳонгирга кўз қирини ташлади. Ҳа, бу набираси ҳавас қилгулик баҳодир бўлди. Ўзиям қуйиб қўйгандек бобосининг ўзи: қадди қомати барваста, елкадор, бошиям бобосиникидек, хумдек келади. Қоши-чи, қоши? Ариқ четидаги ажриқдек қалин, кўзлари қилич дамидек товланади. Феъл-авториям бобосиники, на ёғийдан, на ўлимдан кўрқади. “Ёпирай, – дерди баъзан камдан-кам ҳайратланадиган соҳибқирон. – Мени тириклигимда Аллоҳ таоло яна қайтадан яратдими?!” Набирасининг ёлғиз бир хислати унга маъқул келмасди. Кўпчилик бошини қовуштиришни билмайди. Мардлик одамлар дилини мафтун этса, оқибатбардорлик, фаросат юракларни абадий банди этишини ҳали англамайди.

Амир Темур ўғли Шоҳруҳ мирзодан кейин ўз мулоҳазасини айтишга бирон-бир амир шошилмаётганини кўриб, хушёр тортди. Сукут чўзилганидан тоқатсизланиб:

– Хўш, – деди у баланд овоз билан. Аммо амirlар жим ўтиравердилар. Соҳибқирон жаҳли чиқса-

ям, ичидагини юзига чиқармади. Индамай кутишни маъқул кўрди. Бу бахтичопганлар унинг неча йилдан бўён Ҳинд мулкини забт этиш ҳақида орзу қилишидан яхши хабардор. Наҳотки, билиб ҳам билмасликка олсалар, жим ўтиришни маъқул кўрсалар? У ўзининг деярли барча юришларида қатнашган, садоқатларини неча марта жангу жадалда намойиш этган амирларга бир-бир тикилар, амирлар эса унга бош кўтариб қарашга мажол тополмасдилар. Охири у Амир Шоҳмаликка қаттиқ тикилиб тураверди. Унинг бу боқишини туйган амир секин бошини кўтаришга мажбур бўлди.

– Тақсиримнинг сўзлари йўқми? – деди соҳибқирион бўғиқ овоз билан.

Амир Шоҳмалик ўрнидан туришга мажбур бўлди. Амир Темур унга: “Ўтириб гапиравер” деб ишора қилгач, ўрнини эгаллади. Бироз тараддувланиб, кейин оҳиста арз қилди:

– Аълоҳазрат, сизнинг амрингиз биз учун вожибдур, ундан юз ўгириш тузингизни унутмоқдур. Биз бу тадбир хаёлини дилларимиздан, бамисли жавоҳир туйнукларидан ўтган ипдек шошилмай ўткардик, – у биз деганда амирлар Хожа Юсуф, Сарибуғо, Шайх Нуриддинларга ишора қилди. – Борингки, Ҳиндистонни олдик ҳам дейлик. Бироқ у мулкда турғун бўлиб қолсак наслимиз йўқолмагайму, авлодларимиз ўз аслидан айри тушмагайму, бегона юртда тилларини унумагайму?..

– Тақсири, – деб унинг гапини бўлди Амир Темур хотиржам. – Биз ул мулкда узоқ қолишни ўйлаганимиз йўқ. Қолаверса, шуни ёдда тутингким, дилда эътиқод бутун бўлса, асло наслимиз йўқолмагай, тилимиз унумилмағай... Эътиқод сусайса, тил эмас, имон ҳам унумилғай...

У хотиржам гапираб, аммо қошининг йиғилиб туриши, кўзидағи ўтнинг янада кучлироқ товлана бош-

лаганини пайқаган амирлар Соҳибқирон ичидა қандай кучли тўйон ўйнаётганини сезиб туришарди.

– Кўпчиликда шубҳа бўлса, йўлга чиқмаган маъкул. Шубҳа нафақат ақлни, у дилдаги ўтниям ўчиради. Келингиз, Тангри таолога мурожаат қиласайлик. Ҳинд мулкига юриш борасида истихора этайлик. – Амир Темур ёнида турган Қуръонни қўлига олди. – Тангри таоло нени буюрса, шунга амал қиласаймиз.

Даврадагилар ўша заҳот унинг таклифини маъкуллаб овоз бердилар. Соҳибқирон Қуръони каримни олдидаги шира устига қўйди, чуқур нафас олиб, бироз сукут сақлади-да, кўзини юмиб китобни очди. У аввал очилган саҳифадаги оятни ичидা ўқиди, сўнг баланд овозда такрорлади:

“Эй, Расулуллоҳ, кофирларга ва мунофиқларга қарши жаҳл қилғил”.

Амир Темур бир четда турган мавлоно Фахриддин қорига тикилди. Мавлоно Соҳибқирон истагини уқди, оҳиста ўрнидан туриб оят мазмунини изоҳлаб берди. Амирлар мавлононинг изоҳини эшитгач, бошларини эгиб, жимиб қолдилар.

– Хўш, – деди Амир Темур.

Аммо бу гал ҳам амирлар ўз фикрларини айтишга шошилмадилар. Буни кўрган соҳибқирон жаҳлини яширолмади.

– Тақсирларим, нечун жимсиз? Ё Аллоҳ таоло ҳумми сизга хуш келмадими?.. Мен сизни салтанатим устунлари деб билдим, ҳамиша иззатингизни унутмадим. Сиз эса унутдингиз... Сабаби недир? Сиз билмасангиз, мен яхши билурман. Турган сув сасийди, юрган одам яшаради. Агар сиз толиқжан бўлсангиз, илгингизда мадор қолмоғон бўлса, лашкарни топширинг. Неча-неча бўз йигитлар бизгаям навбат етадиму, деб кутиб турғайлар. Аллоҳ гувоҳ, Ҳиндистонни сиз эмас, шул ўғлонлар албат забт этғай...

Соҳибқироннинг важоҳатини кўриб, айниқса, унинг сўнгги сўзларини эшитган амирлар бирин-кетин ўринларидан туриб афв тиладилар. Амир Темур уларнинг сўзини хотиржам эшишиб деди:

- Сиз ила не-не жангу жадалларда бўлдим. Сиз менга, мен эса сизга суяндим... Ҳар қанча юрагимни қон қилдингиз, афв этдим. Бугун борингғиз, эртагача ўйланғиз...

Эртаси давом этган қурултой аҳли бир овозда бўлажак юриш режасини маъқулладилар. Дили равшан тортган Амир Темур қўл кўтариб, зафару фатҳ фотиҳасини ўқиди.

Қурултойдан ярим ой ўтар-ўтмас, Соҳибқирон бошлигидаги улкан қўшин Қашқадарё воҳасини тарқ этиб, Термизга яқин ерда Жайхундан кечиб, Хуросон худудига ўтди.

У бутун ёз давомида Андароб деган жойда бўлди. Саккиз юзинчи йил зулҳижжа ойининг бошида – 1398 йилнинг августида Амир Темур Панжшир дарёси ёқалаб Кобулга қараб йўналди. Шу ерда унга бўлажак юришда омад тилаган Олтин Ўрда элчиларини қабул қилди. Элчилар бир неча муддат ўтиб қайтишга рухсат сўрагандан кейин, уларнинг карвонини қўриқлаш учун бир гуруҳ аскар ажратди. У бу ишни элчиларни ўйлаб эмас, шу карвон билан дорилмулкка қайтиш лозим топилган Сароймулхоним билан Шоҳруҳ мирзонинг ўғли, тўрт яшар набираси Мұҳаммад Тарағай хавфсизлигини таъминлаш учун қилган эди.

Бундан ўн етти йил аввал қўлга киритилган Хуросон мулкининг бу қисми ҳамиша нотинч бўлиб келган. Ҳиндистон юришини мақсад қилган Соҳибқирон шу сабабдан ҳам қўшин ортини мустаҳкамлаш ниятида Кобулни тарқ этиб, Сулаймон тоғлари яқинида яшаган афғон қабилалари ва исёнкор қора кийимлилар – сиёҳпўшлар номи билан машҳур исёнчиларни

тавбасига таянтириш, ўзининг кўнглини тинчлантириш билан машғул бўлди. Қолаверса, бу тадбир Ҳинд сultonини чалғитишнинг йўли ҳам эди. Гўё ўзини Ҳиндистонни забт этиш учун эмас, мана шу бебош қабилаларни итоатга келтириш учун келган қилиб кўрсатмоқчи бўлди.

У вақт этиши билан ўттиз минг аскарга раҳбар бўлмиш амирзода Пирмуҳаммад Жаҳонгирга Сулаймон тоғини ошиб, Синд дарёсини тўхтамай кечиб ўтиб Мўлтон вилоятига, амирзода Мұҳаммад Султон билан амирзода Рустам бошчилигидағи ўттиз минглик қўшинга эса Синд дарёси ёқалаб Кашмир тоғи этагидаги йўлдан юриб Лоҳур вилоятига босқин қилишга фармон берди. Ўзи бўлса қўшиннинг асосий қисми – ғул билан Бадахшон томонга йўналди ва тоғ ошиб Ҳиндистон сарҳадларига бостириб кирди. Ҳиндистон юриши ҳақида бошқа бир ҳикоямизда ба-тафсил тўхталиш ниятимиз борлиги сабаб, биз асосий мақсадимиз – сизга сўзлаб бермоқчи афсонани келтириб чиқарган воқеаларга ўтишни маъқул кўрдик.

Амир Темур, юқорида айтганимиздек, қўшин ортини мустаҳкамлаш мақсадида афғон қабилалари томонидан вайрон этилган бир қатор қалъаларни қайта тиклатган ва уларда ўз одамларини қолдирган эди. Мана шу қалъаларнинг бири Ироб қалъаси эди. Пирмуҳаммад Жаҳонгир Мўлтонга юриши олдидан ўзига содиқлик сўзини айтган Лашкаршоҳ афғонни мана шу қалъанинг кутволи қилиб тайинлаганди. Амир Темур қўшини Ҳиндистонга қараб йўлга чиқишидан фойдаланган каркас деб аталган афғон қабиласининг бошлиғи Мусо афғон келиб қалъани қўлга киритди ва кутвол Лашкаршоҳ афғонни қатл этди. Ўлдирилган оғасининг қасосини тилаган Малик Мұҳаммад Соҳибқирон хузурига бош уриб борди. Амир Темур узоқни кўзлаб иш тутди: гўё бечора инининг ўтинчи-

га қулоқ солмаган бўлиб, уни қамаб қўйишни буюрди. Сўнг Мусо афғонга хузурига келишни талаб қилиб ёрлиқ юборди. Мусо афғон келган чопардан қон ўчи талаб қилиб борган Малик Мұхаммад қамоққа тушганини эшишиб, хотиржам тортди. Аммо Амир Темур қўшини қалъага қараб келаётганидан воқиф бўлгач, унга пешвоз чиқиб, қалъани пешкаш қилишни маъқул деб топди. Аммо у ўз аскарларидан бирига Амир Темур қалъага кириши билан ўқ узиб, уни ҳалок этишни буюрган эди. Аммо пасткаш ниятига етмади. Узилган ўқ хато кетди. Мусо афғон қилмишига яраша жазоланди, у қатл этилди.

Айнан мана шу воқеа йиллар ўтиб афсонага асос бўлганига шак-шубҳа йўқ. Лашкаршоҳ афғондан аввал қалъада Пирмуҳаммад Жаҳонгир тургани учунми, афсонада Амир Темур ўғлининг ўлими ҳақида ҳикоя қиласади. Набиранинг ўғилга айланиши эса фақат афсоналарда эмас, ҳатто тарихий китобларда учраб турадиган ҳолдир. Қолаверса, Пирмуҳаммад Жаҳонгир Амир Темурнинг кенжা ўғли Шоҳруҳ билан деярли тенгқур эди. Энди навбат афсонага...

II

Дунёнинг тўрт тарафига қўз тиккан Соҳибқирон Амир Темур қўшини жангари афғон қабилалари билан бўлган оғир жанг жадалдан сўнг дарё ёқасида қўққайиб турган улкан қоя устидаги қалъани қўлга киритди. Қалъа жуда кичик, аммо баланд девор билан ўралгани учун ғоятда кучли истехқом эди. Шунинг учун ҳам қалъанинг қўлга кириши қийин бўлди. Аникроғи қийин бўлиши мумкин эди. Аммо кутилмагандა қалъа хиёнат туфайли унинг қўлига жуда осон ўтди.

Хиёнат қалъа жийбахона бошлиғи томонидан бўлди. У дастлаб мактуб қатиб боғланган ёй ўқини Соҳибқирон аскарлари томон учириб, тун яримдан

оғганда мағриб томондаги дарвозани очажагини ха-бар қилди. Мунший хатни унга ўқиб берар экан, хукмдор ҳали афтини қўрмаган жийбахоначидан қаттиқ нафратланди. “Кўрнамак”, – деб ўйлади у мунший хиргоҳдан чиқиб кетгач. У узоқ ўйлади. Ҳукмдорлари берган туз ҳақини унубиб, вафодорлик ва садоқатни бир чеккага йиғишириб, унинг олдига не-не одамлар бош уриб келмаган. Лекин у ҳар сафар бу хоинларни лаънатлаган. Туз ҳақи ва вафодорликни унубиб, хизмат вақтида ўз соҳибидан юз ўгириб унинг қошига келган ҳар бир юзсизни ўзига ва салтанатига энг ёмон душман деб билган.

Зеро, улар ўз соҳибига вафодорлик қилмагач, унга қиласмиди?

Аммо Соҳибқирон хиёнатдан фойдаланишдан юз ўгирмас, ундан усталик билан фойдаланаарди. Ахир, қай бир саркарда ўз жангчиларининг бекордан-бекор қурбон бўлишидан сақлайдиган йўлдан фойдаланишни истамайди. Хиёнат инсон юрагини қурт каби кемирган фасоддан, мамлакатда лоқайдлик туфайли юзага чиқкан парокандалиқдан, хуллас, ҳам устки таназзулдан туғилишини у яхши биларди. Шу сабабдан ҳам ҳар лаҳза ҳар бир сипоҳий, ҳар бир қўшин бошлиғи, ҳар бир амир боши устида унинг қаҳри айланиб туриши зарурлигини унутмас, уларни умид ва кўрқув ўртасида тутишни лозим кўтарди.

Агар жийбахоначи хиёнатга юз тутган экан, ундан фойдаланмоғи савоб, илло, уни бу ҳаром йўлдан қайтаришнинг иложи йўқ. Иложи – ўлим.

Қалъя тонгга яқин ғарбий дарвозанинг кутилмаганда очилиши туфайли унинг қўлига ўтгач, қарорини фармонга айлантириб, қалъя кутволи билан жийбахона бошлиғини ўлимга буюрди.

Бир-икки кун лашкарга дам бериб бўлгач, соҳибқирон қалъада ўғли бошлиқ қўшинни қолдириб, бошқа

шаҳарлару қалъаларни забт этиш қасдида шитоб билан отланиб, йўлга тушди.

Йўлга тушган қўшиндаги аскарларнинг сонсаноғи йўқ эди. Уларнинг отлари минг фарсангдан ортиқ йўл боссаям ҳали толиқмаган ва шамолдек учқур, қиличлари олмосдай ўткир, юракларига қўрқув тушмаган эди. Қўшин шундай шиддат билан борардики, гўё саратон маҳали қамишзорга тушган ўтдек тўхтовсиз эдилар. Бошларидаги симобий дубулғалар кунтифида ялт-юлт товланар экан, ўша замонда яшаган муаррих таърифлагандек, “Қўшин кежим, зирҳ ва жавшанлар қўплигидан темир тоғи каби эди, гўё темир тоғи эриб кетиб, дарё бўлиб оқуб борар, бу қоим юз минг коинотни ютиб юборадиган улкан наҳангдек жилвагар эди”.

Бу қўшин ўтган йўллар чанги ҳафта ўтмасдан тўхтамас, бу темир оқим тўхтаб ҳордиқ олган ям-яшил ўлангларда қайта ўт унмас. Ўт униши учун ёмғир асрлар давомида отлар туёғидан эзилиб ўлган тупроқни юмшатиши, қуёш юз йиллар мобайнида бу тақир майдонларга ўз меҳрини тинмай сочмоғи керак эди. Олис тоғлар қоялари устида пода ўтлатиб юрган афғон чўпонлари биёбон ўртасида тўсатдан пайдо бўлган симобранг дарёни кўриб, Аллоҳ таолонинг иродасидан ҳайратланиб, тасаннолар айтишарди.

Мана шу улкан қўшин тўхтаб Синд дарёси соҳилида ҳордиқ олаётган пайтда Амир Темурга куни кеча забт этилган қалъадан чопар келганини айтдилар. “Кирсин!” – деди Соҳибқирон дарёдан урилган салқин шабададан оҳиста тебраниб турган хиргоҳ пардаларига тикилганича. Амир Темур югуриб ичкарига кирган чопарни таниди. У шаҳзода ўғли хизматида юрган уйўғлонларнинг бири эди. Уйўғлон кира солиб, тизза чўкиб ва бошини эгиб, синиқ овоз билан сўзлади:

– Онҳазрат, шумхабар келтирганим учун бошимни олинг.

Унинг бу сўзини эшитган Амир Темурнинг бир мўйи ҳам қимирламади. У ҳузурига кирган сонсиз чо-парлардан бу сўзни неча марта эшитган, санаса, саноқдан адашмоғи мумкин. Кўпинча бу сўз билан бошланган хабарлар унинг қулоғига етишга ҳам арзимас бир гап бўлиб чиқар, Соҳибқирон одамларнинг ваҳимага ўчлигидан ҳайрон қоларди. Бирдан ўйига: “Наҳотки, ўғлимга бир гап бўлган бўлса?” деган гап келди-да, сергак тортди.

– Сенинг жонинг Аллоҳники, олдин сўйла, агар Аллоҳ олдида жавобгар бўлсанг, бошинг шаксиз кесилғай. Агар менга нисбатан айбли бўлсанг, ҳукмни машойихлар айтурлар...

– Аввал бир қошиқ қонимдан кечинг, онҳазрат, – деди уйўғлон сапчадек кичик бошини кўтармай.

Амир Темурнинг ғазаби қайнади. “Нима бало, бу сакбачча, менинг иродамни синамоқчими?”

Бирдан дарёдан эсган шабада юзига урилди-ю, Аллоҳнинг бу неъматидан яна кўнглига хотиржамлик чўкди.

– Кечдим, гапир, – деди ҳорғин товуш билан Соҳибқирон.

Чопар ортиқ пайсалласа, айтадиган гапи ўзи билан риҳлатга кетишини англади-ю, бошини сал кўтарди. Шунда ҳам ҳукмдорнинг юзига қарашга журъат қилолмай, гап бошлади:

– Улуғ Соҳибқирон, сиз қалъани тарқ этгандан сўнг лаънати ёғийлар ногаҳон уни қамал айладилар. Неча кун жанг бўлди. Аммо кучимиз озлик, захирамиз носозлик қилиб мағлуб бўлдик. Ёғийлар қалъага биз билмаган яширин еrostи йўлдан кириб олди. Қалъанинг қўлдан кетмоғи аён бўлгач, бемонанд шаҳзода мени сизнинг ҳузурингизга жўнатди. Неча ўлимдан

қолиб, минг ғавфо билан қалъадан чиқишига муваффақ бўлдим.

– Ўғлимга нима бўлди, утирикми? – деб секин сўради Амир Темур. Унинг овозидаги совуқдан чопарнинг этлари жимиirlаб кетди. Сўнгра зўрға овоз чиқарди:

– Билмайман, Соҳибқирон, билмайман, – унинг жағлари титрарди. – Мен қалъадан чиқиш саъй-ҳаракатини қилаётганимда, жанг жийбаҳона олдида бораётган, ўғлингиз жангнинг ўртасида эди.

Амир Темурнинг ичига ўт тушгандек бўлди. Секин атрофида турган ичкарилару номбардорларга разм солди. Бирор-бир кўз очиқдан-очиқ унга тикилиб турганини кўрмади. Аммо ҳамманинг юзида ташвиш аломати зоҳир эди. У бир дам ўйга ботиб турди-да, секин пичирлади:

– Ҳозирнинг ўзидаёқ қўшин йўлга отлансин. Ёғийлар муносиб жазолансунлар. Ўғлим тирикми, ўликми топилсин.

Назарида фармонини қўшинга етказишига жавоб гар товачи суст ҳаракат қилаётгандек туюлди. Бир ҳаракат билан ўрнидан иргиб турди-ю, ғазаб билан бақирди:

– Бўғозмисан, онағар. Агар яна шундай пайсалласанг, қорнингни ёриб, қонингни оқизганим бўлсин.

Пак-пакана, қориндор товачи хиргоҳдан ўқдай отилиб чиқди. “Худо бир асрэди, Худо бир асрэди!” деган ўй чопиб бораётган товачининг миясини кемиравди.

Дам ўтмай темир тоғ эриб, улкан оқинга айланди ва кечагина ўтилган, ҳали чанг-тўзони босилмаган йўллардан илондек буралиб оқа бошлади. Энди бу қўшиннинг шиддати яна ҳам жадал, навкарлар дилида қасос ўти ёнар, отлар қамчи зарбидан аламзада йўртиб борар эдилар. Темир оқим бир неча кундан сўнг душман қўлига ўтган қалъани уч томондан ўраб олди.

Тўртинчи томонда эса юксак қорли тоғлардан тушиб ҳали қўлга ўргатилмаган беасов тойдек ҳаприқиб, гувиллаб улкан дарё оқиб туради. Агар ўша тоғлар томонда пода ўтлатиб юрган ўша афғон чўпони ҳозир қалъа томонга кўз ташлай олганида эди, улкан биёбон қаърида туғилган номаълум симобранг дарё улкан қояга – қалъага урилиб иккига бўлинниб асрлар давомида оқиб турган ўзларига таниш дарёга қўшилаётганига кўзлари тушарди. Агар улар эртаси ҳам ўша томонга қараганларида эди, кечаги бирдан пайдо бўлган симобранг дарё йўқлигини, улкан қоя атрофида эса улкан кўл пайдо бўлиб қолганини кўрган бўлардилар. Бу кўл кечаси олов комига айланиб, ундан таралган ёғду юксак тоғларнинг қорли чўққиларига урилиб, уларни нимқизил рангга бўяди. Бу қалъадан йироқ-йироқлардаги қишлоқларда ва шаҳарлар ахолиси олислардан келаётган ер зириллашига ваҳима билан қулоқ солишар, аллақандай номаълум, шу сабабдан кўрқинчли ҳалокатлардан дарак берувчи ғаройиб манзарага – юксак тоғ чўққиларининг қори алвон рангга бўялиб товланишини кўриб даҳшатга тушардилар.

Энг қўрқинчлиси, номаълумлик эди. Номаълумлик уларни ўзлари асрлар давомида яшаган масканларини, молу мулкларини ташлаб ғарқ пишиб ётган тутлар ҳиди анқиб турган чорбоғлар оралаб ўтган йўллар орқали бу ваҳимадан бехабар ва алдамчи фарофат оғушида ухлаётган ўлкаларга кетишга, бу номаълумликдан ёш келинчакларнинг кўксидагу сути қуриб, ҳали киндик яраси битмаган чақалоқлар йиғиси оталарни яrim кечалари туриб олисда тобора қизиллашиб товланаётган тоғларга нотинчлик билан узоқ боқишга мажбур қиласди. Ер зириллаши тўхтагани билан уларнинг юрагидаги зириллаш баттар авжоларди. Улар ўша туни билан нимқизил рангда тов-

ланган тоғлар томондан бирор-бир хабар келармикан дея илонизли йўлларга интиқ боқиб кутишар; аммо намоз пайтидаги кентлар кўчасидек бу қадимий йўлларда бирор кишининг қораси кўринмасди. Номаълумлик томонга қараб бориб, у ёқдан бирор гап олиб келишга ҳеч ким журъат қилолмасди. Ундан кўра улар кенг даштда душман лашкари билан юзма-юз туриб жанг қилишга рози эдилар. Аммо душман ўша номаълум томонда эди.

Ўша номаълумлик тарафда, кечалари нимқизил рангда товланган тоғлар томондан оқиб тушган дарё ёқасидаги қалъани Амир Темур қўшини исканжага олган эди. Соҳибқирон қалъанинг шарқий дарвозаси рўпарасида саркўб тиклашни буюрди. У қалъага таслим бўлишни талаб қилиб нишон жўнатмади. У саркўб тикланишини ва шарқ томондан оқиб келаётган темир оқимни мана шу саркўб пойида йиғилишини ҳам кутиб ўтирмади. Ўртада беомон жанг бошланди. Амир Темур ҳам худонинг бир бандаси каби, олисдаги қишлоқларда яшаган фуқароларга ўхшаб номаълумликдан кўрқарди. Аммо у номаълумлик қаршисида қўл қовуштириб ўтиришни ёқтирмасди. У ҳар қандай жумбоқ ечилгандан кейингина юраги фароғат топажагини яхши билар; бу жумбоқ, бу номаълумлик – фарзанднинг қисмати уни қийнаган сайин, у мана шу номаълумликни йўқ этувчи қуроли – қўшинларини жангга солди. Кўзларида ҳам қасос олови, ҳам ўғил ташвиши баравар акс этган Амир Темур тундаям аскарларига дам бермади. Ҳар ер-ҳар ерда ёқиб қўйилган гулханлар ёруғида қалъанинг тўрут дарвозаси ёнида беомон жанг давом этди. Юган-сувлоқларини чайнаб, оғзи кўпикланган безовта отларнинг қўрқинчли кишнаши, курагига ботган ёй ўқи оғришидан дунёни бузиб бақираётган жангчилар, палахмонлар отган тошлар гурсиллаб деворларга, дарвозаларга урилишидан та-

ралган бўғиқ товушлар, гуруҳ-гуруҳ жангчилар гоҳ олдинга, гоҳ орқага чопгандарида зилзила пайтидагидек ернинг силкинишлари орасида аллақачонлар тикланган саркўб устидаги хиргоҳ ёнида турган Соҳибқироннинг: «Босинг! Босинг!» деган ҳайқириғи!..

Жанг авжига чиққан ярим тунда тиним билмай йўл босиб, кела солиб жанг бошлаган хукмдор кўзининг бир зумгагина юмилганини билмай қолди. Шу бир зум ичида у туш кўрди.

Осмону фалакдан қуюлган кумуш шуъла оғушида бир аёл беланчак тебратарди. Беланчак иплари қаерга осилгани билинмасди. У аёлни таниди – у Тегина Моҳимбегим, онаси эди. Аммо бешикда ўғли ётарди... “Ота, – деди ўғли жилмайиб. – Ота...” Бирдан ўғлининг товушини эшитди. “Онажон!..”

У бирдан уйғониб кетди-ю, саркўб пойида ётган ярадор жангчилардан бирининг бўғзидан чиққан ўлим олди ноласи уни уйғотиб юборганини билмади. “Ўғлим!” – шивирлади бирдан дили ёниб ўзидан-ўзи. Соҳибқирон кўзидан силқиб чиққан бир томчи ёшда гулхан ёруғи акс этгандек бўлди. У ўша заҳоти кўзларини енги билан артиб, ҳеч ким сезмадими, дегандек атрофига назар ташлади. Ҳамманинг хаёли жанг майдонида эди. Фақат унинг ҳамма юришларида қатнашган қари мунажжим осмонга безовта тикиларди. Қария Соҳибқироннинг ўзига тикилганини сезиб, ўгирилди. Амир Темур мунажжимни ёнига чорлаб, безовталиги сабабини суриштирмоқчи бўлди. Аммо хаёли бўлинди. Аскарлари саркўб қаршисидаги дарвозага ўт кўйган эдилар. Қорамой сепилган улкан нақшкор дарвоза ўтга маҳтал тургандек ловиллаб ёна бошлаганди. Олов пастдан тепага жадал ўрлаб, дарвоза устунларига урилиб уларни қорайтиарди. Аммо тўсатдан ҳаво бузилиб, кучли шамол кўзғалди, бир-икки томчи томгандек бўлди. Шунинг ўзи кифоя бўлди-ю, гулхан-

лар ўчди, ёнаётган дарвоза ҳам омон қолди. Бироқ бу жанг шиддатини сусайтиrmади, муҳосара кучайгандан кучаяр, ҳар икки томон бир-бирини аяшни хаёлига ҳам келтирмасди.

Жанг авжига чиққан сайин Амир Темурнинг ғазаби кучаяр, атрофида турган номбардорлар соҳиби тахтнинг қаҳрини кўриб, нафасларини иchlарига ютган ҳолда сукут сақлашарди. Фақат қалъа тарафдан келаётган сурон бу сукутни эшишишга йўл қўймасди. Темир оқим қалъа деворларига бўрон пайтида қутурган денгиз тўлқинлариdek бориб урилар – сада кетидан ҳазора, ҳазора кетидан қўшин келарди. Манжаниқлару аррадалар қалъа деворларини бузиш учун тинмай ишлар, чўмоқлару харбаларнинг бир-бирига урилгандаги жаранглар тўхтамасди.

Тонг яқинлашиб, атроф ёриша бошлаган ғира-ширалиқда Амир Темур амри билан ясовулбоши қодирандозларни ишга солди, уларнинг ёйдан бехато ўқ узишлари туфайли шаҳрбанд устидагилар тутдек тўкилдилар.

Охири сабри тугаган Соҳибқирон хиргоҳ айвонидаги ўрнини тарқ этиб, бу ҳолдан ваҳимага тушган қурчилар ўровида паастга – қалъага яқинроқ боришга, бу билан аскарлари руҳини кўтаришга қарор қилди. У шиддат билан саркўбдан тушиб бораркан, захира оптилган аравалардан бирининг ёнида ўчиб қолган, аммо дарё томондан эсаётган салқин шамолдан қип-қизариб товланган гулхан чўғларига қўлларини тоблаб, исиниб турган бир чолга кўзи тушди. У чолни сезмай ўтиши мумкин эди. Аммо шунча шовқин-сурон орасида чолнинг минғирлаб куйлаган қўшиғи ноҳосдан унинг диққатини тортди:

*Вой, ўғлим-а,вой ўғлим,
Йигитларнинг нобуди.*

Кўтарилимай қолди-я
 Ўғилгинам тобути.
 Моймананинг йигити,
 Оёғида бор-бути.
 Қўлдан-қўлга ўтмади
 Ўғилгинам тобути.
 Қора ерда ётарсан,
 Кимса билмас аслингни,
 Дўстларингни хор этдинг,
 Ким олади қасдингни.
 Вой, ўғлим-а, вой, ўғлим,
 Йигитларнинг нобуди.
 Қўлдан-қўлга ўтмади
 Ўғилгинам тобути...

Амир Темур чолни таниди. У қалъани дастлабки қўлга олганда, ўз соҳиби, ўз сафдошларига хиёнат қилганлиги туфайли ўлимга буюрилган қалъа жийбахонаси бошлифи бўлмиш йигитнинг отаси эди.

Ўшандаям жанг жуда даҳшатли бўлган бўлса-да, бугунгичалик бўлмаганди. Унда мухолифлар ўзаро илк марта тўқнашаётганлари учун ҳали бир-бирларидан қўрқишимас, дилларда фақат: «Кимнинг қўли баланд келаркан?» деган ҳадик бор эди, холос. Аммо қиличлар бир-бирига урилган илк дафъадаёқ бу ҳадик ўртадан йўқолиб, унинг ўрнини ёғийга нисбатан ғазаб ва нафрат эгаллаган эди. Тонгга яқин бошланган жанг кечгача давом этди ва эртаси қуни қуёш энди қизариб чиқа бошлаган маҳалда чол ўғли – жийбахона бошлифи хиёнати туфайли Турон ҳукмдорининг ғалабаси билан тугади. Аммо ғалаба унга татимади. Юборилган нишонидаги талабига бўйсуниш ўрнига қаршилик кўрсатган қалъа кутволи билан унга қалъа дарвозасини очиб берган жийбахона бошлифини қатл эттирди. Енгилган қўшин аскарларини эса қатл май-

донига олиб келиб, ўз бошлиқларининг шармандали ўлимини кўришга мажбур этди. Қатлдан сўнг бу аскарларни озод қилиб қўйиб юборди.

Қатл бошланиши олдидан асир аскарлар турган томондан дод-фарёд эшитилди. Амир Темур сукутни бузган бу ёқимсиз бақир-чақирни эшитиб, “Нима гап?” дегандек қурчилар бошлиғига ўқрайди. Ҳукмдорнинг норозилигини пайқаган қурчилар бошлиғи, девдек келбатига ярашмаган чаққонлик билан пастга отилди. Унинг шундай оғир гавдаси билан чаққон ҳаракати ўртасида боғлиқлик тополмаган ҳукмдор шовқин чиққан томонга тикилди. У мағлуб ёғий аскарлари ичидан қурчилар судраб олиб чиққан чолни кўрди. Чол икки қўлини омбирдек қисиб, майдон четига судраган қурчиларга дастлаб қаршилик кўрсатишга уринди-ю, аммо дам ўтмай, нафаси ўчиб, қўл-оёғи ма-жолсиз шалвираб тушди.

“У ким?” – деб сўради Амир Темур қурчилар бошлиғи қайтиб, ўз ўрнини эгаллагач. “Жийбахона бошлиғининг отаси экан”, – деди қурчибоши.

Соҳибқирон биринчи марта кунда олдида қўли боғлиқ турган, қалъани хиёнат туфайли унга олиб берган жийбахона бошлиғига тикилди. У ўғли тенги йигит эди.

Худди ўша лаҳза товачининг ишораси билан қатл бошланганидан хабар бериб ноғораларнинг гумбир-гумбири бошланди. Майдон ўртасидаги кунда қўйилган супада қўққайиб турган жаллод қиблага қараб тиловат ўгирди. Ботаётган күёшда унинг юзи қип-қизил тусда товланарди. Тиловатни тугатган жаллод ўрнидан турди ва кундага биринчи бўлиб кутвол бошини қўйди. Аммо кутвол бошини кундадан олиб, яна қад тиклашга уринди. Муштумининг зарби билан буқани ўлдиришга қодир забардаст жаллод бир силташ билан яна унинг гавдасини букиб, бошини

кундага қўйди, сўнг юксакдаги хиргоҳ пешайвонидаги таҳтда ичкилару номбардорлар қуршовида турган ҳукмдорга тикилди. Аниқроғи, тикилгандек бўлди, зеро жаллод бошини кўтарди-ю, ўз соҳибига тик боқишига журъат қилолмади. Унинг қўлидаги ойболта ҳам қонга бўялмаган, аммо ғуруб шуъласи тушиб қип-қизариб товланарди.

Энди буёғи фақат Соҳибқироннинг иродасига, унинг ғазаби ёки раҳм-шафқатига боғлиқ эди. Аммо дунёнинг тўрт тарафини зир-зир титратган, Ғарбу Шарқ ҳукмдорларига ўзининг марҳаматини аямай, уларни фарзанди қаторига қўйиб, «ўғилларим» деб мурожаат қилишга кўнинкан жаҳонгир бу лаҳза нималар ҳақида ўйлаётганини ҳеч ким билмасди.

Кутвол ҳам, жийбаҳона бошлиғи ҳам ўғли тенги йигитлар эди. Аммо кутвол мардоналик билан қалъани сақлашга уринган бўлса, жийбаҳона бошлиғи хиёнат билан уни мухолифга очиб бергани улар ўртасида бир улуғ жар ҳосил қилганини ўйлаган Соҳибқирон дунёнинг ғалати ишларини англашга уринарди. Мана, деярли тенгдош йигитлар. Балки улар бир кўчада ўйнаб улғайишган жўралардир, балки қилич чопқилашни бирга машқ қилишган сабоқдошлардир. Аммо улар ҳозир бир-бирига душман. Кутвол ўзини мағрут тутар, ўзини душманга сотган жийбаҳоначига қайрилиб ҳам қарамасди. Жийбаҳоначи бўлса, аллақачонлар тириклик нишонасини билдиrmай мункайиб ётарди. Ўз қилмишини англаб пушаймон бўлганидан ажални аллақачонлар бўйнига олганиданми ёки ўз хиёнати боис марҳамат кутиб, унинг ўрнида ўлим топаётгани туфайли қўрқувданми унинг девор рангига кирган башараси маъносиз, унда на ғазаб, на илтижо намоён эди.

Ҳукмдор ўлим олдида ҳам ўзини хўрлашларига қаршилик кўрсатаётган кутволга қараб, иккиланган-

дек бўлди. Кейин бирдан сергак тортиб, ўғлига кўз қирини ташлади. У ўғлининг чехрасида ҳам иккиланиш аломатини сезди-ю, қарори қатъийлашди. “Иккиланиш, бу бўлажак мағлубиятдир”, – деб ўйлади Амир Темур. Агар у ҳозир иккиланганини ўғлига билдириб қўйса, ўғли салтанат ва ҳарбнинг ҳар бир ишида иккиланиши мумкин. Бунга эса йўл қўйиб бўлмасди. Унда салтанатда ором, душманларда қўрқув, дўстларда садоқат, ўғлида событилик қолмайди. Илло, подшоҳ бир тадбир қилишни олдиндан қасд қилдими, ҳар қандай шароит ва вазиятга қарамай, ўша ишда қаттиқ турмоғи, то битирмагунча ундан қўл тортмагани маъқул. Агар бугун у иккиланса, эртага ўғли ҳам иккиланади, событилиги синади, оқибатда мамлакат бўлинади. Иккиланган ҳукмдор, барибир, охир-оқибат адашади, сўнг уларга яқин турғанлар ҳам адашадилар.

У бир пайтлар, энди салтанат изми илгига ўтган кунларда пири йўллаган мактубдаги муборак сўзларни эслади: «Мамлакат куфр билан туриши мумкин, лекин зулм бор ерда туролмайди». Хўш, ундан шафқат тилаш ўрнига ўлимни индамай кутаётган кутволни ўлдириш зулмми, зулм эмасми?! “Зулм!” – деб ўзига жавоб берди Соҳибқирон. Аммо яна шу нарса маълумки, кутвол ёш бўлишига қарамай, зулм йўлига ўтган. Соҳибқирон қон тўкилишига йўл қўймаслик ниятида ўз нишонини юбориб таслим бўлишни таклиф қилганида, бу талабга ризолик билдириш ҳақида маслаҳат солган икки-уч юзбошини машваратнинг ўзидаёқ чопиб ташлаган. Лаънати жийбаҳоначи, аллақачонлар кўнглида хиёнат фитнасини бошлигарни жийбаҳона бошлиғи ҳам ўша юзбошиларга қилич пешлаган. Нодон кутвол хавф-хатарни унга оқилона маслаҳат берган юзбошилардан эмас, мана шу ёнида туриб қилич пешлаган жийбаҳонаидан кутиш кераклигини билмаган. Оқибатда ўртада жанг содир бўлди, неча юз

аскар бекордан-бекор қурбон бўлди. Бу зулмми, зулм эмасми?! “Зулм!” – деб ҳукм чиқарди буюк жаҳонгир. Қолаверса, ёмонликка яхшилик билан жавоб қайтариш мумкинми? У ҳолда яхшиликка нима билан жавоб қайтариш лозим. Йўқ, ёмонликка адолат, яхшиликка яхшилик билан жавоб қайтармоқ керакдир. Аксинча бўлса, хатодир.

Амир Темур яна ўғлига кўз қирини ташлади. Унинг юзида ҳамон иккиланиш аломати зоҳирлигини сезди ва ўғли унга қайрилиб бир нима дейишга ҳозирланганини пайқashi билан кўзини олиб қочди. Йўқ, ўғли ҳозир нима демоқчилигини у эшитмаслиги керак. Зеро, ҳозирча бу икки иқлимни ичига олган чексиз ҳудудда ва шу ҳудуднинг марказига айланган ерда – у ўтирган маконда ҳар бир нарса, ҳар бир кимсанинг тақдири ёлғиз унинг иродасига, унинг қарорига боғлиқ. Шундай экан, кеча ёлғиз ўзи билган қарор, уни бошқаларнинг қулоғи эшитмаган бўлса-да, бугун амалга ошмоғи шарт.

Соҳибқирон юзида бир дақиқа пайдо бўлиб, ўша лаҳза ўчган маънони уққан товачи жаллодга “Бошли!” дегандек қўл силтади. Ўша лаҳза жаллоднинг қизил дамли ойболтаси кутвол боши устида ялт этди-ю, кесилган бош кундадан супага, супадан пастга думалаб кетди. Навбат жийбахона бошлиғига етди. Яна жаллод ойболтасини ерга тираб, бош эгиб изн кутди. Товачи ҳукмдор юзига тикилди. Аммо Амир Темур юзида ҳукм маъносини кўрмай, вужуди диққатга айланди.

Навбат жийбахона бошлиғига етди-ю, жаҳонгир дастлаб кутволни бошидан жудо этганига ўқинди. Аввал баттол хоинни ўлдириш керак эди. Илло, ўзини ёғийга сотган хиёнаткорнинг ўлимини кутвол кўриши керак эди. Жаҳонгирнинг бирдан ғазаби қўпчиб, товачига ўқрайди. Гап нимадалигини англолмаган бечора товачининг тиззалари бўشاшиб, ранг-рўйи

кўпикдек оқариб кетди. Ҳа, кутвол бу лаънатининг ўлимини кўриши шарт эди... Шарт эди... Нега аввал шу нарсани ўйламади. Бу лаҳза ўз она юрти ҳифзида турган қалъани унга олиб берган жийбаҳона бошлиғи унинг назарида дунёдаги энг паст, энг манфур кимса эди.

Ўлимини кутиб юзтубан ётган жийбаҳоначининг танасига жон киргандек бўлди. Кутволнинг ўлимидан сўнг тамом бўлган хоин ҳукмдор ўйга ботган вақтни пайсаллаш, деб Соҳибқирон уни фақат кўрқитиш учун кунда ёнига олиб келтирганлигига, аслида, қилган иши учун, албатта, марҳамат топажагига ишона бошлаганди. У зўрға кўзларини очиб ҳукмдорга боқди. Мажол топиб ундан имдод тиламоқчи бўлди, аммо музлаб қолган лабларини қанчалик очишга уринмасин, очолмади, фақат қакраган, қонга тўлган бўғзидан нолага ўхшаш бир товуш чиқди. Кейин ҳукмдорнинг ўзига қаҳр билан нафратомуз қараб турганини аранг илғади-ю, мурда нуқси урган башарасини яна ерга босди.

Амир Темур ғазаб билан товачига бақирди:

– Мочағар, нимани кутяпсан, бошламайсанми?

Товачининг ишораси билан жаллод бир силташ билан жийбаҳона бошлиғининг мажолсиз гавдасини ердан кўтарди-да, икки буқди ва бошини кунда устига қўйди. Ўша заҳоти маҳкумнинг оғзидан кўпик оқиб туша бошлади. Жийбаҳона бошлиғининг боши ҳам кундадан пастга думалаши билан ҳамманинг қулоғи кўнишиб қолган оғир ва қўрқинчли суқунат оғушида майдон четида боғлиқ турган отлар ёнида чалқанча ётган чолнинг юрагидан отилиб чиққан мунгли фарёд янгради. Аммо бу фарёд эгасига ҳеч ким журъат этиб қарай олмади. Ёлғиз Амир Темур ўрнидан туриб, қатл майдонини тарқ этаётган одамлар оша чолга узоқ тикилди. «Зулм!» – деб ўйлади яна у. Шу ўй онгида ялт

этган заҳотиёқ, шарт орқасига ўгирилди. Ўшандан буён чолни учратмаган эди...

Сўниб бораётган гулхан чўғларини қўлидаги шоҳ билан титаётган чолга кўз ташлаб, бир лаҳзагина тўхтаб қолган соҳибқирон қадамини тезлаштириди. Ортидан чолнинг қўшифи етиб келарди:

*Вой, ўғлим-а,вой ўғлим,
Йигитларнинг нобуди.
Қўлдан қўлга ўтмади
Ўғилгинам тобути...*

“Чол эсдан оғган!” – деб ўйлади Амир Темур, аммо олдида дурбош кўтариб бораётган қурчи “Воҳ” дея юзтубан йиқилганини қўрди-ю, ўша заҳоти чолни унутди. Қалъа томондан учиб келган тўқмор уни қурчининг кўксини тешиб, курагидан чиқиб турарди. Жаҳонгирнинг хавфсизлиги учун жавобгар ичкilar тезда уни туралар билан тўсиб олишди.

Туни билан давом этган жангтонг ёришгач, баттар авж олди. Кечаси қўзғалган шамол ва бир-икки томчилаб ўтган ёмғир тиниб, осмон шундаям ярқирап эди-ки, бамисоли артилган шишадек беғубор эди. Осмонда бир ҳовуч булат ҳам кўринмасди. Ёз қуёши шундай меҳр билан одамларга, чечакларга, далаю даштларга, юксак тоғларга ўз нурини сочардики, бўлаётган воқеалар ўнгда эмас, тушда кўринаётгандек туюларди. Аммо ҳар икки тарафнинг жангчилари буни сезишмас, уларнинг кўзи бир-бирларидан узилмас, қўзларидағи қиличу зулинлар товуши, кўларидағи ғазаб, дилларидаги қаҳр ғубори ҳам осмонни, ҳам қуёшни тўсиб олган эди. Толиқкан отларнинг ҳам, одамларнинг ҳам ўнги тушга айланган. Улар бутун дунёни унуган, гёё ёлғиз ўлимгина уларга ҳордиқ олиш учун имкон берадигандек. Туни билан совутлар ва дубулғалар акс эт-

ган ой нури сўниб, қүёшдан тушган шуъла қип-қизариб оқаётган дарёда товлана бошлади. Унинг сувига қон қўшилди. У қалъа турган қоядан оқиб тушиб, олис тоғлар тарафдан далаларни яшнатиш, одамлар, гуллар, булбуллар чанқоғини қондириш учун оқиб тушаётган дарёга бориб қуйилар, кўм-кўк дарё бир-икки фарсанг давомида бу қонни ҳазм этолмай қийналар... ва охири қон рангини ичига ютиб, яна ўзининг азалий йўлидан олға талпинарди.

Ўлим топган жангчилар қийналмай жон беришар, ўлим уларга фароғатли уйку бўлиб туюлар, улар «ўляпман» деб эмас, «уйқу босяпти», деган хаёлда кўз юмишарди. Очиқ қолган кўзларда тип-тиниқ осмон билан баб-баравар кўпик сочаётган отлар, қилич пешлаган суворийлар, ҳар икки томондан учеб келаётган новаклару найзалар акс этарди. Бу уруш чизган сурат эди.

Тонгдан ўтиб қалъадагиларнинг заифлашгани сезилди. Зеро, улар ўzlари учун ўлимдан бошқа йўл йўқлигини англаб, матонат билан жанг қилишар, бироқ эриган Темур тоғи оқими шиддат билан тўхтани билмай, қалъа деворларига урилар, ҳар урилганда яна ҳам баландлашарди. Охири бу оқим деворлардан ошиб, қалъа ичини тўлдирди.

Жанг тугади. Амир Темурга душман қўшинлари бутунлай тор-мор қилинганини айтишди. Соҳибқирион бу хабарни эшитар экан, бошқа нарсани ўйларди. У бетоқат эди. У ўзи кутган гапни эшитишни интиқ кутар, аммо ўзи очиқдан-очиқ сўрашга юраги бетламасди. “Демак, ўғлим...” Амир Темур кўкси зирқираб оғриди. У курчилар бошлиғига тикилиб: “Ўғлимни топинг!” деб буюрди. Аммо қидиришлар бекор кетди. Ўғлининг на тириги, на ўлиги топилди. Амир Темур бу ҳақда хабар берган яқинларига дарғазаб тикилар, уларни қайта-қайта қидиришга мажбур қиларди.

Жаҳонгир ўғлини жасур ва ўқтам қилиб тарбиялаган эди. Қилич тутган қўли бакувват бўлсин деб кеча-кундуз машқ қилдирди, юраги қўрқувни билмасин деб шер юрагини едирди, фаросатли бўлсин деб китобга ошна қилди. Йигирмага чиқсан ўғли ўн йилдан буён соҳибқирон юришларида қатнашган, қилич чопқилашда чиниқсан тажрибали жангчилар – баҳодирлар билан бир сафда туриш ҳуқуқига эга бўлди.

Амир Темур ичида фарзандини қанчалик сўймасин, ҳалигача унинг бошини силаб эркаламаган. Эркалаш дилни бузади деб ҳисобларди. Ўғли ҳам шу пайтгача отасига бирор марта кулиб боқмаган, ҳамиша кўзларида олов чақнаб турарди. Бу олов ўша жанг кўрган баҳодирлар кўзларидаги оловдек совуқ порламасди. Бу олов ўтли ва ёш эди. Наҳотки шундай ўғли душман қўлида хор бўлган бўлса? Наҳотки?! Йўқ, у ўзини хор қилишларига йўл қўймайди. У ёғий қўлида хор бўлишдан ўлимни афзал кўрадиган йигит. Зеро, у ўғлини қалъада қолдириб кетар экан, хайрлашиш олдидан, шундай деганди: “Салтанатга даъвогарчилик қилган ҳар бир киши салтанат шаъни ва мартабасига лойиқ иш тутиши зарур. Мудом ёдингда бўлсинким, бу йўлда жангга кириб ё зафар қучиб ғолиб бўлгайсан, ё ўлдирилғайсан. Ўлимини бўйнига олган кишигина бу йўлдан юрмоғи мумкин”.

Амир Темур раҳматли отаси, барлосларнинг улуғ амирларидан бири бўлмиш Мұҳаммад Тарагай уни қандай тарбиялаган бўлса, ўғлини ўша руҳда: бешафқатлик, мардлик ва фаросатлилик, фақат шундан кейингина оқибатлилик руҳида вояга етказди. Оқибат, отасининг назарида, ёлғиз меҳр-شاфқатдан, шу билан бирга диловарлигу қаттиққўлликдан туғилмоғи даркор. У оқибатнинг инкори бўлмиш хиёнатни ёмон кўрарди. Кўрқоқликни кечирса кечирар. Аммо хиёнатчига раҳмдиллик қилишни ўйламас, ҳатто бун-

дай қилишни гуноҳ деб биларди. Агар Амир Темур дунёнинг тўрт томонидаги энг бой ўлкаларни забт этиб, уларнинг подшоҳларини ўзига тобе этган бўлса, бу шарафга шу диловарлиги ва оқибатдорлиги, хиёнатга йўл қўймагани сабабли эришди.

Амир Темур ўғлида уч хислат мужассам бўлишини истарди. Энг аввало, инсонпарварлик, сўнг тежамкорлик ва ниҳоят босиқлик. Инсонпарвар одамгина довюрак бўлмоғи мумкин. Тежамкор бўлган одамгина саҳий бўлиши мумкин. Босиқ одамгина ҳукмдор бўлиши мумкин. Кимки жасур бўлса-ю, инсонпарвар бўлмаса, тежамкор бўлмаса-ю, саҳийлик қиласа, доно бўлса-ю, босиқлик қиласа, ундан одам ўзи бош-қош ишниям, ўзиниям ҳалок этади. Кимки, душмани билан олишгандаям инсонпарварликни унутмаса, у, албатта, енгади. Аллоҳ таоло ҳамиша унга мадад беради, инсонпарварлик унга паноҳ бўлади.

У ўғлига мамлакат адолат, уруш эса диловарлик ва айёрлик билан бошқарилишини, мамлакатда таъқиқ қанча кўп бўлса, авом шунча қашшоқланиши мумкинлиги, илло, эркинлик ва адолат бўлса, авом, демак, мамлакат бой бўлишини, қонун ва буйруқлар қанчалик кўпайса, адолатсизлик, ўғрилик ва бебошлиқ шунчалар кўпайиши мумкинлигини уқтириди. “Ўғлим, – деб айтарди раҳматлик отаси, – узоқни кўролмаган ҳукмдор яқинидаги балоларга гирифтор бўлади. Аммо яқинни кўриб иш тутган ҳукмдор ҳам хато йўлдадир”. Амир Темур отасининг бу гапини ўғлига айтар экан, ўзидан қўшиб ушбуни уқтирган эди: “Подшоҳлар хулқи бамисоли шамол, авомники майсадир. Шамол қай тарафга эсса, майса ҳам ўша томонга эгилади. Аммо подшоҳ ҳеч қачон ўз қудратининг асоси мана шу авом эканини унутмаслиги керак”.

Амир Темур тутаб ёнаётган, вайронга қалъага кирмай дарёга яқин ялангликда чодир тиктириди.

Соҳибқирон ўзининг содиқ жангчилари либосидан деярли фарқ қилмайдиган жангвар либосида, Дамашқни олганда қўлга киритган олтин чироқдан осилган шоҳчодирда, қундуз бўркли бошини эгган кўйи ўғлидан дарак кутарди. У камдан-кам ёлғиз қолар, шу боисдан ҳар гал шу аҳволга тушганда дилини аллақандай англаб бўлмас оғриқ қиса бошларди. Ҳозир ҳам шу оғриқ уйғонди-ю, соҳибқирон чуқур оҳ тортди. У оғриқ сабабини билмас, бу эса оғриқни йўқотиш чорасини топишга имкон бермасди. Туни билан кечган жанг туфайли уйқудан, ҳордиқдан қолган жаҳонгир онгида қуюқ ва ҳорғин бир зулмат пайдо бўлган, оғриқ эса мана шу зулумот ичида ёниб турган чироқдек пирпираб, гоҳ товланиб турарди. Тўсатдан ташқарида шовқин-сурон кўтарилди-ю, сергак тортди. Аммо ўзини тутиб, бу шовқин-суронлардан хаёлан узоқлашиш учун кўзини юмди. Ўша заҳоти кечаги туши ўнгидя ялт этиб намоён бўлди. Кумуш шуъла оғушида беланчак чайқаларди. Бу сафар онаси йўқ эди. Беланчак ҳам бўм-бўш эди. “Ўғлим, ўғлоним...” – дея пичирлади Амир Темур. Аммо ташқаридаги шовқин тобора унга яқинлашиб келар, ортиқ ундан қочиб бўлмасди...

Шу пайт шошилиб ичкарига номбардорлардан бири кирди. Унинг юзида кўркув бор эди. У гапни қандай бошлишни билмай Соҳибқирон қархисига келиб тиз чўқди. Амир Темур нега номбардорлару амирлар ҳар галгидек расм-русумга биноан ўз муносабатларидан келиб чиққан тартибда кириб келмаганлари ҳақида ўйлади-ю, ҳузуридаги номбардор кўпчилик айтишга қўрқсан гапни унга етказишни бўйнига олиб кирганини англади.

- Сўйла, – деди соҳибқирон.
- Онҳазрат, – деди номбардор, – бир қошиқ қонимдан кечсангиз...
- Кечдим, сўйла, – деди Амир Темур.

– Онҳазрат, ўғлингизнинг на тириги, на ўлиги топилди. Қалъани элакдан ўтказдик, аммо... – номбардор жим қолди. Ўртада жимлик чўқди. Бу жимлик чўзилган сайин номбардорнинг кўрқув ошиб борар, бу кўрқув юрагидан қон томирлари орқали вужудига тарқалиб, аъзои баданини шол этгандай бўларди.

– Шовқин-суроннинг сабаби недир? – деди бошини кўтармай Амир Темур.

Кўрқув дарёсига чўкиб бораётган номбардор бирдан хушёр тортиб, бор иродасини йифиб, тақдир инъом қилган хасга ёпишди:

– Қатл этилган жийбахона бошлигининг отаси сизнинг ҳузурингизга кираман деб шовқин кўтарди. Курчилар уни қўл-оёғини боғлаб, дарёга ташламоқчи бўлдилару бу ишни ихтиёрингизсиз қилишга журъат тополмай тўхтадилар.

“Мана ким ўғлимга нима бўлганини менга айтиб беради?” – деган ногаҳоний ўйдан ўрнидан туриб кетган Амир Темурнинг важоҳатини кўриб номбардор ҳаёт билан видолашиб муддати етганини тушунди. Аммо Соҳибқирон унга яқинлашиб, ёқасидан ушлаб даст кўтарди-ю, қаҳрли кўзларини тикиб, бақирди:

– Тезроқ чолни ҳузуримга олиб киринг!

Боягина кўрқувдан қўл-оёғи бўшашган номбардор ҳукмдор ёқасини бўшатиши билан шоҳчодирдан ўқдай отилиб чиқди. Зум ўтмай, чолни олиб кирдилар. Чол ҳозиргина арқон сиқувидан бўшаган кўлларини уқалаб, қаршисида ўтирган соҳибқиронга, кўзларини яширмай, очиқдан-очиқ разм соларди. Улар бир-бирига узоқ тикилдилар. Аллақачон ўз ўринларини эгаллаган номбардорлару амирлар “бу ёғи нима бўларкин?” дегандай воқеалар давомини кутардилар.

– Сўйла, кимсан? – деб биринчи оғиз очди ниҳоят Амир Темур.

– Бандаман, – деди чол унга тик боққанча.

- Кимнинг бандаси? – деб сўради яна Амир Темур.
- Ҳукмдоримнинг, – деди чол.
- Ҳукмдоринг ким?
- Аллоҳ таоло! – деди чол.

Амир Темур чолнинг жавобига ичидага таҳсин ўқиди. Бирлашалик бу савол-жавоб уни анча тинчлантирган эди.

– Эй Аллоҳ бандаси, – дея гап бошлади яна Амир Темур, – менинг кимлигимни биласанми?

– Биламан. Сен ҳам Аллоҳ бандасисан! – деди чол.

– Иншооллоҳ, Худонинг бандаси Амир Темурман, – деди Соҳибқирон.

- Амир Темурлигинги яхши биламан.

Атрофдагиларнинг бутун вужуди қулоққа айланниб, ҳукмдор билан чол мусоҳабасини тинглашарди.

– Аллоҳнинг мўъжизаси, Худованди каримнинг марҳаматига эришган Амир Темурман, – деди соҳибқирон ҳар бир сўзига алоҳида урғу бериб.

– Ҳар бир банданинг дунёга келишининг ўзи Аллоҳ мўъжизаси, Худованди каримнинг марҳаматидир, – деди чол.

Амир Темур «рост айтдинг» дегандек бош силкиб, чолнинг сўзини маъқуллади. Аммо ўша заҳоти ёдига ўғли тушди-ю, лаблари маҳкам қисилди.

– Ўғлимга нима бўлганини биласанми? – деб секин сўради Соҳибқирон. Аммо унинг овозини сукунат қучган шоҳчодирда ўтирган ҳамма эшитди.

– Кеча қалъада бир йигитни қатл этдилар. Унинг кўз-қоши сеникига ўхшарди. Ўша йигит ўғлингми? – деди чол саволга савол билан.

– Сен айтган йигит ўғлимми, ўғлим эмасми, мен ҳали билмайман. Утирикми, ўликми, бундан ҳам бехабарман, – деди Амир Темур.

- Йигит тахминан йигирма ёшда эди, – деди чол.

– Ҳа, ўғлим йигирмага чиққан эди, – деди Соҳибқирион.

– Уни сенинг келишинг арафасида тонгда қатл этишди, – деди чол.

– Ўша йигитни қандай ўлдиришди, сўйлаб бер, – деди Амир Темур.

– Уни қалъя ўртасидаги майдонда қатл этишди. Ўша сен менинг ўғлимни қатл этган супада... – Чол бу гапни айтиб тўхтади. Амир Темур бирдан ёлғизлиқда қийнаб, кўпчилик орасида уни тарк этадиган оғриқ яна дилида уйғонганини сезди. Бу сафар оғриқ ҳар сафаридан кучлироқ эди. У бор иродасини тўплаб, дилидаги азоб юзида зоҳир бўлмаслик йўлини тутди. Чолдан бошқа бирор киши жаҳонни қўрқувда тутган инсон дилида қандай азоб уйғонганигини сезмади.

– Тонг маҳали эди, – деб ниҳоят гапини давом этди чол. – Машриқдан чиққан қуёш чарақлаб турса-да, ҳали мағриб томондаги ой ботиб улгурмаган эди.

– Уни қандай ўлдирдилар? – дея тоқатсизланди Амир Темур.

– Аввал ўнг қўлини елкаси оша чопдилар...

– Инградими? – деб сўради Амир Темур.

– Йўқ, оҳ деган товуш ҳам чиқармади.

– Менинг ўғлим экан! – деди ҳаяжонланган Амир Темур.

– Кейин... кейин чап қўлини чопдилар, – деди чол.

– Инградими?

– Йўқ, миқэтмай чидади.

– Менинг ўғлим экан! – деди Амир Темур.

– Сўнг йигитнинг ўнг оёғини чопдилар, – деди чол, ўша даҳшатли қатл манзарасини кўз ўнгига келтириш ниятида кўзини юмганча.

– Инградими?

– Йўқ. Чидади, кўзидан бир томчи ёш, бўғзидан бир ун ҳам чиқмади.

- Менинг ўғлим экан у! – деди Амир Темур.
 - Кейин бечоранинг чап оёгини чопдилар, – деб ҳикоясини давом этди чол ҳамон кўзини очмай.
 - Инградими? – деб сўради соҳибқирон.
 - Йўқ, инграмади.
 - Менинг ўғлим экан ўша йигит! Менинг ўғлим!
 - деди Амир Темур кўзидағи алам ўрнини ғурур эгаллаб. – Кейин-чи, кейин?..
 - Кейинми?.. – деди чол маҳзун кўзларини очиб, соҳибқиронга тикилар экан, – кейин йигитнинг кўкисини тарс ёрдилар-да, юрагини узиб олдилар!
 - Инградими? – деди Амир Темур.
 - Йўқ, инграмади. Фақат... – чолнинг товуши ҳаяжондан бўғилгандек бўлди. – Фақат юрагини узиб олганлари билан, «Оҳ!» деб юборди, – деди чол кўзларидан оққан ёшларни гулхан қорайтирган енги билан артар экан.
 - Йўқ, у менинг ўғлим эмас экан! – деб юборди чолнинг сўнгги сўзини эшитиб ўрнидан туриб кетган Амир Темур.
- Даврадагилар Соҳибқирон сўзини эшитиб, бир қалқиб кетдилар. Амир Темур уларнинг ҳар бирининг кўзига тикилмоқчи бўлгандек, даврадагиларга бир бошдан тикилди ва ўзига боқиб турган чолга навбат етганда яна такрорлади:
- Йўқ, у йигит менинг ўғлим эмас! – Шу гапни айтиши билан соҳибқироннинг кўз ўнгини бир зум кумуш ёғду тўсади. Кумуш ёғду аро чайқалган беланчакни кўрди. Бироқ беланчак бўм-бўш эди. “Ўғлим!” – дея товушсиз ўртанди жаҳонгир...

Соҳибқирон қалъани бузиб ташлашни, чолга бўлса нима тиласа ўшани бериб, ўзи хоҳлаган манзилига етказиб қўйишни буюрди. Ўша заҳоти унинг амри бажо келтирилди. Темир тоғи эриб, яна қалъа томонга оқди ва бирпасда қалъадан ном-нишон қолмади.

Эртаси куни бу симобий оқим дарё ёқалаб мағриб томонга оқди. Номаълумликдан саросимада қолиб оромни унуган олисдаги шаҳару қишлоқлар бу темир оқим уларнинг қай бирлари томон бурилишини билмай, ваҳима билан кутардилар. Номаълумлик сарҳади камайган сайин бу темир оқим уларга шунчалик яқинроқ келарди. Бу темир оқим четлаб ўтган қишлоқлару кентларда бирпастда талваса ўрнини фароғат, кўркув ўрнини хотиржамлик эгалларди. Келинчаклар йиғиширилган беланчакларини яна дарахтга илардилар, яна алла айтиб болаларини ухлатиб, дала-да ҳосил йиғиши билан овора эрлари учун овқат тайёрлашга уринишар, айрим уддабуронлари шу орада ўсма эзиб, қошлирига суриш учун ҳам вақт топардилар.

Чол эса соҳибқирондан ҳеч нима сўрамади. У деворлари бузилиб, ер билан текисланган қалъа атрофини тарк этмади. Бир неча кундан сўнг Амир Темур тўсатдан чолни эслаб, суриштириди. Унга чолнинг қалъа ёнида қолганини айтдилар. Соҳибқирон қўшиндан бир гуруҳ ажратиб, чолни ўз ҳузурига олиб келишларини буюрди. Гуруҳ бир неча кун йўл босиб, манзилга етиб келдилару чор-атрофни қидириб чолни тополмадилар. Жангчилар чол дарё соҳилида янги пайдо бўлган қабрда кўмилганидан бехабар эдилар. Уни кўмган подачилар эса шарқдаги тоғ қояларидан пастга олиб тушган подаларини ҳайдаб аллақачонлар олислаб кетган, улар чолнинг Амир Темур ва унинг ўғли ҳақидаги маҳзун ҳикоясини аллақачонлар афсона қилиб айтиб борардилар...

Афсона мана шу ерда якунланади.

Вассалом.

Назар ЭШОНҚУЛ



ШАМОЛНИ ТУТИБ БЎЛМАЙДИ

Юз йилдан бери терсоталикларнинг ғуури ва фахри бўлиб келган, замонавий қилиб қурилган ра-воқли уйлар қархисида юздаги чипқондек қишлоққа кўримсизлик ва кексалик бағишлаб турган, номаълум ва мудҳиш синоатларга тўла қадим қўргонни эслатувчи Байна момонинг уйини худди унутишга ва йўқ қилишга маҳкум этилган хотирадек ниҳоят бузиб ташлашга киришишди: темир тирноқли булъодозерлар уйнинг деворларини қулатар эканлар, уй билан қўшиб, ўзларининг ҳам нималаринидир бузиб, вайрон қилишайтгандек, терсоталиклар бир чеккада жимгина кузатиб туришар ва нақ эллик йилча тақдирнинг бешафқат ўйинига қарши кураша-кураша дунёдан ёлғиз ва изсиз ўтиш азобини кўтариб келган, ҳаёти ўзларига ҳамон тушуниқсиз ва мавҳум туюладиган Байна момони эслаган аёллар кўзларига ёш олиб, болаларини бағирларига босганча, олис ва фамгин хотираларга берилиб, мунғайган алфозда ўтирадилар.

Байна момо тириклигида, гарчи бу аёлларни, эрининг полвонлик лаш-лушлари ва кийим-кечаклари ётган, полвонниг ўлимидан сўнг ҳеч қачон чироқ ёнмаган, туйнуги шуваб ташланган ана у ҳужра каби қоронғу мусибат тўла уйи ичкарисига киритмаган бўлса-да, улар қаҳр ва ғазабини ситам билан ичига ютиб келган бу кампирни хурмат ва эҳтиром билан эслашарди. Бу уй Терсотада қурилган биринчи уйлардан

эди ва Райим полвоннинг отаси Шукур оқсоқол бундан бир аср муқаддам туғилажак фарзандларига кенг уй ва йилдан-йилга кўпайиб бораётган йилқиларга отхона солиш мақсадида Терсота сойининг офтобрўя-сига қишлоқнинг биринчи пойдеворини қурганди. Райим полвон эса отасининг ишини давом эттириди: уйнинг орқасида боғ барпо этди ва отхона ёнида қирга туташтириб, ёзниг жазирамасидан гўшт ва ёғларни, қимиз ва айронларни асраш учун кенг ертўла, уйнинг олдига тошдан баланд супача, от кириб чиқадиган узун, устундор айвон қурди. Байна момо эллик йилга яқин ёлғизлиқ даврини ана шу айвондаги устунларга суюниб ўтказди: у эри ва ўғлининг жудолик азоби қийнаган пайлар шу устунларни қучганча йиғларди. Кейинчалик кўз ёшлари ҳам тугаб қолгач, ҳаётида гўё суюнчиғи ва орқасидан йиғлаб қоладигани йўқлигини одамлардан яшириш учун ёки энди йиллар силсиласига дош беролмай путурдан кетаётган уйни буткул вайрон бўлишдан асраб қолмоқчидек, елкасини устунга суюган ҳолатда хотирасининг синиқ парчаларига тикилиб, кўзларини юмганча ғамгину мустағриқ ўтиради.

Райим полвоннинг ўлимидан кейин туғилган ва у ҳақда кейинчалик буткул эсларидан чиқиб кетган чўпчакларнингина эшитиб улғайган авлод уйларини равоқли ва пишиқ ғиштдан қура бошлигач, бир пайлар Терсотанинг кўрки ва ғурури бўлиб турган бу уй бирдан кўримсиз қиёфага кирди ва энди Байна момо каби уй ҳам қишлоқдаги уйлар олдида ёлғизланиб қолганди: фақат бири-бирини босиб-туртиб кириб келаётган шошқалоқ йиллар бу авлоднинг саркаш қалбига қандайдир олис хотирани ёқиб қўйиш учун бехуда уриниб, уй деворларига маҳзун битиклар ёзар, бекаси билан бирга бу макон ҳам аллақачон ўзининг олдинги кудрати ва виқорини йўқотиб бўлган, унун ва ташландиқ масканга айланганди. Терсоталиклар энди аэропланлар ҳақида гаплашишарди. Улар за-

моннинг алғов-далғовларига ғарқ бўлган, ҳаётларида юз бераётган янгиликларни ҳазм қилиб улгурмасди. Йиллар билан бирга ҳамма нарса ўзгарар, фақат Байна момогина уни сезмас, гўё унинг учун вақт ўша ҳолича қотиб қолгандай, уни ҳамон ўша эллик йил олдинги – эри ва ўғлининг ўлигини аскарлар тепкилаб ўтишган устун олдидан топиш мумкин эди.

Миршаб ва аскарлар уйнинг ҳар бурчагидан ёпирилиб келишганда Байна момо эрининг мурдаси устида турарди. Райим полвонни қўлга туширолмай юрган Замон отбоқар уни уйидан чиқаётганда отиб ўлдирган, энди полвон ростдан ҳам ўлганми, йўқми миршаблар билан пусиб-пойлаб, айвонга яқинлашиб келарди. Бироқ шу пайт яна ўқ овози жаранглади ва Райим полвондан кўз узмай келаётган аскар оёғини қучоқлаганча бақириб йиқилди. Байна момо меҳмонхона эшигидан чиқаверишда отасини отиб ташлашганини кўргач, уйга югуриб кириб кетган, қўлига отасининг милитигини тутиб турган ўғлини кўрди – ўғлининг кўзларида ҳам эриники каби ғазаб, телбалик ёнарди. Байна момо ўғлини огоҳлантиришга улгурмади. Бирданига бир неча ўқ овози унинг қулоғини битириб қўйди ва ўғли отасининг устига юзтубан йиқилди – йиқиларкан, энди сабза урган мўйлови титраб кетди, онасиға бир зум қўрқув ва хижолат аралаш тикилди. Замон отбоқар югуриб келиб, унинг бошига тепди ва милиқни бир четга улоқтириди. Қишлоқда аскарлардан бошқа ҳеч ким кўринмас, одамлар гўё сувга чўккандай ғойиб бўлган, фақат деразаларга тортилган қора пардалар бу мудҳиш жиноятга лоқайд ва бефарқ боқиб турарди. Байна момо терсоталикларни кечира олмади – кўкраги илма-тешик бўлган ўғлига қаратса Замон отбоқар яна бир неча бор ўқ узаркан, у мадад излаб, уйларнинг туйнукларини ёпиб турган қора пардаларга бир-бир кўз тикиди, бироқ у ердан совуқ сукутдан бошқа ҳеч нарса кўринмас, зулматга чўккан туйнуклар бу мисли

кўрилмаган қотилликни жимгина томоша қилиб турарди. Миршаблар Райим полвон ва ўғлиниң ўлганига ишонч ҳосил қилишгач, отларига миниб жўнаркан, Замон отбоқар эри ва ўғли мурдаси устида чўкка тушган Байна момонинг елкаси оша қамчи туширди:

– Энди хору зорлиқда ўлиб кетасан, – хириллади у. – Молингни топшир, деганда эринг қўлига милтиқ ушлаб биз билан сичқон-мушук ўйнади. Мана, энди унга ҳеч нарсанинг кераги йўқ.

Миршаблар Райим полвоннинг қўрадаги подасию отларини ҳайдаб кетишиди. Замон отбоқар отларни қувиб кетаркан, бирйўла отаси билан унинг қасосини олиши мумкин бўлган ўғлини ҳам отиб ташлаганидан хурсанд эди – у шу кетиши билан қишлоқнинг кўп нарсасини ҳайдаб кетди – энди қишлоқ бирдан минораси қулаган шаҳардек ғариб ва нотавон кўринарди. Ўн беш йиллардан сўнг Замон отбоқар қишлоққа қайтиб келганда қишлоқдан файз кетиб, одамлар яна ҳам ожиз ва хуркак бўлиб қолгандилар. У Райим полвондан сўнг ташландиқ ҳолатга келиб қолган сой бўйидаги боғга кенг қилиб уй қурди: у боғда уй қуриш учун ҳеч кимдан рухсат сўраб ўтирмади. Энди у ўзи бу қишлоққа олиб келган замон ҳавосидан яйраётган қишлоқдошларини кўриш учун отда изидан бир тўда ов итларини эргаштириб айланиб юаркан, қоя остида елкасига ўтин кўтариб келаётган Байна момога дуч келди. Байна момо қариб қолган, аммо ҳали ҳам кўзлари худди ўн беш йил аввалгидек қаҳрли ва нафрат тўла эди.

– Сен менга бундай қарама, – Замон отбоқар қамчисини ҳавода силкитар экан. – Эринг бу ерда бўлмаса, бошқа ерда барибир ўлган бўларди. Сен эса хавотир олма, ўлсанг итларим кўмади. – Шундай деб у бўрибосарларни кўрсатди. Аммо у Байна момони бу сафар урмади. Байна момо ҳам унга бир оғиз ортиқча гапирмади. Умуман эри ва ўғлиниң ўлимидан сўнг камгап ва одамови бўлиб қолганди. У Шукур оқсоқол ўз феъ-

лига яраша кенг-кенг қилиб қурган хоналарда худди бир нарсасини йўқотган каби мақсадсиз кезиб юрарди: у энди бу алғов дунёда ёлғиз ва қаровсиз қолганди: лекин ўзининг ожизлигини ҳеч қачон билдирмас, ўзидан кўнгил сўраганларни ёмон кўрар, гўё ҳаёти ҳеч ким қиё боқа олмайдиган дахлсиз салтанатдек у ёқقا бирон кишини, ҳатто сўзи билан ҳам киришга йўл қўймасди. Эрта баҳордан то кеч кузгача саҳармардандан олдига беш-олти қўй-қўзи, эчки-улоқ ҳайдаганча дарё бўйидаги юлғунзорга тушиб кетар, у ердан қуриган шох-шабба териб, қоронғу тушганда уйига қайтар, бир йилда икки-уч марта тегирмонга буғдой кўтариб бораради. Унинг буғдой кўтариб юришидан ори келган Олломурод тегирмончи Байна момони инсофга чақирди:

– Сиз бундай овора бўлиб юрманг, – деди у. – Бирон эркакдан бериб юборсангиз, тортиб, ўзим уйингизга олиб бориб ташлайман.

– Бу қишлоқда эркак йўқ, – деди Байна момо зарда билан, сўнг елкасидаги буғдойни тегирмонга кираве-ришда туширди. Гапираётганда овози титраб кетди. Тегирмончи тилини тишлаб қолди. Байна момо бир пайтлар фақат қишлоқ эмас, бутун тоғли халқнинг орини кўтарган, номини чиқарган Райим полвонни қулоқ дея таъқиб қилишларига, сўнг итдай хор қилиб отиб ташлашларига йўл қўйгани ва ўғли билан эрини замоннинг эгаси, бир пайтлар Райим полвоннинг ма-лайи Замон отбоқар ихтиёрига бериб қўйгани учун қишлоқдошларини кечиролмас, уларга бўлган нафра-ти сусайиш ўрнига, йиллар ўтиб, ота-бала ўлдирилган оқшомдан узоқлашган сайин кўпроқ ўрни ва қадри би-линаётган, ўзини ҳаётнинг барча қувончидан бирйўла маҳрум этган, ёлғизликнинг кўр мусибати аро тобора авжланиб, Байна момонинг кексалиги билан бирга инжиқ ва йўриқсиз бўлиб бораради. У баъзида қишлоқ-дошларини очиқ масхара қиласди: «Э, сенмисан, Са-

лом кўса, хотинингнинг иштонини кийиб юрибсанми дейман», «Ҳаким отчопармисан, бунча урғочи байталга ўхшаб қийшанглайсанг?..» «Бу қишлоқнинг аёллари энди фақат ҳезалак туғади». Бу масхара ва нафрат йиллар ўтиши билан Байна момони қишлоқдан бутунлай ажратиб қўйди. Энди ўёлғиз ва кимсасиз қолди. Уни ойлаб бирор йўқламас, фақат эрталаб эчкилари ни юлғунзорга ҳайдаб бораётганидан, кечкурунлари қишлоқни тутган қайнаётган сут ҳидидан ҳали унинг тирик эканини билишарди. Байна момо ўз ёлғизлиги ва мусибатини ҳаётнинг бадбўй, забун, хор этилган ҳидлари анқиб ётган йиллар даҳлизидан етаклаб ўтди. Қишлоқдошлари баҳор келиши билан эски яйловларга кўчиб чиқишар ва ер шудгорлар, ҳар ким ўз ташвишига берилиб кетарди. Қишлоқда қолган Байна момо эса бу пайтда ёлғизлик даштини шудгорлар, у ерга ҳар йили Замон отбоқар ҳукумат одамлари билан келиб, эри ва ўғлини отиб ташлаган оқшомни экар ва сўнг ёлғиз ўзи ҳосилини ҳам йиғиб оларди. Байна момо ҳар кеча кўз ёшлари билан тўлган қайиқда йиллар қояла-ри орасида қолиб кетган эри билан ўғлининг илма-тешик бўлган мурдаси ва Замон отбоқарнинг музофар қамчиси ётган қонли ҳалқоб билан тўлган айвонга сузиб борар, эрталаблари ҳўл бўлиб кетган ёстигини худди қадим аждодларнинг унут яловидай уйининг олдидаги – орадан йиллар ўтгач, уйини бузаётгандар қўпориб ташлашга кучлари етмагач, ковлаб олишга мажбур бўлган – баланд толга осиб, офтобда қуритарди. Қиши пайтлари ғамлаб қўйган ўтини етмаган кунлари у кўрпага оёғини тиққанча хотирасига исиниб жон сақларди. Ражаб кўса қариндошлиги қўзиб, бир неча йил олдин ғамлаб берган ўтини омборхона ортида кўса келтириб, тахлаган жойда тахи бузилмай турарди – уни Байна момо қазо қилганда маъракага яратишиди ва барча терсоталиклар Райим полвон тириклигига

ҳамманинг маслаҳатгўйи бўлган, уйи ҳамиша меҳмонлар ва полвонваччалар билан тўлиб-тошадиган бу аёлнинг бунчалик нафрати ва тавқи лаънатига сазовор нима гуноҳ қилишганини бир умр билолмай ўтиши. Байна момо қишлоқдошларига кўз-кўз қилмоқчидаётгандай эри ва ўғлининг полвонлик яктакларини ҳар ойнинг охирида шусиз ҳам ҳамманинг кўзига ташлашиб турадиган уйининг шаппатгайига осиб қўярди: яктаклар ҳам бора-бора йиллар ҳовурига ҳамда ҳар ойда қайта ювадиган нафрат тўла чангалларга дош беролмади: Замон қассоб ўлимидан бир кун олдин яктаклар торда увада-увада бўлиб осилиб турар, улар энди кийимдан кўра кўпроқ қабрлар устига илиб қўядиган лахтакка ўхшаб қолганди.

Замон отбоқарнинг ўлими ҳам Байна момонинг қалбини юмшата олмади: унинг ўлими тўғрисидаги хабарни келтиришганда Байна момо ўз хужрасида келинлик сандиғи ёнида чўкка тушганча мусибатуғамга кўмилиб ўтиради: унинг шу туриши азоб-уқубатнинг бир тўплам уюмига ўхшарди. Ҳужрага бош суққан Розия момо унга Замон отбоқарнинг ўлими ҳақидаги хабарни етказди. Барча аёллар ҳозир қувончдан ҳаммани бир-бир қучиб чиқади деб ўйлашганди. Аммо Байна момо хабарни оқсуяклардек хотиржам қабул қилди: у бу хабардан ажабланмади ҳам, ўтирган жойидан остонаядаги аёлларга бурилиб ҳам қарамади – ҳайкалдай, гўё тошдай қотиб ўтираверди. Фақат унинг бармоқлари қалтираб турар, хонага қон ҳидидай нохуш ҳид ўтириб қолганди. Аёллар ундан жавоб кутиб узоқ ўтириши. Орадан анча вақт ўтгач, Байна момо уларга ўгирилиб ҳам қарамай, гўё уларни кўришдан ижирғангандай ва жиркангандек алфозда: «Боринглар, ўликларингга йиғланглар», деди. Унинг қаҳр тўла товуши кўпдан буён одам қадами етмаган ҳужралар ичига сингиб кетди: у ердан йигирма уч

йиллик чангу ғубор гўё зардали овоздан қалтираб кетгандек жойларидан бир қимиллаб қўйди, сўнг яна ҳужраларга бу хонадон бошига тушган ғам-андуҳдай абадий чўкди. Шундай дея Байна момо мусибат ва ғам адо қилган бу аёлнинг йилдан-йилга кичрайиб, қариб бораётганидан ва юзларини тилим қилиб ташлаган ажинларидан уялгандай фаслма-фасл ранги ўзгариб, худди бекаси каби туссиз, рангсиз кўринишига келиб қолган ва ҳеч қачон елкасидан тушмаган желаги билан юзини аёллардан тўсиб олди; шу билан у терсоталиклар ва одамлар билан ўрнатилажак барча мулоқотлар эшигини тақа-тақ ёпди ва фақат ўзигагина маълум, бошқа ҳеч ким англай олмайдиган, бошқа ҳеч ким англашга қодир бўлмаган ўз дунёсига кириб кетди.

Байна момо сўнгги нафасигача ўз нафратега содиқ қолди. Замон отбоқарнинг ўлемидан сўнг ҳам қишлоқдошлари билан илакишиб кетолмади. Умрининг охирида бу ўжар кампир барибир ўзлариникига кўчиб бормаслигини сезгач, синглиси билан куёвининг ўзлари кўчиб келишди: аммо бу пайтда Байна момо бутунлай оёқдан қолган, фақат кунузоги кўзини шифтга тикканча чўзилиб ётишга ярарди. Байна момони эри ва ўғлининг қабри ёнига қўйишли: эллик йил аввали-ги қабрни осонгина топишди; қабр деярли ҳар ҳафта тозалаб турилганидан бошқа қабрлардан яққол ажралиб турар ва ундан мискин бир андуҳ анқирди. Унинг Райим полвондан сўнг деярли янгиланмаган, ҳатто уларга ҳам мусибат ва ёлғизлик ҳиди ўтириб қолган кўйлакларини халқ лапарларини йиғиш учун келиб, қуриб кетишган ва ўша талаба қизлардан сўнг бирон марта фойдаланилмаган торга узоқ жанглардан сўнг мағлуб бўлган қўшиннинг ўзларига ўлжа қолган туғларини осиб қўйишгандек ва қишлоқдошларидан эллик йил нафрат қилган аёл устидан ниҳоят ғалаба қилишгандек бир-бир осиб чиқишиди. Талаба қизлар ўшанда Замон отбоқарникига йиғилган, пишириқ-ми-

шириқни бошлашган аёллар қий-чув қилишаётган оқшомда келишганди. Уларнинг келиши билан Замон отбоқарникида бошланган тўй ташвишлари қўшилиб кетди. Бироқ қизлар қишлоқ иримларини назарига ҳам илишмади. Байна момоникига кела-солиб, кир ювишга тушдилар – улар ичқўйлак, рўмол, яна Байна момога ғалати кўринган шимларини шундоқ ҳаммага кўз-кўз бўладиган жойга бемалол осиб қўйишиди – улар Мели ўқитувчининг «қишлоқдаги энг кекса аёл» деган бир оғиз гапи билан Байна момоникига келиб ўрнашиб олишган, афтидан, ҳали-бери кетишмоқчига ўхшамасди. Байна момо улар билан очилиб гаплашмади ҳам. У кечқурун эчкиларни соғаркан, қизлар ҳайратдан қий-чув қилиб юбордилар: уларнинг биронтаси ҳам эчки соғишини кўрмаганди. Қизларнинг бир-икитаси Байна момога яқинроқ келиб, унинг эчки елинига бориб келаётган қоқсуяқ қўлларига қарадилар: миршабларнинг ҳафсаласини пир қилган, худди уйнинг девори каби йиллар уқалай-уқалай жимитдек қилиб қўйган гавдасини сал олдинга эгиб турганидан унинг ўзи ҳам қари ва озғин эчкига ўхшаб қолганди.

– Агар ўғлингиз бўлганида мен сизга жон-жон деб келин бўлардим, – деди қизлардан шаддодроғи Байна момонинг эчки соғишидан завқи келиб.

Байна момо унга ўқрайиб қаради ва кўзларида бирдан алам ёнди: қизлар қўрқиб кетишиди: кўз олдиларида Байна момонинг бутун танаси бирдан тутаб жўнагандай туюлди. Қизлар дуд ҳидини аниқ сезишиди. Байна момо ўрнидан турди-да, қўлидаги кадини супага қўйиб, ичкари кириб кетди ва шу киргани билан эртасига эчкиларини юлғунзорга ҳайдаб кетмагунча қайтиб чиқмади. Чошгоҳ пайти эчкиларини ҳайдаб кетар экан, қизларга бир оғиз ҳам гапирмади. У худди ойпастга ўхшаб кетиб борар, эчкилари юлғунзорга эмас, Пўлат чолнинг бедапоясига қараб кетаётганини ҳам сезмай юлғунзор тарафга йўл олганди. Пўлат

чол қорни шишиб кетган эчкиларни ҳайдаб келганда Байна момони уйдан тополмади: у алламаҳал, ой атрофни сутдай ёритганда шарпадай кириб келди ва уйга кириб кетиб, то миршаблар сўраб келмагунча уйдан чиқмади. Қизлар бир ҳафта унинг оғзини пойлаб овора бўлишгач, бирон нарсага эришолмай қайтиб кетишиди. Улар уй олдида пайдо бўлишлари билан уйнинг таназзулга юз тутгани бирдан билиниб қолди. Улар навқирон ва гўзал эдилар, уйдан ва Байна момодан чиркинлик ва мусибат ҳиди келар, навқиронлик олдида бирдан уй ҳам, Байна момо ҳам кексайиб қолгандай эди. Улар бу уйга ўрнашиб қолган ёлғизлик ва мусибатни чўчитиб, сўнг қувиб юборишмоқчидай тинмай хохолашардилар. Талаба қизларнинг очиқ-сочиқлиги ва лорсиллаган таналарини кўз-кўз қилиш учун кийиб олган тор шиму кўйлаклари, калта сочлари-ю ғалати, оппоқ пайпоқлари ҳам табиатан текин томошани яхши кўрадиган терсоталикларнинг эътиборини тортолмади: уларнинг шаҳар атири уфуриб турган ноз ва таманнолари сирли тарзда ўлдирилган отбоқарнинг азаси орасида кўзга ташланмай қолди. Узоқ вақт фарзандсизлик азобини тортган отбоқарни қирқдан ошиб дунёга келган уч ўғлига бирваракайига дабдабали тўй қилиш учун казо-казоларни шахсан ўзи айтиб келиш мақсадида шаҳар тушиб кетгандан икки кундан сўнг эрталаб дарё бўйидаги юлғунзор ичидан чавақланган ҳолда топиб олишганда аллақачон тўй қозонлари қурилиб, узоқ манзиллардан баъзи меҳмонлар кела бошлаган эди. Узоқ йиллар ўзларига суюнчиқ бўлиб келган отбоқарнинг ўлими худди душманларидан ўзларини асраб турган қўрғонлари кулагандек терсоталикларни бирдан мунғайтириб қўйди – улар қарийб йигирма беш йил раҳнамо ва пешволари бўлиб келган одамнинг ўлимидан қаттиқ қайғуга тушдилар. Эртасига етиб келган миршаблар қишлоқдаги ҳар бир эркак билан гаплашиб чиқишиди, сўнг улар

Байна момоникига йўл олдилар – улар йигирма уч йил муқаддам отбоқар туфайли эри ва ўғлидан ажралган аёлни тўсатдан эслаб қолишганди. Бироқ улоқлар ичида улоқдан ҳам кичик жуссали, юзига йилларнинг бешафқат муҳри босилган ҳамда ёлғизликка маҳкум этилган, ҳар бир сониянинг мусибату андуҳи асорати порлаб турган кичкина, жимитдай, соchlари оппоқ бўлиб қолган кампирни кўришгач, негадир ботинишолмади – улар қаршиларидағи рамақижон кампир билан девдай Замон отбоқарни қиёслашиб, ўз шубҳаларидан уялиб кетишиди, чоғи, индамай изига қайтдилар. Улар, гарчи Байна момони сўроқ қилғанларида ҳам ҳеч нарсага эриша олмасдилар – у кейинги йилларда бир оғиз ҳам гапирмаган, сўзлар ва уларнинг маъниси унинг хотирасидан чиқиб кетгандай ёки ўз моҳиятини йўқотгандай, ўз қайғу ва азоби билан кунларни зўрга енгиб яшаётган эди. Замон отбоқар итдай ўлим топганди. Жасаднинг шу туриши аввал ўзи, кейин тепаси қулаб тушган улкан минорни эслатарди – кийимлар пора-пора йиртилган, аврати узиб ташланган, ўнта бармоқнинг ҳаммаси кесиб олинганди... Барibir бармоқни излаб топишолмади. Жасадни бармоқсиз кўмишга тўғри келди: бутун қишлоқ нақ қиёмат майдонга айланганди: аёллар уввос солиб йиғлашар экан, энди соchlари қордай оппоқ, деярли арвоҳга айланган, қишлоқдошларининг хотирасидан ҳам чиқиб кетган Байна момо том устида Райим полвонни итдай отиб ташлашларидан бир неча дақиқа олдин отини эгарлаш учун олиб чиқаётиб, ўқقا дучор бўлган, йиллар пора-пора қилиб ташлаган жабдуқ устига чўкка тушганча тўй деб келиб, аза устидан чиқаётган меҳмонларни, тўй бераман деб, энди аза берётган қишлоқдошларини кузатиб, худди қутлуғ бир вазифани ўтаб, энди дунёда армони қолмагандек, йиллар ғижимлаб ташлаган юзида бир жунунваш ифода қотиб қолган ҳолда терсоталиклар ҳаётига йигирма уч йил соя солган тош ҳайкал каби қилт этмасдан ўтиради.

Ниҳоят бу кампирнинг ҳам ситамгар китоби ўқиб бўйинди – у лайлатулқадр кутилаётган оқшом ёғоч ва кўп йиллик андуҳлар ҳиди ўтириб қолган, содиқ қўшиндай эллик йилнинг бирон куни ҳам тарк этилмаган ғамнок ва аламли салтанати – келинлик тўшагида жимгина жони узилди – фақат ўлиши олдидан синглисини чақириб йигирма йилдан буён очилмаган, олтмиш етти йил олдин тераклилил Кўр Сафар уста ясаган, ярим вайрона сандиққа имо қилди ва бир сўз демай тўшакка бош қўйиб жимгина жон берди. Уни эртасига тушга яқин чиқаришди. Удумга қўра азага Ўранинг барча қишлоғидан одамлар терилиб келишди – амир замонларини кўрган, нариги асрнинг сўнгги ёдгори бўлган қишлоқдошларини сўнгги йўлга кузатиш учун барча кексаю ёш йифилди. Йифилганлар орасида Райим полвон билан ўғлини ҳимоя қилолмай, Байна момонинг бир умрлик нафратига дучор бўлган, ўша пайтда навқирон, энди шарти кетиб, парти қолган чоллар ҳам бор эди. Улар орадан эллик йил ўтгач, бу унут ва музтар гўшага биринчи бор қадам қўйишган ва тобут ортидан гуноҳкорона бўйин эгиб боришарди.

Мурдани ювиш олдиdan сандиқни очишиди. Аввал ўлимликка аталган кийим-кечакларни, кафанни олишди, сўнг дастаси қорайиб қолган қамчи, сопига гавҳар ўрнатилган ханжар, эркак кишининг тер ҳиди келиб турган калапўши, кўкракка тақадиган зебигардон, кампирнинг қўлида ҳеч қачон кўринмаган келинлик билагузуги, этаги каштали, ёқасига тасма урилган кенг кўйлақ, ангишвона ва сарғайиб кетган Куръонни олишди. Энг охирида сандиқдан боғичини чирк боғлаган, капитарнинг юрагидек кичкина, матоси зар сим билан тикилган, кўп йиллик қон қотиб қолган тумор ва тифи занглаған қайчи, кўп йил турганидан бўғин-бўғин бўлиб, фақат суякнинг ўзи қолган, у ҳам қорамтири тус олиб, нақ кукунга айланиш арафасига келган, чорсининг йиртиғига палапартиш ўраб ташланган ўнта одам бармоғи ҳам топилди...

Абдуқаюм ЙўЛДОШЕВ



БИЗ ЎТГАН ЙЎЛЛАР

...1991 йилнинг кўклами.

Йўғон чўзилиб, ингичка узиладиган пайтлар.

Шундай кунларнинг бирида Ўзбековулдаги ягона озиқ-овқат дўйонига “талон” бўйича тарқатила-диганига нисбатан уч қоп ун ортиқча олиб келинганини ҳақидаги хабар қишлоққа яшин тезлигида тарқалди.

Аста намозшом бостириб келаётган бўлишига қарамасдан бирпасда дўкон олдига тумонат одам тўпланди. Сотувчи Хидирбой бирдан ердан қайнаб чиққандай пайдо бўлиб қолган бунча овулдошлари-ни кўриб, шошиб қолса-да, атай қовоғини уйганча, ўшшайиб тураверди. Тўғри, кейинги пайтларда, яъни “талон тизими”га ўтилганидан бери аҳвол шу, яъни дўйонга ун келса бас, ҳаммаёқни одам босиб кетади. Ҳатто фуқаролар йифини раиси Одил чўлоқ ҳам уларни бошқаролмай қолади. Шўрлик раис ҳар қанча бақириб-чақирмасин, томоги қирилиб кетгунча қичқирмасин, барибир овулнинг эркаклари ва аёллари ун учун маҳаллама-маҳалла келишни ёки навбатда туришни хаёлларига ҳам келтирмай, бари бирдай мўъжазгина дўйонга ёпирилиб киришга уриниб қолишарди. Гўё шундай қилишмаса, ун тугаб қоладигандай, етмай қоладигандай. Ҳолбуки, раиснинг елиб-югуришлари, саъй-ҳаракатлари билан ҳар бир оиласга белгиланган миқдорда ун олиб келинарди.

Ишқилиб, одамлар бақир-чақир қилишар, бир-бирлари билан неча мароталаб уришиб ҳам олишар, жон-жаҳдлари билан ичкарига туртилиб-интилаверип, бир-бирларини тирсаклари билан туртиб, гоҳида эса ошкор итариб ташлаб сотувчини ҳам, раисни ҳам баттар хуноб қилишарди. Ора-сира ун олиш учун “очиритсиз” кирган бечоранинг бошига эса мислсиз қарғишлару сўкинишлар дўлдай ёғиларди.

Ниҳоят, бир ой учун белгиланган ун олиб бўлингандан кейингина одамлар сал енгил тортишар ва гёёки катта ишни бажариб қўйган қаҳрамонлардай кўкракларини керганларича уй-уйларига тарқалишарди.

Шундан кейингина Хидирбой норози бўлиб пўнфиллаганча полга, ерга тўклиб қолган ун қолдиқларини супуриб-сидиришга тушарди.

Охири яхши тугаган нарса барибир яхши-да. Овулнинг эркаклари ва аёллари ҳам ҳар бир оиласа белгиланган тўрт кило ун учун ҳар қанча ёқа бўғишимасин, барибир савдо тугаб, ўз мақсадларига етганларидан кейин яна апоқ-чапоқ бўлиб кетишарди. Балки шу сабаблидир, навбат талаш авжга чиққан маҳаллари ора-сира асосан эркаклар орасидан ҳазил гаплар ҳам эшитилиб қоларди: “Хой, Мамарайим, хотинлар орасига ўтиб кетдингми... Туғиб қўядиганлар ҳам, чақалоқларнинг ҳақиқий оталари ҳам бенавбат киритилисин... Ҳой, сен қаёққа, эри демадик, чақалоқнинг отаси дедик...”

Баъзида қишлоқчасига сал қалтисроқ айтиладиган ҳазил гаплар ҳам янграр, ҳар қанча асабий кайфиятда бўлишмасин, бунаقا пайлари навбатда турганларнинг аксарияти беихтиёр жилмайиб қўйишдан ўзини тийиб туролмасди.

Бироқ бугун йигилганларнинг авзойи бузук эди.

Зеро, дўкон ёнига келганларнинг ҳар бири ортиқча уч қоп унни олишга ўзини ҳақли деб билиб, шунга ўзини тайёрлаб келган, бошқаларнинг ҳам худди шундай (ноҳақларча, албаттa!) фикрда эканини тусмол қилгани боис, элбурутдан жангга ҳозирланиб, айнан ўзининг ҳақ эканлигини жон-жаҳди билан исботлаб ташлаш тадоригида эди.

Одил раис ҳурпайиб турган эркак-аёлларга бир кўз ташлашдаёқ гап нимадалигини англади. Аммо ҳозирча индамай туришга, то талабгорлар бу масалани кўтартмагунча ўзини ҳеч нарса билмагандай тутишга қарор қилди.

Биринчи бўлиб қадди букчайиб, “дол” аломати касб этган, ирғай ҳассасига суянган Олия момо дўкон пештоқи ёнидаги ўзига хос саҳнага айланган майдончага чиқди ва дабдурустдан мақсадгага ўтди-кўйди:

– Мусулмонлар, барингнинг хабаринг бор, келаси ойда бир эмас, икки неварам уйланадиган. Ўзларинг инсоф билан айтинглар: хўкимат бераётган тўрт кило ун билан тўй ўтказиб бўладими? Шундай экан, ўша уннинг ҳеч бўлмаса экки қопи биздикি бўлиши керак. Гапим туврима?

Ёши саксонга яқинлашиб қолган, ўзбековулчасига айтганда, “Тўридан гўри яқин” кампирга бир нарса деб эътиroz билдириш мушкулдек эди гўё.

Аммо “Мол аччиfi – жон аччиfi” деганлари чин экан. Олия момо гапини тугатар-тугатмас одамларнинг орқароғида қолгани боис ҳадеб бўйинини чўзиб қўяётган шаддодгина жувон Каромат хола бобиллаб берди:

– Нима, бизни ёш бола биляпсизми, момо? Ҳали тўртта кўрпа қавилмасдан туриб тўйни гапирасиз! Шу кетиши бўлса орқаси оғир келинингиз августга бориб тўйга тайёр бўлсаям катта гап. Унгача янги буғдой пишади, ҳаммаёқ “Сен же, мен же” бўлиб кетади. Ун мана бизга керак. Энг камида икки қопи...

Аммо вақтида овул фаолларидан бўлиб, не-не эркакларни гап билан ўтириб-турғазган Олия момо салга бўш келиб ўтирадиган кампирлар тоифасидан эмасди. Ҳозир ҳам нурсиз кўзларини Каромат хола томон тикканча, шартта унинг гапини бўлди:

– Кароматмисан? Яшшамагур, сенга менинг келинимнинг орқасини ўлчашдан бошқа ташвиш йўқмиди? Бор, ишингни қил, лекин бу унга кўз олайтирма. Молбозор уч-тўрт кун перашкасиз қолса қолар...

Энди Каромат хола чийиллиб юборди:

– Мен айримларга ўхшаб ғарлик қилмайман, момо, ўғирлик қилмайман. Мен ҳалол ишлаб, пешона терим эвазига пул топаман...

– Кимга ишора қиляпсан, тилингга куйдирги чиққур!

– Гап эгасини топади, момо!..

Ва ҳоказо.

Агар қўйиб берилса, аёллар ўртасида даҳанаки жанг олови янада гуриллаб кетишини, орага ўн-ўн беш йиллик гиналар ҳам тушишини тушунди шекилли, басавлат Карим оқсоқол шопмўйловини силаганча “саҳна”га кўтариларкан, қаттиқ томоқ қириб қўйди.

– Бу ерда ортиқча гапнинг ҳеч кимга кераги йўқ, – деди оқсоқол ишонч билан. – Ҳўш, уч қоп ортиқча келган экан... демак, биттаси сельсоветимиз раиси Одил акага. Ҳар қалай, жўжабирдай жон, буёғи энди ўзбекчилик, меҳмон келари бор... Майли, қолган икки қопини биз ола қоламиз. Пули нақд...

Оқсоқолнинг гапига тўй-маъракаларда бирор эътиroz билдиrolmasdi. Ammo ҳозир...

– Йўғ-э! – деди аллақандай аламли оҳангда ўн йиллик шляпасини бошига қўндириб олган, ўзиям неча-неча ёз қуёш тифида юраверганидан мўридай қорайиб кетган, озғингина Камол сувчи. – Нима, биз ол-сак насияга оламизми? Мана, бизникиям нақд. – Шун-

дан кейин чўнтағига уриб-уриб қўйган Камол сувчи сотувчига ўгирилиб, маънодор кўз қисди: – Арава тайёр, ука, орттираверинг. Ҳеч ўйланманг, у ёғини келишиб оламиз.

– Нимани келишиб оласиз, Камол ака? – чинқириб юборди ғазабдан кўкариб кетган Тожибой агроном.

– Шапкасиними? Ё бир уруғданмиз деб, Хидирбойга орқа қиляпсанми? Айтиб қўйай, биздинг хотин ҳам сенларнинг уруғингдан. Лекин мен индамай турибман-ку... бизга бир қопиям бўлади деб...

Гоҳу гапираётганнинг,гоҳ бу гапираётганнинг оғзига анграйиб тикилиб турган Марварид чеча ахийри индамай тураверса ун тўла қоплар эркаклар орасида ими-жимида йўқ бўлиб кетишини тушунди чоғи, бир сакраб “саҳна”га чиқиб олди ва ҳамон бўзрайиб турган агрономга қараб бош бармоғини иккала бармоғи орасига солиб кўрсатди:

– Мана сенга бир қопи!.. Бекорларнинг бештасини епсан! Нима, иккитагина болангни боқолмай қолдингми? Уялмайсанми оғзингни тўлдириб “Бир қопи бизники” дейишга?! Закунлашсанг закунлашаман, лекин билиб қўй, ун мана бизники! Мать-гиройники! – Шундай дея чеча ҳар эҳтимолга қарши нимчаси кўкрагига тақиб келган “Қаҳрамон она” медалини кўз-кўзлади. – Аввал ўнтасини туғдириб қўй, кейин талаб қиласан ҳаққингни! Бермаям кўр-чи менга! Кепрак бўлса райком бовога бораман, обком бовага бораман! Лекин ҳаққимни бировга бериб қўймайман!..

Медаль, ҳар қалай, хукумат берган сийлов. Ҳукумат эса ўз номи билан хукумат... Шуларни ўйлади шекилли, энди қақшатқич эътиroz учун оғиз жуфтлаган Тожибой агроном ҳар эҳтимолга қарши индамай қўя колди, аммо барибир бир қоп унда ҳаққи борлигини

яна бир бор кўрсатиб қўймоқчидай, чеккароқда турган ўғлига қараб сал ўнғайсизроқ тарзда кўз қисиб қўйди.

Аммо Тожибой муаллим бир нарсани назардан қочирган, яъни ортиқча ун қоп дардида йиғилганлар сафига аллақачон хотини ҳам келиб қўшилган экан. “Ётиб қолгунча отиб қол” қабилида чекка-чеккада иш тутишни маъқул кўрадиган Норой чеча ҳозир ҳам одамлар орасидан писиллатиб зарба берди:

– Қаторлаштириб туғиб ташлашни пишак ҳам билади!

Сал нарсага ўт бўлиб ёниб кетадиган Марварид чеча ҳозир ҳам ранги қув ўчганча, лаблари пир-пир учиб таҳдид билан овоз келган томонга қаради:

– Ким у менинг болаларимни пишакбаччаларга мензаган?

Аммо одамлар учун бу жанг натижаси эмас, кимлар ортиқча уч қоп уннинг эгаси бўлиши масаласи қизиқроқ эди. Шу сабабли улар аллақачон умидвор нигоҳларини Одил раис томон буришганлари боис Марварид чечанинг саволини тузук-куруқ эшитишмади ҳам.

Бироқ томоқ қириб олган раис оғиз жуфтлашга улгурди, холос. Зеро, аллақачон саҳнага чиқиб олган Ибройим чўпон ҳеч эътиrozга ўрин қолдирмайдиган оҳангда эълон қилди:

– Бошқасини билмадим, лекин бир қопи биздики! Баринг бу ерда ўтирасан тайёрига айёр бўлиб, бизга ўхшаганлар тоғ-тошда нима еб-нима ичиб юрганидан хабарларинг йўқ! Хуллас, бир қопи биздики, тамом-вассалом! Қолганини ўзларинг бўлишиб олаверинглар!..

Аммо одамлар ҳам анойи эмас. Шу сабабли ҳали гапини тугатиб улгурмаган чўпон бошига таъна тошлари дўлдек ёғилди:

– Пулини құртдек санаб олғандан кейин юрасиз-да тоғда!.. Күчадаги мой ейди... Күйруқ мойи күттаряпти муни!.. Тандирнинг қуйруғини оппоққина нонга қўшиб егилари кеп қопти!.. Ортиқча жир битиби-да, жезда!..

Ва ҳоказо.

Бунчалик шиддатли ҳужумни кутмаган Ибройим чўпон сал довдираган алфозда саҳнани тарқ этди.

Энди ўз даъвосини достон қилиш навбати Холида опага етди. Кўп йил боғчада мудириалик қилиб, ниҳоят нафақага чиққан басавлат, ҳамон қош-қўзини бўяб юрадиган опа бениҳоя жиддият ила саҳнага кўтарилиди ва оломонга бир қур қўз ташлагач, мана шундай салобат ила маълум қилди:

– Уч-тўртта чақирдим бор эди. Кейинга суравериб бетимда бет қолмади. Рухсат берсангизлар, халойик, бир қопини бизга ажратишса. Майли, бир қопини раис ола қолсин. Қолганини ўзларингиз адолат билан бўлишиб оларсизлар.

Шундай опанинг илтимос оҳангида гапириши айрим эркакларни ийитиб юборгандир, эҳтимол. Бироқ Олтиной эна бўш келмади. Эна юлқиниб олдинга ўтди ва саҳнада мунғайибгина турган опага қараб ўшқирди:

– Бунча ҳаммангнинг оғзингдан “раис” тушмай қолди. Сенларга кетмон дастани бошлиқ қилиб қўйсаям бўлди, эгилганларинг-эгилган. Раисга нима? Бир оғзинингели! “Опкел” деса магазинчинг бир эмас, тўрт қопини уйига ташлаб қўяди. Ташимаям кўрсин-чи. Арбоб билан ҳазиллашиб бўладими. Шунинг учун, одамлар, ҳеч ўйланмасдан испискадан раисни чиқариб ташлаб, ўрнига мана мени ёзиб қўйинглар. Тўрт ой бўлди, уйда бир марта бешбармоқ қилиб ейишга зорман. Келинларга айтсам, ун ўлгир йўқ. Қачонгача қаттиқ нонни камириб, шилдир шўрва ичиб юраман. Шу умидда хўкиматга қирқ йил ишлаб берганмидим!

Ўроқ ўрдим, кетмон чопдим, пахта тердим... Аввал-ку, ёшман дердим, энди-чи, энди қариганимда кўрган куним шуми?!

Митти кўзлари ғилтиллаб ёшга тўлган Олтиной энанинг гапи сиёсий томонга бурилиб кетаётганини кўрган раис жон алпозда унинг гапини бўлди:

– Эна! Ўйланманг! Хукумат ҳеч қачон сиз сингари фидойи инсонларини унутмайди. Мана, яқинда ўзингиздек фидойи ўғлингизни медалга тавсия этмоқчимиз.

Кейинги пайтлари винодан бош кўтармай қолган тракторчи тўнғичи Раззоқ ҳақидаги эслатма юрагига ўқдай қадалган Олтиной эна раис томон ўқрайиб қарди-да:

– Темир тунукангни ўзинг пишириб е! Шусиз ҳам уйда бир ҳовучи ётибди! – деди дағаллик билан. – Мен сендан ун сўраяпман, ун! Милкимда битта тиш қолмаган. Бешбармоқ егим келяпти деб айтдим-ку сенга!..

Раиснинг бахтига кампирнинг сўнгги сўзларини оломоннинг шовқин-сурони босиб кетди:

– Инсоф борми ўзи, Олтиной эна?! Биз нон учун ун сўрасак, сиз уялмай бешбармоқ деб ўтирибсиз... Нонни чойга ивитиб қўйсангиз, юмшайди-қолади... Тўқликка шўхлик қилманг-да энди...

Мунғайиб қолган Олтиной эна саҳнани тарк этганидан кейин бирдан бу жойга чиқувчи талабгорлар кўпайиб қолишли. Улар энди бир-бирларини итариб-туртиб олдинга интилишар ва зўр бериб ўzlарининг ҳақликларини исботлашга ҳаракат қилишарди:

– Мен!.. Мен!.. Сен тўхтаб тур, номард!.. Аввал мен... мен...

Борлиқ шовқин-суронга, бақир-чақирга тўлди. “Саҳна” чеккасида турган, оломоннинг важоҳатидан ранги оқариб, ваҳимага тушиб қолган раис беихтиёр бир қадам ортга чекиниб, дўкон деворига тақалиб қолди.

Энди раис учун чекинишига бошқа йўл йўқ эди.

Оғзидан кўпик сачраётган, кўзлари олайиб кетган, мушт қилиб тугилган қўлларини юқорига кўтарган одамлар оқими бақир-чақир қилганларича раис томон силжиб келарди.

Худди шу лаҳзада...

– Халойиқ! – дея хитоб қилди гулдураган овозда Райим жарчи. – Бир нарсани унутибмиз-ку!

Оломон бир лаҳзага тўхтади. Бундан фойдаланган раис шартта бўш қолган оралиқдан лип этиб ўтиб кетди ва ўзини хавфсиз жойга олди.

Райим жарчи гапида давом этди:

– Ариқ қазишга кетганлар эсдан чиқибди-ку! Эши-тиб қолишса, биздан ўпкалашлари аниқ!

Оломон “оҳ” тортиб юборди. Гап шундаки, катта ариқдан Ўзбековулга сув келадиган кичик ариқ ҳар йили бўтана сув оқиши оқибатида бир-икки қулоч лойқага тўлиб қоларди. Овул аҳли кўклам чоғи ҳашар уюштириб, ариқни шу лойқадан тозалашарди. Ана шунда тозаланган ариқдан сув ўйноқлаб келиб, далалярдаги буғдойга ҳам, паҳтага ҳам, томорқага ҳам етарди. Бу йил ҳам овулнинг ўн беш эркаги кетмонларини кўтариб кеча тонгдан ариқ тозалашга кетишган. Бу кўпи билан уч кун давом этади.

Марварид чечча бетини чангллади:

– Жуда уят бўлибди-ку...

Бирдан оломон ҳовуридан тушди. Тўғри-да, овулнинг ўн беш эркаги далада, ариқ тозалаб юришсаю, булар бу ерда уларсиз уч қоп ортиқча унни бўлиб ўтиришса... Яхши эмас, яхши эмас...

Жаҳл, ғазаб, эътиroz ва даъволар олови бирдан пасайди.

Фурсатдан фойдаланган раис ташаббусни қўлига олди ва эълон қилди:

– Ҳозироқ ўзим одам юбораман! Худо хоҳласа, улар эртага эрталаб етиб келишади. Мажлисимиизни ана ўшандан кейин давом эттирамиз.

Одамлар бу таклифга рози бўлишди.

* * *

Ариқ қазишга кетганлар эртасига эрталаб эмас, пешинга яқин етиб келишди.

Уларнинг йўлига илҳақ кўз тикиб ўтирганлар дарҳол дўкон томон оқиб кела бошлади.

Ҳаммаси бошидан бошланди: бақир-чақир, эътиroz, даъво, илтимос, пўписа, писанда... Бу гал шовқин кечагидан кўра қаттиқроқ эди – ҳар қалай, ўн бешта эркакнинг қўшилганлиги сезилиб турарди. Бунинг устига, қизиқ томони шундаки, уларнинг ҳар бирига ҳам ҳеч бўлмаса бир қопдан ун керак бўлиб турган экан-да...

Ҳали айтиб ўтилганидай, овулда бир неча уруғ вакиллари истиқомат қилишарди. “Раис фалон уруғдан, барibir ўзиникиларга ён босади” деган қарорга келган бир неча ўзбековуллик кечаси “Адолатсизликдан, таниш-билишчиликдан дод!” деган мазмунда каттагина бир шикоят мактубини юмалоқ-ёстиқ қилиб ёзиб ташлаб, тонг саҳардан “юқори” идорага ўз вакилларини юбориб ҳам улгуришган экан денг...

Хуллас, бақир-чақир, талашиш-тортишиш авжига чиқкан, эркакларнинг сўкинишларига аёлларнинг қарғанишлари қўшилган, издиҳом гоҳ дўкон эшигига яқинлашиб, гоҳ узоқлашаётган палла қоп-қора “Волга-31” машинасида “юқори идора”нинг қора костюмшим кийган, қора бўйинбоғ таққан масъул ходими воқеа жойига етиб келди!

Масъул ходимни кўриб қолган Одил раиснинг бўлари бўлди!

Аммо масъул ходим чопқиллаб келган раиснинг гапини эшитиб ҳам ўтиrmади. У гердайиб дўкон ёнига борди ва бўйинбоғли амалдорни қўрган заҳоти бирдан дами чиққан пуфакдай пучмайиб, писиб қолган оломонга ўшшайиб назар солди ва саломларга алик ҳам олиб ўтиrmасдан:

– Короче, гап бундай, – деди. – Кеча адашиб, овулларингизга уч қоп унни ортиқча ортиб юборишибди. Демак, бошқа бир жойга шунча ун кам берилган. Мен нормадан ортиқча унни олиб кетгани келдим. Қани, машинанинг бағажнигига жойланглар-чи лишний унни.

Амалдор келганидан кейин бирдан жонланиб қолган Одил раис бир ишора қилган эди, Хидирбойга қўшилиб яна уч-тўрт киши шоша-пиша дўконга киришиди ва шундай шошқинлик ила уч қоп унни олиб чиқиб, қора “Волга”нинг юкхонасига жойлаштиришди.

Ҳамон ўшшайиб турган амалдор раиснинг жон ҳалпида айтаётган “Бир пиёла чой” борасидаги таклифини ҳам эшитиб ўтиrmасдан, виқор билан бориб машинанинг орқа ўриндиғига жойлашиб олди.

“Волга” қуюқ чанг кўтарганча катта йўл томон елиб кетди.

Оломон ҳамон сукутда эди.

Ахийри чўнтагидан рўмолчасини олиб, терлаб кетган бўйинни артган Одил раис халойиқقا қараб анчайин баланд овозда дўқурди:

– Бўлди, тарқалинглар! Ҳаммамиз чарчадик. Унни исписка билан кечқурун, ишдан кейин тарқатамиз.

Оломон яна чурқ этмади.

Уф тортиб қўйган раис оқсоқланганча уйига қараб йўл олди.

Хидирбой шоша-пиша дўконни қулфлади.

Шундан кейингина ҳаммаси тугаганини, яъни ортиқча уч қоп ун номаълум томонга олиб кетилганини англаган одамлар бирин-кетин тарқала бошлашди...

* * *

Шундан-шунга бекорга келганлари алам қилган эканми, ўн беш эркакнинг биронтаси қайтиб ариқ қазишига бормади. Улар ётиб олиб винохўрликка берилишди ва куну тун ўша уч қоп ун ҳақидаги хабарни “юқори”га ким етказгани ҳақида тахмин қилишга ўтишди. Бу мавзу аёллар оғзида ҳам сақичга айланди. Аммо “Мен ёзган эдим!” ёки “Мен хабар берган эдим!” дейдиган мард топилмади...

Хуллас, ўша йили ариқ қазилмай қолиб кетди. Натижада сув озгинагина майдондаги қузги буғдойга ҳам, фўзага ҳам етмай қолди.

Вақти келиб ўша озгина майдондаги янги буғдой пишди. Аммо Каромат хола башорат қилганчалик ҳаммаёқ “сен же, мен же” бўлиб кетмади – қониб сув ичмаган ғалланинг ҳосилдорлиги паст эди... Ўзбековул аҳли яна умид кўзини ҳукумат берадиган “талон”-га тикиди...

Аммо... онг-шуурда, тафаккурда, қалбларда недир ўзгаришлар, эврилишлар юз бермоқда эди. Ва тез орада Ўзбековул осмонида чақинлар чақди...

* * *

Орадан шунча йиллар ўтиб кетди.

Марварид чечанинг йили ўтказилаётган экан, шунга чақириб қолишиди.

Ўзбековулга бордим.

Қишлоқ энига ҳам, бўйига ҳам кенгайибди. Кенг, равон йўллар бўйида шундай уйлар қурилибдики, қаср дейсиз.

Каромат холанинг биз тенги ўғли Нодир билан анча гурунглашиб ўтирдик.

Нодир каттагина фермер хўжалиги раиси экан. Минг гектарга яқин ғалласи, пахтасидан ташқари ик-

кита тегирмони, нон цехи, биофабрикаси, чорвачилик комплекси бор экан. Шу кунлари компьютер ўқув маркази очиш ташвишида юрган экан.

Гап орасида беихтиёр ўша оғир тўқсонинчи йиллар бошини, Ўзбековулни жунбишга келтирган уч қоп ун можаросини эсладик.

Нодир маза қилиб кулиб олди.

- Э, жўра, у замонлар ўтиб кетди. Одамлар аллақачон текин балиқ сўрашдан кўра, балиқ ушлаш йўлини ўрганиш керак эканлигини билиб олишган...

Рости, шу куни Ўзбековулда юз берган ўзгаришларни қўриб, ҳам роса ҳайратландим, ҳам қувондим. Балки шу ёқимли туйфулар таъсиридадир, уч қоп ун воқеаси худди ўтмиш замонлардан қолган бир эртакдек туюлиб кетди...

Собир ЎНАР



БИР ЎЛАРМАН ЧАВАНДОЗ

Эй жўралар-эй, эй ёронларим-эй, бир гапнинг гали келди, гапнинг гали келдима ўзи, айтинглар. Биродарим ҳақида айтиб берайин, бироғингиз биласиз уни, бироғингиз билмайсиз. Билмаганингизга қизиқ, билмаганларга айтайн – бош гурунг бўлмасам қайтайин. Ўзим орқаси ер искамас жайдари табилчи бўлсан – танобчиямас, табилчи, хулласи, ёзувчияммасман-да – гапга чечанамасман, ёзувчилигим бўлганда-ку, ўзим билардим-а, ҳа майли, Худойимнинг берганига шукр.

Жўрамнинг оти Давлатбой, баданида яроқли жой йўқ, яроқлиси қовурғасими – дўхтири нақ учовини санаб туриб кесиб ташлаган. Соғ бўлса кесармиди, кўпкарида синдирган, кейин дўхтири опташлаган. Гап қовурғадами, мен айтайн, сиз ишонаверинг, тағинам ўзингиз биласиз-ку-я, ярим гавдасини кесиб ташласангизам бу ўларман ҳеч бало кўрмагандай юраверади, сизга гарантия берайин, оёғини жодига қўйиб қирқинг, вой демас. Индаллоси гап, жўрамнинг гавдаси тиккайиб қолган, мен қаридим, қаддим букилди, унинг эгилмаганига сабаб – ўнг эгнидаги суяги синиқ, опташлашганми, олишмаганми, унисини билмадим-у, аммо тиккайиб қолганининг маъниси шу. Энгашса томири тортишиб оғрийди.

Мақтамайман, мақтагулиги йўғ-у, барибир қурмағурнинг ёшлигига девими, бир балоси борийди, ҳайрон қолар эдим унинг полвонлигига: эшгиртиб қўйсанг тоғни кемирар эди, дарёни симирав эди, қиёмат эди; полвонлиги бир сари, бардошига балли дер эдим. Айримингиз биласиз оғатининг чавандозлигини, эна сути овзидан кетмай от чопар эди; кўпкарининг энасини эмдирав эди; синифининг бари шу кўпкарининг касри; тафи айтайин, танасида яроғи бор жой кам, шунинг учун қип-қизил тентак шекилли, бу, деб ўйлаб қолар эдим баъзан. Бир гал қаҳратон қишида Гарашага тўйга кетяпмиз, менинг остимда чўбир, унинг остида бўз, гапдан гап чиқиб уни мақтаб юбора қолибман, совуққа ўлгудай чидамли деб, бу гўрсўхта ўзидан кетиб пўстин билан телпакни ечиб тагига, эгарга тўшаб олди денг.

Хов, бир касрни қиласан, ўларсан манов аёзда дейман, қаёқда қулоқ солса, қайтанга камзулиниям ечяпти. Шу гапнинг нари-бериси, ҳай-ҳайлазимизга қарамай бир фасилда чиппа майкачанг бўлди-қолди. Эгарда тўргайдай ўтириб кетаётир. Шерикларимиз зам дод деб ялинади, менам. Мазақ учун аҳён-аҳёнда пишқириб қўяди. Совуқни-ку, гапирмайин – одамнинг суягидан ўтиб кетади. Мен пўстин кийганман, шунинг устидан еб бораётир чимиллаб. Қошнинг устига қииров қўнади, терласа мўйлабинг музлайди. Жон-поним чиқиб, «бор-э», дедим, менга деса ўлмайсанми, хоҳласанг лунгингниям еч дедим, бепарво ҳайдайвердим, анави бизни калака қилиб мускулларини ўйнатиб қўяди ҳар замон. Совқотяптими, деб разм соламан, бурни қизарган, лекин ишонсангиз, бадани ҳечкурса товуқники сингари бўртмайдиям, ё пиrim, дейман, тавба қиласман. Аввал ачинишиб турган эдик, тўйхонага етавергач, номусимиз келди: бало-да энди, аёз, бўрон уриб турса-ю, ҳеч нарсадан ҳеч нарса йўқ, даб-

дурустдан майкачанг кириб борсанг. Яна тўйга! Унику тентак-пентак деб ўйлар, ёнида борган бизни ким деб ўйлайди одамлар. Отининг жиловидан ушлаб, жўражон, укажон, акажон, деб ялинавердик, ўзингни ўйламасангам бизга ичинг ачисин. Жонимизга ора кирди, сал эриди чамаси, майли, деб кийимларини бирин-кетин кийиб олди. Агар ақлинг бўлса уни ёнида мақтама, ўлдинг мақтасанг. Кўпкариниям ўзи гурсиллатиб чопа қолади, хуллас, эшгиrtманг, эшгиrtсангиз бирон аъзоси мажақ бўлиб кетгани биланам иши бўлмайди, ишонмасангиз ҳозир кўринг бориб: тиззасининг кўзи жойида турмай қолган – гоҳ пастга, гоҳ юқорига силжиб кетади, шунда юролмай қолади,войвойлайди, ўзи улай-булай қўли билан ирғаб-ирғаб ўрнига солади-да, кейин қаққайиб сўфидай кетиб турган куни. Ўша тўй куни кўпкарида бу хуни-муни Кўлибой полвонга илашди денг. Кўлибойнинг оти зўр, отиданам ўзи зўр. Давлатбой нима унинг олдида, сапчадай отиб юборади керак бўлса. Улоқнинг бир путига тирмашиб кетяпти, шайтиб майдонни нақ тўрт марта айланниб чиқди-ёв; уям бу чакамик экан деб, қўяқолмади, буям камкучман демади, чўзилишиб, ўзларини ям қийнаб, отлариниям қийнаб юрди-да қўйди; одам бори тонг қотган, Кўлибойга куч бермаган бу ўларман ким бўлди деб. Минг қилсаям кучли – кучли-да, зўрға пеш бўб бўладими, Кўлибой улоқни тақимига ўхшатиб босиб, гавдасини ёнга олиб бир силтаган эди, икки от нақ қўшмоқ бўлиб қолди. Эгарқош эгарқошга тегиб қарсиллади, Давлатбойимиз эгардан учеб кетди; энди гупчак бўлиб ерга тушади-ёв, бир қиёматни қиласди-ёв, деб турсак, йўқ, шу бўз отнинг нақ ёлида қолиб кетди. Оёқ узангидан чиқмаган экан, гавда ерга шалвираб кетган, оёқ ёлда. Шу аҳволдаям бир майдон айланди-да, охири қўйиб юборар десак, барибир қўймади-е, отнинг айили узилиб эгар-пегари билан учеб

бориб Кўлибойнинг отига қапишиб қолди; оломон «кўй!» деб қичқиради,чувлайди, бу қўймайди. Одамлар Кўлибой энди бу шўрликни улоқ-пулоқ билан кўшиб чортоққа гупчак қилиб ташлар экан-да, деб туришган эди. Чакамик бўлса шилимдай ёпишиб чортоққа етмай олиб қолди. Тўрт ё беш қулоchlар қолган эди,узоқ эмасди; улоқни узиб тушиб, ўзи яёв сомонга судраб олиб бориб ташлади. Раис ҳам бардошингга балли сенинг деб соврин – юз эллик сўмни қўлига тутди, қурғур яна ўжарлик қилди, – мардлиги бор-да ўзи, – юз элликни халқнинг кўз ўнгидаги Кўлибойнинг қўлига тутқазди. Раҳмат айтди. Қайтангга Кулибой полвон изза бўлиб қолди.

Шутиб кўп томошаларни кўрсатиб келганмиз Гарашада. Кейин катта чавандоз бўлиб танилиб кетди. Кичкина ўғли Санжар унинг ўзига тортган. Худди күйиб қўйгандай. Кеча мачитнинг берисидаги бўзлоқда ўзидан барзангироқ бир бола билан курашяпти. Ҳалиги бола буни дустаман олиб тушди, елкасини ерга теккизаман, деб ҳай уринди, терлаб-пишиб, кўкариб кетди, охири бўлмади. Санжар устига салмоғини солиб босиб турган болани бир типирлаб кўтариб туриб кетса бўладими! Ай, сенингам баданингда боракан дедим.

Давлатбой билан тўққиз-ўнинчи синфларни районцентруда, Кўшработда битиргандиз. Кўрғонтепадан, нақ ўттиз чақиримдан нонни белга тугиб қатнаймиз; нима қиласайлик, бу ерда ўрта мактаб йўқ. Унинг эшаги бор, жуда илдам. Лекин кичкина, орқаси чўнтоқ, мингашиб ёлчимайсан, икки қадамдан кейин тушиб қоласан. Икковимиз алмашиб миниб борамиз.

Энди борган кезларимиз. Ўзимизни панароққа олиб юрамиз. Бошингни сал кўтарсанг, сентрликлар популдириғингни пасайтириб қўйишади. Дўйайла-ри бор ўзларининг, ҳар қайсисининг мушти менинг бошимдай келади камида, ғиринг десанг каллангни

олиб ташлайди. Бир куни улар бизни чақириб, тўққизинчи синфда ўқийдиган месний болани кўрсатиб, «курашасан бировинг шу билан», деди. Мен энди, айёрроқман, дарров Давлатбойни рўпара қилдим. Давлатбой олишиб, охири йиқди. Дўкайлар кейин нариги тўққизинчи синфнинг зўрини чақириб, «шу билан курашасанми?» деди Давлатбойга. Буям киприк қоқмай «ҳа» деб юборди. Унисиниям йиқди. Чарчаб қолди. Ҳалиги кураштираётган бола айтдики, шу мактабнинг ишонган шепи мен бўламан, отим палончи, энди мен билан чик, йиқсанг, ўрнимга сен шепсан, тан бераман, қўлни ташла, деди. Давлатбойга қарасам, қўлига бир тупуриб ишқалади-да, «бўпти, кел», деб юборди. Мен бориб ҳалиги шепнинг оёғига йиқилдим. «Жон жўра, жон жўражон, шеп ўзингсан, агар курашсанг буни ўлдириб қўясан, ўзи етим бола, сенинг шеплигингни тан олади», деб ялинавердим. Шеп Давлатбойга қараб: «Шунақами?» деди. Давлатбой менга термулиб туриб: «Ҳа», деди-да ёнига тупуриб юборди. «Тан бердингми, курашмай-а?» деб қайта сўради бола. Мен Давлатбойга жовдираб тикилдим. «Тан бердим», деди у ноилож. Давлатбойни шунда, бир мартагина сўзидан қайтаролганман, ўшандаям қайтиб келаётганимизда одам қаторига қўшмай бўралатиб сўккан. Аммо мен ундан ақллироқ эдим, бирдан-бир тўғри йўлни танлаган эдим. Аниқ ишонардимки, агар Давлатбой униям енгса, дўкайларнинг бизга хусумати ошиб, охири бир кун уриб ўлдириб қўярди. Енгмасанг ўлмайсан, ишқилиб, мусофирчиликда омон-эсон битириб кетайлик, деб тайинладим.

Ўқишдан қайтаётганда икки чақирим йўл юрмай Давлатбойга эшагингни бер, биродар, ўладиган бўлдим, деб ялинардим, у ростакамига ишонарди, туша солиб, «ма, мин, менинг оёғим умуман оғримайди», дерди. Эшаги ҳалиги айтганимдай жуда йўрға, мин-

санг роҳат қиласар эдинг, ҳеч тушгинг келмасди. «Мана шу қирдан ошайлик, кейин сен минасан», дердим мен ҳам инсоф билан. У ишонарди. Калтабақай бўлгани учун қирга секин қўтарилаарди. Мен атайлаб эшакни ниқтаброқ ҳайдаб, ундан ўзиб чиқардим-да, ошувдан ўтгач, энишга қараб қўшоёқ оттириб чоптирадим. Халалаб чоптираверардим. Давлатбой у қирдан кўринганда мен бу қирдан ошаётган бўлардим. Жўрам қораси кўрингандан муштини ўқталиб сўкина кетарди, етиб олсам бурда-бурдангни чиқараман, дерди. Мен унинг жаҳлигаям ишонмасдим, тўхтамай кетаверардим. Кейин у ялинишга тушарди: «Хой, Амрилло, секинроқ ҳайда, етиб олай, мингашиб кетамиз, тўхтагин!» Ишонармидим мен бу гапга – эшакка хала босганча кейинги қирдан ҳам ошиб кетардим. Шу пайтлари сезардим: орқамдан Давлатбой югуриб келяпти, етиб олса аямай урса керак, лекин хайриятки эшак дидни олади – жуда илдам. Мен қишлоққа етиб келганда Давлатбойнинг қораси ҳали-вери кўринмаган бўларди. Уйнинг туши – тўғрайига келганда эшақдан ирғиб тушиб, ипини ийифишириб бўйнига боғлардим-да, орқасига халачўп билан бир уриб уйига ҳайдаб юборардим. Билардимки, эшак, албатта, уйини топиб айвонига кириб боради.

Эртаси тонг саҳар тағин қишлоқнинг оёғидаги зардоли остида Давлатбойни кутиб турардим. Менга кўзи тушиши биланоқ у узоқдан дағдаға қилиб, сўкиниб келар, уриб ўлдирман дерди нуқул. Мен ўзимни бечораликка солардим: «Жон Давлатбойжон, ўзинг биласан, сендан бошқа кимим бор, бошқа ишонадиган одамим йўқ-ку, ўзинг билиб туриб қийнайсан-а. Майли, ўл десанг ўлайин, лекин буйтиб ҳаром ўлдирма». Шўрликнинг дарров авомлиги тутарди. То менинг олдимга келгунча жаҳлидан тушиб, раҳми келиб, бошқа қиёфага кириб қолар эди, чинакам ачинар эди менга. Эшақдан тушиб мени миндиради. Одам кўп яёв юрса

бақувват бўлади, деб қўярди. Бориб етгунча алмашиб миниб кетардик. Қайтаётганда эса... яна худди кечаги ҳол тақрорланарди; эрталаб ҳам ўша аҳвол – ҳар кунгидай ўларманлик қилиб «кечиргин» деб ялиниб туриб олардим. Давлатбой кеча қандай кечирган бўлса, бугун ҳам шундай кечириб юбораверар эди. Жуда ҳайрон қолар эдим. Баъзан ўзимни ҳам койиб қўяр эдим. Начора, ишонувчан, авом бўлса ўзидан кўрсин деб қўй силтаб кетаверардим. Шундай қилиб нақ икки йилни ўғказдим. Икки йил ҳар куни уришиб, ҳар куни ярашдик. Кейин мен ўқишига кирдим, ҳисобчи бўлдим; ҳозир кўриб турганингиздай табелчиман. Давлатбой эса ўша кезлариёқ ўқишига парво қилмади, ўзини кўпкарига урди. Даромадниям кўпкаридан орттириди, касофатниям; лекин оч яшамасди – ҳар маҳал дастурхони обод бўлди. Бир қисим ўғиллариниям уйлантириди. Энди икковимиз эллик учга кирибмиз. Кеча кичик ўғлининг олишаётганига қараб, бундан қирқ йил бурунги Давлатбойни кўргандай бўлдим, кейин қурмағурнинг ўзи эсимга тушди; тип-тикка бўлиб қолган қомати, юриб кетаётганда бирдан тиззасининг косаси тойиб кетиб оёғи қотиб қолиши, бечора вой-войлаб ўтирасолиб, ишқалаб-ишқалаб бир амаллаб қўзни ўрнига солиши, сўнг ҳеч бало кўрмагандай кетавериши кўз олдимга келди. Нега зарил экан, дейман-у, тағин маъюс тортиб ўйлаб қоламан. Нега бунаقا одам, а?! Тавба, нега бунаقا ўзи?!

Бир нарсага бугун ҳам имоним комил: агар Давлатбойни ҳозир бориб ҳам эшгиртсам билган амалини қиласди. Эсли-хушли бўлгани билан гупуртирсам агар, ниманидир қайириб, ниманидир синдириб, ишқилиб ўзининг хуморини ёзади. Ҳа, ҳозир ҳам кучи кўп унинг.

Мен эса... Мен бутунлай бошқа одам, Давлатбойнинг тескарисиман. Бир соат ҳам ундан мард, ундан паҳлавон бўлолмайман, ўзимни қаттиқ авайлайман.

Давлатбойнинг эса қариб-қартайишини ҳеч тасаввур қилолмайман. Нафасимни ел учирсин-у, кучи тошиб, қутурибми ё бир жойдан тушиб кетибми... жон топширса керак деб ўйлайман.

Кечиринглар, жўралар, жўраларамас, ёронлар, гапимнинг охири мунглироқ бўлиб кетди. Кеча жўрамнинг кичкинаси Санжарчани кўриб бир ўйчан тортган здим-да, Давлатбойнинг бир-иккита қизиқ ҳангомалари эсимга тушиб кетди, холос. Ҳар хил одам бор экан-да ер юзида; яшайвераркан, ҳаммаси меники тўғри деб. Ҳай, майли, биродарларим, ҳаммамиз ўтиб кетамиз дунёдан!..

Луқмон БЎРИХОН



ЎТИРИК

Муюлишдан чиқиб келган оппоқ “Ласетти” қас-
собхона биқинида жонсарак турган, олача чопон, қўк
саллали, жиккак жусса қария ёнида тўхтади.

– Йўл бўлсин, отахон? – деб сўради олд ўриндиқда
ўтирган хумкалла, қош-қабоғи солиқ, қоп-қора одам.

Қария серсавлат уловга хуркинкираб яқинлашди.

– Жалпоқтошга.

– Ўтириңг, Чалпактепагача етиб оласиз.

– Маъқул, улим, барака топинг, – деди қария ма-
шинанинг орқа эшигига қўл чўзаркан, – нариёғи яқин,
бир амалларман.

– Тезроқ қимирланг, бува, – деб қўйди ҳайдовчи
норизо оҳангда.

Орқа ўриндиқقا ястаниб олган қуюқ соchlари
ораста, силлиқ киши илкис сурилиб қарияга жой бер-
ган бўлди.

– Келинг, отагинам.

Қария жойлаша-жойлаша машинадаги ҳар уч
киши ҳам қулранг “комуфляжка” кийимда эканлиги-
ни пайқади.

“Аскарларми дейман” – хаёлидан ўтди унинг.

– Ота, тортинманг, – деди орқа ўриндиқдаги
ҳамроҳ узун-қисқа салом-алиқдан сўнг, – Чалпактепа-

гача, э-хе-е, яна қирқ километр, йўл нобоб, қулай жойлашиб ўтиринг.

– Раҳмат, улим, раҳмат.

Туман маркази, гавжум кўчалар, серҳашам уйлар ҳаш-паш дегунча ортда қолди. “Ласетти” дала-дашт йўлига чиқиб олди. Ўнгу сўлда экин майдонлари, ариқ-зовурлар, яккам-дуккам уйлар кўзга ташланади.

– Ҳалиги ерда нима қилиб тургандингиз, бува? – деб сўради ҳайдовчи пешойнадан қарияга кўз ташлаб.

– Улашнингма, Жобирнингма Дамаси кеп қолармикан деб кутиб тургандим. Шу иккови Жалпоқтошдан қатнайди-да.

– Марказга нега келгандингиз? Бозорга тушдингизми? – яна сўради ҳайдовчи.

– Э-э, бозор қаёқда, болам, – деб қария сийрак соқолини ўйчан силаб қўйди, – са-ал ташвиш билан ҳокимликка келгандим.

Унинг ёнидаги ҳамроҳ чолга ажабланиб кўз ташлади.

– Ҳокимликка дейсизми?

– Ҳа, ҳоким қабулига келгандим. Бизнинг Жалпоқтош тап-тақир дашт. Овулимизга, ҳечқурса, битта қудуқ керак. Қўни-қўшни мени илтимос билан жўнатишиди. Ҳокимга учрашиб, арзимизни етказинг дейишиди. Шутиб марказга келиб эдим.

– Ҳокимга учрашдингизми? – яна сўради ён ҳамроҳ.

– Ҳа, – ўйчан бош ирғади қария, – кирдим, кўрдим.

– Қандай одам экан ҳоким?

– Оппоқ, келишган, бўйинбоғли одам экан.

Ён ҳамроҳ пиҳиллаб кулиб юборди. Ҳайдовчи ҳам илжайган кўйи пешойнадан қараб қўйди.

– Эй, – деб пўйнфилади хумкалла, – ғийбат қилишга ҳокимдан бошқа одам куриб қолганми санларга.

Қария, булар сўзларимга ишонмади, деган хаёлда шоша-пиша айтганларини исботлашга киришди.

– Чин, яхши одам экан. Мени кулиб кутиб олди, чой куйиб берди.

– Ҳатто, чой ҳам қуйиб бердими? – ён ҳамроҳ қарияга худди ҳайратлангандек тикилди.

– Ҳа. Бўсағагача кузатиб ҳам қўйди.

– Арзингизни тингладими?

– Ҳа, ҳал қилиб берамиз деб айтди.

– Сизни алдаб-сулдаб чиқариб юборган, – деди ён ҳамроҳ бош чайқаб. – У илтимосингизни бажармайди.

– Нега бажармайди? – ажабланиб унга тикилди қария, – ана, Президентимиз халққа қайиш, ёрдам бер деб ҳар қуни айтиб турибди-ку. Пошшанинг ишонган вакили бўлгандан кейин бажаради-да.

– Сиз ҳоким Президентнинг ишонган вакили деб ўйлайсизми?

– Ҳа-да, ишонганидан унга амал берган-да. Бирор бир нимани ишониб топширгандан кейин бажариш керак, эсам, лафзизлик бўлади, улим. Бу катта гуноҳ.

– Демак, – яна завқ билан кулди ён ҳамроҳ, – сиз ҳам ҳамқишлоқларнинг ишончини қозониб, ишни дўндириб қайтаяпсиз-да.

Қария кафтлари билан юзини силаган бўлиб қўзи-ни яширди.

– Ҳа, энди... қўлдан келганича...

Машина сап-сариқ, тап-тақир дашт қўйнида узалиб кетган, эгри-буғри, паст-баланд йўл бўйлаб оҳиста елиб бораиди. Ур-калтакдан шишиб кетган бадандай қир-тепаликлар бирин-кетин ортда қола бошлади.

– Узр, улим, – деди ён ҳамроҳига юзланиб қария, – сизларга йўл бўлсин? Чўпонларнинг отарига борасиз-ларма?

Ён ҳамроҳ узун бир ҳомузга тортиб олгач:

– Шўрсойда ишлаётган геологларни кўрганмисиз?
– деди.

– Анови буровойчиларни айтяпсизми? Ер ковлагичларни? Ҳа, кўрганман.

– Мен ўшаларнинг бошлиғи бўламан. Ишга кетяпман.

Қария беихтиёр унинг қўлидан ушлади.

– Сизни менга Худо етказди, улим. Худди сиз керак эдингиз менга?

– Ия, нега?! Тинчликми? – деди ён ҳамроҳ чинакамига ажабланиб.

Ҳайдовчи ҳам пешойнадан қизиқсиниб қараб кўйди.

– Ҳа, сиз керак эдингиз, – деди қария қувончдан кўзлари порлаб.

– Хизмат борми?

– Ҳа. Бизнинг қишлоққа кудуқ ковлатиб беринг, илтимос.

– Ия, гапингиз қизиқ бўлди-ю, ҳозиргина идорага кириб чиқдим, ҳоким муаммони ҳал қилиб беради деб айтдингиз-ку?

Қария худди ичи оғриётгандай юзларини буриштириди.

– Туврасини айтайми сизга?

– Туврасини айтинг.

– Боя, – деди қария минг бир хижолат ичидা, – салпал ўтирик сургандим.

– Ўтирик?! Ўтирик сургандим? Нима деганингиз бу?

– Ёлғон гапиргандим демоқчилар, – изоҳ берган бўлди ҳайдовчи.

Ён ҳамроҳ илжайди.

– Ҳа-а, шунақами ҳали... жа-а... қув кўринасиз-а, отахон.

– Шундай бўп қолди-да, улим. Гапнинг тувраси, ҳокимликнинг иморатини кўрган пайтим тиззам қалтираб кетди. Ахир бу ерда чакана одамлар ўтирмайди-да, туврама?

- Тувра.

- Шуйтиб, ана кейин... ўйладим, ҳоким давлатнинг одами, зарил-зарил ишлари кўп, биздайчакинлар билан шуғулланишга вақтиям, ҳафсаласи ҳам йўқ, майдада-чўйда илтимос билан у кишининг бошини қотирмайлик деб... ана кейин... эшикнинг олдида туриб-туриб изимга қайтдим.

- Ия, ғалати-ю, отахон, ҳамқишлоқларнинг илтимоси нима бўлди, ҳали ўзингиз айтгандай, ишонч масаласи нима бўлди?

- Гапни охиригача эшитинг, улим... ана кейин... қишлоққа бориб, ҳокимга учрашдим, шанба куни кел, маблағ бераман, шу пулга қудуқ қаздириб оласизлар, деб айтди дейман.

- Нега айнан шанба куни? - сўради ён ҳамроҳ тобора қизиқиши ортиб.

- Ана кейин... шанба куни беш-олти қўй ҳайдаб бозорга тушаман, сотаман, пулини овулга олиб бораман, мана, ҳоким сўзида турди, маблағ бериб юборди, дейман, буровойчилар билан гаплашиб, шу пулга қудуқ ковлатамиз, деб маслаҳат соламан.

Пешойнадан қараб-қараб қўяётган ҳайдовчи тажажубланиб сўради:

- Ўзингизнинг ҳисобингиздан қудуқ ковлатмоқчимисиз?

- Ҳа, энди-и, улим, мол кетса, кетар, лекин одамларнинг ишончи ўлмасин, уйдан шу ишни бўйинга олиб чиқсанман, ўртада лафз бор, харажат қиламан-да. Бошланишига шу пул етар, қолганига ҳам Худо пошшадир.

- Харажатни сиз қиласиз, югур-югур ҳам сизнинг бўйнингизда, иззат-обрў ҳокимга экан-да, - деди ён ҳамроҳ қарияга синовчан кўз ташлаб.

- Ҳа, энди-и, - деб жилмайди қария, - у киши ҳам шу эл учун куйиб-пишиб юрибди, қайишганимиз маъкул-да.

– Сиз жа-а ғалати фикрлар экансиз, отахон.

– Улим, – қария яна ён ҳамроҳнинг қўлини кафтига олди, – илтимос, ёрдам беринг, харажатга тайёрман, айтганингизни бераман, юзимни ёруғ қилинг.

Ён ҳамроҳ яйраб кулди.

– Отахон, сизнинг юзингиз ҳамиша ёруғ. Сиз ўтирик сурганингиз йўқ. Сиз чиндан ҳам ҳокимга учрашдингиз, илтимосни етказдингиз.

– Йўғ-а, қайтиб?

– Ана, – ён ҳамроҳ олд ўриндиқда ўтириб, гўё дала-даштни кузатиб кетаётган хумкалла, қоп-қора кишига ишора қилди, – сиз айтган оппоқ, келишган ҳоким шу ерда...

Ҳайдовчи баралла кулиб юборди.

Ҳоким ҳам мийифида илжайиб ортга ўгирилди.

– Нега куласанлар? Отахон ўтирик сурмайди, кўнгли оппоқ, нияти тоза одамлар булар, шунинг учун кўзларига ҳамма оппоқ, келишган кўринади.

Машина салони яна қаҳқаҳалардан ларзага келди.

– Эй, сен, майнавозчи, – деди ҳоким ҳайдовчига юзланиб, – тувра Жалпоқтошга ҳайда. Отахон ҳокими ни ҳам, қудуқ ковловчини ҳам олдига солиб келганини ҳамма кўрсин.

– Хўп.

Оппоқ, келишган машина тап-тақири адирлар қўйнига оппоқ, келишган хаёлдай сингиб кетди.

Баҳодир ҚОБУЛ



ТАНОВАР

1-дағтар

Иссиқ-совуқнинг дамини, тўртта ёмғирнинг на-
мини, бир парча булутнинг ғамини кўтаролмай,
бўлар-бўлмасга ҳовлиқиб, хишмаланиб, оғзи кўпириб
келадиган довдир сел Аймоқ қалъасида Македония
подшоси Файлақуснинг ўғли Искандардан қолган
манжаниқнинг бутини айириб қўйнига солгандаям,
Чингизхон Сартюзи қўрғонига узунасига экиб кетган
учи айри сихнайзаларни тун қоронғусида занг-панги¹
билин қураклари орасига қарсллатиб қадагандаям,
Кутайба Новқа Ота чиннихонаси кўксини чил-чил
қилиб, исқотига тортилган чироқ синикларини си-
дириб, куппа-кундуз кўзларига қуйгандаям бунчалик
хўрланмаганди...

Ойқору Шунқор тоғларининг қишин-ёзин қи-
личдай ялтираб турадиган қорларининг оёқ учла-
ридан бошлаб ўрмалайдиган булоқлар жилғага, са-
ноғига бирор етмаган жилғалар сойларга, Каттасойу
Жум-жумсойлар Санглоғу Кўкжарга бўй берадилар.
Кўкжару Санглоқ Сангзорга дўнишини, шаҳар кўрган
Сангзор ранги синиб, кучоқ етмас бели қилдай бўлиб,
бир аҳволда Қили отини олишини, кейин Арнасой, Туз-
кон, Айдаркўл оралаб Сирдарёга, Сирдарёдан булутга

кўчишини, булат осмонларни айланиб-айланиб қор бўлишини, яна келиб Ойқору Шунқорга тўдаланиши, тоғларга сингиши, арчазорларни яйратиши, булоқ бўлиб кўз очиши, жилға бўлиб тил чиқариб чулдираши, Санглоқда тошлар билан қучоқлашиб қўшиқ айтиши, Кўкжарда қизларга қўшилиб, бўрвакларига ёпишиб чопиши, Сангзорга келиб этакларини йиғиштириб, эрта-индин келин бўладиган бўйсиралардек малоҳат билан юришини, азалий ҳаёти шундай кечгани, ўйин-кулги билан ўтганини туш кўргандай бўлади. Ёр Яилоқ ўтакасини ёриб келган тулпорлар хилват қирғоқда лабига лаб босишини, не бир баҳодирлар юзларини ювиб, одам зотига айтмаган тушларини у билан сирлашганини ёдга олганда юраги ўйнаб, димоғи чоғ бўлади. Кучоғига қайноқ тўшини урган яланғоч-яйдоқ айғирларнинг елкасига осилиб, суйкаланиб, бўйниларидан эркаланиб ошганлари, ёлларини ялаб-юлқаб тушганларини қўмсайди. Бир вақтлар Бобуршоҳ бироров қўнган, ўша даврлар отдоши бўлган, ҳозирда “Сукунат қўрғони” атоғлиқ тепалик уғруғига уғруқ қароси кўринармикан, деганча кўз тикиб ўтади.

Юраги тўхтаб қолай-тўхтаб қолай деганда қулоғи остида эшитилган кишинов хаёлман деганин хаёлини қочиради. Кишинов эгаси кўмилдуруғи – кўкрагига тақилган зийнатидан тортиб ўстами – тўқаю эгар қошигача олтиндан, сувлуғу узангиси кумушдан, айли ипакдан, тўқими бир юрт баҳоли, юганига тўрт улус эл бош берган тўриқ юзини юзига босганидан кейин юлдузли осмон қутб юлдузи атрофида айланиши қоидасига сўзсиз буйсунгандай бошқа тулпорлар ҳам иссиқ нафасларини бегона қилмаганини эслар экан тилидан, қўнглидан Художон тушмайди. Яна шундай кунларга етказишини тилайди.

Ҳадди сифмаса-да, аҳён-аҳёнда, йўли ўнг келиб Туркқишлоқ оралаган селова севишганлар яширин-

ган, пана топган, масти-мустағриқ ризқ терган, машо-йихлар булутдай, қароқчилар қуюндең үтган, жаҳон-гирлар чонғи – от устида тезкор кенгаш чақирған, де-воналар давра солған, парилар парда осған, лўлилар капа тиккан, шаҳидлар чироқ ёққан, оёғи Каттасойда, боши Авлиё Отага етған Жаркўча шавкату савобини бўйнига мунчоқ қилғанча, гарду гуноҳини ювиб Кат-тасойга солади. Каттасой Жаркўча оёғини ювгани-дан ўзида йўқ талтаяди. Хурсандлигини кўкси қалқиб ён-теваракка билдирган бўлади. Ўқотар ялангига, Ўртабаланд қирига, Дунётепага. Ёқалаган сариқтол, жийда, ёнғоқларга кўз-кўзлаган бўлади. Жийдалар шундоқ ҳам очилмаган кўзларини баттар юмиб, кўр-масликка оладилар. Сариқтол кўрингanganга сарғайғанча елкаси қисилиб, ким нима деса оғзига қарайди. Ундан гап чиққандаям бирор елкалаб, ўтин қилмаган. Кет-мондастаям. Ушлови йўқ. Қадимий ёнғоқ яшинлар билан олишаверганидан, чақмоқ уравериб каллаклан-ган, баҳайбат чандиқлари узоқдан кўриниб турадиган муштига иягини тираганча ҳаммасини кўрганлигини шамолга қўшилиб бошини хиёл ҳам қилғанча билди-ран бўлади.

Най нағмани тош билан ўйнаган тўлқинлардан, карнай довруқ солмоқни шарраклардан, доира зарб сехрини томчилардан, танбур нола тортмакни до-манага юзини ургандаги сасдан, ғижжак оҳ урмакни ҳансираган ҳарсанг тошларнинг ўзаро гурунгидан илиб олганини билмаганга олиб, кулиб-кулиб хотир-лайди. Не бир ёвнинг йўлига пишқириб чиққанча ғов бўйлан кунларни ўпкаси тўлиб тиниқ әслайди. Уда-мали бўйлаб Балхга етиб, қуюқ жийдазор оралаганда бирдан шўхлиги тутади. Ёш демай, ёши үтган демай мажнунтоллар сочини тортқилаб, юлқилаб ўйнайди. Нуширавон, Кўчмаариқ, Мулкиушр ёқалаб ўйноқлай-

ди. Совуқбулоқ билан учрашганда сунбулалар йўлдан уради. Сунбул исига бурканиб, сунбулга қўшилиб сунбулланади. Бир исга, бир ҳисга чайқалиб эшилади. Ўтган-қайтганинг хаёlinи олади. Қилиғи ўзига ёқиб қолади. Кейин яна қўшиқ айтиб, ўйнаб-ўйнаб энади. Шамол энди бунақа шўхликлар ярашмаслигини, мавриди эмаслигини қир ташлаб билдирган бўларди.

Новқа Ота сувини ичганда ич-ичи бошқача бўлиб кетади. Ер қолиб, осмонда учишни илғаб олади. Хаёллари тезлашгани баробар, эсиям тиниклашади. Зарафшон қаватига киргандан кейин Туятортар кучи билан дунёга сифмайди. Бундай кучга teng турган, икки кифтини танг тўлдириб суворий макон қилган, лашкарқўним бўлган кунларни эс-эс эслайди. Бир нарсасини йўқотиб қўйган-у, нимасини йўқотганини ўзиям билмайдиган бўйқиздек орқасига қараб-қараб келганча, Чолкўндига етганда ихтиёр-беихтиёр гапга кўнади. Сокин тортади. Шундай бўлиш кераклигини ўзиям сезади.

2-дафтар

Эгасиз уйнинг эшигига дайди ит ҳам чот кўтарар-миш...

Эга – эга, эга бўлмаса, нега?

Устма-уст бўлаётган талотўп, ур-йиқит, ушла-ушла, қува-қув, қама-қамалардан юрак олдирилиб, қўрадан қочирилган, қочган, улоқсан, беэга ҳайдов қўйлар кўзпана сойлар, арнаю ўнгирлар, шамол етмас камарларда битта-иккита бўлиб йифидилар.

Ҳаворда қолганларга эгаси ўлгандай тўқими оси-либ, нўхтаси узилиб, айили судралган, афтидан эскидан чўпон эшаги ва эшак етовидаги озиб-тўзиб кетган ит келиб қўшилди. Жонлиқлар эшакни қора тортдилар. Ҳайдов бўлганлар чўпон-чўлиқли сурувдек кўринди...

Қасд кун экан, ой оғиши оқшомида жондор дориди. Дўлтгалар давра олишди. Қашқирлар тўдани тўрт тарафдан ўраб келди. Бир бошига қўш қашқир келган жонлиқнинг кунига тўзим берсин. Жондорлар аввалига жонлиқларни хуркитиб, қувалаб ўйнади. Кейин базм бошланди. Энасининг ортидан зориллаб эргашган қўзининг йўлидан бир эмас, икки бўри чиқди. Бошқаси довдираб, йўлини йўқотиб, оёқ остида ўрмалашган тусоқ човини шарт узиб шеригининг олдига ташлади. Кучини қаерга қўйишини билмаганлар сутдан ажраб, кўкнинг таъмини билиб, диркиллаб қолган тўхлиларни эрмакка ёнбошига олиб ўтакасини ёрди. Кўпни кўрганлар кўзларга кўз қадаб жон суғурди. Оз бўлса-да, ҳидини олганлар дағ-дағ қалтираётган жонлиқларни панжалари остида ушлаб, қўрқувдан юраги ёрилишини баҳузур томоша қилдилар. Қон тўлиб ёрилган юрак ширин бўлармиш.

Кўрққанидан вовуллашният унутган, қоча-қочнинг ваҳимасида қўйларнинг ўртасига кириб, ўмгагини ердан кўтаролмай қолган итни бўрилар аввалига ё тош, ё кесак деб ўйлашди. Итлигини билиб ёппасига ташланишди. Жон чиқар титроғида кўзлари жовдирраб, аввалига ялтоқланиб, жон умидида ғингшиши-ю, лаҳзада бўлари бўлганлигини англаб, итлиги қўзиб, эсига туши кечиккан бириллаши бўғзидан аrimай ичаклари талош бўлди.

Қашқир шовурини сезган эчки борки, турган жойида тўрт оёқда сакрашга тушади. Бу қилиқ жондорларга аввалига бироз қизиқ туюлса-да, қизиқнинг қизиғи қон оқизиши, қонли лаб-лунжларни тилни бир қарич чиқариб, тамшаниб-тамшаниб ялаш эканлигини унутмадилар. Серсоқоллар зўр келганда жонҳолатда бақирилса-да, товуш чиқмаслигини шунда ё билдилар, ё билмадилар.

Эшак зоти борки, бўрини кўрса, бўри мени кўрмасин, деб қулоқларини тушириб, кўзларини беркитади. Қош-кўзидан тўдабоши, дўлтабўрилиги билиниб тургани кўзини беркитиб турган жонворга яқинлашди. Бошқалар иш ўргамчи шогирддек қараб турдилар. Дўлта хотиржам, каштасини келтириб аввал бўйни, кейин навбатма-навбат орқа оёқларини керди. Арзимас хас-хус, чанг-чунг илашгандай силтаб-силтаб қоққан бўлди. Ов бунақа бўлади, дегандай совуқ босиқлик билан бир ҳамлада жонлиқнинг кекирдагига тиш босди. Ақлни қулоқдан олган бошнинг оғир дамсар уриб хўрсинишини ҳеч ким эшифтади. Чиройли ва қоп-қора қўзлардан оқаётган эгасизлик ёшлиарининг сўнгги бор йилтиллашидек кўргулиқдан бўзарганча авзойи бузуқ келган Жавзо ойи ўзига тинч, элга но-тинч бўлиб беланчак осди.

З-дафтар

Икки бошли калхат сурати туширилган хос вагонни етаклаган паровоз бир нарсадан қуруқ қолгандек ҳансира, Самарқанддан саҳар мардонлаб ҳаллосланча Жиззах сари йўлга чиқди. Атрофни аччик-сассиқ ҳид босди. Хайрлашаётган кўкламнинг намтоб ҳавосига ўралашган қора тутун ичра поезд юрар йўлини тусмоллаб борарди. Яна сон текканидан ўзида йўқ хурсанд, истеъфодаги полковник, суд ҳайъати раиси Александр Николаевич Соколов вагон-ресторанда. Игна ютган итдай ориқ поручик-прокурор ва ҳукуқ илмидан бехабар юзлаб аскарлар орасидан танлаб олинган тўрт нафар зобит – ҳайъат аъзолари раиснинг қош-қовоғига қарайдилар. Ҳайъат базми жамшид устида. Қурдагилар Жиззахга юборилган. Шаҳарни тозалаш буюрилган.

Анчадан бўён ишсиз юрган, қозонга қоровуллик қилиб қолган полковник яна қўл остига одам берган-

ликлари, униям эсга олиб қолганликларини шу вақтгача сездирмай келган бўлса-да, ичига икки томчи киргач жиловини бўш қўйди. Қўлидан ҳали кўп иш келишини, келгандаям катта ва довруқли ишлар келишини унутмаганликларини ҳар бир аъзога қайта-қайта уқтириди. Ҳазрати Олийларига таҳсинлар ўқиди.

Ҳар бир станцияга бу ер энди кимга тегишли эканлигини билдирувчи қашқа отлар қўйилган. Ер бетидан қадим отлар сургун қилинган.

Большая Михайловка станциясида сувхонасини сувга тўлдириб ҳаяллаган поезд яна йўлга тушди. Милютинскийда ўтинхонасиға ўтин ғамлайди.

– Мени шахсан суд ҳайъатига бошчилик этиш учун таклиф қилдилар, – деди худди бошқалар буни билмайдигандек. – Судда бу итларни чивиндек эзид ташлайман. Жиззахнинг ҳар бир дараҳтига буларнинг ҳаром жасадини осиб қўяман...

Полковник шундай деганча, елкасида зўрға илиниб турган, беўхшов қизариб кетган бошини аранг кўтариб, рестораннинг у бошидан бу бошига қараган, кўзи ўтмаса-да, қора-куроларни тусмоллаб тикилган бўлди. Ўрнидан турганди, тиззалари илкисдан букилди. Кўзойнаги отилди. Тик турганча, ичмоқчи бўлганини оғзига олиб боролмай, ёнбошга ағанади. Шунда поручик жонига ора тушди. Суяб қолди. Прокурор бош бўлди. Аъзолар раисни кўтарганча хос вагонга олиб жўнадилар.

Куропаткино разъездидан шитоб билан ўтган поезд Ломакино станцияси томон елдек учиб борар, Қароқчитоғ ортда қолган, Ғўбдин этаклари босиб ўтилаётган, ҳадемай Милютинск станцияси қўнғироғи овози эштилади. Поезднинг тўсатдан тўхтаётганлигини билдирган, боласини йўқотган аёлдай чинқириғи ва вагонларнинг орқама-кетин бир-бирларига қарсиллаб урилиши йўловчиларнинг хушини учирди.

Темир изнинг адир тирсагидаги бурилиш ортида, йўл устидаги кўзга қадалган талотўп поезд ҳайдовчисию бошлиғиниям шошириб, гангитиб қўйган, шундан шошилинч дастакларини босишган, йўл сон-саноқсиз жутга тўлган, узоқдан худди бир қишлоқ одамни қатор қилиб, текис отиб ташлагандек тасаввур уйғотарди. Унинг наздида Оқпошшо аскарларини қўзғолончилар йўлга олиб чиқиб ўлдиргандек туюлган, қўзғолон иштирокчиларини суд қилувчи ҳайъатнинг шу поездда бораётганидан хабар топғанлар интиқом учун поездни тўхтатмоқда эдилар. Яна Жиззах қўзғолони олдиdan эгасиз авом темир йўллар бузилса, аскар келомлайди, деганча Тошкентдан келадиган Кауфман йўналишидаги Урсатовск ва Обручево станциялари изини бузганлари ёдига тушганди.

Поезд тўхтагач, бир муддат ҳеч ким тушмади. Дे-разаю туйнуклардан ҳарбий ҳйила ишлатилган, деган фикрда обдан кузатилди. Тирик жон қимиirlагани сезилмагач, қўриқчи аскарлар ҳарбий интизом билан икки-иккитадан тушишди. Милтиқларини дуч келган томонга нуқиб-нуқиб душман қидиришди. Топилмади. Кейин сўкиниб-сўкиниб, жутларни судраб четга олишди. Поручик қўриқчи аскарлардан хушёрликни оширишни, “туземец”лардан ҳар нарсани кутиш мумкинлигини бир қўлида тўппонча кўтарганча поезд зинасида туриб, ярим танасини чиқарганча бот-бот такрорларди.

4-дафтар

Ўйиннинг зўри ё бозорда, ё мозорда бўлади. Бу сафар ҳам шундай бўлди. Катта, зўр ўйинларнинг сопи ҳамиша ўзидан чиқарилган. Ҳали Жиззах Ўрдасида қирғин бўлмасдан олдин, Ўрданинг шундоқ биқинидаги бозорнинг икки қоровули “Отасидан қолган мулк”ни бўлиша олмай жанжаллашганди. Бозорнинг

кирди-чиқдисидан топадиган бир парча қаттиқ нон кўп кўринди. Худо урган шундай ношукурлик кунларнинг бирида ур қалтак, сур қалтак бошланди. Қоровуллар жанжал нимадан бошланганиният, нимага Ўрда ўт ичида қолганиният билишмади. Бозорда кунда ўн уриш, юз жанжал. Шулардан бири бўлса керак, дейишганди. Кейин билишдики, Ўрдадаги жанг катта жанглардан. Бозор кўрганлар бундай кунларда бирорни ўйламайдилар. Бошни бирор панага тиқсан маъқул. Сассиқ бўлсаем. Тирик қолса бўлди. Бошқанинг кўзи оқиб тушсаям киприги қилт этмайдиган бозор кўрган қоровуллар жангга ўзларича аралашдилар. Тўғрироғи, бирори олдинроқ ҳаракат қилди. Пайтдан фойдаланди. Занг босган ва тўппончалиги қолмаган темирни адоватдаги қоровулнинг ҳовличасига кўмди. Фалончиям кўзголонга аралашган, қатнашган, ҳовлисининг пистон жойида тўппончаси бор, деб маъмурларга чақув етказган. Солдатлар келган, кўрсатилган жойни ковлашган, тўппончани топишган. Кўшиб ҳовлининг эгасиният олиб кетишган.

Шаҳарга адоясиз дабдабаю асьаса билан кириб келган суд ҳайъати бошламасига шу ишни кўриши, кўзини пишитиши, дийдани қотириши, Оқ пошшо одамларининг гапини икки қиласиганларнинг кўзини мoshдай очиб қўйиши керак эди. Ҳайъат кўрадиган ишларнинг айбдорлари кўча, раста, бозорлардан тутиб келинган, оддий тириклик кўйида куймаланиб юрган кишилар бўлиб, чақувга учраб охранка агентларига пора беролмай қамалган, баъзи бир бойлар ҳукуматга садоқатларини кўрсатиш учун ушлаб берилган камбағаллар, бемаврид бу масканда макон топганлар эди.

“Ўта муҳим жиноятчи”ни солдатлар қуршовида олиб кирдилар. Оқловчининг қорасиям кўринмади. Суд бошланди. Тўқиллатиб стол устига қўйилган бир энлик занг босган темирнинг тўппонча эканлиги-

ни фақат уни күтариб юрганларгина илғашди. Сўров бошланди.

– Тўппонча сеникими?

Собиқ қоровул тўппонча деган нарсани иккинчи бор яқиндан кўраётганидан қўрқиб кетди. Бир марта уйидан ушлаб кетишаётганда қўлига бериб қўйишганди. Кўни-кўшни ўртасидан қўл боғлиқ, бўйинда тўппонча билан солдатлар олдига тушганди ўшанда. Солдатларнинг биқинидаги тўппончаларга қарашга юрак бўлмаган. Ранг дам оқарди, дам кўкарди.

– Тўппонча меники эмас.

– Бу душманлик ва тухматдан бошқа нарса эмас, – ўшқирди прокурор.

Банди яна нимадир демоқчи бўлганди, тақиқлашиди. Бўғзига келган сўз ҳолини ўзгартириб, бўғилганидан ёш бўлиб тирқиради. Аъзойи баданини қуюқ қора тер босди. Кейин тўппончани ундофига-бундоғига айлантириб кўришди. Бир зобитни чақириб, унинг ишлаш-ишламаслигини текшириб кўришни буюрдилар. Зобит шошиб қолди. Тўппончанинг ишламаслигига ақли етмайдиганлар қандай суд ўтказаётганига ҳайрон бўлиб раисга қараганди, заҳриолуд башарага, заҳар чакиллаб томиб турган, топшириқни бажариш ҳирси уфуриб турган турқقا дуч келиб, ҳайрон хаёлиям эсхонасидан чиқиб кетди. Орадан бир соатдан ортиқ вақт ўтди. Ҳайъат бетоқатланди. Яна бир зобитни гап нимадалигини билишга жўнатдилар. Сукунат.

Тўппончанинг овози чиқмаётганлигидан бандининг бетига қон юргандек бўлди. Тетикланди. Қани энди шу ҳолатда бўлсаям умрини ўтказаверса. Шунда, шунда бирдан осмону ерни ларзага солиб ўқ овози эшитилди. Назарида, худди тўп оғзига уни боғлаб отишгандек ҳуши қолмади. Ташқарида, қаердадир, қандайдир қуролдан отилган дайди ўқ бехато келиб шакар томирига урилгандек, тик бўйи йиқилди.

Ҳайъат аъзолари масала ҳал, дегандек, бир-бирларига ройиш бериб қарадилар. Раис икки соатдан буён ниманингдир расмини солиб ўтирган, китоб деса китобга, супра деса супрага ўхшамайдиган бесўнақай икки бетли жилдни бир-бирига қарсиллатиб уриб, стол устидаги кумуш қўнғироқчани каштасини келтириб чалганча, суд якунланганини билдириди.

Стол устига жилднинг остига солинган икки бошли калхат эга чиқди.

5-дафтар

Поездлар қоп-қора дудга ботиб, эрмакка совуқ шамол қувиб келади.

Граф Лев Николаевич Толстой: “Фарбликлар бошқаларни ўлдирмоқ ва ўзларини ҳалок қилмоқ учун Шарққа қараб йўл олдилар. Сабаблар бир-бирига мос келиш қонунига кўра”, – деб ёзганда давр бир бўлса-да, макон бошқа эди. Бир даврнинг бўлак маконида сафар йўналиши ўзгача бўлди. Шимолликлар Жанубга қараб йўл олдилар.

Аввалига чучмал ҳаракат бўлиб туюлган, исказбатопар олимлар ёрдамида ўлжанинг чўфи аниқланиб, сўлакни келтирадиган иштаҳа йўли очилиб, уруш ўчоғига ўтин қалангандар, кейинги очиқ босқин яраларига пўстин кийдириш учун келтирилган пойинтар, бачканна сабаблар бир-бирига тўғри келмаса-да, келгандек кўринганини исташгани учунгина оқиям-сарифијам йўйлаб кўришни ўзига эп кўрмасди: Николайнинг тупроғи тилла Туркистон заминига ишқивозлиги ва бу ишқивозликнинг, биринчи навбатда, тийиқсиз генераллар, тажовузкор зобитлар, оч аскарларнинг кайфиятига мос келиши; ҳам Фарб, ҳам Шарқ урушларида шарманда бўлган Россия армиясининг қуролсиз аҳолини эзишга ва айни вақтда бароқ кўппакдан кўрқар, суманги санқини қувар қудратини намойиш

этишга бўлган чегара билмас завқи; ақли танг қотиб, қиличи занг босган тор кўнгилли бекларнинг зарни кўрганда кўзини зарнигор касали бутунлай қоплаши-нинг мутлоқ аниқлиги; тўрт овора бир бутундан кўра яримта-юримта бўлсаям азони бетаҳорат чақирилган номи айтилиб туришни исташдек ҳаром хаёллар оғу-шининг устун келиши; қандайдир оломоннинг бун-дай саховатли ерларда яшашликка аллақачон ҳукуқи бекор қилинганинг гўллигига бориб англамаёт-ганликларини англатиш ҳирси; серсув, унумдор ер-ларда мужиклар эгалик қилишларига шахсан Олий ҳазратнинг ўзи фатво берганлиги; шунинг учун, айтайлик, Жиззахдек геосиёсий, барча йўллар учраша-диган, қуруқ чўп ҳам гуллаб тилла туғадиган ерда, яна шаҳарда қанақадир сартлар – ўзбекларнинг яшашла-ри тўғри эмаслигини тушунмаётганликлари; қирғин-га дин эмас, зулм ва зўравонлик сабаб бўлганлигини англашни истамаслик; ёмонўйликнинг сиёсатга ай-ланганлиги; ҳукм юритишда мантиқнинг айният қо-нуни бузилган тимсоҳ софизми қундан-қунга саноқ-сиз тишини қайраб, қон тепган кекирдагини кўрсата-ётгани ва бу бузуқиликнинг тарафдорлари зўравон-лар, амалдагилар эканлиги; малака ҳосил бўлиш эгри чизиқлари тўғридан-тўғри найзаларга, қиличларга айланганлиги; эгоизмнинг эгоцентризмга аллақачон ем бўлганлиги; уят ва ҳаёсизлик ҳиссидан маҳрумлик-нинг ҳукумат деб аталиши; яхлит рефлектор ҳаракат лар системасидаги қисмларнинг ўз ишини бирин-ке-тин бажаришдан иборат функционал қонуниятнинг бузилиши; ҳис-туйғулар уйғотувчи манбаларнинг тубанлашганлиги; босиб олмишларнинг босиб олин-мишлардан савод ва одоб даражасининг пастлиги сезилганлиги ва бунақа савод анчадан буён савод са-налмаслигини англамаётганликлари; Андижон қўзға-лонида Британия, Жиззах қўзғалишида Туркиянинг

қўли бор, деб айюҳаннос солиниши ва охир-оқибатда бу гап-сўзларнинг пилта милтиқ сассифидек жийиги чиққанлиги; баҳамжиҳат бўлиб, тинч-тотув яшашни хуш кўрадиган Туркистон аҳлини ўзини-ўзи ейдиган олаканалар маконига айлантириш истаги; ҳақиқатни билиш санъатининг мантиқий усуllар ва методик қоидалар системасининг худбинлик, ўзим бўларлик манфаатларига бўйсундирилиши каби миллион-миллионлаб сабаблари бор эди.

Шимолдан оч мужикларни, сури сургунга йўлиқан тўғрисўз илмиларни қамаганча елкалаб келган поездлар ҳайҳотдек вагонларни тиллаю тиллодан зиёд китобларга... юкка тўлдириб зўриққанча, ҳавони булғаганча келган ерига қайтади...

6-дафтар

Раис қачондир, нимадандир, жуда қаттиқ қўрқиб, юзи шу ҳолатда қотиб қолганлиги, киприк қоқмаслиги, мудом бақрайиб туриши, томоқ қиришидан заҳар томиши билан ном чиқарган эди. Прокурор саводсизлигини эгнидаги ҳашамдор формаси бекитиб туради, деб ўйладиганлардан бўлиб, зобитларни нақшинкор хумларга ўхшатганлар хато қилмасди.

Сўроқ пайтида раис бандилардан бир-икки оғиз гап сўраган бўлиб, бошини аввал ўнг томонга, кейин чап томонга буриб, навбатни ҳайъат аъзоларига ҳавола этар, бироқ уларда ҳам гапириш истаги топилмасди. Аниги, уларга гапириш хукуқи берилмаганди. Рўйхатга белги, чизиқ чизиш билан овора эдилар. Прокурор ва ҳимоячининг гапларидан сўнг кўлларидағи қалам билан бандига ўтиришорасини қилишар, сўроқ навбати бошқасига келарди. Шу зайлда бир кунда режага асоссан юз одамнинг ишини кўриш вазифаси зиммаларига юкланданди. Саккиз соатдан юз одам иши.

8x60=480 минут. 480:100=4.8 м/секунд.

Ҳар бир одамга сал кам 5 минут. Айбдор атамиши ни суд залига олиб кириш ва олиб чиқиш, шахсини аниқлаш ва айблов хулосасини ўқиб бериш билан бирга, албатта. Савол-сўровнинг қаттиғи саводсизда бўлади. Гўштга етган итдай навбат прокурорга тегиши билан кўзойнаги ва сап-сариқ қоши оралатиб аввал рўйхатга, кейин бандига бошдан-оёқ тикбўйин қараб, қурбақани авраётган илондек бўйини беўхшов чўзиб-чўзиб, аввал ўнг бош бармоғини чап енгига, кейин чап бош бармоғини ўнг енгига тиқиб, худди билакларига тегиб кетган енгларини ажраттандек ўйнашдан бўлган киборлар қилиғини қилиб, қўнгилни айнитар даражада қўскى-қўлансиқ-палағда товуш билан ишини бошларди. Одатда, банди прокурорнинг саволига тушунмас, қайта сўрашга журъат қилолмас, қайта сўраш мумкинлигини ўйлаб кўрмаган ҳам ёки жавоб берса-да, прокурорнинг найранг тўрига ўз ихтиёри билан бўлмаса-да, қатъиятсизлиги, гўлу овсарлиги ортидан илиниб қолардики, гапираётган гапи ўзига зарап келтираётганлигини фаҳмламасди. У энди қаердан билсинки, бир “гап” учун наинки бир уй ё ўн уй, балки минглаб уйлар куйиб кетса, хонумонлар тутаса, нафақат бир шаҳар, балки бутун бошли бир мамлакат хароб бўлса...

Аммо таржимон прокурорнинг айёрлигини пайқаб қолиб, саволларга шарҳ бериб, авом тушунадиган тилга ўгира бошлайди. Шу тариқа уч-тўрт банди прокурор чангалидан қутилишга эришди.

Прокурор билди. Энди таржимоннинг кўзига қаттиқ тикилиб, саволларини дона-дона қилиб талафуз қилар, лекин таржимон диққат қаратмас, ишига собит турарди...

Прокурор кўрдики, ов бароридан келмаяпти. Таржимонга ташланди.

– Сиз, Мирзо Абдухолиқзода, менимча, саволларимни нотўғри таржима қиляпсиз. Бир оғиз гапимни достон қилиб етказишнинг нима зарури бор. Гапимга гап қўшмай, айнан таржима қилишингизни талаб қиласман!

– Прокурор жаноблари. Сиз адабий тилда гапиряпсиз, агар мен гапингизни айнан ва сўзма-сўз таржима қиладиган бўлсанм, қишлоқ одами сизга нима деб жавоб беради? Жавоб берган тақдирда ҳам саволга мувофиқ келмайди, англашилмовчилик юзага келади. Агар саволингизни очиқроқ, аникроқ баён қилсангиз, менинг шарҳ бериб ўтиришимга ҳожат қолмасди.

– Бу ёғи сизнинг ишингиз эмас! Вазифангиз айнан таржима қилиш, тушундингизми? Сиз менга йўл кўрсатманг! Мен ўз ишимни яхши биламан.

– Кечирасиз, жаноб прокурор, менинг вазифам саволингизни бандига тушунтириб бериш, токи у саволга тушуниб жавоб берсин, зеро, бу ерда инсоннинг тақдиди, ҳаёт-мамоти ҳақида гап кетяпти.

– Такрор айтаман, саволимга илова қилманг, мен нима десам, айнан таржима қилинг, сизни бу ерга таржима қилиш учун олиб келганлар, адвокатлик учун эмас, – деганча қаҳр билан столга мушт солди.

Ҳайъат, бандиу соқчилар, текинидан қуруқ қолгандек йиғилган томошибинлар бир чўчиб тушди.

Таржимон суд раисига мурожаат этди:

– Раис жаноблари, мени ҳарбий суд мажлиси таржимонлигидан озод қилишингизни сўрайман. Мен прокурор талабини бажара олмайман ва виждоним олдида гуноҳкор бўлишни истамайман.

Суд танаффус эълон қиласди. Кейин маслаҳатхонасига прокурорни чорлади.

– Александр Николаевич, таржимоннинг хатти-ҳаракати жонимга тегди.

– Бу ерда ҳиссиётга берилмаслик керак, азизим Василий Петрович. Маълумотингиз, шарманда унвоннингиз вазифангизга тўғри келмаслиги важидан Тошкентда озмунча одам билан сану манга бориб сизни сўрамаганмидим. Мана, кўриб турибмиз, тажрибангиз ҳам ҳаминқадар...

– Александр Николаевич, ўзингиз биласиз, бунча одамни айбдор деб топиш учун начальник охранканинг бир протоколи камлик қиласди. Биргина гувоҳимиз бор. Лекин унинг “танимайман” дейиши ҳам асоссизга ўхшаяпти. Шунинг учун мен юристча гаплар билан уларнинг бошини гангитиб, ўз тилидан илинтирмақчи бўляпман. Таржимон эса ишимга халал беряпти, агар у халақит бермаганда қанчасини тумшуғидан илинтирардим. Бунинг ўрнига русчани яхши гапира олмайдиган чаласавод таржимон топганимизда яхши бўларди.

– Василий Петрович, жуда соддасиз-да, нима, Тошкент қароридан хабарингиз йўқми? “Бу итларнинг ҳеч бирига омонлик йўқ”, деган гапни эшитмаганмисиз?

– Қандай хабарим бўлмасин. Юристлик маҳоратингни ишга сол, деган эдингиз, шунга амал қилиб...

– Яхши, тайинлаганимдек, чалкаш саволлар билан чалғитинг, гапга олинг. Прокурор деган номингиз бор. Русчани тушунмайдиган маҳаллийларга эътибор қаратмайман. Сиз ҳам шундоқ қилинг, бироқ русчани биладиган адвокатлар ва томошабинлар чатоқ. Улар қанақа одамлигини билиб бўлмайди, демакки, ишониб ҳам. Мабодо масала қандай ҳал бўлаётганининг исини олсалар хукумат шаънига бўлмағур овозалар тарқатадилар. Албатта, хукумат бундайлардан кўркмайди, лекин ҳарбий судимизнинг нозик жиҳатлари бор. Тушунгандирсиз? Қанчалик оғир бўлмасин, ҳозир чиқиб, таржимондан кечирим сўрайсиз. Бу шахсий иш эмас, умум иши. Улуғ Россияга, Ҳазрати олийларига

фойда келтириш учун шахсийнинг баҳридан ўтиш керак. Шу ишингиз билан очилган пардани ёпган бўла-сиз, – деди дўлтабўридай ёвуз босиқлик билан. Кейин қўшиб қўйди. – Бу ерни ҳозирча Туркистон дейдилар. Асосий мақсад Туркистон деган сўздан кўрқитиш, без-дириш, тондириш. Ҳатто бу ҳақда ўйлашдан қўрқишига эришишимиз керак. Топшириқ шундай. Тушлик 1.00 да бошланади. 2.00 да хамма суд залида бўлсин. Тартиб қанақа бўлишини буларга ўргатиш керак. Вақти-миз қисқа. Ҳамма ишга.

7-дафтар

Юлдузлар, минглаб юлдузлар тартиб билан Ғарб-дан Шарққа айланади. Ер шари миллионлаб жондору жонлиқлар бошини елкалаб, ўз ўқи атрофида Шарқ-дан Ғарбга томон ўгрилади. Бир танасига бир бош берилган одам қаёққа юришини билмай, кўрингангага қўшилишиб жўнайди.

Аввалига йигирма мингдан зиёд эркак зотини сўроқ-сўровсиз ўққа дучор қилган, кейин ўқ ҳам ҳайф деб ҳисобланиб, совун суртилган дорларга тортилган шаҳар ва шаҳар атрофи бўри талаган қўрадек ҳувил-лаб қолди. Кундуз куни қидириб, қари чол ва норасида гўдаклардан ўзга эркак зоти топилмас бўлди. Қоч-гандан қирилган кўп бўлди. Эгасиз экинзорлар одам бўйи ғалласини кўттаролмай ер билан битта бўлиб ётар, ишлашга қурби етганларнинг илингани ўлди-рилган, қочолгани бедарак, ушлангани турмада, суд бўлгани Сибир, “омади чопгани” мардикорликка олиниб, уни-қуйруғи йўқ ўрмонзорларнинг гадой топмас, борса келмас хилватларига жўнатилган эди. Шаҳарни ушланган жойидан вагонларга урилган дайди-дуйди, оч-яланғоч, соч-соқоли битлаб, изма-из етиб келаётган мужикларга бўшатиш лозим.

Жиззах шаҳри, Боғдан ва Сангзор вулусларида қариялару ёши қайтганлар, аёллару болалардан бўлак қўзғалонда иштирок этганлигини гумон қилиш мумкин бўлган ҳеч бир зот қолмади. Эгасизларга қўзғалон иштирокчиларини зудлик билан тутиб беришлари ҳақида буйруқ берилди. Мабодо уч кунда буйруқ баҷарилмайдиган бўлса, аҳоли уй-жойидан мосуво бўлиб, чўлу биёбонга бадарға этилиши олдиндан тузилган режага асосан маълум қилинди.

1916 йил 7 август. Соат ўн икки. Фармон ўқиб берилди. Унга кўра эгасиз эл биёбонга сургун қилинган. Кун қизигандан қизиган. Саллотлар ва отлиқ казаклар қиличу найзаларини яланғочлаб, милтиқларини ўқталиб, нотавонларни тўрт томонга ҳайдаб шаҳар четидаги дала – Учтепага тўпладилар. Оч саллотлар аҳолининг охирги бурда нонини қўлидан юлқиб, шу жойнинг ўзида кавш қайтарар, бир бурда қотган нони бор одам гуноҳкор саналган кун эди.

Эгасидан ихлоси қайтган итдек бўйни эгилган ҳардамхаёл улус отлиқлар олдига тушди. Номигагина кўйлак-иштон вазифасини бажарадиган латта-путтага ёпинганлар гирёну нолон даштга қараб судралди. Учтепа ортидан бошлангучи Бадбаҳтдалага юзланган гўдаклар, аёллар ва кексаларнинг оху воҳи оламни бузди. Ташналик азобидан лаблари гезариб судралаётган минглаб қари-қартанг, аёлу гўдакларни осмондан офтоб, ерда тош куйдиради. Олдинда гиёҳ ҳам унмайдиган, ўз оти ўзи билан Бадбаҳтдала. Орқада милтиқ ва қилич ўйнатган саллоту отлиқ. Бир бошга қўшотлиқ мирзо тиф кўтарган. Мадорсиз, йиқилганни кўндоқ ва тепкининг зўри ўзига келтириб қўяр, отлифининг оғзидан “собаки” тушмас, соллоти “сукина дети” деганча бет-кўзинг демасди.

Асад ойи димиққанча ярми сенга, ярми менга дегандек қиличини тик кўтариб чиқди.

8-дафтар

Поездлар жанубдан шимолга сургун этилганларни, шимолдан жанубга янги ер эгаларини пешма-пешташийди. Шимолга кетаётган вагонлардан чаккиллаб қон, заҳардек ялтираб зардоб томади. Зарdobлар темир изларни тешиб юборгудек бўлади. Поездларнинг қилифи шамолга ёқмайди. Уни таг-туги билан азот кўтариб ургиси, айниқса энг бошида келаётган, қора тутуни билан дунёни булғаётган қозонқоринни ёмон кўради. Ичи дардга тўлиб кетади. Дарди чанг-тўзон бўлиб осмонга ўрлайди. Тентираб тўрт томонга чопади. Дардларини дарё тушунади. Дарёning дарди шамолникидан зиёд эканлигини сарғайган икки бети – доманаси билдиради. Дарё дарё бўлиб бунчалик хўрланмаганди. Ҳушини эсхонасидан чиқарган нарса Каттатоғнинг қадим арчаларининг ғорат этилиши, Ўсмат Ота, Новқа Ота, Боғмозор Ота мозоротлари устигача ястаниб келган арчазорнинг бир бошидан кесилиб юзига отилиши эди.

Неча бир босқинда арчалар элни асраганди. Пана бўлганди. Бир туп тизза бўйи арчани бирор кесолмасди. Бир арчада қирқ йигитнинг ризқи бўлади, деганча эл арчани асрар, арча тоғни безар, шодликлар булоқ бўлиб, қўшиғи дарёга оқарди. Каттатоғнинг бир шохидан энган сувга Самарқанду Бухоро, бир шохига кунчиқишиш бетдагилар тириклиги қараб қолган. Поездман дегани шақилдоқ илондек билтанглаб келди-ю, ҳамманинг ранги учди. “Эга, эга бўлмаса нега”, деган гаплар шу вақтларники дейишади. Дарё ўз онаси, ўз болаларини оқизиб кетаётганидан, қутқара олмаётганидан, қутқаришга кучи етмаслигидан қирғоқларга бош уриб югуради. Дард оғир, кўргулик зил келади. Балолиғ босинқиратади. Аламини кимдан олишга, ҳасратини кимга айтишга ақли етмай қўлига илингани олиб чопади. Қирғоқлар этагини тош-

га түлдириб ортидан эргашади. Минг йиллар олдин икки тоғни муросага келтириб, орадан йўл очганига пушаймон бўлай дейди-ю, шаштидан қайтади. Шамол бир дарё бетида, бир қирғоқларда ялангоёқ изиллайди. Кўз кўрган еридан ажраган, камига етти бўлакка нимталанган, йўргакдек ғўлаланган арчанинг дарди бу дунёга сиғмайди. Ғўлалар сув юзида, пўртаналарда айланишар экан, бир-бирига бош қўйишиб, гоҳ гирдобда, сув ўрада уймаланиб қолишади, гоҳ шарракларда юракларини ҳовучлаб, кўзларини чирт юмиб олишади. Ҳали дарёдан чангакда томоғидан тортиб чиқарилиб, сергитиб, қуритилиб, поездларнинг ўчоғига ўтин бўларлариям бор. Ўшанда уларнинг оҳини бирор эшийтмайди. Эшийтган тушунмайди. Тушунган тескари қарайди.

Зорланган Сангзор бўлади. Зорлангандан Сангзор зорланади.

Шундай кунларнинг бирида темир йўлнинг икки чеккасини, сассиқ шпаллар орасини ёриб қизғалдоқлар бош чиқаради. Бир-бирининг кўлидан маҳкам ушлаган қизғалдоқлар. Худди вагонлардан чакиллаб томган қонларнинг изсиз йўқолиб кетмаганлигини таъкидлагандек, қад ростлайдилар. Шаҳидлар чироғидек, йўқ, бошидек қип-қизил бўлади. Шамол уларни танийди. Кела-сола юзларини силайди. Сув-саб қолган бўлса керак, деб шошганча булатни қувиб, олдига солиб келади. Қизғалдоқзор тўйинган бўлади. Тоғлар кўзларини ишқалаб ҳайратдан ёқа ушлолмай қоладилар. Уларга қўшилгиси келади. Тошлар такбир айтадилар. Тухумбошлар тошча бўлмайдилар. Шунда иккитоғдан ўзига ёқа ясад олган Темир Қопқанинг Илонўти тарафидан келган паровознинг ҳаммаёқни жийитиб ўтиши бузади. Кўзи ачиб, нафаси тиқилган дара ёқа тутамлаганча данг қотади. Қизғалдоқзор тик туриб қарши олади. Кўрқмайди. Бу бошлар темир из-

ларга қўйилиш учун яратилмаганлигини билдириб қўймоқчи бўлади. Хаёл қиласи. Хаёлида борлиқ алвондан-алвон эмиш. Ҳатто Бадбаҳт далаям. Шамолга айтмоқчи бўлганди, Яланғоч кўрсатгич бармоғини лабига босди. Қизғалдоқзор тушунган бўлди, елкаларига парчинланган изларни шамолга қўшилиб бир силтаб олади. Кўпни кўрган шамол яна ўнг эсишидан умидвор бўлади. Ҳуриллаб, ям-яшил арчаларни, аламларни қадимгидек пирпиратгиси келади. Яланғоч оёқларини сувга солиб, бир қўлини Танги, бир кафтини Чонғи қирларига тираганча тек қотади. Бир кўнгли дарадаги ғорга кир, дейди. Бошқаси қўли бойлиқ бўлмаган бир ўзи қолганини иддао қиласи. Дунёларни тентираб-тентираб, айланиб-айланиб келаркан, йўлма-йўл саболар сочини маҳкам ўриб юпатади, шаббода кўнглини ёритади, муштипардек ҳилпиллабгина турган елпин кўнглини кўтаради, гармселни ҳовурдан туширади, сурон солишга силласи етмай қолган тўзонларга тўзим тилаиди, довулга айланмоқ орзусидагиларга қувват бўлади, камонларга ўқ бўлиш ғайрати билан ўсаётган новдаларни, хивичларни силаб-сийпаб ўтади, елкасига кун, кўксига эпкин тегишига илҳақ мустаринларга нигоҳ ташлаганча, кўпга қўшилганлар оҳидек улиб, шерболадек кулиб, дарёнинг дардидан дамма-дам дарак олгани қайтиб келаверади.

Катта айрилиқлар ва улуғ топишишлар ҳақидаги қўшиқ ёлғиз айтилмаслигини сағаналардаги ёзиқлар эслатади. Куйиниям.

Хур шаббода, ҳуриллаган шамол, ҳурлик олиб келадиган шамол йўлига қўз тиккан Ой улуғ армон күйига эш бўлади. Ўзини ўн иккига бўлиб улуғ армонлар қўшиғини, улуғ армонлар ушалиши кумсови қўшиғини айтиб, ўзи айланиб, ўзи ўргилиб, ўроғини эл бошидан авайлабгина сирмайди, серпайди..

Сунбула-ё, сунбула...

Бу дунёда бормикан-а, юрак-бағри бутуни,

Бу дунёда бор бўлса, юрак-бағри бутуни,

Қоғоздан ўчоқ қилай-а, гулдан қилай ўтинни.

Сунбула-ё, сунбула...

Янги ой – Сунбула элга тинч, ўзига нотинч бўлганча, қоши икки ёққа осилиб, аҳли асрорга сир улашиб ёсин тортади. Катта юлдузлар азалий ўринларида итоат билдириб, хурмат ва сукут билан бўйин эгадилар. Йўқолган юлдузлар ўрни ўпирилиб тушган эгасиз очиқ гўрдек мунғаяди. Чархи фалак, оғма фалак отига ярашиғ йўлида давом этади. Юлдузларнинг ўтиш йўлидаги тўғри кўтарилиш ҳисобини топиш ҳамманиям кўлидан келавермайди. Чўмич юлдуз тўнкариғлиқ қозонда юлдуз шопириб тураверади...

Миррих ғўддайганча, хеч кимни мирламай юрт кезади. Қараган, юзланган томонидаги яшнаган нарсаларни қийратмай қўймайди. Зухрага қараган, Зухра қараган жонлар ором олади. Орзу юлдузи – Аторуд кимга яқинлашса орзу-тилакларга кўмилиб, орзулари орзуларга уланиб, улаб яшайди. Кути ўчмайди. Етти қароқчи тутқич бермай кўчгани-кўчган”...

Эгалик итларнинг ҳуришиям дадил-дадил чиқади.

Эгасини кўрганда, албатта. Эга, эга бўлмаса, нега?

Эркалик эгалик уйга ярашармиш...

Исажон СУЛТОН



МЕН, ОНАМ ВА ЎРТА ЕР ДЕНГИЗИ

Онам билан Ўрта Ер денгизи соҳилидамиз.

Поёни кўринмас яшилтоб сувлар тинмай долғала-
нади. Чағалайлар чийиллаб учишади. Узокларда оппоқ
яхта кўпикли из қолдириб сузиб бормоқда.

Чап томонимизда сув қаъридан бош кўтарган ки-
чик тоғлар кўзга ташланади. Устида сийрак арчалар
ўсган, ораларида оқиш қоялар кўриниб турибди. Бу ер-
ларнинг ҳавоси тоза, чанг йўқ, балки намлик кўплиги
туфайлимикин? Қизгиш йўлкалар йилтирайди, баҳти-
ёр сайёҳлар тўда-тўда кезишади. Биронтасининг юзи-
да ташвиш кўрмайсиз.

Бошига қизил қалпоқча кийган йигитча патнисда
чой опкелади.

- Sorry, do you want a cup of tea or maybe drink some?
- Ҳа, яхшимисиз, болам, – дейди онам. Кейин савол
назари билан менга қарайди:
 - Чой-шарбат ичасизми деб сўраяпти.
 - Қанақа чой экан?
 - Аччиқ, қора.
 - Сўра-чи, кўк чойи йўқмикин?
- Куламан. Бу ердагилар унақасини ичишмайди.
- Ростданми? – ҳайрон бўлади онам.
Ўтган-кетганлар она-болага қизиқсиниб тикили-
шади.

Ўтирибмиз икковлон, тош устида.

– Роса чуқур бўлса кераг-а? – дейди онам, сув шовуллашига, оқ чағалайларга маҳлиё бўлиб. – Қара-я, қанақа экан денгиз деганлари?

– Ҳа, жуда чуқур.

– Тавба, худойим шунча сувни яратибди-ю ичиб бўлмайдиган қилиб қўйганини кўр!

Бу маконларга уни қўярда-қўймай олиб келганман. Шу гўзалликларни, шу оромни жуда илингандан. Кўрса завқланади, қалби қувнайди деганман. Саҳролару тоғ-тошлар оша уча-уча, ниҳоят, манзилимизга қўндиник. Улкан аэропорт, одам қайнайди, ҳар турли кишилар оломони бир лаҳза бўлсин тинмайди. Тизилишиб кетган ялтир-юлтири дўконлар, охири кўринмас ўзиорар зиналар...

– Your attention, please! Flyght Air France number five five two to Paris is boarding now. Passangers are requested to proceed to gate number two two one¹.

Бегона тиллардаги мана шу шовқин-сурон аро онам ҳар ёнга аланглайди.

– Роса сув ичким келди-я. Боядан бери излайман, бирор жойда кўрмадим?

– Бу ерларда сиз билган шарқираб оқиб ётган сувлар йўқ-да, – дейман кулиб. – Сотиб олиш керак.

– Йўғ-э? – ҳайрон бўлади онам. – Сувни-я?

– Сиз ўтириб туринг, мен ҳозир...

Бориб сув опкеламан. Одамлар сувни тўғридан-тўғри идиш оғзидан ичишаверади. Онам эса ўйланишиб туриб “Пиёласи йўқмикин” деб атрофига аланглайди.

– Шундоқ ичаверинг, қаранг, ҳамма шунақа қиляпти.

– Э йўқ, қўйсанг-чи, уят бўлади.

¹ Дикжат қилингиз! 552-рейс билан учувчи “Эйр Франс” Париж учогига чиқиши эълон қилинади. Йўловчилар 221-учиш йўлагидан самолётга чиқишлари мумкин.

Қайтиб бориб, қоғоз финжон олиб келиб, қуиб узатаман.

– Бу ернинг суви ичишга ярамайди, – деб тушунтираман. – Шу сабабли тозаланганини ичишади.

– Вой, бечоралар...

Бир соатча вақт ўтгач, ўз учоғимизга чиқамизу кўзлаган манзилимизга етиб келамиз.

Бу – денгизнинг шимолий соҳили. Субтропик иқлимнинг нам ҳавоси бетга уради. Қайдандир шабада шўр исини олиб келади. Биз отини билмайдиган анвойи дараҳтлар барқ урган, ҳар тараф озода, топ-тоза.

Сайёҳларни кутиб олиш хизмати аллақачон шай турган экан, тез орада сароймонанд муҳташам масканга етиб келамиз. Олтинкори нақшлар кўзни қамаштиради. Тўхташимиз билан хизматчилар чопиб келиб, юкларимизни олишади.

– Вой, қўйинг, болам, – дейди онаизор, бўхчасини олган йигитчага. – Енгилгина-ку, ўзим оборавераман. Сиз овора бўлманг.

Йигитча ҳайрон бўлиб қарайди, кейин аравасини ғилдиратиб бир дунё юқ билан кутиб турган бошқа кишилар ёнига кетади.

– Одобли бола экан, таълим берган ота-онасига раҳмат, – дейди онам.

– Она, буларни вазифаси шу.

– Вазифаси шу бўлсаям-да, – дейди она. – Кулиб туришини қара. Хўмрайса нима қилардинг?

Икковлон “Оилавий” дейилган бир хонага жойлашамиз.

Бунақа хоналарга бир эшикдан кирилади, аммо ичкарисида ёнма-ён иккита хонаси бўлади. Ҳар тараф ораста, сочиқлар оққуш шаклида ўраб-тахлаб қўйилибди. Ётоқларни кўздан кечираман.

– Ҳой бола, – дейди онам. – Кап-катта бўлсанг ҳам эсинг кирмапти-я? Еч оёғингдагини!

Қарасам, ўзи оёқяланг бўлиб олибди.

– Бу ерда бўлаверади, она, – дейман. – Ҳар куни икки мартадан тозаланади.

– Бекор айтибсан, – дейди онам. – Тозалашар экан деб оёқ ости қилаверасанми? Ўша фаррошлар ҳам бирорвни боласи, меҳнатини қадрламайсанми?

– Хўп-хўп, – дейман кулиб.

* * *

Саҳарлаб онам мени уйғотади.

Эҳ-ҳе, қанчалар соғинганман шу сасни, шу уйғотишини. Жилмайиб уйқудан кўз очиш саодати қанақа бўлишини билсайдингиз! Онангиз койиб уйғотишининг фароғатини туйсайдингиз!

– Ҳой бола, тур! Мусича кукуляяпти, кун ёйилиб кетди.

Мусича? Бу ерда мусича бор эканми?

Ростдан ҳам қайдандир – баҳайбат япроқли паль-малар, тўп-тўп шамшодгуллар орасидан ўша қадрдон сас эштиляпти. Кўз ўнгимга айвонимиз, тоб ташлаган устунлар, михга илиб қўйилган чўпсават, хас-чўп ташиб кукулаган қушлар, барқ уриб гуллаган бодом келади.

Онам хушҳол, жилмайиб турибди.

Ўзимча ҳазиллашаман, онаизор эса қувнаб кулади. Бундай қувнашини кўп йиллардан бери энди кўрмоқдаман.

Мен университетга кирганимда шунақа қувнаган эди. Қизим туғилганида ҳам... Баъзан байрамларда, ҳайитларда кўйлак олиб берсам шунақа суюнарди.

Мана, узоқ эллардамизу аммо кўзида ўша, ўзим яхши кўрадиган севинч учқунлари.

Юради, аланглайди. Теваракка разм солади.

Арчалардаги олмахонлар шоҳдан-шоҳгага чопишиди. Онам уларни кўриб, боладай суюнади. Олмахонлар одамлардан ҳайиқишимайди, биттаси олд панжаларида

бужурини тутиб, кичкина қора кўзларини бизга тикиб турибди.

– Вой, айланай, – дейди онам. – Мунчоқ кўзчалари ни қара! Ҳай, жонивор келақол, ўргилай сендан!

...Овқат маҳали ресторонга кирамиз.

– Вой-бўй, – дейди онам, у ердаги неъматларни кўриб.

Ҳақиқатан ҳам, дунё миқёсидаги кўнгилочар масканларнинг мижозларга хизмат тизими беҳисоб егуликларни қалаштириб ташлаган. Тўртта ресторанда одам ғужғон. Кишилар қўлларида товоқчалари билан айланниб, кўнгиллари тусаган нарсани олишяпти. Таомларни саноғига етолмайсиз. Бир томонда тўп-тўп ширинликлару мевалар, турли ҳалқларнинг тансиқ таомлари, итальянларнинг ҳар хил пиццасидан японларнинг “суши”сигача бор. Олавер, дейди замонавий маркетинг. Истаганингча завқлан, лаззатлан! Биз фақат сенинг ороминг учун хизмат қиласиз! Нарироқда анча-мунча киши қовурилаётган тухумга навбатга туришибди. Булар – эрталаблари қўймоқ еб ўрганган кишилар. Баъзилари бола-чақаси, оиласи билан келган, калта шим кийган чол-кампирларгача бор. Аммо онаси билан келган ўғил кўринмайди.

Онам озгина овқат олди. Бориб, гилос шарбати опекелиб бердим.

– Шу холосми? – дедим кам еганини кўриб. – Мўлкўл-ку, тўйиб еб олмайсизми?

– Қўйсанг-чи, – деди онам. – Қорним озгина нарсага тўяди. Исроф бўлмасин...

* * *

Теваракни айланамиз. Пальмалар типпа-тик бўй чўзган, хитой атиргуллари бутадай бўлиб ўсиб кетган. Ҳавода чучмал ис бор. Дараҳтлар орасидаги ғалати чирилдоқлар қаттиқ овоз чиқариб чириллашади.

– Мунча бақирмаса? – деб сўрайди онам. – Ўзимизнинг чирилдоқларми шулар?

– Йўқ, бошқача, – дейман. – Бор-йўғи икки кун яшайди. Жуда қаттиқ чириллаб, бақира-бақира ёрилиб кетади.

– Э тавба, ўзимизниkilар эслироқ экан-да, – деб кулиб юборади.

Оқшом қўнган.

– Тавба, кечалариям бир бошқача-я, – дейди онам.

– Худо кечаниям ҳар турли қилиб яратиб қўйганини кўрмайсанми?

– Нимаси бошқача экан?

– Билмадим. Чиройлию аммо бошқача-да... Одамлари-чи? Биров билан бирорни иши йўғ-а...

Тунги кафелар атрофида оломон зич. Кайфу сафо масканларида ҳавога мушаклар отилади. Салдан кейин ёнгинамиизда бир нима қаттиқ гумбурлайди: мусиқий қўнгилхушлик бошланади. “Оборайми?” деб сўрайман онаизордан.

– Йўқ, – дейди онам. – Ундан кўра юр, денгизга борамиз...

Сарин кечада она-бола қўл ушлашиб, соҳил томон кетамиз.

Чароғон чироқлар ёғдусида қорамтири тўлқинлар йилтирайди. Кечки шамол турган, уни “бриз” дейдилар. Соҳил тинч, ҳеч ким йўқ. Сал нарироқда, пальмалар остида севишган жуфт кўзга ташланади.

Онам ўйчан.

– Она, нималарни ўйляяпсиз?

Индамайди.

Ҳавога булат чиқади. Биз билгандай эмас, паға-паға, қорамтири-кулранг. Уни денгиз ичкарисидан шамол суреб келади. Шамол сувни ҳам, булатларни ҳам бирдай суради.

Денгиз долғалана бошлайди.

– Балиқлари ҳам бўлса керак?

– Ҳа, албатта.

– Бўлади-да, – дейди онам. – Ҳовлимизни этак томонидаги кичкина ариқча бор-ку, баҳорда қарасанг, ўшани сувидаям минглаб майда балиқ милтиллаб сувизб юарарди. Шундай катта денгизда бўлмасинми?

Яна термилади.

– Она, бир жойингиз оғримаяптими?

– Йўқ, болам.

– Нимага бошқача бўлиб қолдингиз?

– Ўзим...

Икковлон жим қоламиз.

“Онам... ўзгариб қолибди-ку?” деб ўйлайман билдирмасдан разм солиб.

Қаддини тик тутиб, мағрур юришлари ўша-ўша, бироқ... аввалги шиддати сезилмайди. Секинроқ, авай-лаброқ қадам босади. Мен олдин кўрмаган, пайқамаган кўп хавотирлар бор бу қиёфада.

Шу маҳалгача онам ҳали тетик, ўзини олдирмаган деб ўйлар эканман. Бир оз юрса тинкаси қуриётгани, оғзи қуруқшаб “Сув йўқмикин” дейишлари, салдан кеийин ўтиргани жой излаб аланглашлари... Қўлини кўзларига соябон қилиб узоқ-узоқларга қийналиб термилишлари... кексалик деган бир куз фасли онамнинг умр боғига етиб келганини кўрсата бошлабди.

Ҳа, онам ўзгарибди. Менга боладай итоат қилиши-чи? Бошқа йўлакка қараб кетаверса “У ёққа борманг” десам, “Хўп” деб ортига қайтишлари, қайга борсам эргашишлари, худди боламдай итоаткор бўлса-да, бу ҳам етмагандай, чиройли манзаралару хуштаъм егуликларни илинишлари... бир завқимни келтирса, бир хавотиримни оширади. Ҳар дийдор онаиде ёнида бўлиб, шуларни сезмаганимни қаранг.

Куш товуши яна хаёлимни бўлади.

“Тавба”, дейди онам.

– Ўзимизда Зухра ая деган бир хотин бор, – дейди кейин. – Тошкентга келаётганида томоғига нон увоғи тиқилиб қолибди. Сув ичсаям кетмасмиш, йўталсанам чиқмасмиш. Тошкентга етиб келиб, энди дўхтирга оборамиз деб туришса, ўғли елкасига бир урган экан, отилиб чиқиб кетибди дегин. Бир мусича нон увоғини шундоқ чўқибдию пир этиб учиб кетибди. Худойим ўша қушчани ризқини шунча жойдан томоғимнинг ичида олиб келди-я, битта мусичани ризқи деб жоним қанча қийналганини айтмайсизми, дейди. Биз ҳам эл-юртдан узилиб шунча олисга келганимизнинг бир ҳикмати бордир, йўлимизни бежиз шу ёққа бурмагандир?

* * *

Онам ҳардамхаёл, қошларини чимириб-чимириб, бир нималарни ўйлаяпти.

Тик қадли шамшодларга, улкан чинни атиргулларга термилади, ям-яшил барқут япроқларини силаб кўрадию хаёли ўзида эмас.

Тағин денгиз бўйига чиқамиз, ўша ердаги тахта ўриндиқлардан бирига ўтирамиз.

– Яна нималарни ўйлаяпсиз, она?

Тириш юзларига, ўзим яхши кўрадиган ғадир-бӯдир кўлларига тўйиб-тўйиб қарайман. Онам узокларга тикилади, ўйларини билиб бўлмайди.

Бир маҳал қўзидан ёши дув этиб оқиб кетади.

– Она? Нима бўлди?

– Билмасам, – дейди ўзини тўхтатолмай. – Ўпкам тўлиб кетди, жон болам.

Теваракка термилади, рўмолининг учи билан мижжаларини артадию ҳеч ўзини босолмайди.

– Нима бўлди, ахир?

– Энанг... – дейди ёш боладай ҳиқиллаб. – Келишимизда дунёда шунаقا чиройли жойлар бор, сизга илиндинг девдинг-ку? Мен ҳам энангга илиниб кетяпман...

Елкалари силкиниб-силкиниб, ўпкаси тўлиб-тўлиб ийғлайди. Не қиласримни билмайман.

Бир гапиради, бир ўксинади.

- Болам-чақам деб сира тинмасди бояқиши. Исиқлардаю совуқларда жонини жабборга бериб уринарди. Далаларда ишларди, етмаганига сигирга емиш бўлсин деб тутқатор ораларида ўт ўриб, ўшанча жойдан бошига қўйиб кўтариб ҳам келарди. Шом қўёниб-кўнмай овқатга уриниб кетарди, эрталаблари аллақачон сут соғиб, ҳовлини супуриб, ўчоқда чой қайнатиб улгурган бўларди. Шу жойларга қараганим сайин эсимга энанг келяпти...

Денгиз шовуллайди, тўлқинлари кўпикланиб оёқлари остига бош уради-да, ортига қайтади.

- Меҳнатлар, заҳматлар, қанчадан қанча қийин-машаққатли кунлар, ўйласам, ичим тўлиб кетяпти. Отанг, сингилларинг, қўни-қўшниларим... бари кўз олдимга келиб туришибди. Болажон, бу жойлар ниҳоятда ажоийиб экан... Умрим бино бўлиб кўрганим дастурхонда бир бурда нон-чой, нонпалов, ёвфон бўлди. Етти пуштим етти ухлаб тушига кирмаган жойларга опкеб қўйдинг-у... Мана, эртага тонг ҳам отади. Шу чиройли сувлар адогидан қуёш чиқиб келади...

Ўксинишларини кўриб, меҳр билан бағримга босаман, уммонларнинг эркин шамоли юлқилаётган рўмолини тузатаман. Муштдайгина, ёш боладай бўлиб бир нималарни гапираётган онаизоримни юпатолмай ҳалакман.

- Жон болам, кетайлик ўзимизни юртларга, - дейди она. - Сен сира хафа бўлма, аммо мен бунаقا жойларда юролмас эканман.

* * *

Саҳарлаб яна соҳилга чиқамиз.

- Вой, тўлқинланишини! - деди онам, соҳилга шовуллаб урилаётган катта-катта долғаларга боқиб.

Кейин худди одамдай ҳол-аҳвол сўрайди. – Ҳай, яхши ётиб турдингми сен ҳам?

Онаизорнинг кайфияти яхши.

– Денгиздан ҳам ҳол-аҳвол сўрайдими?

– Сўрамайдими? Шу бечораям худойимни маҳлуғи...

Тўлқинлар келиб, яна оёғига бош уришади.

Онам денгизга қарата шундай дейди:

– Бўпти, биз кетяпмиз. Яхши қол.

Қирмизи йўлаклардан бораётсак, онаизор бирданнига тўхтайди. Дараҳт шоҳида бир нимани қўриб, жилмаяди. Қарасам – олмахон! Қўлида ҳануз бужури, мунчоқ кўзларини тикиб турибди.

– Сен ҳам боргин биз томонларга, хўпми? – дейди онам олмахонга.

Юкларимизни тартибга келтираман. Ҳа, онаизорнинг кайфияти яхши, ҳужжатларни тўғрилагунимча бўхчасини тиззасига қўйиб, шоҳлар саройидан қолишмайдиган ором ўриндиқларининг бир четида ўтирибди.

Бепоён денгиз соҳиллари шу тариқа ортда қолиб кетади.

Эҳ она, дейман. Қадимий шаҳарларни, сув устидағи манзилгоҳларни, ғор-қишлоқларни, шоҳ саройлаrintию кўхна ибодатхоналарнинг улуғворлигини, бепоён уммонлардаги улкан юнусбалиқларни, кечалари ўзидан нур таратиб сузадиган денгиз ажойиботларини кўрсатаман деган эдим. Ҳақиқатан ҳам узоқ йиллар сира тиним билмадингиз, томорқалардаю далаларда жонингизни жабборга бериб меҳнат қилдингиз. Иссиқ қайта бошлаган ёз оқшомларида оила жамулжам, кўнглингиз қониқиши ила тўлиб-тўлиб овқатлар пиширдингиз, шунча болани вояга етказаман деб уриниб-тиришдингиз. Ажойиб елканли кемаларни, куй чаладиган қоятошларни кўрсатаман деган эдим-ку? Ҳа, дунё шунаقا кенг, ажойиб, шуларга маҳлиё бўлиб, қалбингиз бир дам яйрайди, деган эдим...

Бўлмади-ку?

* * *

... Аэропортга келамиз. Сафар қариди.

Нотаниш тиллардаги турли туман эълонлар орасидан бирданига иссиқ, қайноқ бир сўз янграйди:

- Your attention, please! Flyght Uzbekistan Airlines number two seven two to Tashkent is boarding now. Passangers are requested to proceed to gate number two two five¹[2].

- Вой, Ўзбекистон дедими? - атрофига аланглаб сўради онам.

- Ҳа она. Тошкентга учадиганлар фалон жойга борсин, деялти.

- Отингдан айланиб кетай, қулоғимга бирам иссиқ эшитилди-я, - дейди онам. - Юрақол, болам.

Онам менга хушҳол қараб тураг, нигоҳида севинч балқирди. Ўша, мен университетга ўқишга кирганимдаги, қизалоғим туғилганидаги, янги кўйлак олиб берганимдаги севинч...

- Умрим бино бўлиб денгизни кўрмаган эдим, - дейди онам, ўйчан. - Қара-я, ниҳоятда бепоён, шовуллайдиган бўлар экан. Халқини шу боқар экан-да...

- Тавба, кимдир шунаقا жойларга келиб маҳлиё бўлиб, маза қилиб дам олиб кетса, мени ўйлаганларимни қара, - деб хушҳол кулади. - Энди, шунақаман-да, болам. Эл-юргизден денгизиям, тоғиям татирмиди?

- Мана, шунча кун юрдигу еганим ичимга тушмади. Худо яратиб қўйган шу мўъжизаларни бир ўзим кўраётганимдан иймандим. Сингилларинг, амма-холаларинг, тоғаю амакиларинг, тумонат халқ турибди у ёқда. Қўшини тўй бошлаб қўювди, тоғанг қиз чиқармоқчийди...

¹ Диққат қилингиз! "Ўзбекистон Ҳаво йўллари"нинг 272-рейс билан Тошкентга учадиган учогига чиқиш эълон қилинади. Йўловчилар 225-учиши йўлаидан самолётга чиқишлари мумкин.

Кейин чиғаноқ парчасини кўрсатди.

– Шуни олвoldим, – деди. – Сувда чиройли қўрина-ди дединг-ку? Обориб кўрсатай, қулоғига тутиб шовуллашиниям эшитишсин. Худо хоҳласа, кейинги гал ҳаммамиз келамиз, ўшанда маза қилиб яйраймиз.

Нимаям дердим? Ўҳ-ҳӯ, шунча одамни олиб келиш осонми? Лекин онамнинг сўзлари қалбимга қувват бахш этди. Ҳа, албатта келамиз. Ахир, бир ўзим учун эмас, яқинларим, жигарларим учун тер тўкаман-ку? Шуларнинг қувнаши, яйрашини истайман-ку? Бир менгина эмас, юртда ҳеч ким ёлғиз ўзи учун уринмайди. Кўпчилик учун, рўзғорим, болам-чақам, отам-онам, қавму қариндошим деб заҳмат чекади-ку?

– Албатта келамиз, – дедим онаизорга. – Дунё гўзalликларини кўриш учун, ажойиботларни ҳайрат ила томоша қилиш учун, яқинларимиз, жигарларимиз, меҳрибонларимиз, бола-чақамиз билан келамиз.

– Ҳаммамиз биргалашиб-а? – сўради онаизор.

– Ҳаммамиз биргалашиб, ўзимизнинг одамлар билан!

– Ҳа-а, яхши бола бўпсан, – деб алқаб қўяди мени...

Текширувлардан ўтарканмиз, хизматчи қизлардан бири онамга қарай-қарай, ниҳоят ёнимизга келиб сўради:

– Sorry, where do you fly? Er-Riyadh? Paris? Jeddah?

– Кечирасиз, қаёққа кетяпсизлар, Ар-Риёдгами, Парижгами, Жиддагами деб сўраяпти, – деб тушунтирдим онамга.

– Уйга! – деб жавоб қилди онам менга бир қараб, ёйилиб жилмайиб. – Уйимизга-да, болам...

Наби ЖАЛОЛИДДИН



ВАТАН

«Эй-й!..» деди-да, кичкинагина хитойи телевизорининг симини электрдан узиб, беозор зарда билан ташқарига йўналди: «Ватанди куни сенларга қомай ўлсин, дардингга урайлар!..» Остонадан ҳатлаб, мева-чеваю экинларга тўла ҳовлисига беихтиёр тикилиб, туриб қолди. Сербарг мевали дараҳтлар жимирилаб, ялтирайди – бу офтобнинг тафти баландлигидан далолат. Саратон авжиди-да. Иссиқнинг ҳаттоки кўзга кўринаётганидан, сояда турганига қарамай, гёй кимдир юзига қайноқ сув сочиб юборгандай энтикиб кетди.

Хотинининг овқат қиласман, дейишига ҳам кўнмай, ҳали тушликда бир коса шакаробни нон билан пақкос туширди-ю, устидан терлаб-терлаб қайноқ чой ичди. Сўнг кўнглининг кўчасига қайрилди – одатдагидек уйга кириб, телевизорни қўйди-да, тўшакка ёнбошлиди. Шундай иссиқда эси бор одам кундузи бир мизғиб олади-да. Аслида-ку, жазираманинг дастидан эси кирмаган одамнинг ўзи қолмаган чиқар. Шу тариқа эси йўқ беор телевизор нималарнидир «сайрайверди», у эса аста-секин пинакка кетиб, охири тиррак қотди. Чамаси, икки соатча ухлади, яна ўша телевизорнинг овозидан уйғонди. Уйғонди-ю, мижжаларига ёпишган уйқуси ҳарсиллаган дунёning аллақаерига ўзини ур-

гунча ярим очиқ кўзларини оқ-қора тасвирга тикиб ётди. Шуури тиниқлашиб, тасвирдаги маъноларни англай бошлагач, ҳалиги гап -ғаши келиб, ўрнидан туриб кетди.

Хотиниям иссиқдан қочиб доимгидек рўпарадаги уйнинг айвонида ётгандир. Катта ўғли ўқишига кириш билан овора. Кичиги ҳойнаҳой чўмилгани жўнаворган. Ёлғизгина қизи эса, бироннинг хасми эмасми, эгасини топиб кетган. Қаранг-а, ҳайҳотдек ҳовлида хотини иккови қолибди-я. Ўшан-чун ўзбек дегани ўнталаб туғаверган-да. Чунки битта-иккита бола билан бағри тезда ҳувиллаб қолаверган. Каттаси бу йил ўқишига кирса кирди, бўлмаса, баҳорда уйлаворади. Худо берса, бир-икки йилда неваралар кўриб, уйи яна тўполнга тўлади-да. Қизнинг боласи барибир биронники экан, келсаям бир-икки кунга келади. У мудом остоңда тураркан, бағри ҳувиллаганиданми, беихтиёр хотинини ич-ичидан соғинаётганлигини пайқади ва айвон томон юрди. Ўртадаги уч-тўрт қадамлик офтобрўядан кўзларини юмиб ўтди -куйдирвораман дейди-я, жонивор.

Иссиқдан нафас ростлаш ниятида чалқанчасига ястаниб ётган хотини уйғоқмиди ёки унинг шарпасидан уйғониб кетдими, эрининг хурматидан, дарров оёқларини йиғиштириб, ёнбошлаб олди. У эса сўрининг четига ўтириб, олдидаги чойнақдан пиёлага соvuқ чой қуиди ва бирварақай сипқорди: яхна чой ҳам, наздиди, илиқдай туюлиб, чанқоғи босилмаганиданми, норози қиёфада тамшанди. Шу ҳолига:

– Ҳа бекорчи парий, ётибсими иш йўғлигидан маза қиле-эб? – дея хотинига тегишиди.

– Ҳмм, шу иссиғдаям иш қилиб ўлиб қолайми энди?
– деб қўиди хотини секингина ва уйқули кўзларини очиб-юмаркан, уйқусираётгандай сўради. – Нима деб ғудранаётувдийз уйда?

– Ҳозиргиндами?.. – Эр бир қимирлаб олди, билинчар-билинмас жилмайди. – Биласану, ўзимизи каналларди кўрсам жиним қуришиб кетади.

– Унақа бўса, кўрмай қўёвринг, дейману. Нима қилас асабийзи бузиб.

– Бошқа кўрадиган нарса бўмаганидан кейин кўрасан-да. Ҳозир ҳам бир қиз Ватан ҳақида ашула айтяпти-ю, ўзи ярим-яланғоч. Орқасини тўлдириб байрақ хилпираб турибди, дегин. Ҳудди аши ўзи куйлаётган Ватан уялганидан байроқминан юз-кўзини тўсиб, «Авратийни бекит, қизим», дёётгандай. – Нима бўлсаям ёшлигига китобни кўп ўқиган-да, анча-мунча чиройли гапни келиштиради. – Яхшиям телевизоримиз оқ-қора, рангли бўса, унақа ашулачиларди кепатаси вобше даҳшат кўринса керак.

– Ҳа, бияғи мустақиллик байрами яқинлашяпти. Унвонми, мукофотми олса қерай-да. Ашинчун Ватан ҳақида айтатта, хўжайнин, – деди хотини энди бошини ўнг қўлининг кафтига тираб.

– Унвон олса олиб ўлсин, оммале Ватан ҳақидағи ашула бунақа айтилметта, хотин. Нима, ҳозирги яшлар ашилардан ўрнак оладими? «Сен учун жонимни берай»миш. Сен жонийнимас... Ҳе, дардингга урай!..

– Оббо-оо!.. – хотин ўрнидан туриб ўтиаркан, тушиб кетган рўмолини бошига илди. – Ватанпарварлигийзи биламану, омма шопур одамга ким қўйибдийкин-а бунақа гапларди, тавба. Нима бало, бугун сиёсатдан обқолдийз-а?..

Хотинининг ҳазил аралаш кесатифи унинг ҳам «илҳомини» қўзғади.

– Ҳа, энди сиз культурний одамсиз-да, боллар боғчасини ошпази бўсайиз. – Кейин зўраки қўл силтади.

– Эй-й, сен қорин бандаси Ватанди билармидинг, дардингга урай!

– Шунақами?.. Мана, мени Ватаним, билдийзми! – Хотини кулочини кериб, аввал уйларига, сўнгра ҳовлисига ишора қилди ва эрини қўрсатиб, деди: – Мана, мени Ватаним, болларим мени Ватаним!.. Кенг (келинг), қўйинг, чой-пой дамлаб берайми?

Унинг меҳри товланиб, кулди:

– Барибир ўзинг зўрсан-да, хотин. Пақат шу ҳозирги яшларга ичим ачиғанидан... Улар эргашадиган одамлар йўғ-да. Ҳалиги, ошнам Марип бору... Биласан, тарихни яхши билади. Аши тарихда қанча қаҳрамонларимиз бор, дерди. Ашиларни кино-пино қилиш керайми?.. Ашулачиларимизи аҳволи ҳалиги бўлса. Бунақада... – У жим қолди-да, хаёллари аллақаёққа учди.

– Чой ичассими-йўғми? – деди яна хотини таъкидлаб, мийиғида жилмайганча.

– Ичмийман. Чекка (янги берилган томорқа) ўтиб келаман, – дея ўрнидан турди.

– Шу иссиғда-я, дадаси?

– Зериктим, бир айланиб келай. Сен бугун ош қиласран?

– Хўп, – хотини чойнақдаги яхнани охирги томчисигача қўйиб, ичди. – Майли, айланиб келинг, бўлмаса.

У айвондан тушиб, саҳн четида оқаётган ариқчада юз-қўлини ювди, хўл қўлларини бошию кўкракларигача ишқаб, ўзича салқинлади.

Шу пайт катакдаги товуқларнинг қақағлагани қулоғига урилди.

– Ўртоғларингга дон-пон бердингми? – деди ўтирган кўйи овозини баландлатиб.

Айвондан хотинининг овози эшитилди:

– Қорни тўқ, туққани учун бақиряпти.

У бошини силкитиб, кулди, сўнг уй ичидаган дуррасини олиб, елкасига ташлади-да, кўча томон юрди.

Уларнинг кўчасида дов-дараҳт мўл бўлиб, ёнидан анҳор ўтганлигидан, ҳийла салқин туюларди. Бироқ саратон жазирамаси бу ерда ҳам ўз ҳукмини ўтказарди. Чекигача анча юриши керак, шунинг учун тездагина терга ботмаслик ўйида қадамини оҳиста олди. Бораркан, хотинининг гапини эслади: ростданам ўзбек учун бола-чақаси-ю, уй-жойи Ватан-да. Хотини бало... Аммо бу бир жиҳати, агар кенгроқ ўйланса... Ватаннинг нима эканлигини тўла англамоқ учун уйдан чиқиши керакмикин? Нима бўлгандаям бояги яримяланғоч ашулачи айтиётган кўшиқ ёки ҳозирги аксарият кинолардаги оврўпачасига кийиниб, чала-чулпа ўзбекча сўзлаб, бемалол ўпишиб, қучоқлашаётган бизга ўхшамаган одамлар Ватан дегани эмас-да. Ватан балки яна нимадир, нималардир... У ошкора кулди: ростданам шопир одамга ким қўйибди бунаقا гапларни. Ҳарбийда ҳайдовчилик ҳунарини ўрганди-ю, шу-шу юк машиналарига боғланиб қолди. Умрининг асосий қисмини колхоз машинасини миниб ўтказди. Ниҳоят, колхозлар барҳам топди, бу ёқда ўзининг ҳам қон босими ошадиган бўлиб, ногиронлик нафақасига чиқди. Мана, эндиғина элликка кириб, пенсионерга айланди-қолди. Номи ғирт бекорчи-ю эшик-элига, мол-ҳолига қарайди, олти сотихли чекига ул-бул нарса экади, ҳар ҳолда қора қозонини қайнатиб, рўзғорини эплаб тебратади. Уёғини сўрасангиз, ёшлигida бадиий китобни кўп ўқигани билан, аслида, ҳалигидай чиройли гапларни ҳадеб гапиравермайди ва ҳатто бугунгидек ўй-хаёлларидан ўзи ҳам ҳайратда. Лекин эсини танибдики, эл-юрт, Ватан дейиладими, халқми, ишқилиб, мана шунаقا юклироқ нарсалар хусусида айттилган енгил-элли гап-сўзларни ёқтирумайди. Хотини айтмоқчи, ватанпарварлиги ҳам рост, яъни, ҳалол-да. Мустақилликнинг ун ва нон танқис бўлган аввалги йилларида, болалар боғчасида ошпаз эмасми, хотини

гоҳо уйга бир-иккита булка нон олиб келиб қоларди. У эса бир индамади, икки индамади, учинчисида тузуккина сўкиб берди: «Болларни ҳақини еб, қандай сингдирасан», деди. Кейинроқ хотини энди мол-қўйи учун ортган овқатларни ташиб юрди. У бунга ҳам кўнмади, «Сут-қатигини ичадиган ҳайвонингга ҳар хил шубҳали нарсаларни берма», дея ўдағайлади. Ана ўшанда хотини «Жа ватанпарварсиз-да, кошки буни бирор билгани фалсафаси шу: кимнингдир бунақа гапларга хуши йўқми, майли, асло бу борада гапирмасин, яъни ҳазил-мазахга айлантириб юбормасин. Ҳозирги кўйига бўлса кутилмагандан тушиб турибди-ю ё ҳалиги ярим-яланғоч ашулачининг турқи-таровати шунчалар таъсири қилдими?..

Бундан уч-тўрт йил муқаддам қишлоқда бир одам пайдо бўлиб қолди. Жиккаккина бу одам афт-ангоридан на ўзбекка ва на ўрисга ўхшамасди, ёши, чамаси, олтмиш билан етмишнинг ўртасида эди. Айтишларича, у асли шу ерлик бўлиб, ҳарбийлигига бир ўрис қизни яхши кўриб, Русиянинг аллақайси шаҳрида қолиб кетганмиш. Ҳозир ўёқда биноидек уй-жойи, бола-чақалари бормиш. Аммо ёши бир жойга етгач, бирдан бу томонларни ихтиёр этибди. Оиласи кўнмабди, лекин у ҳайё-хуйт, дебди-ю, жўнаворибди. Энди бу бор-йўғи бир гап-да, ўғини тағин Худо билади. Бу ёққа келса, уруғларининг катталари ўлиб кетишган, эмишки, ёшлари ғалати қариндошини қабул қилишмабди. Шундан кейин у қишлоқ ҳаммомининг кўлбولا меҳмонхонасида ётиб юрди. Кимдир унга эскироқ чопон, дўппи кийдириб қўйди. Унинг оҳорсиз кийимларни кийиши ва ёки увада кўрпа-тўшақда ётиб юриши начорлигидан эмас, эҳтимол соддалиқдан эдики, шу билан ўзбек бўлишга уринарди. Балки аллақачон-

лар бой берган қандайдир азиз нарсасини қайтадан топишни истармиди. Ҳаммомнинг биқинида ўчоқ, қозонлари ҳам бўлиб, кўлбола меҳмонхона ҳар куни улфатлар билан гавжум эди. Оллоҳнинг эски чопону дўппини кийиб, «Шудгор қўриқчисига» ўхшаб қолган бу соддадил қули эса (аслида гўё энди унга тўн билан дўппи ҳам бегонадек эди) гоҳ чойнак, гоҳ товоқ кўтариб, хизматга киришиб кетарди. Буни кўриб, оғзининг боғичи йўқлардан бирори, кайфчиликдами нима бало, унга «Милтиқли киши» деб лақаб қўйибди. (Шўро замонида шу номдаги машҳур, аммо жуда зерикарли фильм бўларди ва унинг қаҳрамони кинонинг бошидан охиригача елкасига узун милтиқни осволиб, чойнак кўтарганча у ёқдан-бу ёққа бориб-келаверарди).

Бир қуни у ҳам «Милтиқли киши» билан гаплашиб қолди: икки пиёла «ҳасрат-дори»дан «уришгач», эҳтияслар кўнгиллардан тилларга кўча бошлади.

– Мени ҳечам у ёққа кетгим йўқ, – деди болаларникидек беғубору беозор кўзларида ёш айланиб «Милтиқли киши», ўзбекчада дудуқлангандай сўзларкан.

– Тўғри, болларимни, хотинимни соғинаман. Но-о, шу ерда ўлишни, шу турпоққа кўмилишни истайман.

Тавба, негадир ўшанда бу ҳам йиғлаб юборганди.

Орадан беш-олти ой ўтиб, «Милтиқли киши» бирдан ғойиб бўлиб қолди.

Айтишларича, болалари олиб кетишибди...

Эҳтимол, бояги «Яна нимадир» деганимиз унинг ҳеч йўқ ўлмоқ учун кераклигини англашимиздир? Буни англаш учун наҳотки тарки Ватан этиш зарур бўлса?.. Худо асрасин!..

У катта кўчага чиқиши билан юзига асфалтнинг тафти урилиб, жазираманинг қуввати икки ҳисса ортгандай туюлди. Бу қиздирилган тандирмонанд жойда бирозгина юришини ўйлаб, ичида ўзини овутган бўлди. Шу пайт рўпарасида келаётган Солига кўзи тушди.

Кар ва соқов, гоҳо-гоҳо қўлларини силтаб, нималар гадир ишора қилиб юрадиган бу одам, кўча-кўйдаги гапларга қараганда, ундан уч-тўрт ёш катта эди. Эҳтимол, у ўз исмини бирон марта эшитмагандир ва балки исми Соли эканлигини мутлақо билмас, лекин одамлар уни Соли деб аташаверади. Тўғри, қайсиdir тили қичиганларнинг шундай чиройли исмнинг ёнига гоҳо «жинни», «довдир» сўзларини қўшиб қўйишлари ҳам рост. Аммо Соли жинни эмасди, тўй-тўркинларда ўзича хизмат қилиб, идиш-аёқларни йифишириб, у ер-бу ерларда қолиб кетган нон бўлаклари ва бошқа егуликларни, кўпинча эса йўллар четидаги тамаки қолдиқларию қутиларини, хас-хашак, қўйингки, чиқинди дегулик неки бўлса, барини териб юрарди. Тера-тера бир четга олиб бориб ташларди. Бу юмушини ҳар куни бажаرارди. Ҳозир ҳам бошига ўнгиб кетган эски дўппи, эгнига кир-чир қўйлак ва шим кийган Соли унга яқинлашаркан, йўл четида ётган тамаки қутисини олиш учун энгашди. У эса Солига тикилиб бораркан, беихтиёр қўнгли хил-хил эриди, Оллоҳнинг мана шу девона қули билан жуда-жуда сўрашгиси келиб кетди. Бироқ нега бундай бўлаётганлигини тушунмади.

– Ассалом алейким, Соли ака, – деди у сўрашиш учун икки қўлини узатиб.

Соли нимадир ямларди, юзида кинояли ним табассум зоҳир. Салом берувчининг овозини эшитмаган бўлса-да, узатилган қўлини кўриб, сўрашмоқчи эканлигини пайқади ва шошиб қўл чўзаркан, «қалайсан» дегандай бошини болаларча силкиб қўйди. Соли-нинг рангпар юзи ниҳоятда серажин эди, бу ажинлар бағридаги қисиқ қўзлари эса... Улар бағоят маъноли боқарди ва соҳибининг буюк ақлу қалбини намойиш этаётгандек чақнаб, ёнарди. У бу нигоҳдан қаттиқ мутаассир бўлиб, бутун вужуди жимиirlаб кетди. Соли эса юзини тиришга кўмиб, тиржайди-да, гўё нимадир

деди-ю, йўлига кетаверди. У бир лаҳза тўхтади ва шу туришида жудаям муҳим бўлган ненидир ҳис қилди, лекин шуури унинг не эканлигини англамади...

Мана, ниҳоят дала йўлига элтувчи тошлоқ қўчага бурилди. Бир томонида чуқур зовур, бир томонида эса паст-баланд қишлоқча уйлари бор бу кўчада боягидек кўйдирувчи тафт сезилмасди. Болалиқда кўпроқ шу кўчада ўйнашарди ва тарафма-тараф муштлашувлар ҳам асосан шу ерда бўлиб ўтарди. Энди қадрдонга айланиб, гавжумлашган бу кўча ўшанда хилватроқмиди. Айниқса, синфдоши Маъруф жуда уришқоқ эди, анча-мунча зўрнинг ҳам ичини тўкиб қўярди. Аммо ўзи ҳам чакки эмасди, паканароқ бўлгани билан ундаям битта ўғил боланинг шашти-ю қуввати бор эди. Бундайларни юраги дов дейишади. Ҳар ҳолда пакана ёки новчами, эр киши довюрак бўлгани маъқул-да. Асқотади. Эсида, ҳарбий хизматни тугатгач, ҳам яхши ҳаётга ва ҳам ўрис қизларга ишқибоз бўлиб, ҳайдовчилик баҳона Русияда икки йилча қолиб кетди. Ишчилар ётоқхонасида уч киши ётишар, уларнинг бири армани эди. Бир куни бекорчиликда «Алибобо ва қирқ қароқчи» деган ўша машҳур фильм ҳақида гап чиқиб қолди. (Ўшанда бу фильм роса оғизга тушган пайтлар эди, кинотеатрларда тинимсиз қўйиларди). «Уни Ўзбекистон Ҳиндистон билан ҳамкорликда ишлаган», деди у оғзи қулоғида мақтаниб. Буни эшитган армани шу қадар масхараомуз тиржайдики, унинг вужуд-вужудидан ўтиб кетди. Устига-устак «Эсинг жойидами, что за тупост», деб ҳам юборди. У ана шунисига чидолмади, армани бутун халқини ошкора ҳақоратлаётганилиги ни юракдан ҳис қилди. Шаҳд ўрнидан туриб, ўртадаги столни арманининг устига улоқтириди, нималардир дея сўқинди, ғазаб ва нафрати куч бериб, уни босиб олди. Учинчи ҳамроҳлари ажратишга тушди. Армани кечқурун ўз қавмдошларини бошлаб келди ва уч ки-

шилашиб бечора миллатпастни роса дўппослашди. Аммо кейинроқ арманилар уни роса ҳурмат қиласидиган, давралариға чорлайдиган бўлиб қолишиди. Улар ё кино чиндан ҳам ўзбекларники эканлигини аниқлашган ва қилмишларидан уялишган, ёки унинг ўз миллати учун мардона турганидан таъсирланишганди. Демак, эр киши ҳурмат топмоғи учун нималарни дир деб уришиб ҳам туриши керак шекилли-да.

Маъруф остонаси тагидан оқиб ўтган ариқча ёқасидаги ажриқда ёлғиз салқинлаб ўтирарди. У ошнасининг кўчада майкачан ўтирганини кўриб, буни уят санаганидан (ҳаё фақат аёллар учун эмас-да) бироз ғашланса-да, уни ҳалитдан бери бир неча бор эслагани учун кўнгли эридими, жилмайиб, салом берди. Маъруф сал қўзғолиб, қўл узатди.

– Тўшак обчиқайми, ошна? – деб қўйди унинг ажриққа ўтираётганини кўриб, шунчаки мулозамат оҳангиди.

– Раҳмат, тўшакда ўтирангам қизиб кетасан ҳозир, – деркан, юзига фотиҳа тортди у. – Қалай, отпискага чиқволиб, маза қиб дам оляпсанми?

Маъруф ўқитувчи эди, тарихдан дарс берарди.

– Ҳа, энди... – деди у пешонаси тиришиб. – Дам қайд-а-я, ошна, ўзбейди дами нималигини биласану.

Шу пайтгача эътибор бермаган эканми, ҳозир тузукроқ сарасоғ солгач, пайқадики, дўсти анча қарибди. Майкачан ўтиргани учун шимининг устида беўхшов осилган қорни сабаб жуссаси катта кўрингани билан тузуккина чўкиби ҳам. Сочлари оппоқ, пешонаси-ю қўзининг атрофини тириш босган, юзи салқиган, нигоҳи эса аввалгидек ўтли эмас, лоқайд боқади. Болалигида товонидан ўт чақнарди, ҳамма нарсада биринчи эди. «Атаман-атаман» ўйинини ўйнашганида нуқул Маъруф атаман бўларди. Болалар

уни кўпчиликлашиб «қўлга туширишарди»-да, дараҳт ёки симёғочга ростакамига чирмаб боғлашарди. Энди ўйласа, у атайлаб қўлга тушиб берармиди, чунки, асир олинган атаманни қийнаш ва унинг қийноққа чидаши жуда завқли эди, ҳартугул одам ўз мардлигини на-мойиш қилиши учун бу росаям қўл келарди. Чамаси, ўшандада Маъруф қийноқларга чидаб, паролни айтмай туришдан хузурланарди шекилли. Аммо қийноқлар қарийб чинакамига бўларди – асирга сув сочиларди, лой отиларди, юмшоқ жойлари чимчиланарди.

– Ёғоч от минволиб, «Атаман-атаман» ўйнаганла-римиз эсингдами, Марип? – деди у хотирага берилар-кан, завқланиб.

– Эсимда, – деб қўйди Маъруф бошқа гапинг йўқ-миди, дегандай писандсизларча.

– Унда биз ўхшагимиз келган одамлар кўпийди-да-а? Ҳозиргиларни куни нуқул ғарнусха, баччанусха ашулачиларга қолди.

Маъруф бир кафт нос отиб, индамай ўтираверди.

– Менга қара, бир пайтлар қадимдаги зўр одамла-

римиз ҳақида жа кўп ривоятлар айтиб берардинг-да?

– У дўстининг феълини яхши билгани учун гапига жа-

воб кутмасдан бидиллай бошлаганди, Маъруф кутил-

маганда оғзида носи билан «си-си»лаб қолди:

– Су дейман биз пақат улуғ поссоларимиз ҳақида гапириб, уларни мақтаб, осирворяппиз секилли-да. Простой одамлардан чиқсан зўрларимиз ҳақида га-пирсак яхси бўлармиди? Чунки ёслар аслиларга эрга-сатта. Масалан, ҳалиги Сироққа (Широққа) ўхсаган...

– Ўзимизи Дукчи Эшонга ўхшаган, дегин, – гапни илиб кетди у. – Нимага Дукчи Эшонни кўпам гипири-

шоврмайди, а, Марип? Агар уни кино қилишсами... Зўр чиқарди-да. – У саволлари кўпайиб кетганлигига ҳам

парво қилмасди. – Ҳалиги Широқ ўзи бўган одамми, Марип?

– Бир ривоятта энди, – деди Маъруф ҳамон лабларини қимтиб. – Иягини яна тағин Худо билади.

– Халқини деб қулоғи минан бурнини кесишсаям чидайди-я. – У худди ўзининг бурун-қулоғини кесишаётгандай ғалати бўлиб кетди. – Бизиям шунаقا қилишса чидармикинмиз-а, Марип? – деб юборди болаларча соддалик билан. – Худо сақласину, мабодо уруш-пуруш бўлса, бизи халқам эплаб уришармикин?

Маъруф унга савдойига боққандай бир қараш қилди-да, носини туфлаб ташлагач, деди:

– Жа серсавол бўп қобсан, тинчлийми? Гапларинг ғалати-ғалати. – Кейин худди ўйларини ирғитмоқчидай бошини кескин силтади. – Бийил (бу йил) иккинчи ўғлими уйлашим керак. Уйдаги мол-қўйларимди, теракларимди сотсан етармикин, деб турибпан. Бижакда катта ўғлимга битта ватан қиб беришим керак.

У эса дўстининг гапини гўё эшитмагандай ғўлдиради:

– Шу бизи ашулачилар... Унақа десанг, ҳаммами зам Ватанимиз ҳалиям бирорни қўлидадек мақтаймиз, куйлаймиз-да. «Сени бирорвга бермиймиз», «Сени жонимдан севаман», яна «Сендай Ватан қайдা бор?» дейишадими-ей. Ҳаммаси армон. Ватан бунақа куйланмайди-да, а?

– Об-боо, роса бошти оғриттингу, бор, ишийни қил! – дея дўқурди Маъруф. – Бор-бор!..

– Одам қуриб кетгандай сенга гапирдимми-я, – деди у ҳам дўстининг зўраки дўқига жавобан. – Бор-эй, дардингга урай сени! Мен бир чекдан хабар об ўттай.

Пича нарига етганда Маъруфнинг овози эшитилди:

– Хўй, ватанчи, қайтишда киргин, биттани ариқчага ташаб қўйганман.

У «хўп» дегандай қўл силтаб, жилмайди. Юриб бораркан, яна хаёлга берилди: тавба, буларни тушуниш,

ҳис қилиш ёки ҳалигиндаقا қийноқларга чидаш учун наҳотки бола бўлмоқ лозим? Ёки чинакамига севмоқ ва мард турмоққа болалардек соддалик, беғуборлик керакмикин?..

Томорқасига баҳорда сабзи сепишганди, роса бўлди жонивор. Яқинда йигиштириб, бозорга «уришди-ю», ўрнига маккажўхори экишди. Ана, маккажўхорилар ҳам тил кўрсатиб қолибди. Ҳадемай, бу ерга уй қуради ва катта ўғлини уйлаб, олиб чиқиб қўяди. Томорқа олишга олгану, лекин ҳали уй қуролмаганлар кўпчилик, атрофда яккам-дуккам кичкина-кичкина уйлар кўринади холос. Чор тарафга асосан терак экилган. Терак деганлари яхши нарса экан, ош-нон сўрамайди-ю, уч-тўрт йилда қўлга илингулик даромад келтиради... «Ие, маккажўхори экилган уяларни товуқ титибдими?» Ҳа, битта эгатдаги уялар қаторасига титкилаб ташланибди. Илдизидаги дони чўқилгану, янги унган ва энди илдизсиз қолган ниҳоллар сўлий бошлабди. Ҳойнаҳой, бу ҳамиша бирорларнинг девор-тўсиқсиз томорқаларини овлаб юрадиган қўшни жувоннинг товуқлари бўлса керак. «Мол эгасига ўхшамаса ҳаром ўлади», дегани шу-да. Бир кўнгли бўралатиб сўккиси келди, лекин шайтонга ҳай берди. Ҳозир чақирса, барибир эри уйда йўқ, ўша товуқмижоз жувонга рўпара бўлади. Хотин киши билан пачакилашиб ўтирмагани маъқул, сири кетади. Яххиси, уйга боргач, хотинига айтади. Товуқларига қўшиб бир адабини берсин...

Чекини астойдил кўздан кечиргач, ўт-ўлан босган ўйдим-чуқур йўлга ўтди ва ундан катта анҳор ёқасидаги дўнгликка кўтарилди. Бу ердан теварак-атроф яққол кўзга ташланарди. Шу туришида, наздида, дунё жуда кенг туюлиб кетди. Суви тип-тиниқ анҳор эса лим-лим оқади. У қирғоққа ўтириб, дурраси билан юзу бўйнидаги терни артди. Сўнг тағин Широқ ва

болалиқдаги «Атаман-атаман» ўйини ёдига тушди. Унинг кетидан ўрислару амриқоликлар ишлаган қадимги жангуда жадаллар ҳақидағи киноларни әслади. Улар бунақа киноларни қотиришади, лак-лак лашкарлар қатнашган муҳорабаларни ҳам жуда ўхшатиша-дикі, беихтиёр ишониб кетасан, киши. Ўзингни гүё ўша жангларда иштирок этаётгандек ҳис қиласан ва кўнглингда шиддат ёки мардликни соғинишга ўхшаган туйғуми пайдо бўлади. Эҳтирослироқ одам уларни кўрганида ўзини жуда-жуда мард фаҳмлаб, вужудида мислсиз қувват жунбушга келаётганигини сеза бошлиди. У ёшлигидан шунақа киноларни яхши қўради. Айниқса, бош қаҳрамонларнинг асир тушишлари ва уларнинг беаёв қийноқларга чидашларидан ниҳоятда таъсиранади, мардлигидан ҳузурланади. Шундай пайтларда гоҳо ўзини ўша қаҳрамонларнинг ўрнига қўйиб кўради ва қийноқларга чидай олиш ёки олмаслигини хаёлан чамалайди. Айтса, бирор ишониши қийин-ку, кўпинча бу чамалаши ўз фойдасига ҳал бўлади. Ҳозир ҳам Широқни эсларкан, хаёлан унинг ўрнига ўзини қўйиб кўрди. Широқ улуғ бир подшоҳни лашкарига қўшиб алдаган. Энг қийини ҳам шу – у бирорни алдолмайди, ёлғон гапиролмайди. Тағин ким билади, мабодо эл-юрти учун бўлса, балки... Бироқ қийноқларга чидайди. Мана, қулоқларини ҳам кесишиди. Аввалига ҳатто сезмади. Кейинроқ сал-пал оғриди – бунга чидаш мумкин. Фақат бўйнидан кўкрагига оқиб тушаётган қонни кўрганда сесканиб кетди, озгина ваҳимага тушди. Кейин эса бурнини кесишиди. Чидайди... «Чидайман!...» – деб юборди у овоз чиқариб. Ўз овозидан хаёли бўлингач, ён-верига бирров қараб қўяркан, жилмайди.

Анҳорнинг муздек сувида аввал қўлларини чиғаноғигача, сўнгра юзу бўйинини, кўкрагини ювди. Ҳозир у гүё танасидаги қонни юваётгандек эди...

Сал салқинлади, лекин анҳор бўйи офтобли бўлганидан нариги қирғоқдаги тутқатор остида бирпас ўтиргиси келди. Ўрнидан туриб, ўнгдаги кўпrik сари юрди. Рўпарасида яна Соли кўринди: у ниманидир излаётгандек тимирскиланиб, атрофга тез-тез назар ташлаб келарди. «Ҳаммаёқни кезиб юраркан-да бу девона», деган гап ўтди хаёлидан. «Балки Соли биз билмаган ниманидир билар? Бу дардингга урай бало!..» У ихтиёrsиз тарзда Солига тикилди. Соли ҳам унга туйқус назар ташлади. Ана шунда ўртадаги анчагина ма-софага қарамай, яна унинг нигоҳини аниқ-тиниқ кўрди. Бу нигоҳ бағоят чуқур эди. Шу қадар чуқурки, унга кириш ва эҳтимол чўкиш мумкиндай туюларди... Улар кўпrik олдида тўқнашдилар. Соли тағин «Қалайсан?» дегандай бош силкиб, ўтиб кетди.

Тутқаторнинг нарёғидаги этаги анча узоқларга чўзилган картага пахта экилганди. Дуркун ғўзалар тизза бўйи бўлиб қолган. У тут остига ўтириб, юз ва бўйнидаги намни артди. Энди офтобнинг тафти хийла қайтган, лекин ҳаво нони узиб олинган ва чўғи хиёл сўнган тандир каби дим эди. Унинг бағрида ажиб бир соғинч пайдо бўлди. Юрагининг ости сим-сим оқаётгандай, кўзларининг четига бирорига игна санчаётгандай эди. Эҳтимол, хотинини соғиндими? Қизиқ-а? Тавба! У кафти билан намчил бағрини сийпалади. Гўё йиғлагиси келарди-ю, аммо бу ҳолати ўзига жудаям хуш ёқарди. «Дардингга урай бунча ширин-а?..» Ё ошнаси Маъруфни соғиндими? Балки Солининг нигоҳи таъсир қилгандир? Йўқ, бағридаги нарсанинг омонлиги учун булар озлик қиласиди... Яна хаёллари чувалашди: қайтишда Маъруф ариқчага солиб қўйган «ҳалигиндан» икки пиёла «уради». Ҳаво дим бўлса нима қипти? Кейин уйига бориб, хотинжони пиширган паловни «туширади». Таскин илинжидаги бу орзу-ўйла-ри ҳам камлик қилди... Ҳаловатсиз жовдираган кўзла-

ри ғужғон ғўзаларга тикилди. Шу пайт тизза бўйи бўлган ғўзалар ўса бошладилар, ўса-ўса худди қадимги жанглар акс этган кинолардаги сонсиз суворийларга айланардилар ва ўтиргани боис тобора ундан баландлаб борардилар. Бостириб келаётган тиш-тирноғигача қуролланган лашкар ҳисобсиз эди. Унинг бағри ҳаприқди, кўксини эзғилаётган нарса шиддат билан бўғзига урилди. Бўғзи куйди-да, унда мислсиз бир наъра пайдо бўлди. Ҳайқирапкан, чап қўли ёнбошини безовта пайпаслади ва кафти нимагадир урилди-да, уни маҳкам чангаллади. Сўнг бироз хотиржам тортди, кўксига ҳаво тўлиб, кўтарилиди ва белида тутгани улкан қилични қиндан суғира ўрнидан туриб кетди. Шу он ўнг ёнидаги сербутоқ, эгри-бугри тут «Милтиқли киши»га айланди. Унинг қўлида чиндан ҳам катта-кон милтиғи бор эди. Чап томонидаги тутлар ўрнида хотини ва Соли пайдо бўлди, орқароқда эса қорнини қаппайтириб Маъруф кўринди. Бошқа тутлар ҳам таниш-нотаниш одамларга айланарди. Ҳозир улар ҳамлагла шайланган шер янглиғ рўпарадаги сон-саноқсиз лашкарга бас келмоққа қодирдай туришарди.

Қўчқор НОРҚОБИЛ



ВАТАН НИМА?

Тавба қилдим, баъзида одамнинг хаёлидан ўтган воқеа содир бўлади. Шунинг учун ҳадеб ёмон хаёлларга боравермаслик керак. Катта энам раҳматли: “Ёмон хаёл қамални, яхши хаёл ҳамални чақиради...” дер эди.

Пойтахтдан минг чақирим нарида адабий учрашув бўларкан. Бир гуруҳ адиблар сафида мен ҳам борадиган бўлдим. Манзилни эшитиб юрагим шифэтди: “Илҳомнинг онаси ҳам қатнашади. Онаси мендан Илҳомни сўнгги бор сен кўргансан... Айт, боламга нима бўлувди, болам сенга нима девди... деб сўроқقا тутади”, деган ўй ўтди хаёлимдан. Ҳатто онаизорнинг қиёфаси ҳам кўз ўнгимда гавдаланди.

Орадан ўттиз ийлга яқин вақт ўтяпти. Қорақалпоғистоннинг Амударё тумани ҳақида гап кетса, таомом, Илҳомни эслайман. Мен ўша дамлар, айни қирчиллама ёшимда, ўша ерда Манғит деган шаҳарча борлигини илк бор Илҳомдан эшитганман...

Самолётдан тушяпману ҳамон алланечук хавотир юрагимни тимдалаяпти. Ҳудди кимдир мени таъқиб этаётганга ўхшайди. Елкамга кимнингдир кўзлари қадалиб тургандай бўлади. Илҳомнинг нигоҳи қадалиб қолган елкамга. Мен уни аниқ-тиник кўраман... Ме-

нинг оёқ-қўлим қалтирагандай бўлади: оний лаҳзада. Чунки Илҳомни елкамга кўтариб олганман. Агар мен Илҳомни олиб кетмасам, Илҳом бу ерларда қолиб кетади. Агар Илҳом қолиб кетса уни душман олиб кетади, уни нимта-нимта қилишади... Чунки... биз...

Хаёл инсонда қандай пайдо бўлади? Буни билмайман. Хаёлни инсон тизгинлай олмайди, хаёл инсонга бўйсунмайди, шуни биламан. Аэропортда машинага ўтираётганимизда гуруҳ бошлиғимиз ажабланди:

– Бизни кутиб олгани шу ернинг ёшуллиларидан бири ҳам чиқибди. Нега сўрашмадингиз?

– А-а?!

– Эй-ей, нега паришонсиз? Тобингиз йўқми?

– Яхшиман. Бир гап, шу мен бошқа бирорта туманга борсам, бўлмасмикан?

– Мумкинмас. Рўйхат кетган. Ўзгармайди.

Майли, рўйхатинг ўзгармаса ўзгармай қўя қолсин...

Машина сахрони қоқ ёриб ўтган йўлдан шамолни қайириб ўқдай учади. Бироқ саҳро жойидан қимир этмайди. Гўёки мен оёқ-қўлим боғлиқ, қисмат уловида ўзим хоҳламаган манзил сари ноилож ва noctor ҳолда кетиб бормоқдаман.

Тақдир улоқтиурса одам боласи палахмон тошига айланади, ўзи истамаган жойга бориб тушаверади. Худди менинг, Илҳомнинг ёшлиги каби.

Хаёл яна менга, фақат менинг ўзимга томоша қўйиб беради – мен бу томошада ўзимни, Илҳомни кўраман.

...Тоғда жанг. Қиёмат қойим. Агар топтамоқчи бўлсанг ўзга юртнинг тоши ҳам, гиёҳи ҳам сенга қарши уруш очади – ўқ отади. Бирорвнинг юртига босқин қилган биз шўрликларга қарши ўша юртнинг ҳар бир майса, тоши, гилу қуми ўт очяпти – бошимизда ўқбўрон гувлайди. Кўз очолмаймиз. Харсанг панаси-

га бош уришдан ўзга чора йўқ. Биз тепаликка чиқолмадик. Тоғ йўл бермади. Тоғ бизни ўз этагидан худди курт-қумурсқани силкиб, тўкиб ташлагани каби пастликка улоқтириб ташлади – биз чекиндик, жонимиз ҳалқумимизга тиқилиб, эмаклаб-эмаклаб қочдик, шармисор бўлиб қочдик. Взводнинг ярми тутдай тўкилди, взводнинг ярми қирилиб кетди. Қирилганинг жони, қирилмаганинг юзидан қони кетди. Тоғ адогига етдик-етдик деганда асаби дош бермади чоғи, Илҳом ўрнидан даст туриб пастга қараб югура кетди. У ўзини текисликдаги бутазор ичига урмоқчи эди. Бир маҳал жойида таққа тўхтаб қолди, бир қўлини ҳаволатиб, ортга бир силтанди-да, бир он тек қотиб, кейин елкаси билан қулади. У ўқдан тез учаман деб ўйловди. Йўқ, у ўққа учди.

Мен юзтубан ҳолимда юзидан сўл қочган Илҳомни тортқилаб, судрай бошладим, у ихроқ азобида нималардир деб ғулдиради. Юзига юзимни босиб, бошини силайвердим, нега бундай қилаётганимни билмайман, шундай қилсан юзимдан ҳарорат, жонимдан жон ўтади, деб ўйлаган бўлсан керак-да. Шундай қилсан, унга енгил бўлади, у тирик қолади, деб ўйлаган бўлсан керак-да. Эй-ей, менинг ғўргина ёшлигим-а...

Илҳом ўқчий бошлади. Қон сизаётган лаблари пирпириади. Ичидан ожиз бир ингроқ отилди:

– Ўлигим... Ўлигим қолиб кетмасин... Олиб кет бу ердан.

Илҳомнинг сўнгги гапи шу бўлди. Жони узилди...

– Шоир, нега хаёл суриб қолдингиз? Нукусда қолмаганингизга хафасиз-а? – деди гурухбоши тиржайиб.

Мен нима ғамдаману, қўбизим нима дейди. У олис йўлда азоб торти деб ўйляяпти. Ичимдаги сабр тоши чил синади:

– Биз бу ерга нимага келдик, умуман Амударёга нега боряпмиз? – дейман томдан тараша тушгандай.

Гуруҳбоши эсанкираб қолади.

– Ватан, мустақиллик, келажак ҳақида гапиргани, халқ билан учрашгани, – дейди у авзойим бузуқлигидан энсаси қотиб.

– Ватан нима эканлигини мен ёшлигимда ҳис қилғанман. Ватаннинг моҳиятини менга ўн саккиз ёшида жон бераётган дўстим ўргатган.

– Тушунмадим.

– Эҳтимол, тушунмаганингиз яхшидир. Тушунмайсиз...

– Бу нима деганингиз?

– Ўша раҳматли дўстим менга ўликлар ҳам ўз Ватанини соғинишини, ўликлар ҳам ўз танасини Ватан тупроғи билан қоришиб кетишини исташини, ўликлар ҳам Ватан танлашини ўргатиб кетган. “Жасадим бу ерларда қолиб кетмасин...” деб инграган аскар илтижосида инсон қалби изоҳлашга ожизлик қиласиган буюк бир туйғу бор... Биз ана шу туйғуни ҳис қилишимиз керак.

– Нега бундай деяпсиз?

– Менга Ватан моҳиятини ўргатган ўша ўғлон туғилиб ўсган тупроққа оёқ қўйяпмиз. Ҳозир биз ўша ўғлоннинг овулдошлари билан учрашамиз, дедим.

Учрашув жонли кечди. Адабиётни, шоири адибни севган элнинг қарсаклари зални ларзага келтиради. Менинг юрагим безовта, кўнглимда бир титроқ, ҳадик... Залга аланглайман. Худога шукр, тадбир ниҳоя топди. Ўзимни енгил ҳис этиб ташқарига чиқдим. Йўл четидаги машиналарга ўтиряпмиз. Орқа эшикни очиб, энди ичкарилайман деб турувдим, костюмим баридан кимдир тортгандай бўлди. Юрагим шув этди. Ўгирилиб қарадим. Қаршимда озғин, новча, чўзиқ юзи ва тор пешонасини ажин босган, ботиқ ва тим қора кўзлари порлоқ, дурраси остидан чиқиб турган бир тутам кумуш сочи чеҳрасига ярашиқ, истарали, қирқ беш ёшлар чамасидаги аёлни кўрдим.

– Раҳмат сизга, – деди у. – Манавини олинг, – эгнига мос ипакгул халат чўнтағидан конверт олиб узатди.

– Нима бу?

– Йўлда кўрарсиз...

У бурилиб кетди. Мен машина ўриндиғига чўқдим. Машина жилиши ҳамоно конвертни очдим. Титраб кетдим. Дўстим Илҳом иккаламизнинг жанг олдидан бирга тушган суратимиз қўлимни кўйдирар, бу оташ бутун борлиғимни чулғаб олганди.

– Тўхтатинг. Тўхтат! Тўхтат машинани! – деб қичқирдим.

Мен катта йўлнинг қоқ ўртасида анчагача серрайиб қолдим. Сўнг оёқ-қўлим бўшашиб яна машинага ўтирдим.

Илҳом... менга баъзида айтар эди: “Омон-эсон борсак, синглим бизга гуртук қилиб беради. У гуртукни боплайди”, – дерди...

– Гуртук нима? – дердим.

– Хамир овқат. Курка гўшти солинади. Қорақалпоқларнинг “бешбармоғ”и, – дерди у.

– Синглинг неча ёшда? – дердим.

– Мендан икки ёш кичкина. Ўн олтига тўляпти, – дерди.

Сўнг менга қараб пўписа қиларди:

– Илжайма, нега илжаясан?

Йўл-йўлакай ўйлаб бордим: синглисининг исми нима эди? Исми нима эди? Нодирамиди? Назирамиди? Нигорамиди? Йўқ, Назира эди... Назира...

Кўзларимда ғилқиллаб ёш айланади. Машина сахрони тарс ёриб ўтган йўлда учиб борарди...

Улуғбек ҲАМДАМ



ВАТАН ҲАҚИДА ҚҮШИК

Профессор Ҳ. Бобобековга

1

Баҳорда, атрофда ажиб бир уйғонишнинг ёқимли бўйлари уфура бошлаган тароватли бир айёмда, чўққи соқоли, ораста кийими ўзига чунон ярашган, қўл тегса, тилиб юборгудек қиррадор дўппи кийиб олган истараси иссиқ оқсоқол етти-саккиз ёшлар чамасидаги, ғайрати танасига сиғмай, қулай фурсат топдим дегунча ўзини ҳар ён уриб кўраётган чақмоқдек болакайнинг қўлидан маҳкам ушлаб олган кўйи мамлакатнинг бош шаҳрига келиб тушди. Отахон бошқа томонларга чалғимай, болажонни тўғри Хотира майдонига етаклади. Саккиз қиррали юлдуз ичра гуриллаб ёниб турган оловни айланиб ўтдилар-да, “Мотамсаро она” ҳайкали қошида бир муддат тўхтаб, эҳтиром кўрсатдилар. Сўнг бобо қўлидаги гулдастани тутқазиб имо қилганди, зеҳнли набира уни бирпасда она пойига тўшаб қайтди.

Кейин нақшинкор айвон томон юрдилар.

– Вуй, анави китобларни!.. – ҳайратини яширолмади болакай.

– Ҳа, ажойиб-а! – набирасининг завқига шерик бўлди бобо айвон деворларига ўрнатилган, олтинранг улкан китобларни авайлаб варакларкан. – “Ҳамдамов К. 1918–1943” – ўқиди бобо овоз чиқариб. Сўнг ўқиган жойига кўрсатгич бармоғини элтиб: – “Болам, бу киши менинг отам, сенинг эса катта бобонг бўлади”, – деди.

– Бобо, нега катта бобо бу ерда, китобнинг ичида? – сўради набира чандон қизиқиб.

– Чунки болам... – дабдурустдан нима дейишини билмай бир зум тараддудланди бобо, сўнг борини борича айтишга қарор қилди, – чунки у киши урушда ҳалок бўлган. Ватанимизга бостириб кирган душманга қарши жанг қилган...

– Бобо, яна гапириб беринг.

Бобо ўйга толди. Раҳматли онасининг айтишича, у киши Иккинчи Жаҳон урушида, қонли жанглардан бирида оёғининг остига келиб тушган бомбадан чилпарчин бўлиб ўлган экан. Аммо ҳозир негадир ўз отаси қисматини эмас, балки элининг узоқ тарихида юз берган бошқа бир воқеани ҳикоя қилиб бергиси келди. Назарида худди шу ҳикоя мағзида нафақат ўз падари бузруквори, балки ер юзидағи жамики Ватан қаҳрамонлари тақдири жо бўлган эди...

– Тавба, – деб қўйди у ҳикоясини бошлашдан олдин ўзига ўзи, ки тарих шундоқ кўз ўнгида такрорла наётган эди: ахир, гўё кечагина ўзига ҳам буни бобоси ҳикоя қилиб берганди-да. Яна қўшиб қўйгандики, “бу – Ватан ҳақида қўшиқ бўлади, ёдлаб олгин-да, вақти соати етганда уни болаларингу набираларингга айтиб бергин...”

2

Қор бирданига босди. Ҳеч кутилмаганда. Ҳали эрта эди, аммо... Ортидан қора совуқ келди. Нафас олсанг, бурун катакларингнинг гирди гўё бирлашиб

ёпишиб қолаётгандек, оёқ ва қўл бармоқларингнинг учи увишиб, ўзининг бор-йўқлигини сезмаётгандек бўлаверади. Ҳовузлардаги сув тарақлаб музлаган. Челак тугул, найза билан тешиб уdda қилолмайсан: шундоқ ҳам суви кам қолган ҳовузлар тубигача яхга айланган. Бир қучоқ музни амаллаб олиб чиқсанг, уни эритиб-қайнатиб чой дамлаш учун на тезак ва на ўтин топилади. Дараҳтларми?.. Бе-е, бор бўлса, дараҳтлар ҳақида гапирилади-да! Қайда қопти дараҳт дегани? Ҳаммаси ўтган йилги аёзда кесилиб, ўтинга ишлатилиб соб бўлган...

– ...шимоли-ғарбий дарвозалар бағоят заифлашиб қолди, ҳукмдорим! Таслим бўлишдан ўзга иложимиз йўқ! – ҳаяжону қўрқувдан дир-дир титраб келиб деди қалъабеги. – Шундай қилсак, зора аёлларимизу болаларимизга тегишимаса... Ахир, ёғийнинг ваъдаси ҳам шундай эди-ку!?

– Қачон эди? Шунча қаршилик кўрсатдик. Аламлари бўғизларида. Жон аччиғида бутун халқни қиличдан ўтказишса, биздан, миллатдан нима қолади? – эътироz билдириди амирбоши.

– Ахир, айтинг, тузукроқ ўзга чорамиз борми?! Бўлса, бош устига! Барчамиз кўриб-билиб турибмиз, бир йилдан бери тиш-тирноғимиз билан қаршилик кўрсатамиз. Аскарларнинг катта қисми ҳалок бўлган, борининг ҳам шарти кетиб парти қолган: неча кундир сувсиз-нонсиз совуқда қотиб ўтирибди, у ёқда ўқ-дорисининг ҳам таги кўриниб ётибди. Кўлимиздаги қиличу юракларимиздаги умиддан ўзга ҳеч вақомиз йўқ энди! Ўша умид билан Тангрига сифинайлик-да, қиличларни ёғий оёғи остига ташлайлик, ҳукмдорим!..

Ҳукмдор қалъабегининг гапларига диққат билан кулоқ тутиб тураркан, ушбу оқил ва мард жангчи билан хаёлан баҳслашарди: ахир, қайси юз билан таслим бўлишади? Тарих кечирадими?.. Тарих?.. Қанақа тарих?

Таслим бўлмаса, яна нари борса, бир неча ҳафта ичида ҳаммаси патарат топади-ку! Бир йилдир дош бериб турган дарвозалар қулайди-да, ичкарига мўри малах-дек бостириб ёғий киради ва ваъдасини бекаму қўст адо этади: эркакларнинг уруғини қуритиб, қизу аёлни ўртада бебурд қиласи, болаларни эса қул ва чўрига айлантиради. Сўнг унинг Ватани ҳам, унга қўшилиб элининг тарихи ҳам ер юзидан супурилиб кетмайдими?..

Бундай бўлмаслиги ҳам мумкин, агар... Агар у қалъабеги ўтиниб сўрагани каби иш тутса!.. “Шунда... шунда қўзи қонга тўлган душман қўлида қилич ту-табилгич жамики эркакларни сўйса ҳам, аёллару ёш болаларимизнинг омон қолишига умид қиласа бўлади. Шунда... шунда менинг халқим батамом қирилиб ке-тишдан сақланиб қолади ва қачонлардир яна ўзлиги-ни тиклайди!.. Оҳ, тиклармикан!?..”

Шундай дер эдию ҳукмдор алам билан лабини тишларди. Чунки бу эҳтимол ҳам мавжуд воқелик қар-шисида ғоят ҳақир кўринарди. Шунчаларки, у дам кўзга илашар, дам эса йўқ. Шунинг учун ҳам у бисотидаги сўнггиchorани қўллаш ҳақида ўйлай бошлади. Сўнггиchorа! Бас, у ҳаммасини ҳал қиласи: ё ҳаёт, ё ўлим!..

Ҳукмдор уззукун шу ҳақда ўйлади. Сўнггиchorани қўллаш вақти келдимикан деб, бу борада хато қилиб қўймаслик устида узоқ ва жиддий бош қотирди. Ниҳоят, бир қарорга келди: аъёнларини тўплаб кўнглини дастурхон этди...

Эртаси кун ҳукмдор юрт кезмоқ учун ташқари чиқди. Элнинг катта бир қисми сарой атрофида тўпланиб, унинг навбатдаги, – балки охиригидир, – фармонига бутун вужудлари қулоқقا айланиб маҳтал туришарди. Уларнинг олдиларидан бир-бир босиб ўтаркан, ҳаммасининг дард тўла нигоҳларида очлик ва совуқдан, мусибат ва чарчоқдан, умидсизлик ва чорасизликдан дол бўлган қадларида битта, ҳа-ҳа, биттагина тилак-

ни кўрар, у ҳам бўлса, қалъабегининг айтганлари билан муштарак жаранглар: “Ҳаммамиз сенинг шонли туғинг остида шунча вақт аҳил яшадик, тирикликнинг аччиқ-ширинини бирга тотдиқ, ёв келганда бирдаму бир жон бўлиб курашдик, нимаики юртда содир бўлаётган экан, бари-барини кўриб-билиб турибмиз, сен ҳақиқий миллатсевар, ватанпарвар ҳукмдор экансан, лекин энди қўлингдан нимаям келарди, элга келган тўй экан, биз ҳам, сен ҳам имконимизда борини қилдик, энди сен биздан рози бўлмоғинг кераклигидек, биз ҳам сендан розимиз, дарвозаларни очайлик-да, тақдиримизнинг қолган қисмини пешона ёзигимизга топширайлик!” – деяётгандек туюларди.

Юртнинг қамал қилинган бўллагини пою пиёда узоқ айланди ҳукмдор. Ҳар одимда мудофаа билан боғлиқ турли-туман ишлар жонсизроқ бўлса-да, давом этиб турарди. Аммо бир пайтлар гулистон бўлган мамлакат энди харобазорга дўнганди, бир пайтлар мағрур юрган ватандошнинг энди боши ҳам, қадди букиқ, нигоҳи синиқ эди... Юра-юра, илгари обод, энди эса барбод бўлган бир мавзе марказидан чиқиб қолди ҳукмдор. У ерда тўпланган тумонат одам ниманидир бўлиша олмай, баҳслашиб-тортишиб турарди. Ҳукмдорни кўрганларнинг бир қисми бош эгиб таъзим қилди, аммо урушиб-талашаётганларнинг аксари қиё ҳам боқиб қўймади, аксинча, зўр бериб ўзларини тўданинг ўртасига уради. Ҳукмдор синчилаб разм солдию ўртада талаш бўлаётган бир бўлак зоғора нонни кўрди. Очликдан силласи қуриган одамлар ана ўша бир парча егулик илинжида бир-бирларининг юзу кўзларига охирги кучларини тўплаб мушт туширап, бир-бирларининг етти аждодини бўралаб сўкар ҳам эди. Туртиниб-суртилишлар натижасида нондан уқаланиб ерга тушган ушоқларни териб қор ва муз парчаларига қўшиб оғзига солиш илинжидагилар ҳам

ўшанча топиларди... Ҳукмдор аянч манзара қаршисида узоқ қололмади, ўзига ўзи: "Ҳа-а, уруш элни не кўйларга солиб кўйди!.. Аммо қай тадбирда хато қилдим мен?! Кўргиликнинг барига мен айбдор, ҳа, мен!.." деганча, юрагида гуриллаб ёнаётган олов билан дуч келган томонга боса кетди...

Кун оға бошлаганды эса темирчилик устахонасига келиб қолди. Аъёнларини эргаштириб устахонага бош суққан ҳам эдики, ичкаридаги тақир-туқир бирданига тинди. Усталар юзланиб, қўлларини кўксиларига қўйганча ҳукмдорга таъзим бажо келтирдилар ва шу кўйи ҳайкалдек қотдилар. Фақат четда бир киши орқа ўгириб олиб, бошини қўйи солган кўйи ўнг қўлидаги гурзидек катта болға билан чап қўлидаги, оловдан эндингина чиққан, позиллаб турган чўғ-қилични савалаб ишлов беришини қўймади: тақ-тақ-тақ... Кўрқиб кетган устабоши "хой!" дея сасланди. Бироқ уста ишга шу даражада берилиб кетганники, ҳеч нимани пайқамади. Бирданига ҳамманинг нафаси ичига тушди. Устабоши жонҳолатда чопиб бориб, устанинг елкасидан туртаркан, дўқ урди: "Таъзим қил!"

Уста ўгирилиб ҳукмдорини кўрди ва болғани қўйиб, қўлини кўксига олиб борди, бошини эгиб ҳурмат кўрсатди. Ҳукмдор унинг ўрта бўйиу чайир билакларига, меҳнатдан қорайиб кетган чеҳрасига негадир куллимсираб тикилиб қолди. Уста бир муддат кутди, сўнг яна бутун қиёфаси билан ҳукмдорига эҳтиром кўрсатдию қўлига "гурзи"ни тутди: тақ-тақ-тақ! Устабошининг яна капалаги учди ва "Бас қил!" дея кескин буйруқ берди. Уста ишдан тўхтаб, "Нима гап?" дегандек ҳайрон қаради. "Эсингни едингми? Қаршингда ҳукмдор турибди, таъзим бажо айла, нодон!" Уста унга ҳайрон қаради ва хотиржам, аммо қатъий оҳангда: "Мен зиммамга тушган вазифани бажаряпман. Қолганлар ҳам ўз ишини сидқидилдан адo этганда эди, дарвоза-

ларимиз ортида лак-лак душман қўшини келиб турмас эди!" – деди. Наштардек ушбу жавобдан устабошининг эси оғиб қолаёзди: у яшин тезлигига нимадир демоқчи бўлдию ё ичидаги кўркувига ва ё ҳаяжонига тиқилиб тутилди. Балки айтмоқчи бўлиб оғиз жуфтлаган гапининг маънисига урилиб кетган бўлиши ҳам мумкин... Нима бўлгандаем, устабоши вазиятни тузатолмас ҳолларга тушиб гангиди. Шунда хукмдор унинг озурда жонига оро кирди: қўли билан "Хожати йўқ" дегандек имо қилди. Сўнг бир маромда ишлаб турган устага тикилиб турди-турди-да, унинг елкасига енгилгина шапатилаб қўйганча устахонанинг чиқиш томонига йўналди. Қолган усталарнинг бари қуллуқ қилган кўйи уни кузатиб қолишиди... Хукмдор устахонадан чиқиши билан эса ёппасига тақир-туқур бошланди. Аммо у уч-тўрт чақирим олислаб кетганда ҳам ортидан унинг қулоқларига фақат ўша устанинг болғасидан чиқаётган товушгина келиб турарди: тақ-тақ-тақ... Ва у негадир худди бир пайтлардаги, озод ва обод юритидаги темирчилик устахоналаридан келадиган садони ёдига соларди...

...Эртаси кун аzonда хукмдор сарой олдидағи баланд супага чиқиб келди. Неча замондир фармонни жарчи ўқиб ҳалойиққа ошкор айлар эди. Энди саҳнада хукмдорнинг ўзи қад ростлаб турибди. Аммо бу гал "жарчи"нинг қўлида фармон битилган қофоз йўқ эди. Ҳамишаги жарчи "Хукмдоримизнинг фармони олийлари эълон қилинади!" дея жар солиши билан бутун эл у ерга ёпирилди ва ўз хукмдорлари билан юзма-юз келди. Одатда, бундай манзарадан оғизлар очилиши керак эди-ю, бундай бўлмади, ки аҳвол изоҳларсиз ҳам кундек равшан эди...

"Эй, муқаддас тупроқ! Эй, шу тупроқ эгалари! Эй водийлар, эй воҳалар! Эй, бепоён ўлкамнинг боғу роғларию эй, дашту далалар ва чўлу биёбонлар! Эй,

юртимнинг осмонўпар тоғларию улардан тушиб келгувчи дарёю сойлари! Эй, сахий қуёш ва эй, кечалари бошларимиз узра порлаб тургувчи беминнат ою юлдузлар!.. Мен сизлардан мингдан-минг розиман! Фақат ўзим учун сиздан рози-ризолик тилашга тилим айланмайди. Чунки биламанки, бунга асло ҳаққим йўқ! Яхши ҳукмдор Ватанини ёвга топширмайди. Аксинча, уни ҳеч бир ёвнинг дасти етмайдиган баландликларга олиб чиқади ва мудом ўша ерда қолмоғини таъмин этади. Надоматлар бўлғайким, бу менинг илкимдан келмади!..” – Ҳукмдор бу аччик, аламли сўзларни ирод қилмоқчи эди, аммо айттолмади. Улар ҳукмдорнинг ботинида жарангларди. Мана, неча ойдир, кунда жаранглайди улар. Бас, бутун вужудини қоплаган титроққа бир зум енгилиб, кўзларини юмди... Киприкларида реза-реза ёш ҳалқаланди... У ўзини қўлга олишга тиришаётгани бутун қиёфасидан, айниқса, бўғриқиб бораётган юз-кўзидан, бўртиб чиқаётган бўйин томирларидан, дамбадам силкинишга тушаётган вужудидан шундоқ билиниб турарди...

– Мен... Мен кеча юрт кездим, – деди у ниҳоят, овоз чиқариб, – гулдек ўлкамнинг ёғийга таслим бўлишини ўйласам, ҳалигача тирноқларимнинг учигача титраб кетяпман!.. Ахир, бу сиз билан бизнинг юртимиз! Уни биз ўз қўлларимиз билан бунёд ва обод этдик. Бас, тупроқларимизда биздан ўзга ҳеч кимнинг ҳаққи йўқ ва бўлмаслиги ҳам керак! Эсланг, ҳаммамиз шу юрт қулоғида туғилдик, унинг кенгликларида дунёни танидик, ҳаёт деган тенгсиз неъмат билан юзлашдик, ота – ким, она – ким, дўсту ёр – ким, билдик. У – бизнинг ору номусимиз, бору йўғимиз! Бас, унинг бағрига ғайри кимсаларнинг киришига минбаъд рози бўлмаганмиз!.. Шундай деймиз-у, энди... – ҳукмдор кўзёшларини култ этиб ютиб юборди, – энди кўрмайсизми, ёв манави деворларимизнинг, дарвозаларимизнинг шундоқ орти-

да тиш ва қилич қайраб турибди. Бизнинг эса егани нонимиз, ичгани сувимиз қолмади. Қуролу аслаҳамиз ҳам уларнидек эмас. Устига-устак, ҳолдан тойганмиз, жангчиларимизнинг кўпи очиқ жангларда ҳалок бўлган. Қолгани оч ва юпун... Жосусларимизнинг сўнгги маълумотларига қараганда, душман биздан ўн ҳисса зиёд. Ҳам қорни тўйқ, ҳам қуроли соз. Шунча кўргулик етмагандек, эшик қоқмай қаҳратон қиши кириб келди. Худди ёғий каби қўққисдан босди у ҳам бизни. Ёғийни мамлакатга сўқмасак ҳам бу туришда қишдан омон чиқишимиз амримаҳол... Мен кечак мамлакат кездим, сиздан бир оғиз сўроқ сўрмай ҳолингизга қарадим. “Нима қилайлик?” деб юзу кўзингизга тиланчи каби мўлтираб боқдим. Биласизми, ҳаммаларингнинг нигоҳларингда битта жавобни кўрдим. У ҳам бўлса, “Дарвозаларни очайлигу у ёғини тақдирга ҳавола этайлик!” деган...

Мен дунёга келиб сиздек мард, сиздек садоқатли халқни кўрмадим ҳам, эшитмадим ҳам. Сизлардан айримларингиз аллақачонлар мени, юртимизни, миллатимизни сотиб, душман тарафга қочиб ўтишингиз мумкин эди. Аммо буни қилмадингиз. Биронтангиз нону тузимизга хиёнат қилмадингиз, орқадан пичоқ урмадингиз. Мен, аввало, шунинг учун ҳам Яратганга шукроналар келтираман! Сизларга эса қуллуқ қиламан! Лекин энди вазият бошқача йўл тутишни тақозо қиляпти экан, бу ҳам қисматда бор кўринади. “Таслим бўлсақ, душман ўз ваъдасида туриб, аёлларимиз ва болаларимиз ҳаётини сақлаб қолар...” демоқдасиз сиз. Наҳотки, бисотимизда фақат шугина бир умид қолган бўлса?.. Биргина шу умид!.. Наҳотки, сизнинг айтадиган бошқа гапингиз, ўзга таклифингиз бўлмаса?!. - ҳирқироқ овоз билан хитоб қилди хукмдор...

Халқдан эса садо чиқмади.

- Айтинг, шу чоққача фармонни мен бердим, энди бир гал сиз беринг. Ки, бу фармонга ватанимизнинг, сизларнинг, ҳаммамизнинг тақдиримиз боғлиқ! Эълон қилинг фармонни! – ҳайқирди хукмдор энди...

- Сўз айтмоқقا рухсат беринг, хукмдорим! – одамлар орасидан кўримсизгина, шу ерда йигилганларнинг кўпчилиги қатори уст-боши кир-чир, йиртиқямоқ бир йигит чиқиб келди-да, хукмдорнинг қаршисида тиз буқди.

- Сўйла! – буюрди хукмдор.

- Мадомики, фармонни биздан кутаётган экансиз, менга жангда ҳалок бўлиш шарафини ато этинг! Ёвга таслим бўлиб қул бўлгандан кўра, душман қиличидан ўлиб, озод бўлишни афзал биламан!.. Мен жонимни таклиф қилиб келдим, хукмдорим!!! Ахир, Ватан қўлдан кетар экан, жонни нима қиласман!.. Мен Ватанимни бошқача яхши қўролмайман!..

Боягина атроф сув қўйгандек жим эди, бирдан ғала-ғовур бошланди:

- Эсини еб қўйибди бу!..

- Битта ўзи лак-лак қўшинга қарши борадими?..

- Мусибат элтиб қўйган буни...

- Рухсат берманг, хукмдорим! Йўқса, ҳаммамиз шу темирчининг касрига қоламиз! Душманинг яна ғазабини келтиришнинг нима ҳожати бор? Аслида, муносиб ёфийга муносиб тарзда таслим бўлиш ҳам бир шараф! Шунда ғолиб мағлубни афв этади... Бу шўринг қурмағур йигитча бизни ўша сўнгги имкондан ҳам маҳрум айламоқчи!..

...ундан – у, бундан – бу, дегандек, кўпдан кўп гап чиқди. Лекин уларнинг бари йигитнинг сўнгги истагига қарши жаранглади.

- Жим! – қўлини азот кўтарди хукмдор. Сўнг яқин келиб фуқарони елкасидан тутиб турғазди. - Сен кечаги темирчи йигит эмасмисан, мабодо?

– Ҳа, ҳукмдорим, ўшаман, – кўзларини ердан узмай жавоб берди темирчи.

– Отинг нима?

– Туron! – фахр билан деди йигит.

Ҳукмдор йигитни маҳкам бағрига босиб, қулоғига шивирлади:

– Агар ҳамма сенек жасур бўлиб, сенек фикр юритганда эди, оstonамиизда ҳозиргидан ўн ҳисса кучли ёв турганда ҳам, барибир енгиги чиққан бўлар эдик! Қани энди ҳамманинг кўксига сенинг юрагингдек юрак ура бошласа!.. – Ажабтовур манзарани кўриб, ҳалойиқнинг нафаси ичига тушди, шовур эса тинди.

– Майли, сенинг тилагингни қабул қиласман, жангчи! Тангри сенга, менга, бутун туронликларга мададкор бўлғай!.. – Сўнг ҳукмдор қалъабеги томон юzlаниб ҳайқирди: – Дарвозани очинг!

Лекин жавобан на қалъабеги ва на аскарлар – ҳеч ким ҳаракатга келмади. Афтидан, улар нима бўлаётганини бирданига фаҳмлай олмай, довдираб туришарди.

– Дарвозани очинг, дедим, қалъабеги! – баланд оҳангда такрор ҳайқирди ҳукмдор.

Қалъабеги дарҳол ҳушини тўплаб, дарвозабонларга буйруқ берди. Зумда саройга энг ёвуқ дарвозанинг бир қаноти хиёл очилди. Кечаги кунга довур темирчи, бугун эса жангчига дўнган йигит ҳукмдорнинг бағридан айрилди дарвозадан шитоб чиқиб, тўғри душман ёққа йўналди. Ўн-ўн беш одим юргач эса белига тақилган қинни қўлига олди. Сал нарида эрталабдан янги ҳужумга тайёргарлик кўриб саф тортиб турган ёв қўшини аввалига анграйиб турди, сўнг биргина йигитнинг қилич суғуриб, қинини дуч келган томонга улоқтирганча жангга ҳозирлигини кўргач эса хохолаб кулиб юборди. Бу пайтда Туron эли баландлиги нақ бир терак бўйи, устида иккита арава bemalol ёнма-ён юроладиган қалин деворлар устига чиқиб олганча

воқеани кузатар эди. Ҳукмдорнинг эса бутун вужуди кўзга айланиб, лаблари тинимсиз пичирларди...

Йигит ёв қўшинига жуда яқин қолганда улар орасидан бир неча пиёда жангчи ажралиб чиқиб, қиличларни яланғочлади. Йигит улардан энг пешдагисига ҳамла қилди ва қиличининг бир ҳимоси биланоқ душман бошини сапчадек узиб ташлади. Сўнг иккинчи, учинчи, тўртингчисини ҳам худди шундай осонлик билан саранжомлади. Ушбу манзара бир қарашда гўё ўтда ёнмасу сувда чўкмас, қилич чопмасу енгилмас қахрамонлар ҳақидаги эртакларни ёдга соларди, соларди-ю, аммо бу эртак эмас, балки айни ҳақиқат эди. Чунки у ҳамманинг – минг-минглаб жангчию қалин деворлар устига чиқиб олган Турон элнинг шундоқ кўз ўнгидаги содир бўлаётганди... Алқисса, ёғийнинг ўндан зиёд аскари ер тишлаб қолди. Эндиғина қаҳ-қаҳлаб турган улкан қўшиннинг кайфияти бузилгану йириб очилган кўзлари омонсиз жанг давом этайдиган давангир-давангир душман жангчиларини ерга қулатар, сўнг яна олдинга ташланарди. Бунга ортиқ чида бу турниш мумкин эмасди, ки майдон ёв жангчиларидан сачраган қону уларнинг жасадларига тўлиб бораётган эди. Шу пайт денг, бир жойда қоқилган қозикдек тек турган қўшин ҳаракатга келдию ундан ажралиб чиққан жангчиларнинг катта бир гуруҳи ҳалқа бўлиб йигитни ўраб олди. Йигит энди гоҳ у ёндан, гоҳ эса бу ёндан ҳамла қилаётган ёғийга қараб шердек ташланар, наъра тортарди. Ниҳоят, унинг қиличи навбатдаги душманнинг боши узра азот кўтарилилганда чор томондан сиқиб келган ёв қўлидаги ўнларча узун найзалар жангчининг ёшгина баданини илма тешик қилиб тешиб ўтди... ва... ва йигитнинг вужуди ўша алфозда ҳайкалдек қотди...

...аммо худди шу аснода тарих ўз йўлини ўзгартириди... Чунки худди шу лаҳзада Турон элининг юрагида ухлаб ётган шер қаттиқ наъра тортганча ғафлат уйқусидан бош кўтарди...

...борлиқ дарвозалар бирданига лангиллаб очилди ва ҳайқириб, сурон солиб Турон жангчиларию оддий эл душманнинг устига ёпириб кела бошлади. Уларнинг орасида етти ёшдан етмишгача, эркакдан аёлгача бор эди. Соғми-касалми, бутунми-чўлоқми, карми-соқовми... ҳамма ўзини жанг майдонига отганди!.. Ва барчанинг кўз ўнгида эндинга Ватаннинг ору номуси дея бир ўзи бутун бошли душман қўшини қархисига чиққан, чиқа олган жангчи йигит ва унинг душман билан бўлган тенгсиз олишуви сувратланиб қолганди. Бас, энди бу қўшин қархисига чиқишга жазм қиласидан қўшин бутун ер юзини айланиб битирганингда ҳам топилмасди. Тополмасдинг ҳам! Гўё бу қўшин жангчиларининг ҳар бири эндинга йигирма ҷоғли душманни ер билан яксон қилган ўша жасур жангчи йигитга айланиб бўлганди... худди хукмдор орзу қилгандек...

Ҳа-я, сал бўлмаса, эсимдан чиқаёзибди: хукмдорнинг охирги чораси... У шу эдими ё бошқа, – буни ҳеч ким билмади. Ўшандаям, ҳозирам... Зеро, ғалабадан кейин буни ким ҳам сўраб-суриштиради, дейсан...

3

– Жангда ким ғолиб бўлди, бобо?! – ҳикоя мағзини тушуниб қолганига қарамай, янада аниқлик киритмоқчи бўлиб сўради таъсирланиб кетган болакай.

– Албатта, туронликлар! Чунки улар сонда ўн ҳисса оз бўлса ҳам, амалда душмандан йигирма ҳисса кучли эдилар. Туронийигитнинг мардонавор ўлимни уларнинг юрагини уйғотиб, ундан ўлим қўрқувини қувиб сол-

ганди. Уйғонган юракда гап кўп, болам. Юраги уйғоқ инсонни ҳам, бундай элни ҳам асло енгиб бўлмайди...

Бобо ҳикоясини тугатгандан сўнг узоқ муддат сукутга чўмди. Боланинг бўлса, нигоҳларида ҳайрат қотиб қолганди. У ҳаммасини тушунган каби савол беришни бас қилган, бир бобосига, бир она ҳайкалию бир унинг қаршисида – майдон ўртасида ёниб турган мангу гулханга ва бир катта боболарининг исмлари битилган зарҳал китобга маъноли-маъноли қарап, ўзича нималарнидир уқиб олмоқчи бўлар эди. Яна бирпас кутиб олгач, бобо боз тилга кирди: “Бу – Ватан ҳақида қўшиқ бўлади, болам. Ёдлаб олгину унутмагин. Кун келиб эса уни ҳикоя қилиб бериш гали сенга етади...”

Бобо ва набира кун бўйи майдон айланиб, савол-жавоб қилиб, сухбатлашиб юришди-да, шом туша бошлигачгина бекат ёққа оҳиста одимлашди. Бу чоғ ҳув узоқда, уфқда қуёш ол рангларга чулғаниб ботаётган эди. “Қара, эртага кун янада мусаффо бўлади!” – деди бобо. Боланинг эса, нигоҳи бобоси ишора қилган томонга қадалган бўлса-да, кўз қорачифида, ором олиш учун рангин шафақ – ёстиққа бош қўяётган бобоқуёш эмас, йўқ, балки Ватан шаъни, миллат ҳимояси учун сон-саноқсиз ёвга қарши бир ўзи жанг майдонига кириб кетаётган ўша ёш ва баҳодир йигит суврати аксланар, лаблари эса “бобо, у менинг катта бобомнинг ҳам катта бобоси экан”, дея пичирларди...

Лола ЎРОҚОВА



ЎҒИЛ БОЛА

– Самандар! Ҳей Самандар!

Кўча томондан кимдир баланд овозда чақиради. Ошхонада онасининг ёнида куймалашиб юрган бола ўзининг исмини эшитиб, қулоғини динг қилди ва бе-ихтиёр онасига қаради. Хадича опа ҳам сергак тортди.

– Чиқиб қара-чи, ким экан?

Самандар кўча томонга чопиб кетди. Дарвоза олдида улардан беш-олти ҳовли нарида яшайдиган Карим ака турарди.

– Ассалому алайкум. Келинг, амаки, – деди у. – Уйга киринг.

– Ваалайкум ассалом. Раҳмат, ўғлим. Кўшниларни тўйга айтиб юргандим, дарвозангиз олдидан ўтиб кетолмадим. Эртага эрталаб бизникига наҳорги ошга боринг, отангизни ўрни билинмасин, хўпми, бўтам.

Ўғлининг ортидан дарвозахонага келган Хадича опа қўшнисининг сўзларини жимгина эшитиб турарди. Карим ака жувонни кўриб, у билан саломлашди.

– Яхши юрибсизми, келин? Самандаржонни тўйга айтгани келдим. Албатта, юборинг, от ўрнини той боссин энди.

Хадича опа “хўп” ишорасини қилди-ю, ўпкаси тўлди. Йиғлаб юборишдан ўзини зўрға тутиб, ортига бу-

рилди. Барибир кўзидан ёш қуишлиб келаверди. Унга ҳозир битта гап кам, иккита гап ортиқча, йиғлагани йиғлаган. Беш ойдан бўён кўнглига чироқ ёқса ёришмайди. Эрининг ўлими юрак-бағрини адо қилди. Эл устида юрган кайвони одам тўсатдан юрагини чанглаб жон берди. Дўхтир ҳам вақтида етиб келолмади. Ўшандан бери Хадича опанинг егани заҳар, кийгани кафан. Сал гапга йиғлайди. Кўз ёшидан болалари ҳам безиб қолди. Икки қизи-ку ҳали кичкина, кўп нарсанинг фарқига бормайди, бироқ Самандари анча ҳушёр, онаси йиғласа қандай овутишни билмай эси кетади, ноилож ўзиям йиғлай бошлайди. Жуда эзилиб кетди бола фақир. Буни Хадича опа сезиб, бироз ўзини ўнглаб оляпти, жилла курса болалари учун иродали бўлиши кераклигини англаган. Ҳозир ҳам кўнгли тўлганини ўғли сезмасин учун тез-тез юриб ошхонага кириб кетди.

Самандар эса тўйга айтилганидан ҳайрон: “Ахир катта одамларни тўйга айтишади-ку, мен ҳали кичкина бола бўлсам, ё нотўғри эшитдимми? ”.

Самандар хаёлчан онасининг ортидан ошхонага борди.

- Ая, Карим амаки мени тўйга айтдиларми?
- Ҳа, сени айтдилар, болам, – деди онаси.
- Мен тўйдан ош олиб келаманми? Товоқча берасизми?
- Йўқ, сени ошга эмас, тўйга айтиб кетдилар.
- Мен ҳали ёш боламан-ку.
- Тўғри, сен ёш боласан, лекин ҳовлимизни каттаси – эркагисан. Шунинг учун сени тўйга айтдилар. Бундан кейин отангга муносиб, янаям одобли, ақлли ўғил бўл. Ана шунда отангни руҳи шод бўлади.

Хадича опа ҳар қанча уринмасин, йиғлаб юборди. Самандар хомуш тортиб, онасининг пинжига тиқилди, қўллари билан унинг кўз ёшларини артди. Онаси

ўзини тутиб, жилмайганидан кейин кўнгли жойига тушиб, яна савол беришни бошлади:

- Руҳ нима, ая?
- Руҳми?.. Руҳ отангни осмондан сени кузатиб туриши. Яхши бола бўлсанг қувониши...
- Эртага тўйга боришимниам кўрадиларми?
- Кўрадилар! Ўғлим катта йигит бўлибди, деб севинадилар.
- Ўзи эртага тўйга бораманми?

– Албатта, борасан. Айтилган жойга борадилар, йўқса, хурматсизлик бўлади. Ўзим сени чиройли кийинтириб, фасон қилиб қўяман. Одамлар: “Қаранг-а, Абдиғаффор аканинг ўғли катта йигит бўлиб қолибди. Бунча чиройли бўлмаса. Кийимлари бирам ярашибдикি, одобини айтмайсизми?”, дейишсин. Хўпми?

– Хўп, ая.

Самандар яна ниманидир сўрамоқчи бўлиб онасига тикилди. Хадича опа буни сезиб, кутиб турди.

- Ая, Карим амаки мени сизлаб гапирдиларми?..
- Ҳа. Бу хурмат-да, болам. Сенга ва дадангга хурмат.
- Ёш болани ҳам сизлайдиларми? Бошқача эшитиларкан...
- Ҳурмат қилишса, бешикдаги чақалоқниям сизлашади.

Самандарни жўралари чақириб қолиб, она-боланинг сұҳбати бўлинди. У кўчага чиқиб бироз ўйнаган бўлсаям, фикри-зиқри эртанги тўйда эди.

- Карим ака мени наҳорги ошга айтдилар, – Бегалига мақтанди у. – Сенам борасанми?
- Йўғ-э, дадамни айтдилар. Сен кичкина-ку, тўйга айтдиларми?
- Ҳа-да! Кичкина бўлсам ҳам айтдилар, албатта, боринг, дедилар. Дадамни ўрниларини билдирамаслигим керакмиш... Биласанми, Карим амаки мени сизладилар.

– Ростданми? Зўр-ку! Менга ҳеч нима демадилар, дадам билан гаплашдилар.

...Самандар кечки овқат пайти ҳам, овқатдан ке-йин ҳам фақат тўй ҳақида ўйлади. Ўтган куни холаси олиб келган расмли китобни варақляяпти-ю, хаёлида тўй. У ўзини катталар каби тўйга таклиф этилганига хурсанд. Тўйхонага қандай боришни, дарвозадан қан-дай киришни ўйлагани ўйлаган. Кечқурун уйқуси қо-чиб кетиб, алламаҳалда онасига яна сўз қотди:

– Ая, ҳали ухламадингизми?

– Йўқ, нима эди?

– Тўйга Бегали жўрам билан борсамми, сиз нима дейсиз?

Хадича опа ўғли бугунги чорловдан ўзини бошқа-ча ҳис этаётганини сезганди, кўрдики, ҳалиям ухла-май, хаёл суриб ётибди.

– Менимча, ўзинг борганинг дуруст. Тўйга Бегали эмас, дадаси айтилган. Бегали билан борсанг, Карим амакинг: “Ўзини айтгандим, ўртоғини етаклаб келибди”, дейишлари мумкин.

– Unda ўзим бораман...

Самандар қачон ухлаб қолганини билмайди, уйго-ниб қараса, икки синглиси пишиллаб ухлаяпти, онаси жойида йўқ. У бет-кўлини ювиб, кўча супураётган она-сининг ёнига борди.

– Турдингми, болам?

– Ўйқум қочиб кетди, бирор иш қилишайми?

– Пақирчанг билан сув сепақол, бугун дарвозамиз олдидан тўйга қанча одам ўтади, супуриб-сидириб қўйсак яхши-да.

Самандар кичкина челакчада сув ташиб, супурил-ган жойга сепиб келаверди. Бир зумда қўчага файз кирди. Сўнг она-бола уйга кирдилар. Хадича опа Самандарнинг эгнига мактабга кияди, деб олган янги костюм-шимини, бошига дўпписини кийдирди.

– Мана, ҳақиқий йигит бўлдинг, – деди ўғлига фахр билан тикилиб. – Сени кўриб танимай қолишмаса деб қўрқаман...

Самандар кулди. Ойнага қараб у ёқ-бу ёғини тўғрилаган бўлди, қош-кўзларини учирив, онасига эркалик ҳам қилди.

– Ўзимни ақллигимдан, – Хадича опа Самандарни бағрига босди. – Яхшиям, сен бор. Яхшиям, икки синглинг бор. Йўқса, мен адойи тамом бўлардим.

Самандар онасининг бағридан бўшаб, мўлтираб қараб турди. Она ўғлининг кўз қиридан нима демокчилигини англаб, кулиб юборди.

– Борақол, болам, борақол. Қара, қанақа чиройли қўшиқ эшитиляпти. Насиб этса, катта бўлиб уйланганингда тўйингга ана шунақа ҳофизларни олиб келамиз.

– Эй, ая!..

Самандар уялиб кетди. Онасининг икки юзидан ўпиб, кўчага отилди ва тўйга бораётган одамлар оқимиға қўшилди. Тўйхонага яқинлашаркан ўзини ғалати сезди ва атрофга олазарак боқиб тенгкур қидирди, асига олиб бирорта бола қўринмади. Беихтиёр қадами секинлашди ва йўл четидаги тут панасига ўтиб, одамларни кузатди. Гуруҳ-гуруҳ тўйдан чиқиб келишапти, гуруҳ-гуруҳ кириб боришапти. Самандар бирпас қараб тургач, ўзича аҳд қилди: “Нима бўлса бўлди, мана шу одамларни ортидан кираман. Ахир мени тўйга Карим амакининг ўzlари айтдилар. Бормасам ҳурматсизлик бўлади. Онам ҳам айтилган жойга бориш керак, дедилар”.

Самандар тутнинг панасидан чиқиб, тўйхона томон юрди. Шинам кийиниб, катта кишилардай тўйга келаётган болага биринчи бўлиб Карим аканинг кўзи тушди ва беихтиёр ўрнидан туриб кетди.

– Келинг, келинг, Самандарбек. Ичкарига киринг.

Карим акани кўриб “хуш келибсиз”га турган бошқалар ҳам ўринларидан туришди. Улар илк бор ёш болада ўзига хос салобатни кўришди ва кириб кетгунига қадар тавозе билан туришди. Ҳамманинг назарида Самандарнинг отаси – маҳалла оқсоқоли Абдуғаффор aka тирилиб келгандай туюлди.

Самандар қўлини кўксига қўйиб салом берди ва ичкарига кирди. Мехмонлар орасидан бир кўриниб, бир кўринмай тартиб билан терилган стол-стуллар томон ўта бошлади. Шу пайт нимадир оёғини чимчилаб олгандай бўлди ва чўчиб тушди. Бир зум нима гаплигини тушунмай гангиб қолди, сўнг кўзи Карим аканинг ён қўшниси Амин чўлоққа тушди, у химчин кўтариб ёнида турарди.

– Сен, зумраша, катталар орасида нима қилиб юрибсан? Эрталабдан бўён эшиқдан қувсам тешиқдан кириб келасанлар, оёқ остида ўралашганларинг ўралашган. Бор, уйингга кет!

Самандарга еру осмон бир бўлиб, боши айланиб кетди.

– Амаки, амаки, мен... Ҳалиги ошга эмас, тўйга келганман... Мени Карим амакимнинг ўzlари таклиф қилганлар... Мен...

Амин чўлоқ унинг сўзларига қулоқ ҳам солмади. Одамлар орасидан туртиб-туртиб дарвоза томон ҳайдади. Самандар уят ва аламдан ер ёрилса, кириб кетгиси келди. Миясида: “Дарвозадан қандай чиқиб кетаман?” деган фикр маҳкам ўрнашиб олди. Амин чўлоқ эса бепарво, уни туртиб борарди.

Самандарнинг кўзлари ёшга тўлди. Дарвозага яқинлашганида нигоҳи бошқа бирор нигоҳ билан тўқнашишини истамай бошини хам қилиб олди. Аммо Карим aka уни кўриб қолди. Ҳозиргина тўйхонага кириб кетган боланинг зум ўтмай қайтиб чиқиши унга шубҳали туюлди.

– Самандар! Самандар! Нега кетяпсиз? Нима бўлди?

Самандар бошини кўтартмади. Бир сўз демади. Индамасдан дарвозадан чиқиб кетди. Карим аканинг кўзи қўлига химчин кўтариб олган Амин чўлоқقا тушди-ю, гап нимадалигини англади.

– Югур, Ражабали! Югур! Самандарни қайтар!

У ёнидаги йигитга буюрди. Ражабали югурди. Бироқ тўйхонадан чиқиб олган Самандар ўқдай учеб борарди. Унга етиб бўлмасди. Унга етиш амримаҳол эди.

Ражабали индамай ортига қайтди. Самандар уйига қараб эмас, кўчанинг нариги бетидаги жарлик томон елиб кетди. Жарликка тушиб, тўғри чашма бўйига борди. Унинг болалиги шу ерларда ўтятти. Дўстлари билан ҳали қувлашмачоқ ўйнайди, ҳали бекинмачоқ. Баъзан нонни увоқ қилиб балиқларга ташлайди. Югуриб сув юзига чиқиб, увоқ талашган балиқларни кўриб завқланади. Баҳор келиши билан ким кўп ялпиз терар ўйнашади. Лабларини қип-қизил қилиб маймунжон териб ейишади.

Хозир эса ёнида ҳеч ким йўқ. Танҳо ўзи. Қизиқ, бир лаҳзада кап-катта кишилар унинг иззатини жойига қўйиб ўстириб юборишиди. Яна бир лаҳзада ер билан битта қилишди. Самандарнинг ўпкаси тўлиб, йиғлаб юборди. Анчагача ўзига келолмай, ҳиқиллаб турди. Сўнг юз-қўлларини ювиб, балиқларни томоша қилди. Ердан кичкина тошчани олди-да, чашмага отди. Тошча сув юзидан ўзига йўл очиб, чашманинг тубига тушкиди. Балиқлар парво ҳам қилишмади.

Самандар чашманинг бўйидан кетгиси келмас-да, онаси хавотирланишини ўйлаб ўрнидан қўзғалди. Жарликдан чиқиб, уйига кетди. Дарвозадан кираркан, кайфиятини кўтариб олиш учун жилмайиб қўйди. У шу кўринишда онасига рўпара келмоқчи эди.

Пешайвонда онаси, сингиллари ва қўшниси Салима ая нонушта қилишаётган экан.

Самандарнинг қўзи дастурхон устида бўғи чиқиб турган бир лаган паловга тушди. Ошнинг ёқимли ҳиди димоғини қитиқлади.

– Келдингми, ўғлим, – деди уни қўриши билан Хадича опа. – Карим аканинг хотини Гулбаҳор опа жуда фаросатли-да. Азадорлигимни билиб шундан шунга бир лаган ош юборибди. Гуручидан гўшти кўп. Барака топсин. Кел, ўғлим, гўштидан егин.

Самандар гап нимадалигини бир зумда сезди. Бироқ онасига сир бой бермади. Оғзидан сўлаги оқаётган бўлсаям уйга киаркан:

– Ая, ахир мен тўйдан келяпман-ку, –деди.

Карим аканинг хонадонидан ҳануз мумтоз наволар эштилар, тўй давом этарди...

Абдуҳамид МУХТОРОВ



ҲАЙДАРҚҮЛ ХАЁЛЛАРИ

Сувни яхши кўраман.

Фақат у тиниқ бўлса, бепоён бўлса, ўртасига сузиб бориб атрофга боққанингда фақат сув кўринса.

Юрагинг орзиқиб кетса. Яна озгина кўрқиб турсанг. Кейин эса...

Кейин эса қайиқда бехавотир ўтириб, яххиси, чалқанча ётиб, қуёш нуридан юзингни бош кийиминг билан тўсиб хаёл сурсанг. Шунчаки хаёл...

Бошқа йўли ҳам бор. Бош кийим сени осмондан тўсмаслиги учун қуёш тиккага келгандамас, ё шарқ ёки ғарбда энгашиб турган пайтда унга терс ётиб осмонга тикилиш, эээ, тикилиш ҳам гапми, унга шўнғиб кетиш мумкин.

Фақат бу пайтда Ҳайдарқўлда шамол бўлмаслиги керак. Шамол турса осмонгамас, қўл тубига қўшиб қўя қолади, сени. Ҳа, шунақа.

Омадинг келиб, шамолсиз, бунинг устига булутсиз кунда Ҳайдарқўлга чиқиб қолсанг, чўимилишинг ҳам мумкин...

Атрофда ҳеч кимса йўқлиги учун тортинмай, қип-яланғоч бўлиб, қайиқдан думба отиб сувга калла солсанг. Шўнғиб чиққанингда эса қайиқнинг анча нарига кетиб қолганини кўриб, жон-жаҳдинг билан унга қараб қулочкашлаб сузсанг.

Хаа, унга етиш осон бўлмайди.

Қанча тез ҳаракат қилма, ортга кетаверасан. Вужудингни чулғаган ваҳмдан жонинг бўғзингга келади. Жисминг сув тубига ботиб, оёқ-қўлларинг оғирлашиб қолади...

“Ўлдим”, деб ўйлайсан, камига алам ҳам қиласди.

Қайиқ қаердан топилади? Жасадингни топишармикан?

Топилмагани дуруст, ахир қип-яланғочсан-ку. Кўрганлар нима дейди?

“Битта аҳмоқ ўлгунча ичиб, бир-иккита қизлар билан кўлга бориб, чўмиламан, деб тир яланғоч бўлиб ечинибди-да, кўлнинг ўртасига бориб чўкиб кетибди”, дейишади.

Тўғри, экспертизада ичкилик ичмаганингни аниқлашлари мумкин. Бироқ Ҳайдарқўл атрофида яшайдиганларни бунга ишонтириб бўпсан. “Ичган, ичмаган бўлса, бир ўзи битта қайиқда кўлнинг ўртасида номаъқул еб юрганмикан”, дейишади.

Кизлар тўғрисида аниқ далил бўлмагани учун “опер”лар ҳеч кимга лом-мим демаса-да, кўл атрофидаги эл қўшиб-чатиб, қизиқ қилиб гапиришга устасми, Боймирза буғалтернинг қилғилиғини шартта ўзгартириб, ўрнига сени қўйиб, чўкиб ўлишингдан бутун бошли қисса ясади. Қанақа қисса деманг, аниғини билмайман, мен ҳам эшитганман. Қўшиб-чатмай айтсам-айтай, эшитинг.

Айтишларича, Боймирза буғалтир пахта қабул қилиш пунктида ишлаган кезларида тафтиш бўлибди. Олди-орқасини ўйламай директори билан катта-катта еб қўйгани учун тафтишдан қамалиб кетишига бир баҳя қолиб, ўлай-ўлай, деб зўрга “омон” чиқибди.

Одамларнинг айтишича, бир “Жип”нинг калитини бериб жон сақлаганмиш. Хуллас, Боймирза тафтиш-

чиларни “акажон-акажон” қилиб, амал-тақал кузатиб уйига келиб, айвонида ўтириб узоқ йиғлабди.

– Ай Худойжон, нега мени буйтиб яратдинг, – деб қўкрагига уриб бўзлабди. – Нега ҳамма нарсани ўлай-ўлай деб ушлаштирган жойимда узасан, – деб додлабди. – Муна мумсик директордан қисиб-қимтиб, тишимдинг кавагида йиққанимни, элдан яшириб Элмурод тарашанинг уйига кўйиб, хотинимгаям кўрсатмаган “Жип” имди қўшқўллаб шу исковучларга тутқаздинг. Нега, эй, Худойжон, нега?!

Қўни-қўшнидан уялган аёли аввалига у-бу деб кўрибди. Лекин эри қўнадиган аҳволда эмас. Сўғин жаҳли чиқиб, Боймирзани чақалоқни кўтаргандай шартта чап қўлтиғига қисиб уйга кириб кетибди. Ха-холка¹ларга ўҳшаган полвон хотин экан-да. Девордан мўралаган қўшнисининг айтишича, олиб киргунча ёш боланинг кетига ургандай Боймирзанинг кетига бир-икки шапалоқ ҳам тортиб юборганимиш...

Бироқ гап шапалоқдамас, эртасига бўлган гап-да...

Бировлар “Ўша куни хотинига кучи етмаган Боймирза Сарвар чечага “кўйивор”, деб ялинган, лекин у қўймаган. Шундан сўғин аламига чидолмаган эр шўрлик “Агар эртага тўшагимдан тирик турсам, ҳайдартўқайда иккита хипчабелнинг кетига шапатлаб ўйнатмасам итман”, деб қасам ичган”, дейди.

Бошқалари “Бўлмаган гап. Ўзи Боймирза бузук, айнигана, аҳмоқ бола”, деса, ақа-укалари, қариндош-уруғи, “У киши шантажнинг қурбони бўлди. Душманлари ичкизиб-ичкизиб эркакди жўштирадиган дори бериб, кўлга обориб бир-иккита “Қорақош”га рўпара қилган”, дейишади.

Аниғини Худо билади, эшитганимни айтдим.

Нима бўлгандаям Боймирза ўша куни ўзи айтган “хипчабеллар”ни олиб Хайдарқўлга жўнаган. Йўлда

¹ **Ха-холка** – Украин аёлларини шундай ҳам аташади.

миршаббоши бўлган синфдоши Боймирзанинг қизлар билан кетаётганини кўриб қолган. Миршабмасми, ортидан пусиб бориб жинғиллар орасида анча пайт кўриниш бермай кузатибди. (Шунча жойгача пусиб келишни қойиллатганини-чи. Миршаб-да, мираншаб). Боймирза аввалига роса ичибди. Кейин чўмилибди. Сувдан чиқиб худди ҳайвондай тўрт оёқлаб “Қорақош”ларнинг олдига гижинглаб келибди. Улар бўлса “юввош-юввош”, деб унинг у ер-бу ерини силағанмиш. Боймирза эса осмонга қараб тумшуғини кўтариб чўзиб-чўзиб ис олибди. Кейин эса эшакка ўхшаб ҳанграб дуч келган томонга тўрт оёқлаб югуриб кетибди. Уларнинг олдига қайтиб яна исқабди, исқабди, исқабди-да, бошқа томонга шаталоқ отибди. Майсаларни топтаб депсингандай бўлибди, эшақдай ағнабди, ер тепиб яна унга қараб турғанларга талпинибди. Улар бўлса думалаб-думалаб кулармиш...

Хуллас шунаقا ҳикояга мавзу бўлиш ҳеч гапмас.

Лекин нима қиласай? Барibir сувни яхши кўраман.

Майли. Жуда ўртасига бориш ҳам шартмас. Учқулич томонга бориб, Жетимтovдан ҳам кўлни томошা қилса бўлади. Қайтанга кўл бутун борлифи билан кўринади. Сувга туташган уфққа термуласан.

Тоғ ҳам жуда баландмас. Эринмай пастга тушсанг, сув остида қолган қабрлар кўзга ташланади. Бундан ташқари, у ерда шоҳ сингари ажраб кўлга кириб борган мўъжаз қояча бор. Қачонлардир киночилар бу қоя устига тошдан блиндаж қуришган. Томи йўғ-у, деворлари ҳали турибди. Ана шу деворга ўтириб Ҳайдар-кўлнинг бепоён кенгликларига қарайсан. Лекин сув остида қолган мозорлар барibir таъбингни хира қиласади. Бошқа томондан, бу ерларда қачондир, қачон ҳам эмас, ҳатто ўтган асрнинг саксонинчي йилларида ҳам сув ўрнида бепоён яйлов бўлганига ишонгинг келмайди...

Қирғоқдаги балиқчилар кулбасига бориш мумкин. Ҳамсуҳбат топилганига хурсанд бўлиб меҳмон қилишади. Хоҳласанг, балиқ қовуртириш, хоҳласанг моторли қайикда сайд қилиш, хоҳласанг, бир неча кун шу кулбада қолиб қорақушми, ёввойи ўрдакми, қирғо-вулми овлашинг мумкин. Зерикмаслигингга кафилман, ошна. Бу ердаги аҳолининг шевасиям ажойиб. Оддий гапи ҳам одамни кулдиради.

Йигирма еттинчи қаватдаги меҳмонхона айвонидан мен томоша қилган денгиз чинакам мўъжиза эди. У ерда қўёш денгиз узра қирғоқдан то уфққа қадар узундан-узоқ оловли йўл ҳосил қилиб,чувалишиб ботарди. Тонгда эса денгиздан келаётган мусаффо эпкиндан танинг ором оларди. Ўша кунларни ҳалигача яққол тасавур қиласман, гоҳида тушимга ҳам кириб чиқади.

Шанхайда менга тинч океани шаҳардан саксон чақирим наридалигини айтишиди. Ишбилармонлар билан режалаштирилган учрашувларни ўйлаб ўтири-масдан шартта қолдириб, океанга жўнаб кетдим.

Қирғоқца етиб бориб ҳафсалам пир бўлди. Негаки, сув қайтиб океан қирғоқдан сал кам ўн беш километр орқага кетган, қоп-қора лойга белангандекисиз текисликда бошига похол шляпа кийган сан-саноқсиз хитойлар тирикчилик ташвиши билан балчиқ устидан молюска териб юарди.

Яратган бандасининг ризқини ҳатто уммон тубидаги балчиқقا ҳам сочиб қўйганига ажабланмай иложӣ... йўқ...

Кутганимни кўрмаганимдан лаб-лунжим шунчалик осилиб тушдики, хитойлик ҳамроҳларим ташвишланиб қолишлиди. Таржимоннинг бўлса жаҳли чиқди.

– Сизнинг инжиқлигингизга қарамай, ишларини бир четга суриб шу ерга олиб келишлиди. Ҳайратлан-масангиз ҳам ҳайратлангандай бўлиб туринг бирпас.

Кулинг, уларга қараб хўмрайманг. Ахир океаннинг кетиб қолишига улар айбормас. Кулинг деяпман, жин урсин сизни, – деди у.

“Жин урсин”, деган гап меники эди. Бу сўзни мен кўп ишлатаман. Икки кун мен билан юрдию унгаям ёқиб қолди шекилли, аввал бир-бир, кейин эса оғзини тўлдириб ишлата бошлади, жин урсин!

Ўзбекистонда уфқда ер кўринмайдиган сувнинг бири Орол, бири Ҳайдаркўл. Орол олис, жуда олис. Ҳайдаркўл эса бир қадам. Эринмаганга бир қадам. Шуйтиб, гоҳида сувни соғиниб Ҳайдаркўлга улоқиб кетаман. Шерик бўлиши шартмас.

Шерик ҳам ҳар хил.

Намоз акага ўхшаб ов деса яйраб кетадиган, кўлга чиққач амалдор бўлганига ҳам қарамай аравани тенг тортадиган, икки кун деса икки, уч кун деса уч кун миқ этмай юрадиган шерик ҳамишаем топилавермайди. Топилганининг ҳам вақти сенинг вақтингга тўғри келмайди.

Ҳайдаркўлнинг Омонкелди томонларида бир чўпонни учратдим.

Кумга ўтириб қолган машинамни чиқаролмай хуноб бўлиб турганимда қўй ҳайдаб келди. Кун куйидирар даражада иссиқ бўлса ҳам тuya жунли чакмонга уралиб олган, бошида қозоқи қалпоқ.

Салом бердим, алик олмади. Худди мени кўрмагандай тўғри келиб машина ғилдиракларига қаради. Қўлидаги ҳассаси билан уларни бир-бир туртиб кўрди. Сўнг қўлини пешонасига соябон қилиб йигирма-ўттиз метр наридаги йўлга қаради.

– Не ушин бул жерге келдинг, балам? – деди ниҳоят.

– Туяларни олдидан томоша қилмоқчи эдим, – дедим алам билан.

– Олар қайда? – деди у.

– Кетиб бўлди.

– Аҳмақ экенсин, – деди чўпон.
 – Ҳаа, хаёлпарастилигам ўлсин, – деб ёзғирдим уни кувватлаб.

– Касибинг не? – сўроқлашда давом қилди чўпон.
 – Журналистман, – дедим.

Чўпон ажабланди:

– Бул не дегенинг?
 – Журналист-да, газетага мақола ёзади. Радиода гапиради, – дедим бироз ажабланиб.

Унинг чехраси ёришди.

– Эээ, минандай сойлеген сенмисин? – деди қўйнидан кичиккина радиоприёмник олиб.

Агар Ҳайдаркўлдан анча нарида, Қизилқум саҳро-сининг чўпонлардан бошқа ҳеч ким яшамайдиган жойида турганимга кўзим етмаганда, у мени масхара қиляпти деб ўйлаган бўлардим.

– Ҳа, – дедим.

Чўпон юзимга синовчан тикилиб приёмникни ёқди. Ундан вишиллаган товуш чиқди. Чўпон мурватларини бураб тўлқин қидирди. Бефойда.

– Созинг туври шифар, сен минау жердесинғой, қайдан айтсин, – деди сўнгра.

Кулиб юбордим. Уям кулди. Кейин:

– Минауни қой. Тамақ жеб, қимиз иш. Жигиттер келсе, шифарип аламиз, жур, – деди.

Унга эргашибдан бошқа чорам ҳам йўқ эди. Машина эшикларини қулфладим. У норози тўнғиллади:

– Неден қўрқиб турсин. Машинаға ким киреди? Еш ким жоққой минау жерде. Албасти киремин деса – кулптин пайда жоқ.

Бирга-бирга гаплашиб кета бошладик. Унга Учқу-лоч томонда сув остида қолган мозорлар ҳақида гапирдим.

– Эситгенмин, – деди чўпон. – Минау жерде улken қазақ авули болатин эди. Жастар қалаға қашип кетиб

тур. Бул жердеде сондай болған. Биздеде солай. Улken улим ахмақ, Уш рет мал алиб, қўрасиға тиқдим. Минг данаға жақындаса – сатиб, Алматиға қашади. Мениде, анасинида тангдамайди. Бар ақшасини құритип, шир жаланғаш қайтип келеди. Ахмақ, билейтин жумисти құлсайши, диймин. Тингдамайди. Сен сияқти жақси соз сойлеп, ақша алса бир жол. Сен уақтунда туври сўйлесин. “Одоб”, дейсин. Аулда болған ангимени тингда. Ўтеген ақсақал ористармен журип, арақ ишгени ушин халиқ они ағашға баулаб, аулдан қувған. Казир ишме дегенни қуип салатинмизов. Омир сондай экенфой...

Унинг гапларини тинглаб, Ҳусан Карвонлининг ичкилик ҳақида мақола ёзганию мисолни ўз қишлоқ дошларидан келтириб сал кам олти ой қишлоғига боролмай юргани эсимга келди...

Нуротани айланиб Боғдан шахрига киргач, бозор ораладим. Бу ерга келган киши бозорга, албатта, кириши керак. Қўзиқорин, тотрон, равоч мўл.

Қўзиқорин сотиб турган йигит савол берди:

– Асли қаердансиз, меҳмон?

– Форишлиқман, – дедим, у ишонқирамади.

– Тилингиз ўхшамайди-ку?

– Бичоқлар томонданмас, туркманлар томонданман, – дедим эски ҳазилни эслаб.

Форишда Нурота тоғининг Самарқанд тарафидағи элни туркман, улар эса Боғдан атрофида яшовчиларни бичоқлар деб ҳазиллашади. Туркмани-ку тушунарли, бичоги нима десангиз, айтай. Форишининг асли ўғиз әлати пичноқни – бичоқ дейди.

– Ээз, – деди йигит. – Фалакнинг гардишини қаранг. Илгари бу ерга туркман зоти келмасди. Энди Форишининг салкам ярми туркман бўлиб кетди. Қораабдолданмисиз? Қораабдолнинг қаериданмисиз?

– Болғалиданман.

– Ие-е-е Шакарвой мелисанинг қишлоғиданми, – деди у жонланиб. – Ў бизнинг ака бўлади.

Форишикларнинг кўпи Қораабдолдан Шакарвой милисани, Гарашадан Саъдулла Ҳакимни, Нарвондан Бастам Сайдқуловни танишади.

– Милиса бўлиб ишлаганда ичибми, жанжаллашибми қўлига тушган бўлсангиз керак-да, – дедим “тегишиб”.

Йигит қизариб кетди.

– Эзэ, энди йигитчиликда бўлади-да. Яхши ёрдам қилган, барака топсин, ҳар кўрганимда бир чой қилиб бераман. Кими бўласиз Шакарвой аканинг?

– Қўшнимиз. Ростдан яхши милиса бўлган, ҳозир оқсоқол, – дедим.

Йигит Шакарвой акани ростдан ҳурмат қиларкан, қўзиқоринга пул олмади. Безрайиб кетиш ноқулай туюлиб машинамдан битта китобимни олиб дастхат ёзиб совға қилдим...

Энди эса ёзишга анча-мунча гап йиғиб, Тошкентга қайтияпман.

Сайру саёҳатнинг бир гашти шуки, уйга қайтиб бола-чақангга, хотинингга, қўни-қўшнию ошна-оғайнингга қўшиб-чатиб лоф уриш мумкин. Оғзини ланг очиб эшитишади. Бусиз иложи йўқ...

Ахир Аҳмад оға айтган-ку: “Овчи бўлиш учун лофи, лофчи бўлиш учун овчи бўлиш керак”, деб.

Аниқ биламан, бу сафар ҳақида Намоз ака эшитса яйраб кетади, Баҳодир... Баҳодир нимаям дейди?

Яна қўлга боришга аҳд қиласи, кунини белгилайди...

Саксовул, жинғил, қамиш оралаб сув кечадиган жойга дазмолланган костюм-шим кийиб, туфлида борадиган тоифа бўлса “Фақат ўзингиз боравермай, бизниям олиб боринг-да энди”, дейди.

Россияга савдога бориб бор-буудидан айрилгач, бир амаллаб ярим тунда ёлғиз ўзи қишлоғига кириб келган, отасининг олдига сўппайиб киришга номус қилиб, “Шарманда қилма”, деб Худога ёлворган, дарвоза қашисида унсиз йиғлаган, кейин эса “Ўзингга таваккал”, деганча ҳеч кимга билдиrmай (ҳатто хотинигаям) ими-жимида яна Россияга қайтиб кетган Собирхон тоғадаги ҳамиятнинг миллиондан бири ҳам бўлмаган бу суллоҳлар айнан шундай дейди.

“Борайлик” ҳам демайди. “Олиб боринг”, дейди.

- Ҳамият катта гап, – дерди Абдулла бобо гоҳида.
– Ҳамият катта гап!

Собирхон тоға айнан шу ҳамияти учун орадан бир-икки йил ўтгач, юзи ёруғ бўлиб Россиядан қайтган. Буларнинг юзи...

Нимагадир уларнинг юзини эслолмадим, узр.

Хуллас, Ҳайдаркўл атрофида шунаقا гаплар. Сиз ҳам бир боринг...

Айтганча, Боймирза болғалилиқмас. Форишданнамmas “Қаердан”, деб сўраманг. Ҳамма жойда “хол қўйиб” юрган “мирзо”лар камми?..

Олимжон ДАВЛАТОВ



Камина ходимингиз Ҳазрат Навоий йўлида уч-тўрт ғазал ёзиб, “Навоийнинг янги ғазали” дея навоийшуносликка даъвогар бир-икки зотдан “мен нима дейман-у, қўбизим нима дейди” қабилидаги “шарҳ”лар ундирганимни ҳисобга олмасақ, бадиий ижод билан умуман шуғулланмаганман. Лекин Хайриddин Султоннинг “фақат одамлардан эшигтан ва бор ҳолида қофозга туширган” ўттиз битта янги ҳикоя-ҳаётномадан иборат “Одамлардан тинглаб ҳикоя” китобини ўқиб, ҳолнома йўсунида бир ҳикоя қоралагим келди. Чиройли қўшиқни эшитаётганда беихтиёёр қўшилишиб, хиргойига тушгани каби чуқур маъноларни содда, осон ва тушунарли тарзда ифодалаган бадиий асарни ўқиган одамда ижод ҳаваси уйғониши табиий бир ҳол. Ҳикояни номлашда ҳам таниқли адабимизга издошлик қилдик. Ёзиб бўлгач, бир хуносага келдим: ҳикоябон кўрган-эшигтанингиз агар бўлса, яхшиси, Хайриddин Султонга айтиб беринг. У киши нақлингизни ўзингиздан ҳам қизиқарлироқ, жонлироқ, таъсирчанроқ қилиб халқча етказади. Ўзим ҳам шундай ёза оламан деб, бехудага овора бўлманг. Ишон-масангиз, “Ўттиз иккинчи ҳикоя”ни ўқинг.

ЎТТИЗ ИККИНЧИ ҲИКОЯ

Ўрта мактабни тугатганимда мустақилликнинг икки йиллиги нишонланаётган бўлса-да, ҳали чегаралар аниқ белгиланмаган, соат сайин қадрсизла-

наётган эски совет рубли муомалада эди. Қолаверса, қўшни республикалар билан барибир алоқаларимиз олдингидек сақланиб қолади, темир панжаралар буткул олиб ташланади, деган умидимиз ҳали сўнмаганди. Қўшни Тожикистонда биродаркушлик урушининг алангаси пасайиб, қонуний ҳуқумат ўрнашгани, уйимиз олдидан автобуслар мунтазам қатнаб, бир ярим соатда Душанбега етказишини ҳисобга олган ҳолда, Тожикистон давлат университетининг шарқшунослик факультетига ўқишига киргандим. Ҳафтанинг охирида дарсдан кейин уйга келаман, бир кун уй ишларига ёрдамлашиб, душанба куни эрталаб автобус билан яна ўқишга қайтаман.

Қишилди. Офтобшувоқ кунларнинг бирида синфдошлар билан қишлоқ кўчаларини айланиб юрадик. Йўлда катта аммамнинг кенжা ўғли – Бахшулло акани учратиб қолдик. Бахшулло ака – савдо ходими. Пули кўп сахийлардан. Биздан атиги тўққиз ёш катта бўлса ҳам, кўпчилик жиянлар у кишини каттагина қорни борлиги учун “Бой ота” деб ҳазиллашамиз.

– Ҳа, студент, қалайсан? – мен билан қуюқ сўрашди Бахшулло ака. Сўнг энгил-бошимга разм солиб, мамнунлик билан бош ирғади: – Дуруст. Студент дегани шунаقا ихчам бўлиши керак. Менга қара, сен Душанбеда ўқийсан-а? Тўхтаб тур, сенга берворадиган бир нарсам бор.

Ҳаял ўтмасдан, газетага ўралган бир боғламни олиб чиқиб, қўлимга тутқазди:

– Бу – сенинг улушкинг. Бир миллион. Сўм-купон чиққанда уйдаги пулларни алмаштириб қўйгандим. Янганг мендан яширинча “қора кунлари”га атаб, иккита болишни “заправка” қилиб қўйган экан. Эсиданам чиққан экан, кеча ёрилди, – шундай деди-ю, қаҳқаҳ уриб кулди. – Эпласанг, Душанбега олиб бориб ишлат. У ерда ҳалиям “деревянний” амалда экан.

Ўзбекистонда қадрсиз қоғозга айланган, Тожикистонда амалда бўлган “деревянний” – совет пулларини уйга олиб келиб яшириб қўйдим. Отам Айний домланинг “Қизболани йўқчилик бузади, ўғилболани – тўқчилик” ҳикматига қаттиқ амал қиласидиганлардан. Билиб қолса, “Оч қорнинг – тинч қулоғинг”, деб пулни олиб қўйиши ҳам мумкин.

Эртаси эрталаб “Бой ота” берган улушдан ташқари уйдагилардан бир сумка озиқ-овқат ҳамда йўлкирага етадиган пулни олиб, йўлга чиқдим. Автобуслар бешта жойда текшириларди, шунинг учун вокзалга бориб, “Душанбе – Конибодом” поездига бир амаллаб билетсиз чиқиб олдим. Иккинчи “полка”да увадаси чиқсан яғир матраснинг тагига пулни тахлаб, четдан Тожикистонга олиб киришига рухсат берилган ўн беш минг рубл чўнтағимда, юрагим ҳовучимда – текширувчиларни кута бошладим.

Вагон менга ўхшаган билетсизлар билан тўла эди. Пахтаобод бекатидан “облава” бошланди. Талаба бўлмаган бўз йигитларни ушлаб, мажбурий равишда Тавилдарага – урушга юборишарди. Иккита зобит тала-балик гувоҳномаси сохталашибилган тўртта йигитни автомат қўндоғи билан уриб-уриб, Ҳисор бекатида тушириб кетишиди. Шундан кейин менинг ҳам, бошқаларнинг ҳам жонига ором кирди.

Издиҳом орасида бошқа милиса ва “боевик”ларнинг кўзини шамғалат қилиб, вокзалдан чиқишим биланоқ сариқ “Волга”га ўтириб олдим.

- Гулистонга.
- Ўн минг.
- Ҳайданг.
- ...Шу билан каминанинг “олтин давр”и бошланди. Таксичи билан келишиб олдик: ҳар куни эрталаб келиб, университетга олиб боради. Тушлик ва кечки овқат кафе ва ошхоналарда, улфатлар даврасида ўтар-

ди. Бир такасалтанг талабанинг кўнгли нимани тусаса, ҳаммасини татиб кўрмоқчи эдим.

“Олтин давр” узоққа чўзилмади: қўшни хонадонда ижара турадиган талабалар пайшанба куни эрталаб кириб, телевизорда совет пули синиб, уч кундан сўнг Россия рубли муомалага чиқиши ҳақида ҳукумат қарори эълон қилингани, Сариосиё билан чегарадош бўлган Турсунзода туманида ҳукуматга қарши навбатдаги исён кўтарилигани сабабли, шаҳар қамалга олинганлигини хабар бериши.

Секин туриб, ошхонага ўтдим: уч кунлик базми жамшидлардан қишлоқдан келтирилган икки юз граммча шакар билан чорак банка пахта мойи қолган, холос. Бошқа ҳеч вақо йўқ...

Кўчага чиқдик. Транспорт ишламайди. Ҳаммаёқ берк. Ҳатто кўкат сотилмайди. Нон дўкони томон йўл олдик. Одам гавжум. Камида икки минг киши навбат пойлаб туришибди. Дўконнинг ёнидаги омонат кассаси олдида ҳам яна шунча одам пул топширишга тўпланган. Ҳар бир кишидан икки юз минг рубл қабул қилиб, паспортига муҳр босиб беришаркан. Қачон, қанча миқдорда қайтарилиши номаълум. Уям фақат шаҳарликларга...

Қаппайган чўнтаклар билан нон навбатида турдик. Россия рубли ҳам, сўм-купон ҳам, “деревянний” пули ҳам бор. Тахминан икки соатлардан кейин бортига “Хлеб” ёзилган шалоқ юқ машинаси келди. Куттишдан чарчаган одамлар олдинга ҳаракат қилишга имкон бўлмаса-да, жойида депсина бошлади. Машина дўконнинг орқа томонига ўтди. Бақир-чақирлар остида нон сотила бошланди. Уруш ҳақидаги фильмларда нон навбатини кўргандик, аммо бу лавҳаларнинг бирортаси очлик даҳшатини кўрсатолмаскан. Минглаб инсонлар бола-бақраси учун бир бурда нон сотиб олиш истагида бутун вужуди билан олдинга интилар-

ди. Қўллар қиши пайти яланғоч қолган кекса чинорлардек осмонга кўтарилиган, ҳиссиз, катта-катта очилган кўзлар бир нуқтага – нон чиқаётган кичкинагина туйнукка қаратилган, мадорсиз оёқлар ўйдим-чукур йўлкадаги ҳалқобларни ҳам, бемаъни уруш касофатига қолган бегуноҳ ва бадбахт қавм ҳолига йиғлаётган осмоннинг қор аралаш ёмғирини ҳам ҳис этмасди. Бу даҳшатни ўз танасида яшаган одамгина билади...

Тахминан эллик-олтмишта нон сотилмади ҳамки, тўсатдан усти очиқ ҳарбий мошинлар шовқин солиб келиб, издиҳом олдида чийиллаб тўхташди. Бошдан-оёқ қуролланган, юzlари ниқоб билан тўсилган бақувват йигитлар мошинларнинг устидан сакраб тушишди. Биттаси одамлар устидан бир шиллик ўқ узди. Ҳаммаёқ жимжит бўлди. Ҳарбийлар тўрт томондан нон мошинини ўраб олишди. Биттаси орқа эшиги ни тарақлатиб ёпди.

– Ортимиздан ҳайдай!

Эски машина бир-икки уринишдан сўнг ўт олиб, ҳарбийларнинг ортидан bemажол йўл олди. Ортидан очлик ва қаҳатчилик асирига айланган минглаб мазлум ва бенаво ҳалқнинг аламли нигоҳлари кузатиб қолди.

– Хурматли ҳамشاҳарлар! – ҳиссиз бир овоз янгради. – Уч соатдан сўнг 33-микрорайоннинг дўконида нон сотилади.

Каракт бўлиб турган издиҳом жунбишга келиб, айтилган манзил томонга йўл олди. Иккита нон дўконининг ораси уч километр. Етиб боргунимизча нон навбатида турганлар бир замонлар “Озодий” ва “Шаҳидон” майдонларида иккига бўлинган адолатталаб митингчилардан ҳам кўп эди. Чиқмаган жондан умид, биз ҳам навбатга қўшилдик. Яна кутишлар, яна ўша аҳвол – нон келди, юз-юз элликта нон сотилди, қолганини ки-

йимидан қайси ҳарбий бўлинмага тааллукли эканлигини билиб бўлмайдиган “боевик”лар олиб кетишиди...

Соат тўртдан ошди. Кун қисқа. Ҳадемай, қоронғу тушади. Комендантлик соати бошланади. Мажбур уйга қайтдик.

Бир ярим қошиқдан шакар солиб, ширинчой ичиб ухладик. Иккинчи куни ҳам шу аҳволда ўтди. Уйга қайтиш жуда оғир бўлди. Уйдаги ҳарорат, ҳаловат ва айниқса, дастурхондаги бир бурда нонга етишмоқ умиди совуқ ҳавода саккиз соат давомида оёқда тикка ўтказган қорни оч одамга қанча қувват бериши мумкинлигини ўшанда ҳис қилганман... Аксига олиб, чироқ ҳам ўчган экан. Шакарни тилимиз тагига ташлаб, бирпас тамшаниб, кейин совуқ чой билан ютдик. Уйқу йўқ, мадор йўқ, чироқ йўқ, хона совуқ. Бир амаллаб тонг оттирдик.

Кун ёришди. Бошимни кўтариб, хонадошим – Суннатга саволомуз қарадим.

– Бугун кучим етмайди. Фойдаси йўқ...

– Ётиб ҳам бўлмаяпти.

– Рустилидан имтиҳоним бор. Ўшангага бормаймизми?

Кийиниб, Суннат таҳсил олаётган иқтисод факультети томон йўл олдик. Хайрият, бугундан автобуслар йўлга тушибди...

Рус тили ўқитувчиси ёши катта, озғин бир аёл экан. Талабаларнинг аҳволини кўриб, битта грамматик қоидани мисоли билан ёддан айтишни вазифа қилиб берди. Топшириқ жуда оддий эди: “Обстоятельство времени обозначает время действия и отвечает на вопрос когда? Пример: Я встал рано утром”.

Бечора Суннат. Мактабни кумуш медал билан тутгатган бўлса ҳам, икки соатда шу биргина қоидани ёдлаб айтиб беролмади. Бошқа талабаларнинг аҳволи бундан баттар эди. Ўқитувчи сабр-тоқат билан уларнинг оёғини судраб, зўрға боришлари-ю, тутилиб-тутилиб жавоб беришларини эшитиб, ахийри “Ну ладно,

ребята, Бог с вами. Пройдут эти дни", деб, ҳаммага "тўрт" баҳо қўйиб берди.

Кўчага чиқдик. Ихтиёрни оёққа бердик. Тўрт бекат пиёда юриб, тўқимачилик комбинати бекатида нафас ростлаб ўтиридик. Совуқ суюкларимиздан ўтди. Бир маҳал ичида деярли одами бўлмаган 17-рақамли автобус келди. Иккаламиз туриб, автобусга миндик.

– Суннат, бу автобус Гулистон томонига борадими?

– Йўқ, бу Россия колхози томонга боради.

Гулистон – биз ижарада турган мавзе бошқа томонда, Россия колхози бошқа томонда. Лекин негадир автобусга миндик. Сабабини ҳалигача билмайман.

Автобус деярли бўш бўлса-да, Суннат иккаламиз оёқда тик туриб борардик. Душанбе шаҳрида ёзилмаган бир қоида бор – олтмиш ёшли эркак ҳам невараси қатори бўлган қизга жой бериши шарт. Аёл киши тик турганда йигитнинг ўтириши иснод ҳисобланади. Шунинг учун, беш йил ўқишим давомида бирор марта автобусда ўтириб бормаганман, десам, муболаға бўлмас.

Шаҳарнинг баланд бинолари тугаб, қишлоқ манзаралари лип-лип этиб автобус ойнасидан ўтиб борарди. Ўз ҳолига қараб қурилган тартибсиз уйлар, дарахтлар, далалар...

Тўсатдан мўъжиза рўй берди: кичиккина бир дўкон олдида нон туширилаётганди. Энг қизиги, навбатда ҳеч ким йўқ.

– Тўхтанг! Тўхтат! Тўхта! – жонҳолатда бақирдик иккаламиз.

– Хўп, хўп, мунча ваҳима қиласизлар. Ҳозир, ҳозир...

Автобусдан югуриб тушиб, ортга қайтдик. Нон дўконида ўрта ёшли сотувчи нонларни тахлаб турарди.

– Ака, нонми бу?

– Ҳа, нон.

– Сотасизми?

– Ҳа.

– Қайси пулга?

– Эски пулнинг 10 сўмлигига, ёки янги – “российский”га.

– Неччи пул?

– 165 сўм.

Уч кундан бери кераксиз тошдек оғирлик қилаётган пулларимизга ҳам, ўзимизга ҳам жон кирди гёё. Шартта битта “буханка”ни олиб, иккига бўлдим-да, ярмини Суннатга бердим. Ушоқлари тўкилмасин деб, чап қўлимни оғзимнинг тагига тутдим. Нон жуда тез тугади. Сотувчи бизга қараб-қараб қўйди-да, индамади.

У пайтларда дўконларда пакет сотилмасди. Ҳамма ўзи билан тўрхалта ёки “корзинка” деб аталадиган қора дерматиндан тикилган қора сумка кўтариб юради. Қўлимизда ҳеч нарса йўқ эди. “Табани” курткамизнинг белбоғини бўшроқ бойлаб, учтадан нонни ичидан териб, жойладик.

– Болалар, қаердансизлар? – сўради сотувчи.

– Ўзбекистондан. Сариосиёдан.

– Ооо, машхур Сариосиё... Бир илтимос бор: малол келмаса, еган нонларингиз менинг ҳисобимдан бўлсин.

Бир нарса бўғзимга тўлғаша бошлади. Уч кун очликка чидаб, ўзини хор қилмаган одам нонга етганда концлагер асиirlаридан ҳам баттар тутганимга ўзимдан нафратланиб кетдим. Маъносиз илжайиб турган Суннатга қарадим.

– Йўқ, кўнглингизга келмасин, илтимос, – шоша-пиша изоҳ беришга ўтди сотувчи. – Бу – Ўзбекистон нони. Каримов бобо биздаги аҳволни эшишиб, ёрдам юборибди. Фақат битта шарт қўйибди – олдин ўзбеклар яшайдиган жойларни таъминлайсан, дебди. Бу колхозда асосан фарғоначилар яшайди, биласизлар. Учинчи мошин келди бугун. Ҳамма ўзига тегишли нормасини олиб кетди.

... Бу воқеадан йигирма саккиз йил ўтди. Ҳалигача Ўзбекистонимнинг ўша яримта нони қарз бўлиб бўйнимда турибди. Қандай қайтараман, билмайман.

Холида БОЗОРОВА



БОБОТУРКИЙ

Ғалати хабар эълон қилинди: Хитойда вирус тарқалган эмиш. Тождор эмиш. “Парранда гриппи”, “Чўчқа гриппи” ҳам шундай ваҳима билан эълон қилинганди. Йўқ. Буни ундан демадилар. Бундан “Испанка”, “Ибола”... шуларнинг “иси” келяпти. Э нима бўлса бўлар. Замонамиз тинч бўлсин. Ўзбек Боботуркий ўзбекларга хос соддалик ва кўнгил хотиржамилиги йўғрилган хаёллар билан ишга отланди. Ишхонада ҳам шу гап. Вирус ўзимизга – Ўзбекистонга ҳам келган эмиш. Боботуркийнинг институтда биринчи курсларга маърузаси бор эди. Мана неча йилдирки, тил ва адабиёт институтида фаолият юритади. Она тили – ўзбек тили фани юзасидан маърузалар ўқийди. Буюк мутафаккир Алишер Навоий номида тил ва адабиёт институтининг очилганидан ўзбек сифатида ғурур ҳис қиласи. Ўзининг жарангдор, ширали овози билан ўқиган маърузалаларидан ҳузурланади. Мана ҳозир ҳам...

“Дунёнинг энг бой, энг баҳтсиз бир тили қайси тилдир? Биласизми? Туркча. Шоирлик қилмоқчи эмасман, сўзнинг тўғриси шудир. Дунёни энг бой тили туркчадир, энг баҳтсиз тили ёна худ туркчадир...”¹

Маъруза одатдагича бир соат давом этди. Талабалар керакли ўринларни ёзиб бордилар, ўзаро сухбатла-

¹ Абдурауф Фитрат. “Тил ҳақида”.

шиб (пичирлашиб, албатта) турганлар, эътиборсизлар ҳам кўзга ташланди, бироқ Боботуркий нуронийларга хос босиқлик билан фикрларини баён этишига бу каби салбий ҳолатлар таъсир эта олмади. Маъруза якунида сухбатга ўтилди. Талабалар саволлар беришди.

“Нега Фитрат қарийб ўн асрдан кейин шундай буюк Фирдавсий, Деклавий, Румий каби даҳоларга “тош отди?”

“Фитрат ҳақ бўлганида ҳам бу буюк даҳолар асарларини туркий тилда қайта ёза олмайдилар-ку?! Бунинг имкони йўқ-ку?! (Шу савол берилганида баъзи бирлар кулгидан ўзларини тия олмадилар).

“Нега энди ўзлари туркий қавм бўлсалар туркий тилда асар ёзишга мажбур эмаслар-ку?!”

Боботуркийни тер босди. Талабалардан эшитган бу каби бемаъни саволларданми ё танасига аллақачон ўрнашиб улгурган “мараз”нинг шиддатиданми ўзи ҳам англай олмай қолди. Ҳар қалай кекса одам. Томоғини аччиқ бир нарса куйдиргандай, оғзи қуруқшагандай... Қизиқ, илгари сира бундай ожиз сезмаганди ўзини. Аъзойи бадани қақшаб, кучсизланиб қолди, танасида мадор қуриди, сув-сув тер остида қолди. Энди овозлар ҳам анча олислардан эшитила бошлади...

“Тит-тит-тит” деган бир маромда такрорланувчи товушдан ўзига келди. Устига гўё бир қоп ун юклангандай оғир ҳис қилди ўзини.

- Устоз, тузукмисиз? Сизни “Covid-19”да гумон қилиб, “Жонлантириш” бўлимига қабул қилдик. Ўзингизни қандай ҳис қиляпсиз? – шу каби саволлар билан шифокор унинг кўзларини текшириб кўрди, иситмасини ўлчади. – Сатурация 61, – деди.

- Нафас... нафас... – Боботуркий шу сўзларни айтиб-айтмай яна оғирлашиб қолди.

Тўғри, у бундан олдин ҳам касал бўлиб турарди, иситмалаб ётиб қоларди. Бироқ Сўзсулув хонимнинг

ширин сўзларию меҳрибонликлари ортидан касаллик ундан тезда даф бўларди. Дарвоқе, Сўзсулув хоним! У ғалати аёл. У билан шаръий никоҳлари бор. Фарзандлари йўқ. Меҳрибон, дилкаш, эркароқ, бироз жиззаки, аммо бекарор. Бир қарасанг, ўта замонавий, бир қарасанг, замондан ортда қолган, бир қарасанг, донишманд, бир қарасанг, тўпори, оми.

Ҳали уй, ҳали ишдаги кундалик ташвишлар инсонга бир нафас тўхтаб босиб ўтган йўлига назар солишга имкон бермайди. Бироқ бошинг ёстиққа тегганида ўтган умрнинг ҳар бир лаҳзасини сарҳисоб қиласан.

Боботуркий жуда оғир ва мاشаққатли йўлни босиб ўтди. Уни севганларидан кўра севмаганлари кўп бўлди, дўстларидан кўра душманлари кўп бўлди...

“...Аввал Меҳрбонуга уйланди. Жуда ширин турмуш қуришди. Ундан ўғли Қорлуқбек туғилди. Фарзанд ва неваралар кўргач, Меҳрбону Боботуркийга эътибор бермай қўйди. Ўғлининг орқасидан невараларини баҳона қилиб пойтахтга кетиб юборди. Ҳайҳотдай ҳовли хувиллаб қолди. “Мен онам ва болаларни олиб чет элга кетяпман”, деган хабарни олгач, қалби ҳам бўм-бўш бўлиб қолди. Бироқ асл фожиа кейин юз берди. Ҳануз шу ҳодиса юрагини яралайди – тифюрагига санчилганча турибди!

Қорлуқбек оиласини олиб қишлоққа – ота уйига меҳмонга келди. Ҳовлига тумонат одам йифилди. Қишлоқдагиларни ўғли миниб келган автомашина ҳам, хотинининг эгнидаги алламбало либослар ёки болаларининг юриш-туришидан ҳам кўра бир-бирлари билан тиллаша олмаганлари хуноб қилди. Ўғли ҳам, Меҳрбону, келин ва неваралар ўзбек тилини унтишган эди. Улар билан шу сабаб гаплаша олмадилар. Қишлоқ аҳли қандай тез тўпланган бўлишса, ўшандай тезлик билан ҳовлидан чиқиб кетишди. Бу билан улар гўё бу хонадон эшигини ўзларига абадий очилмайдиган қилиб ёпди.

Бу қандай бедодлик ахир?! Ўзбек ўзбек тилида гапирмаса?! Гапира олмаса?! Ўзбекни ўзбек тушунмаса?!

“Дада, ҳозир ҳеч ким ўзбек тилида гаплашмайди. Бу тил билан кўтарилиб бўлмайди!” “Шарақ” этган товуш отага кўтарила бошлаган овозни ўчирди. Балки ота-бола, эр-хотин, қариндошлик изларини ҳам ўчирди...”, “Ўзингники ўзагингни кесади”, деганлари шудир?..”

- Биз bemорни йўқотяпмиз! Сатурацияси тушиб кетяпти. Иситмаси жуда баланд!

Ажаб, Боботуркий шифокорларни тепадан туриб кузата бошлади. Улар bemор устида, худди, она каби парвона эдилар. Ўзларига касал юқтириб олишларини ўйламас эдилар. Шунда бош шифокор қизиқ гап қилди. У:

- Бемор “Covid-19” юқтирмаган. Унинг таҳлилларида вирус таёқчалари аниқланмади, – деб реаниматолог врачга юзланди. – Сиз қандай фикрдасиз, Дўстов?

- Мен ҳам бунга шубҳа қилаётгандим. Беморда “Covid-19”даги ҳолатлар деярли кузатилмаяпти.

- Бу руҳий изтироб синдроми, – гапга аралашди яқиндагина тиббиёт фанлари докторлик диссертациясини ёқлаган ёшгина олим Ҳабибов. – Бундай ҳолларда bemорни ҳаётга қайтаришнинг биргина йўли – уни яшашга ундашдир. Фақат биз унинг қандай бўлмасин, руҳиятига таъсир ўтказишимиш керак. Бемор ўтмишида кичик бир кўнгилсизликни ёдга олгудек бўлса, аҳволи оғирлашади. Фожиа юз бериши мумкин...

Боботуркий ўзининг чалажон танаси тепасида чархпалакдек айланди. Шу топда унинг яшагиси йўқ эди. Бир нафас ўзи босиб ўтган олис ўтмишини эслади. Яна хаёллари уни ўша дардли оламга бошлади...

“...Меҳрбону ҳам, ўғли Қорлуқбек ҳам кетиб қолишиди...

Вақт – ҳамма дардга даво. Орадан йиллар ўтди. Боботуркий ўзи билан ишлайдиган ёшгина адабий ходимга “Оғиз солди”. Кичкинагина “белгича” ҳам қилишиб, муносабатларидан яқинларини огоҳ этишди. Ширин орзулар, баҳтиёр кунлар бир-бирини қувлаб ўтаверди. Мұхаббат (хотини) Мехрбонудан қолган барча яраю дардларга даво бўлгандир. Қипчоқбекнинг туғилиши эса ораларидағи мұхаббат, ҳурмат, ишонч ришталарини яна маҳкамроқ боғлади. Боботуркий бу даврда янада баракали ижод қилди. Она тили – ўзбек тили билан боғлиқ тадқиқотлар олиб борди. Мактаблар очилди. Дарсликлар яратилди. Барчаси кўнгилда-гидек, бироқ аллақандай ёқимсиз, танани жунжиктирувчи шамоллар эса бошлади. Мұхаббатхон ўшанда Ўзбек тили дарслиги устида ишлаётган эди. Боботуркий “иш”нинг хомаки нусхасини ўқиб кўрди. Ажиб атамалар унинг эътиборини тортди: “Эга состави”, “Кесим состави”, “Гап конструкцияси”... бу каби атамалар китоб саҳифасини гўё қизғалдоқдай безаб турарди. Ахир, тилимизда бу сўзларнинг асл ва гўзал намуналари бор-ку! Мұхаббатхон бунинг сабабини оғаларга нисбатан мұхаббат белгиси, деб баҳолади. Боботуркий ҳануз англай олмайди: ўз мұхаббати ошён қурган ўша хонадондан қандай чиқиб кетганини... қулоғида бақириқлар, шанғиллашлар, аллақандай идишларнинг синган овозлари... Трамвай бекатига келганида, унинг қўнғироғи товушидан ўзига келди...

Аввал Мехрдан, кейин Мұхаббатдан айрилган Боботуркий ҳаётдаги мақсадини ҳам, йўлини ҳам йўқотиб қўйди. Ичкиликка берилди. Қачонлардир келишган, барваста ўқтам йигит бўлгани, ўз тили ва эътиқодида событ инсон бўлгани энди тарихга айланганди...

– Адреналин! – қичқирди Дўстов. – Икки кубик ўтказинг. Пулс ...тушиб кетяпти! Электрошок...

Устига кўк гулли оқ мато ташлаб қўйилган, рангида ранг йўқ, бир аҳволда ётган Боботуркий... яна ўз ўтмишига қайтди. Уни яна ўз тарихи чорламоқда эди...

“...Ҳаёт эса Боботуркийни унутмади. Уни сўлиб бораётган чеҳраси, букилиб бораётган алп қомати хор бўлмаслигини истади: уни яна бир бор сийлади.

Эътиборхон. Ҳар қалай, у кутган, оқила, доно, гўзал ва мулоҳазали аёл эди. Ўғиллари Ўғузни ҳам чиройли тарбия қилишди. Боботуркий яна бир вақтлардаги каби ишга “шўнғиди”. У жуда қийналиб ишларди. Замон оғир эди. Ўғли, кўзининг оқу қораси, нуридидаси... қатағон қилинди. Эътиборхонни бу дард енгиб қўйди. Бир меҳрибон қўл уни тобора чўкиб бораётган елкаларидан тутмади... Боботуркий бироннинг ярасига малҳам бўлолмади, бўлолмасди, у ўз дардига даво изларди... Ана шундай синовли, мاشаққатли кунларнинг бирида у билан жуда узоқ ҳиллардан буён бирга ишлаган Сўзсулув хонимга қўнгли суст кетаётганини сезиб қолди. Ўзидаги бу туйғу олдида таслим бўлди. Тўғри, Сўзсулув хоним таърифини келтирганимиз каби табиатан бекарор аёл, бироқ бироз барқарор ҳам. Сўзсулув хоним шундай аёл эди: у ечилмаётган масалани осон ҳал қиласди, қўндиришни биларди. Шундай осон, жўн тушунтирадики, рози бўлишдан ўзга чора қолмасди. Бир сафар у:

“Халқни қийнаб нима қиласиз? Ҳар ким хоҳлаган сўзини ўз таъбича қўллайверсинг, – деб қолди. – Дейлик, ўтириладиган буюмни “стул”; худуд маъносидаги сўзни “район”, “область”, “территория”; хабарларни ўқиб турадиган буюмни “газета”, “журнал” деб ишлатишнинг зарари йўқ. Қайтанга тилимиз бойийди. Шунча сўз қўшилади, ҳам халқлар ўртасидаги дўстликни мустаҳкамлайди, бир-бирига ҳурматини оширади, – деб туриб олди. Боботуркий Сўзсулув хонимни

ҳақ деб ўйлади ўшанда (ваҳоланки Муҳаббат, Мехрбонулар билан ҳам оралари шу каби муаммолар замира бузилганди). Тўғри-да, ёлғиз ўзининг кўлидан нима ҳам келарди. Стулни "курси", столни "миз", "газета"ни "жарида" сифатида қўлланаётганидан нима наф, барибир ҳам бу сўзлар ҳам туркийча бўлмаганидан кейин?! Аммо бунга эътибор берувчилар бўлди.

– Софлик бузилади, дадаси. Тилимизга нисбатан бундай муносабат унинг мавқейини пасайтиради. Тилимиз жуда бой ва гўзал. Эсланг, "сувинер", "айва", "Байкал", "Сибир", "утюг"... Бу сўзлар ўзимизники эди... Сиз қарши туринг, курашинг! Пайти келганида ўзбеклар ўзбекчани тушунмайди. Ҳеч ким ўзбек тилида гапирмай қўяди...

Эътиборнинг бу гапига жавоб бўлиб унинг лўппи гўзал юзида қолган беш панжанинг излари бўлди.

Шу-шу Боботуркий Сўзсулув хоним билан бирга. Бироз эркалиги бўлса ҳам, ҳар қалай, у ташлаб кетмади, ўзи ҳам уни ташлаб кетмади...

Сўзсулув хоним уйни ўзича жиҳозлади. Унга кўпроқ чет эл буюмлари ёқар экан. Аллақайси мамлакатларда ишлаб чиқарилган буюмлардан олиб келтиртирди. Энди Ўзбек Боботуркий ҳам бошида дўппи эмас (у дўппини фақат таъзияларгагина кийиб борадиган бўлди), шляпа, кепка кияди. Хуллас, ўзгаришлар кўп. Аммо Боботуркийнинг кўнгли ярим, ҳувиллагандай, бўм-бўш, аллақандай... ўзи ўзига бегона. Бир томондан Мехрбону, Муҳаббат, Эътиборларсиз Ўзбек Боботуркий – ҳеч ким, бошқа томондан юрагида аччиқ бир тугун... пажмурда қалб...

Авваллари уни барча танир, бутун Оврўпо салом берарди. Ҳозир эса ёнидаги кишининг гапини таржимасиз тушунмайди. Қайси куни тўрттинчи қаватда яшайдиган қўшниси:

– Боб (уни шундай чақиришади), эшигимнинг кнопкасини босиб, звонит қиворинг, – деб қолса бўла-дими?

Ичидан зил кетса ҳам билдирмади. Бироз туриб гаплашишди қўшниси билан коронавирус ҳақида.

– Э, коронавирусни лечится қилиб бўлмасакан. Дори топилмайди. Аптекада “шапка” билан сотяпти. Везде шу проблема...

Кулоқлари остида қўшнисининг шанғиллаган шу сўзлари акс-садо берганича уйига кирди. Сўзсулувхоним аллақандай шоу дастурни томоша қилиб ўтирган экан. Бошловчилар ўз шеваларида қўрсатувни олиб боряптилар...

– Сатурация тушиб кетяпти, доктор. Беморнинг юрак уриши пасаймоқда...

– Сатурация 51, – ташвиш билан шанғиллади яна кимдир.

Ўзбек Боботуркий буларнинг ҳаммасини тепадан кузатиб тураг экан, унинг ҳаёти учун жон чекаётган шифокорларга раҳми келди. Қани, барча касб эгалари фидойи бўлсалар. Ўзи-чи?.. Наҳотки, ўзи ҳам фарзандларини шу тарзда аро йўлда ташлаб кетаверса?! Ёдига қалин ўртоғи Маҳмуд тушди. Маҳмуд:

– Ўзбекжон, сенинг гўзал қалбинг, алпдай қоматинг бор. Сен худди улоқда от чоптириб кетаётган чавандозга ўхшайсан! Зеро, сен минган от ҳам учқур! Мени Маҳмуд Кошғарий қилган ҳам сенсан, дўстим! – деганди.

Шошма, унга руҳий мадад берган яна бир буюк даҳо бор! Уни унугиб-да бўлмас! Ахир у-ку унинг гўё “ўлган жуссасига Масиҳ анфоси билан жон кийдурган” зот! Навоий!!! Алишербек!!! Боботуркий шу онда, назарида, майда-чуйдаларга ўралашиб қолган аёлманд киши сингари хархаша қилаётган нотавонга ўхшатди ўзини.

У шу аҳволга тушиши керакмиди?!

Ахир, курашиши керак эмасми?!

Ўлим ва ҳаёт бўсағасида турган одам нимани ўйлайди? Яшашни, албатта. Ўзбек Боботуркий ҳаётини хатоларини тўғрилаб давом эттиromoқчи бўлди. У, аввало, жондан севган азиз инсонлари Мехрбону, Муҳаббат, Эътиборхонларни қайтармоғи керак. Ахир уларсиз ҳаёт йўқ унга. Уларсиз яшай олмади, яшай олмайди! Сўзсулув хоним ҳам ёмон эмас. Ҳаммалари бир оила бўлиб яшайдилар: уч ўғил, ўттизга яқин набиралар билан. Ният қилди: Оврўпога боради, бутун дунё кезади. Асл Ўзбек Боботуркий ким эканини кўрсатиб қўяди!

– Профессор, профессор! – шифокорнинг ҳаяжонли овози янгради. – Бемор ўзига келди. Унинг ҳамма кўрсаткичлари жойида. Ҳатто зўр, энг соғлом одамларникайдай!..

Профессор эринмай Боботуркийни текшириб кўрди. Шогирди ҳақ эди. Беморда ҳеч бир касаллик аломати йўқ эди. Профессор:

– Отахон, Сиз соппа-соғсиз! Сиз билан мўъжиза юз берди!!! Сиз энди, Худо хоҳласа, абадий яшайсиз!!!

Ўзбек Боботуркий миннатдорлик билан жилмайиб қўйди.

Бахтиёр НУРИДДИНОВ



БОШПАНА

Ташқаридаги шаррос ёмғир ёғарди.

Дераза ортидан доимидек Хонтоқнинг сўниқ, аммо жудаям фусункор манзараси кўзга ташланиб турибди. Аҳён-аҳён дарё бўйидаги теракзорнинг шамолда чайқалиб, шовуллаши қулоққа чалинади. Айвон шипидан шошқалоқлик билан чаккиллаб тушаётган томчиларнинг товуши гоҳ-гоҳ одамнинг хаёлларини бузиб, чалкаштириб ташлайди. Унга хос тарзда ора-орада ёмғирдан қочиб, уйнинг мўриси тагига беркинган бир жуфт мусичанинг беозоргина ғув-ғувлаши эшитилади. Томчиларнинг шитирлашини айтмаса, уй ичидаги сукунат мана шу онларнинг устидан буткул ҳукмронлик қилишга шай турарди. Аммо на ёмғир, на қушлар, на табиат бунга имкон беришни хоҳлашмасди.

Ҳаммаси бундан ҳам бошқача бўлиши мумкин эди. Бироқ диққатини ҳув боғ четидаги сарғиши курси ёнида тинимсиз айланадиган аёл кишининг шарпаси тортди. Соябон тагидан унинг ярим гавдасига мос ҳолдаги бејирим оёқларигина кўзга ташланарди. Эслаб кўрса, у охирги уч-тўрт кун ичида худди шу вақтда ана шу ерга келишни ҳеч канда қилмасди. Аслида, бу уйни яқиндагина сотиб олганди. Ҳатто кўчиб ўтишга ҳам ултурганича йўқ. Базўр, амал-тақал таъмирдан чиқариб, эндингина жиҳозларни жойлаштироқчиди. Сотиб

олган уйи унчалик ҳашамдор ҳам эмас. Бунинг устига, шаҳарнинг энг чеккасида жойлашганди. Фақат тоза ҳаво, ойнадан кўриниб турадиган табиат манзаралари-ни айтмаса, кичкина шаҳарчадаги икки қаватли бу уй-нинг иноқ яшайдиган ўн-ўн беш чоғли қўшниларидан бошқа деярли мақтандулик ҳеч вақоси йўқ эди.

У ўша нотаниш кимсага анчагача тикилиб турди. Сўнг уни кузатишдан чарчади. Чунки аёлайнан бир хил ҳаракатларни тақоррларди. Бироз у-бу юмушлар билан овуниб, чалғигандек бўлди. Ўзини ҳеч нарсага эътибор бермасликка ундан кўрди. Аммо барибир уддалай олмади. Кўчадаги аёл сурати борган сари фикрини бўлиб, тобора ўзига жалб қиласарди. Ноилож унга яна термилди. Бу сафар аёлнинг хатти-ҳаракатини узоқ томоша қилиб турди. Худди болалар ўйинчоғига ўхшарди – кимдир мурвватини бураб кетгану, тўхтатиш ёдидан кўтарилиб қолгандек гўё. Ҳақиқатан ҳам, бирон хатосиз бир жойда айланарди. Ўша ёмғир сувларига бўкиб, ўтириб бўлмас аҳволга келиб қолган сарғиш курси атрофида тинимсиз у ёқдан-бу ёққа бориб келарди. Шу топда унинг олдига югуриб чиқиб, ҳол-аҳвол сўрамоқчи бўлди. Хаёлидан ўтган бу фикрдан бир сесканиб тушди. Ахир бориб нима ҳам дерди. Уни танимаса, қандайлигини билмаса. Бирпасда шаштидан қайтди. Лекин унинг олдига чиқишистаги бошини чирмовиқдек ўраб ташлаганди. Қани эди бу ўйлардан қутулолса. Яна бир неча бор ташқарига ошиқди. Бу сафар уни ёмғир тўхтатиб қолди. Чунки унда соябон йўқ эди. (Эрталаб бу ёққа келаётганда ҳаво очиқ эди-да!) Энди ҳар бир нарсадан баҳона излашга тушди. Эшик тирқишидан кираётган изғирин этларини жимиirlatворди. Шундагина аёлга астойдил ачинди. У кун бўйи ёмғир остида-ку ахир, деб ўйлади. Шу онда ўзининг бераҳм ва инсоғизлигидан нафратланиб кетди. Ич-ичидан ўзини койий бошлади: садқа одам кет!.. Бу танбех фикрларини бироз тийраклаштиргандек бўлди. Шашт билан ёмғирпўшини елка-

сига ташлади-ю, ташқарига отилди. Бироқ кеч эди. Бу пайт унинг ўзи ичкарига кириб келганди. Ҳа-ҳа, шундай бўлди. У қархисида совуқдан дилдираб турарди.

– Киринг, – деди довдираб зўрға.

Беихтиёр унинг қўлидаги соябонидан ушлаб, ичкарига тортди. У шошиб қолганди. Талмовсираб нима қилаётганини билмасди ҳам.

– Нимага туриб қолдингиз?!.. – сўради яна худди эски қадрдонлардек.

Аёл индамади.

– Кун бўйи ёмғирда қолиб кетдингиз чоғи. Бировни кутяпсизми?.. – деди айбдор оҳангда.

У ийманибгина бошини сарак-сарак қилди. Бу унинг “Йўқ” дегани эди.

– Нима қилиб жалада юрибсиз унда? – сўради таажжубланиб.

Аёлнинг индамаслиги уни янада тетиклаштиарди.

– Биз бу уйда яшагандик, – деди дабдурустдан аёл ниҳоят чеҳраси ёришиб.

У ичкарига кирганидан хурсанд кўринарди.

Ташқарида нимадир қаттиқ гумбурлагандек бўлди. Хона бир ёришиб сўнди. Ҳойнаҳой Хонтоқ тарафда момақалдироқ чақмоқ чалиб, чақин чақнатди-ёв!..

Унинг назарида эса, осмон узилиб ерга тушганди гўё.

Аёлнинг оғзи ёпилмасди. Бояги торитинишдан асар ҳам қолмаганди. Худди уйидагидек эркин ҳис қиласарди ўзини. У тинмай гапирав, шу аснода аста-секинлик билан ичкарига қараб, юриб борарди. Ҳаёллар гирдобида:

– ...Оилам билан шу кичкина хоналарда ҳаётимнинг қанчадан-қанча яхши кунлари ўтган, – деганини илғай олганди, холос.

Шу дамда болалиги ёдига тушди. Ота-онаси билан бирга яшаган йилларини эслади. Ака-ука ҳар тонгда айвонда ёзиладиган дастурхон атрофида тўпланишар-

ди. Онаси нонушта тайёрлаб, дастурхонга тортугунига қадар хархаша қилишиб, дунёни бошига кўтаришарди. Еб, ичиб тўйғанларидан кейин ҳаммалари ўз юмушлари билан кетишарди: бири ишга, бири ўқишига. Кичкина укасини бўлса боғчага ташлашарди. Кеч тушганда яна уйларида йиғилишарди. У кунлар энди ўтмиш, фақат таассуротларгина қолган.

Бир пайт аёлнинг овози бутунлай тинди. Айвонда тақа-тақ тўхтади-да, ўйчан туриб қолди. Ўзи атрофида айланиб юрган сарғиш курси томонга ғамгин тикилди. Ўшандаги совуқдан жунжикиб, кўчада қолган пайтлари эсига тушдими, беихтиёр кўзларига ёш қалқди. Уни юпатмоқчи бўлганди, шошқалоқлик билан:

– Болаларимни олиб кирсам майлими? – деб ялиниб сўради.

У нима қиларини билмай қолганди. Бир унга, бир кўчага қараб жовдирарди. Аёл яна ўша сувга бўкиб, шалаббо бўлган сарғиш курси томон боқди. У нигоҳлари билан аёлнинг болаларини қидира бошлади. Кўзлари ёмғир остида қолган дараҳтлар-у, ўша дардисар курсидан бошқа нарсани илғамасди. Аммо аёл илтижо билан унинг розилигини кутиб турарди. У баттар довдиради. Чунки аёлнинг ёлвориб қарашлари эсанкиратиб қўйганди. Беихтиёр “майли” дегандек бошини қимирлатди. Аёл шу ондаёқ ташқарига ўқдек отилиб чиқиб кетди. У ҳаммасини айвондан кузатиб турди. Аёл катта дараҳт танаси панасига яшириниб, шумшайиб олган болакайларни тортқилаб чиқарди. Уларнинг бири уч, иккинчиси беш ёшларда эди чамаси. Уст-бошлари ивиб чинор пўстлоги рангига қоришиб кетгани сабаб, кўзга ташланмасди ҳам. Ҳаш-паш дегунча уччалови ичкарида пайдо бўлишди. Ҳатто қачон киргандарини-да пайқамай қолди. Катта ўғли кира солиб уйни гир айланиб ниманидир қидира кетди. Ниҳоят ётоқхонанинг бир бурчагида қаравот оёқлари тагида қисилиб ётган айиқчасини топиб,

беғуборларча бағрига босди. Кичкина ўғли эса, пилдіраб түғри ошхонага борди. У ердаги курсига чираниб юриб чиқди. Амаллаб ўрнашиб олгандан сўнг:

– Нон, – деди дастурхондаги ноз-неъматларга ишопра қилиб.

Уни кўрган акаси чопқиллаб келиб укасига дакки берди.

– Булар сенгамас, – деди у босиқлик билан. Акаси ўзини катталардек тутарди. Укаси унинг гапларига парво ҳам қилмади.

– Қорним очди, – деди чинқириб йиғлаб. У шундагина ўзига келди. Хотини “Тамадди қиласиз”, деб қўлига тутқизган егуикларни аллақачон унтиб юборганди. Шошиб бориб нондан ушатиб, болакайга узатди. Яна пишлок, қайнатилган гўштдан кесиб, ёнига қўйди. У тортинмай ҳаммасидан бирма-бир олиб ея бошлади. Акаси бурчакда тамшаниб, ютиниб турарди. Совуқда очқаганини шундоқ кўзларидан билса бўларди. Укасининг ёнидаги курсига уни ҳам ўтқизиб, дастурхонга таклиф қилди. Олдига у-бу егуикларни қўйиб ейишга уннади. Бола ийманибгина ҳусайни узумдан бир шингил олди-да, бирин-кетин доналарини узиб, секингина оғзига солди. Аёл деворга суюнган қўйи диққат билан уларни кузатарди.

– Нимани кутяпсиз? Сиз ҳам келинг! – деди унга ҳам. Аёл қимтинибгина аста уларга қўшилди. Аммо ҳеч нимага қўл урмади.

– Олинг! – деди у яна қистаб. – Очифи, ёлғиз томоғимдан ҳеч нарса ўтмаётганди. Яхши бўлди.

У бироз вазиятни юмшатишга ҳаракат қилди. Аёл ҳам кичкина ўғлига танбех берган киши бўлиб, орапорада у-бу егуиклардан чимчилаб-чимчилаб еярди. Аммо болакай тўйганди. Ўзини курсига борича ташлаб, ялпайиб суюнчиққа суюнволди.

– Нимага бизни уйга кириб олдингиз? – дабдурустдан сўроққа тутди болакай жиддий. Унинг оғзидаги

луқмаси томоғига тиқилди. Чайналиб нима деярини билмай, нажот билан аёлга қаради. Онаси:

– Унақа беъмани гапларни гапирма. Амакинг уста. Үйимизни таъмирлаб берди, – деди ўғлига.

– Шунақа, – деб қўйди у ҳам болага мўлтиллаб.

Она-болаларни тиланчи деб ҳам ўйлади. Сўнг бўлаётган бари ишларга ўша ёмғирда ивиб, шалаббо бўлиб кетган сариқ курси айбдордек айвондан ташқарига кўз ташлаб қўйди. Унинг қарашларида яна бирон кимса бормикин, деган хавотир ҳам мужассам эди.

– Бошқа ҳеч ким йўқ, – деди аёл унинг хавотиромуз юзларига термилиб, хаёлидаги фикрларни ўқигандек. – Тиланчи ҳам эмасмиз.

Хижолатомуз оғиз жуфтлаган эди, гапиришга қўймади.

– Ҳозир кетамиз. Болаларим “Үйимизга борайлик”, деб иззиллашганди. Уларни қўрсатгани олиб келгандим, холос. Сизга раҳмат, – деди ва шошиб ўғилларини етаклаб, кетишга чоғланди.

Аёлнинг гапларидан ўзларининг қисматини уқди. Онасининг тақдири кимлардадир қайтарилаётгандек туюлди. Отасини узоқ сафарга кузатишгани кўз олдига келди. (Бу онасининг юпанч сўзлари эканини катта бўлибгина тушунишганди.) Ўшанда ака-ука айюҳаннос солиб роса йиғлашганди. Шундан сўнг отасини бошқа кўришмади. Онаси билан яшаш учун қилмаган ишлари қолмади. Отасининг яқинлари деярли улардан юз ўгиришганди. Кейинчалик ўзлари яшаган уйдан ҳам қувиб соли什ди. Бир муддат кўчада қолиши. Аввалига у қариндошиникида, яна бир кун бошқасиникида яшаб юришди. Дарбадар ҳаёт жонларига теккач, ижарага кичкинагина хона олишди. Аҳён-аҳён онаси болаларини етаклаб бир вақтлар ўзлари баҳтли ҳаёт кечирган қадрдон уйлари ёнига бошлаб келиб, тунда деразадан тараалаётган шуълаларга термулиб ўтиришарди. Ўша

пайтларда онасининг кўнглидан ўтказган изтиробларни эндиғина тушуниб турибди.

Бориб пойгакда уларни йўлини тўсди. Аллақачон қоронғи тушган эди. Айни шу дамда бошқалар сингари икки норасидасига кўшиб муштипар аёлни совуқда кўчага ҳайдаш учун вижданни йўл бермади. Ҳаётнинг мурракаб сўқмоқларида якка-ёлғиз қолган бу ожизанинг нима айби бор! Эндиғина дунёнинг шафқатсиз ўйинлари-ю, раҳмсиз ҳукмига дуч келиб, умрнинг аччиқ таъмини татаётган, худди ўзлари сингари онасининг ёлғиз умиди, суячни бўлган манави икки болакайнинчи?..

У шоша-пиша кийимларини кийди.

- Сизлар қолинглар, - деди ўтинганнамо ва уй калитини эшикнинг оғзида қолдириб, чиқиб кетди. Шу топда тутқунликдан халос бўлган қушдек ҳис қилди ўзини. У унчалик бой бўлмаса-да, аввалгидек қашшоқ ҳам эмасди. Йўл-йўлакай бу ишини тўғрими-йўқми, деб ўйларди. Ўша лаънати сарғиш курси ёнига етиб боргандан оёқ товуши эшитилди. Қайрилиб қарамоқчи бўлганда:

- Шошманг! – деган хитобдан вужуди титраб кетди. Бу гоҳ онасининг, гоҳ ўша аёлнинг овозига ўхшарди. Кулоқларига ишонмади. Аста у томонга ўгирилди. Аёл соябонини узатган кўйи рўпарасида турарди. Унинг нигоҳлари онаси каби меҳрибон ва мағрур эди. Шу алфозда соябонни қандай олганини ҳам билмади. Аёл уйга кириб борарди.

Кетмоқчи бўлганда соябон тутқичидан бир уюм қоғоз шитирлаб, ерга сочилди. Бу уйнинг хужжатлари эди. Ёмғирда ивиб, лойга қоришаётганди. Уларни қайтариб бермоқчи бўлди-ю, аммо орқасидан боришни истамади. Агар инсон қисмати мана шу қоғозларга битилган айқаш-уйқаш ёзувлар-у, сиёҳи қотган муҳрга боғланган бўлса, тупроққа қоришиб йўқ бўлиб кетсин бу матоҳлар, деб ўйлади.

У ҳушига келгандა аёл шарпаси йўқлик сари сочилиб, аллақачон ғойиб бўлиб улгурганди. Уйнинг ёлғиз йўлаги билан остона пойида бераҳм дунёнинг қақшатқич зарбаларидан ўлакса ҳолга келган яланғоч хаёлларнинг жасади ётарди гўё. Унинг ортидан ичкарига киришга ошиқарди-ю, аммо юраги бунга дов бермасди. Қандайдир ваҳм худди ўргимчак тўри мисол оёқларини чирмаб ташлагандек эди. Қанчалик ҳаракат қилмасин қимирлашга ўзида куч тополмади. Фақат нигоҳларигина унинг изидан истаксиз судралди, холос. Бутун вужудида мажол йўқ эди. Шуурида эса хаёлларини таг-туги билан қўпориб ташлаган бу уй ҳақидаги хотиралар ўрнашиб олганди. Яна ўша соябон тутган, ёмғир остида уззукун қолиб кетган муштипар онанинг суврати айланиб юрарди. Унинг бўлса, ўзи яқиндагина неча йиллар давомида йиғиб-териб не кўйларда яшаш учун сотиб олган кулбадеккина бошпанаси ва болалари билан у ерда кечирган баҳтиёр ҳаёти ҳақидаги эзғин сўзлари ҳеч тинчлик бермасди.

Рўпарасида ўша қарашларини бузиб, чилпарчин қилиб ташлаган, беғубор болаликнинг кувончларига шерик уйнинг ўзи виқор тўкиб турарди. Ичкарида эса, икки норасида боласини бағрига босиб, эркалатиб, шоду хуррамлик гаштини суроётган баҳтли она; ёмғирдан қочиб, уйнинг мўриси тагига беркиниб – пинжларига суқилишиб – баҳтиёрлик сурурини totaётган беозоргина бир жуфт мусиҷа... Буларнинг бари чинмиди ёки тасаввuri маҳсулими, билмайди. Билгани энди унинг ўзи ўша сарғиш курси атрофида умидвор айланётгани эди, холос.

Бироқ бир неча кун аввал мана шу уйдан бошпана сотиб олгани бор гап.

Ғайрат САЙДУЛЛАЕВ



ДАРАХТ

Қўзимни очдиму япроқлар орасидан сизиб тушаётган қуёш нурларини кўрдим. Қўз олдим жимирилаб қолди. Аввал япроқлар, сўнг дараҳт тиниқлашди ва мен мана шу дараҳт соясида ётганимни англадим. Руҳим сархуш, қувончим чексиз эди. Мени майсалар кўтариб туради. Кулоғим остида майнин, шитирланган овоз руҳимга сеҳрли қўнғироқчаларнинг жаранги каби таъсир қиласр эди. Теварагимда капалаклар учиб юрганини ҳис қилдим. Туновин амакиваччам икковимиз уларни ушлаймиз деб қанчалар овора бўлдик-а. Кулгим қистади: амакиваччам капалак кетидан қуваман деб сув оқаётган ариққа тушиб кетганди.

Юрагим ҳисларга кўмилиб туради. Қўшиқ билмайдиган, тортичкоқ ва камгап бола (тоғам менга шундай дакки берарди!) шу маҳал овозимни баралла қўйиб қўшиқ айтгим келарди. Жиндаккина ўзимга ҳайрон бўлдим, жилмайиб қўйдим. Осмон тиниқ эди. Унда-мунда пахта толаларидек сочилган оппоқ булатларни айтмаса, осмонни биргина қуёшнинг ўзи эгаллаб туради. Мен осмоннинг ҳақиқатан охири йўқ бўлса, (Отамнинг тушунтириши!) қандай қилиб кўк рангда кўринишини ҳечам англаб етолмасдим. Мен тушунмайдиган нарсалар кўп эди. Аммо ҳадеб сўрайвергим келмасди. Кўп эзмаланаверсам, катталарнинг тез жонига тегишимни билардим. Тўғрироғи, акам «Кўп ғалча бўлма!» деб уришиб ташлаганидан кейин

англаганман буни. Сирли нарса онгимда сирлилигича қолар, баъзан ўзим ўша тилсимларни ечишга тиришар эдим. Бу менда ғалати завқ уйғотарди. «Нега осмонга чиқиб бўлмайди?» ўйлардим мен.

«Чунки унинг дараҳтникидек шохлари йўқ, ўзи эса жуда катта. Фақат учиб чиқса бўлади. Мен эса учоммайман». Бу жавобим ўзимга ҳам маъқул келганидан яна жилмайиб-жилмайиб қўярдим.

Кимdir томоқ қириб йўталди. Бошимни кўтариб қарадим. Ариқ ёнидаги йўлакчадан қари бир киши ўтиб кетарди. Кўлида ҳассасиям бор. Мени кўрмади. Ариқ эса дараҳтдан йигирма метрча нарида эди. У киши яқинда қазо қилган бобомга ўхшаркан. Айтганча, мана шу дараҳтним ўша бобом эккан. Тирик бўлганида эди, ҳадемай пишадиган мевасини еган бўларди. Ўрикларини ўзим териб тушган, ўзим ювиб, ўзим қўлига берган бўлар эдим...

Мен мириқиб керишдим. Оёғимда ўрмалаётган қумурсқаларни тушириб ташладим. Қўлимни кўйлагим тагига тиқиб бироз қашиндим. Қўйлагимнинг орқа томонига майса ранги униқиб қолибди. Энамдан яна койиш эшитадиган бўлдим-да. Қоқиўтнинг ҳали ҳам димоғимда турган ҳиди мени яна ётишга ундарди. Телевизор, кўчадаги ўйинлар, тоғамлар ва аммамларнинг эркалашлари нега тез жонимга тегади-ю, нега шу жойга ётиб, шу дараҳтга чиқиб юрсам, ҳеч зерикмайман – бундан ажабланмас эдим. Ҳатто бу ҳақда ўйламасдим. Ҳар қалай, кўчадаги «чиллак» ўйини билан дараҳтда, у шоҳдан бу шоҳга ўтиб юришим ўртасидаги тафовутни ҳис қиласдим ва менга дараҳтга чиқишлиар қадрлироқ, қизиқарлироқ туюларди. Ҳар доимгидек, уйимиз томондан энамнинг овози эшитилди. Қаердагигимни билади, овқат тайёр бўлиши билан чақиради. Баъзан койиб ҳам қўяди: «Ҳа, ер ютгур-а! Мунча шу дараҳтга ёпишмасанг, мана, кўча бор-ку, болам?»

Ўрик дарахти ҳовлимиз тўрида салобат ташлаб турарди. Олдига йўнғичқазор ёқалаб борардим. Кўпинча амакиваччам иккимиз бўлардик. Бундай пайтда мен ошхонадан озгина туз олиб чиқар, у эса ҳали қотмаган отқулоқлардан териб келар эди. Биз дарахт тагида ястаниб олиб, отқулоқларни тузга теккизиб-теккизиб ер эдик. То тўйгунча отқулоқ чайнагач, қўлларимни ёстиқ қилганимча осмонга тикилиб ётардим. Дарахтнинг танаси, шохлари, майин шамолда қимиirlаб турган барглари ва уларнинг орқасидаги мовийлик мени ҳаяжонга соларди. Бир куни отам уйимизни оҳаклаётганда «Битта хонамизни осмон рангга бўянг, ота!» деб бироз харҳаша қилганман. Отам менга ҳайрон бўлиб қараган, сўнг энамга юzlаниб: «Бу кичкинангга нима бўлган, ҳадеб бир осмон дейди, бир дарахт дейди?» деган эди. Ниятим ушалмади, барибир. Кейинчалик шуни эслаб кулиб қўядиган бўлдим.

Ишхонадаги столим устида биттагина сурат бор: фақат дарахт ва осмон акс этган. Бир сафар суратга узоқ тикилиб қолиб, бошлиғим кириб келганини ҳам сезмай қолибман...

Кейин дарахтга чиқар эдик. Амакиваччам ён тарафдаги йўғон шохга ўтириб олар, мен тирмашиб турган шохларга чиққиси қелмасди. Мен доимо баланд шохларда юрардим. Ўрнашиб олгач, пастроқ шоҳда ўтирган амакиваччамга «ҳей, сен баландми, мен баланд? Мени қара, энг учига чиқдим, осмонга етаёздим» дердим. У менинг гапларимга қўпам эътибор бермас, қўлетгулик шохчалардан довуччаларни узарди-да, карсиллатиб ея бошларди. «Шунча дўнгга чиқиб нима қиласан, – дерди у, – яна ерга тушасан-ку? Барибир осмонга учеб кетолмайсан. Сенданам мен зўр ўтирибман. Тушиб кетсамам, унча оғримайди».

Ўша йили амакиваччам мактабга борди. Унинг мендан бир ёш катта эканлигини ўшанда билгандим. Отамга «мен ҳам мактабга бораман» деб йиғлаган-

ларим энди ғалати туюлади. «Келаси йил борасан, ўғлим, ҳали кичкинасан», деса ҳам уйда чинакамига жанжал кўттарган эдим.

Куз кириб, дарахт япроқлари сарғайиб қолди. Унинг олдига бормай қўйдим. Қишида ўлгудай зерикиб кетдим. Мен мактабга ошиқар эдим. Аммо... қўлимга дафтар-қалам олганимдан сўнг, назаримда, вақт жуда тез ўтди. Уч-тўрт йил дарахтга чиқиб тушиш, унинг тагида ётиш одатимни ташлолмадим. Амакиваччам фақат ўрик егани чиқарди, холос. Биз капалак ҳам тутмай қўйгандик. Отам менга уй ишларини буорадиган бўлди. Нимадандир узоқлашиб бораётганимни ҳис қиласардим. Бир томондан... тезроқ катта бўлгим келарди. Ахийри, қоқиўтнинг ҳиди ҳам у қадар жозибали туюлмай қолди.

Иш столимга ўтириб бир зум суратга тикилиб қоламан ва бирдан юрагимда алланималар уйғониб кетади. Юрагимда соф, қадрдон ҳислар мавжурати. Лаҳза ўтмай, яна қаёққадир йўқолади. Шаҳарлик ҳамкасб жўрамни амакиваччамга таништираётганимда ҳам юрагим бир ҳаприқиб кетганди. У эшақдан тушиб биз билан қўл бериб саломлашди. Биз эса галстукда эдик. «Ке, чой ичамиз... тўртта ҳангома», деб қўйдим. «Майли, кечкурун ўтарман, ҳозир буғдой ўргани кетаяпман», деди у.

Жўрамни меҳмон қилдим. Овқат еб бўлиб сигарет чеккани ташқарига чиққанимизда уни беихтиёр ҳовли тўрига бошладим. Энди йўнғичқазор ўрнига маккажўхори экилган эди. Жўрам нима учун бу томонга юрганимизни тушунмади. «Бирор нимани кўрсатмоқ-чимисиз?» деб сўради у. Қисқа жимликдан сўнг, «ҳа, шу... биласизми, шу ариқ илгари катга эди-да, ҳозир қаранг, ичи тўлиб, ўт босиб ётибди», дедим. Жўрам менга ажабсиниб қаради. Мен эса дилимдагини айтольмадим. Айтмоқчи бўлганим бошқа эди. «Дўстим, мана шу тўнка ўрнида бир пайтлар катта дарахт бўларди. Гўнг уюб қўйилган мана бу жойда бир пайтлар мен дарахтга, осмонга тикилиб ётар эдим», дегим келарди унга.

Анвар СЮНОВ



ОТА УЙ

Ёмғирдан сўнг ярқираб чиққан қуёш нурлари кўпчиган тупроқни қиздира бошлади. Тизза бўйи ўтлоқлар устида тебранаётган буғ ўрлаб кўм-кўк баҳор осмонинг сингиб кетади. Пичанзорлар орасида бир маромда сайраётган муллатўрғайнинг чуғур-чуғури адир бўйлаб кезади. Фўбдинтоғ этагидаги ёйилмаларда пода боқиб юрган болакайларнинг қий-чуви қушлар чуғур-чуғурига эш бўлиб, олис-олисларга учмоқда. Қибладан эсаётган намхуш шабада ёмғир аралаш тупроқ ҳидини узоқларга олиб кетяпти.

Сел йўлида ҳосил бўлган ўнгирда бир қўнғир тулки шабада эсаётган томонга тумшук чўзиб, қўксини елга тоблаб бирпас турди. У шамол йўналиши бўйлаб ҳид олмоқда гўё. Кейин сарак-сарак қадам ташлаб сал илгарироққа юрди. Сои бошида эса нам тортган шоҳшаббанинг бурқисган тутуни кўринди. Олов эгаси тутун тагидаги қўрадан иккита усти куйган картошкани ҳалачўп билан думалатиб олди. Картошканинг пўсти чўғда куйиб, ёрилиб кетган. Ўша ёриқлар орасидан күюнки аралаш димоғёрап ҳид тараалди. Қўнғир тулкини ана шу таъм безовта қилгандир, эҳтимол. У қўнғир бошлар оралаб шу томонга йўл солди. Бироқ осмонда қандайдир ўлаксахўр қуш пайдо бўлдию тулки яна қўзикулоқлар орасига уриб кетди.

Эгри-бугри сайҳонлик этагидан чиқиб келаётган отлиқ шу томонга ўрлади. Гоҳ пасайиб, гоҳ тезлашиб турган ел бир маромда тебраниб келаётган жийроннинг думи ва ёлини чилтор қилларидек ўйнайди. Офтоб отнинг хурмо тусига оловранг жило беради. От бошини селкиллата-селкиллата сувлигини ғижирлатиб қадам ташлайди, оғзидан чайналган ўт тутамлари тушади. У яна илкис энгалиб коврак ёки барра шувоқнинг бўлиқ жойидан узиб олади. Отлиқ шундай кезлари юганни силтаб тортади: “Чух, касофати мол”, деган товуши эшитилади унинг. Йилқи биқинга тушган тўмтоқ тепкидан тўрт-беш қадамга сергак тортиб, йўртиб кетади.

– Ҳорманг биродар, ош бўлсин, – деди отлиқ куймаланиб картошка тозалаётган кишига, – қўйлар овқат олдим-а?

– Саломалайкум, келинг қани, – деди у ўрнидан қўзғаларкан отлиққа қўл чўзиб, – тузtotинг.

– Майли, раҳмат. Яқин беш-ўн кунда эллик чоғли сурувга кўзингиз тушмадими?

– Йўқчимисиз?

– Ҳа, шундай. Ҳафта бўлди, бир оқшом қўйлар ҳайифиб кетибди.

Чўпон ва отлиқ анча вақтгача шу тахлит гаплашиб турди. Қибла шамоли кучайиб ёмғирнинг муздай тафтини уфура бошлади. Отлиқ чопонига ўраниброқ жиловни чўққининг ўсма тошлар оқиб тушган томонига бурди. От ўрловга кўтарила бошлади; мушакдор сонлари таранглашиб, илдам оёқ олиши ортда қолган чўпоннинг ҳавасини келтирди: “Отмисан, от! Тиллого алишсанг, ютқазмайсан, – деди ўзига-ўзи, – ҳее, бу дунёда йўқчи билан касалга қийин, икковиям қидириб яшайди”.

– Ҳой, ёдингиздан чиқмасин-а, орасида бешта олабел совлиқ ҳам бор! Шуниси эсингида турсин...

Тасодиф хитобдан чўпон ўзига келди. Йўқчи чўқчи бошида суюнчисини айтаётган эди. У отлиқقا маъқул маъносида бош ирғаб, телпагини қўлига олиб кўксига урди. Отлиқ ҳам шундай қила-қила чўқчи ортига эниб кетди.

* * *

Мол одамнинг юрагининг мойидан бўлади. Оққи-ялик Берди чавандоз қўйларини йўқотдию ўзгарди-қолди: бир қарасанг жizzаки, арзимаган нарсага учиб-қўнадиган, бир қарасанг паришонхотир, дунё бе-фарқ телбадай. Баъзан яқинларининг арзимас гапига ҳам ниш отиб, кейин узоқ вақт ўзини-ўзи койийдиган одат чиқарди.

Ана шундай телбахаёл кунларининг бирида акаси Сайфи махсум эшик қоқди:

– Саломалайқум, келинг ака, – деб махсумнинг ис-тиқболига чиқди чавандоз.

Акаси қўл бериб кўриши, лекин ҳеч сўз демади. Олдинма-кетин меҳмонхонага кирдилар. Полвоннинг хотини хонтахта устига дастурхон ёзиб, бир-икки ҳо-вуч қанд-курс, майиз қўйди.

– Яхшимисан, келин, болаларинг дурустми? – деди махсум гап оҳангини чўзиброқ.

– Раҳмат, бирнави. Чечамлар ҳам яхшими? – деди келин қисқагина қилиб.

– А, бу, бизнинг ука қўй йўқотган десам, ўзиниям йўқотиб қўйибди-ку, – махсум укасига қия қаради. – Мол топилади, жон топилмайди, жон!

Келини индамади. Овқат баҳонасида ташқарила-ди. Ака-ука ёлғиз қолиб ундан-бундан гап суришди. Бу орада бирорвнинг машина олгани, кимнингдир тўй қилгани, яна кимнингдир ўғли чет элга кетиб, пул жўнатаётганию отаси янги иморат кўтараётганлиги муҳокама бўлди.

– Энди-и, ука, мен ҳам бир омади гапни айтгани келувдим, – махсум дастурхон попугини ўйнаб давом этди. – Отамдан қолган “Волга”ни сотсак. Пулини иккига бўлардик, тенг ярми сеники, қолганини Самандар иккимиз бўлишамиз. Мана, сенинг ҳам боланг ўқишга ўтиб калланг қотиб турибди, мушкулинг осонлашарди.

Берди полвон ўйланиб қолди. Межмонхона деразасига шох ташлаб турган гужумнинг баргларига боқиб туриб отасини эслади. Ота-бола “Волга”ни олиб келган куни шу азамат гужум кўчатини ўтқазган эди. Яна унинг хотиридан армиядаги акасига хат жўнатганлари ҳам ўтди:

– Билмасам, отамнинг ёдгорлиги. Таъмирлаб миhib юрсак, душман кўзи эди-да?

– Қанақа душманкўзи? Ким бизга душман кўзи билан қарапди, ука, – Сайфи махсум ликопчадаги парварданинг майдароғини оғзига солди. – Қизиқ гапирасан-эй, сен ҳам минганим эшак бўлсаем узангим тиллодан, дегичлар хилидансан-да.

– Шу улов юриб турса, ҳар кимга тўю таъзияга обориб кел, деб ялинмайсиз-да, – деди полвон акасига кўз ташлаб, – рўзгоримизнинг ободлиги.

– Ҳей, сени жин чалганми дейман, бу Даққионусдан қолган арава қанақа ободлик бўлади? Бунинг – янгиси, зўри бўлса экан, ачинсанг. Чўнтагингда пулинг бўлса, кўча тўла мошина...

Ака-ука ўртасидаги даҳанаки жанг товуши тобора баландлаб бораверди. Улар бири олиб-бири қўйиб, ўзиникини маъқуллатишга уринарди. Махсум, мен – акаман, айтганимни қил деса, чавандоз эса, акадан жўяли маслаҳат чиқса айтганини қиласман-да, дерди. Шу пайт дераза устидаги гужум шохига уя қурган мусичалар потирлаб тепага кўтарилишди. Ва бир қанча вақт муаллақ учиб туришди. Сўнг ҳовли этаги-

даги бодом шохига қўнишди. Уяларида эса, икки полапоннинг боши гоҳ кўтарилиб-гоҳ тушиб турарди.

– Сотасан! Гап шу, – деди махсум лаби учиб, – керак бўлса, отниям бўлишамиз, уям отамдан қолган.

– Билганингизни қилинг, – Берди полвоннинг гап оҳангি тушди. – Хоҳласангиз икковиниям олиб кетинг, ҳеч қандай улуш керак эмас менга.

Ака-ука бир қанча вақт сўзсиз ўтирди. Берди полвон дераза пардаси устидаги қизил гардишли рамкага термулиб қолди. Унга уруш йилларида туширилган сарғиши сурат жойлаштирилган эди... Бир вақт махсумнинг кўзи илкис укасига, сўнг у қараб турган томонга тушди. Кейин дастурхонни кўздан кечирган бўлди. Кейин... ўтира олмади.

Улар ҳовли этагидаги дарвозагача сўзсиз бордилар.

– Чечамларни сўранг, – деди полвон синиқ оҳангда.

Сайфи махсум гап-сўзсиз муюлишдаги буримга қараб лўкиллаб кетди.

* * *

Нақрачда бир сурув беэга қўй юрганмиш, деган дарак тарқалдию Берди чавандознинг ичига бурга кирди. Хабарни эшитибоқ, эртаси куни саҳарда от эгарлади. Эгар устига қайсиdir кўпкаридан айирган гилам хуржунни ташлади. Унга иккита нон, бир-икки ҳовуч қанд-курс ва халтага ўралган жойнамоз солди. Очиғи, полвон бу хабар ростми-ёлғонми билмайди. Унга қўшниси Абдурасул чилангар етказди бу гапни. Чилангар ҳам бирордан эшитибди. Аслида, йўқчи халқи шундай бўлади: арзимас даракдан умид кутади, элма-эл оғиз пойлайди, маъракама-маърака хабар тарқатади, йўқотган молининг белгисигача айтаверади. Илло, идорама-идора югуриб мелисаю

посбонни безовта құлмайды. Сабаби, әл оралаганни әл топади, Берди полвон эса шунча йилки әл оралаб юрибди.

Фира-шира тонг қоронғусида Фўбдинтоғнинг пастқам адирларида бир отлиқ кетиб боради. Йилқи қулоқларини диккайтириб олган. Чигиртканинг шитирига ҳам сергак қараб қўяди. Ангаралар шахмат тахтасидек майда бўлакларга бўлинган, оралиғи саккиз қаторлик қайрағоч тизмаси билан иҳоталанган. От ана шу дараҳтларга қулоқ диккайтириб, тикилиб-тиклиб боради. У ўша тарафларда хатар борлигини сезди. Бирпас ўтиб, от сезими рўёбини кўрсатди. Дараҳтлар орасида санғиб юрган чўпон итлари довруғ кўтариб келаверди. Отлиқ эгарга мустаҳкамроқ ўтирди. Узанги арқонини бир-икки марта эшиб зичлаб жойлади. Юганни тортаётганда, итлар қуршовга олиб, асабга тега бошлади. От гоҳ ўйртиб, гоҳ тисланиб йўлида давом этаверди. Улар шу кетишида дараҳтзор ортидағи сурув устидан чиқишиди. “Маҳ-маҳ Оқтириноқ, маҳ”, деган овоз келди сурувнинг у бошидан. Қўйлар “дурр” этиб хуркиб олди, кейин тинчиб қолишиди. От қораси чўпоннинг ёнига етди.

– Ҳорманг! – деди отлиқ эгарқошни маҳкамроқ сиқиб. Итларингиз олғир экан. Сал бўлмаса отдан ағдараёзи.

– Э-э, сизмисиз, полвон ака!

Чўпон полвонни овозидан таниди, яқин келиб қўл узатди. Улар эски танишлардек сўрашишиди. Чўпон ўшандан буён бегона қўй кўрмаганини айтиб, гап оҳангидан ҳамдардлигини билдириди. Суҳбат охирида Нақрачга борадиган йўлни тушунириб, хайрлашди. От йўлида давом этди.

– Ҳой, полвон ака, тўхтанг, – деди чўпон ҳаллослаб унинг ортидан югуриб, – манови таёқни олинг, йўлда қопқири ити бор сурувлар кўп.

– Чўпон таёгини биронга бермайди, унда барака бўлади, – деди полвон унамайроқ.

Чўпон қистаб туриб олди. Берди полвон чўпонтага ёқни олиб, қайта хўшлашиб, от бошини тоғ қўймичидаги қишлоққа бурди. Бирпас ўтиб чўпон унинг қорасини кўрмай қолди.

Кун чошгоҳдан ўтганда сувлар кечиб, ангарлар кезиб келаётган Берди чавандоз Нақрачга етди. Аввал қишлоқ бошидаги жилғада отини сувлатди. Хуржундан нон билан қанд-курс олиб, сув лабига белбоғ ёйди. У бир туор нон ушатиб кумушдек товланиб оқаётган сувга ботирган ҳам эдики, орқадан кимнингдир томоқ қиргани эшитилди. Беихтиёр товуш келган томонга бурилди. Нишабликдан етмиш ёшлардаги оқсоқол бир киши эниб келарди.

– Ассалому алайкум, – деди чавандоз ростланиб олиб.

– Валайқум ассалом, – чол эҳтиёткорлик билан қиялиқдан тушиб кела-кела қўл узатди. – Бу дейман, чошгойини ариқ бўйида қилаётганингизга қараганда, меҳмонга ўхтайисиз. Қани, қаерлардан сўраймиз?

Чол полвон билан сўрашиб, одмигина белбоғ-дастурхон бошида оёқ узатди. Полвонни илгаридан танийдигандек қалин сўрашди. Аввалига ийманиброқ турган Берди чавандоз сал ўнғайсизликдан сўнг очилиброқ гап бошлади:

– Аслимиз Ғўбдинтоғдан, отим Берди. Олти ойлар бурун, кўкламнинг бошида бир қўтон қўй йўқотиб қўйганман. Мол аччиғи – жон аччиғи экан, кўча-кўйда, тўю маъракада дараклаб юраман. Бирон ундай-биров бундай хабар етказади, аммо излови келмадими, топилмади. Кеча бир қўшнимиз маъракадан Нақрачда беэга қўй юрганмиш деган гапни топиб келди, эрта билан шу томонга от солдим. Юришимиз шу, бобо.

– Йўқчиман, денг?! – чол бир ушатим нон солди оғзига, кейин бир муддат нонни шимиб турди. – Қўйларингиз ичида бешта олабел совлиғиям бормиди?

Бу гап полвонга аканг армиядан келди ёки хотининг ўғил қўрди дегандагидек таъсир қилди. Рости, гангид қолди. Сўнг гап эгасига ҳайратланиб разм солди. Шу он қаршисида ҳазрати Хизрни кўргандек бўлди. “Ҳа-ҳа, Хизр бобоям шунча бўлар-да бўлса! – деди ичида, – юзлари қалам билан чизгандай, ё, уста – Худо!”. Кейин унинг оқ иштон-қўйлагию серсоқол юзига қайта қараб чиқди.

– Қўйларингизни йўқотганингизда орасида қанақа қўчқорлари бор эди?

Чавандоз сўровни эшитиб ўзига келди.

– Учта қўчқорим борийди, – деди каловланиб, – каттаси кўк, иккови қорабет, бирорининг орқа туёқлари оқ.

Чол салмоқлаб гап бошлади:

– Тўрт ойлардан ўтиб қолди, қишлоғимизга беэга сурув келиб, ҳали унинг-ҳали бунинг экинига тушавериб безовта қила бошлади. Ҳамқишлоқлардан бир-иккиси қўйларни гумдон қилишнинг ҳам пайига тушган. Бир куни бизнинг маҳсарпояга оралаган сурувни невараларим ҳайдаб келиб қолишиди. Бир бечоранинг ризқи қийилмасин, хабари чиқса ўзим етказиб бераман, дея эга чиқдим. Ўшандан буён қўйларингиз бизникида. Ҳа, айтганча, узун сони неччов?

– Бир кам олтмишта эди, – деди полвон.

– Демак, қўйлар сизники, – деди чол ишончи комил бўлиб, – фақат, ҳозир қўйларингиз бир кам олтмишта эмас, олтмиш учта бўлган. Бу ерга келиб тўрттаси қўзилади.

Берди чавандоз ҳайратдан лол қотди. Нима деярини билмай қолди. Қарийб ярим соатлик вақт қандай ўтганини сезиб улгурмади.

– Ҳай, турдик энди, – деди чол тиззасига суюниб, – сизни уйга бошласам. Ҳали замон невараларим суврүни сувлагани туширади, шунда кўрасиз қўйларингизни.

Улар полвоннинг отини етаклаб, кунгай бетдаги ҳовлига боравердилар.

– Шунча пайт гап олиб ўзимни танитмабман-ку, – деди чол кенг саҳни айвоннинг эшигини торта туриб, – қарилик курсин. Мени бу ерда Раҳмонали тегирмончи дейишади, мулла Бердибой. Олти ўғил, уч қиз, ўттиз икки неварам бор. Қани, ичкарига кирайлик, суврүв келгунча бафуржга гурунг қиласиз.

Улар меҳмонхонага кирдилар. Ҳонанинг ҳовли тарафида кўзлари йирик-йирик, устига оқ бўздан парда тортилган дераза жойлашган. Ўнг томондаги бурчакка иккита сандик кўйилиб, устига кўрпа-тўшак тахланган.

Полвон билан Раҳмонали тегирмончи чамаси бир ош пиширим вақти гурунглашиб ўтирди. Бу орада дастурхон тузалиб, сергўшт қайнатма шўрва тортилди. Овқатга фотиҳа қилингач, шўриллатиб чой симираётган тегирмончи аввалроқ бошлаган гапини давом эттириди:

– Отадан учов етим қолдик. Онамизнинг чехрасини эса яхши эслолмайман. Лекин иккисиниям худо кўп кўрган экан, укам қовурчини қотмай бизларни ташлаб кетди. Акам уйланиб, бир болали бўлганда риҳлат қилди, – чолнинг кўзларида йиллар ҳасратидан қолган кўз ёшлар билинар-билинмас қалқиб чиқди. – Манови, ёнимиздаги уй акамнинг ўғлиники. Ўзи шаҳарда, институтда дарс беради. Аввал уни ўқитдим, орқасидан ўзимнинг болаларимни. Барига тегирмончилик қилиб, қўй-мол сотиб шаҳардан уй олиб бердим. Кейин қишлоғимдан иморат кўтардим ҳар бирига атаб. Барибир, қайтадиган жойи шу ер-да!

Тегирмончининг мунг чўмган кўзларида аллақандай масрурлик зоҳир бўла бошлади.

– Кўзим очиқлигига жойли қиласай дейман-да. Ўзлари кулиб юришади, шаҳарда уйимиз бор-ку, деб. Бари бир-бири билан аҳил, интифоқчилигини кўриб яшагим келади. Тортган азобларимга ачинмайман. Аслида, ўзбекники шу – болаларининг ҳузурини кўриш! Мол-дунё топилади. Мана, сиз ҳам олти ой бурун йўқотиб, бугун топиб турибсиз. Одамгарчилик ва иймонга қолганда йўқчи бўлмаслик керак. Шундай эмасми?

Шу вақт келиними ёки қизларидан бирими қўйлар сувлагани келганини айтиб кетди. Улар олдинма-кетин жилға охиридаги қўлмакка йўл олишди. Ҳай-ҳайлаб полвоннинг қўйларини сурувдан айирдилар.

– Энди-и, Раҳмон ака шунинг ичидан хоҳлаган олтовини айиринг, – деди полвон, – олти ой бирор боксаям энчи олади-да.

Тегирмончи кўнмади. Полвон ҳарчанд қистаса ҳам олмайман, деб қатъий туриб олди:

– Менга атаганларингизни болаларни ўқитишга харж қилинг, – деди Раҳмонали тегирмончи хайрлашаётган маҳали, – ўқимишли бўлганда эслаб юрасиз.

Кун пешинга қиялаб қолганда Берди чавандоз севинч ва аллақандай масрур туйғулар гирдобида жилға бошидаги қирдан қўйларини ҳайдаб ошиб кетди.

* * *

Сумбула кириб, сув тиниган бир кунда полвон акаси Сайфи маҳсум ва укаси Самандарни уйига чақирди. Бир қўчқорни бўғизлатиб, қўни-қўшниларни йиғиб худойи ўтказди. Узоқ қишлоқдан келган Зикрхон эшон хатм қилди. Ва, издиҳом охирида бир чақмоқ қўйгүшти, бир кийимлик сарпо олиб жўнади. Вақт хуфтондан ўтиб йифилганлар ҳам тарқалишди.

– Сизлар қолингизлар, – деди полвон акаси билан укасига.

Учовлон холи меҳмонхонага қайтиб кирдилар. Полвон тахмондаги бўғчадан иккита белбоғ олиб хонтахта устига қўйди. Уларда вазни беш килони оладиган нимадир бор эди.

– От билан машинани нархлатдим, – чавандоз уларга назар солди. – Икковининг қийматидан ҳар бирингизга ўнта совлиқнинг пулинин атадим.

Самандар ҳайрон қолди. Нима гап деган маънода Сайфи махсумга нигоҳ ташлади. Махсум эътибор қилмасдан полвонга қаратса деди:

– Ўзинг розимисан? Ҳарҳолда, отадан олтов бўлсанг ҳам уйингда ёлғизсан, деган бир гап бор эскиларда.

Гап нимадалигини тушуниб етган Самандар эса қизишиб кетди. Овозини баландлатиб суюктешар гаплар қилди. Бироқ...

– Ол, ука, ота уйида ҳамма фарзанднинг ҳақи бўлади, – деди полвон алланечук мунғайиб турган укасига қараб, – рўзгорингнинг бирор тешигини ямайсан.

Махсум белбоғни қўлтиқлаб қўзғалди. Икки ука унинг ортидан ташқарилади. Дарвозада қуюққина хайрлашишди. Полвон қанчалик қистамасин, менга унақа мерос керак эмас, дея укаси Самандар тез-тез юриб машинасига ўтириб жўнаб кетди.

Берди чавандоз енгил тортди. Кузнинг этни жимирлатар ҳавосидан симириб-симириб нафас олди. Тоғ бошига қўниб турган милтироқ юлдузларга боқиб кўнгли алланечук бўлиб кетди. Шу кез унинг юзидағи табассумга мойил ифодани ой ёруғида бемалол кўрса бўлар эди. Яна укасининг қилиқларидан масрурлик туйди: “Келаси йил Самандар ўғилларини суннат қиласи, той қўшаман”, – деди ўзига-ўзи.

Ошхонани тамбалаб келаётган хотинига:

– Ўғлингга айт, ўқишига бораверсин, – деди. – Ке-
чикмабдими, пулини тўлашга? – деб қўшиб ҳам қўйди.

Ташқарида, гужум тагида ётган тўнғичи Бекбола суюниб кетди. Лекин қўрпадан бош чиқаргиси келмади. Тўшак орасидан уй томонга қия қараб қўйди. Сўнг ҳовли бурчагидаги қўтонга қўзи тушди. Кучур-кучур қилиб кавш қайтараётган қўйлар негадир унга яхши қўриниб кетди. Кейин ўқиш ҳақида ўй суриб ухлаб қолди.

Ҳовли бўйлаб уйқудаги олам сукунати кеза бошлади.

Нурилла ЧОРИ



ТАШВИШИ ЙҮҚ ОДАМЛАР

Бозирган чавандоз доғда қолди...

Қызғалдоқнинг адодидан кўндалангига Тагсарой оқади. Тагсаройнинг кунгай бети қари лалми (эл шундай атайди), қибласи сувот – таёқ суқсанг барг ёзади. Замони чархифалак бўлиб кетган бу кунда қози ҳам, миршаб ҳам, дўйхтир ҳам тиш-тирноғи билан ерга тармашган. Ерга етмаганлари молиниям, жониниям бозорга урган. Бозорга бор – баҳтингни кўр. Баҳтини ниманинг эвазига кўради, бунисини ўzlари билишмаса – биз билмаймиз!

Майдақадам моданинг устида ўз майлида тебраниб бораётган мана у жинқарча Бозирган чолнинг невараси. Ҳув-в, ана бу чайла эса Бозирганга, тўғрироғи, унинг кенжаси – Эшбой эшчига товин. Эшчининг эш чанглаб косаси оқармаган чоғи рўзғорга томчи деб пиёз эккан. Экканда ҳам сидирғи экмаган, “Аччиқ бўлса, харидорини ўзи топади”, деб дамига ош пишадиган Жолпон хумга уруғ септирган. Аччиқ бўлишини билмадиг-у, аммо уруғнинг ярми куйиб кетган чиқади. Сийраккина кўклабди. Сийраклиги Эшчининг умидини янада жонлантириди: “Ҳали қўрасиз, чумчуқнинг калласидек эмас, муштдай-муштдай пиёз бўлади!”

Муборак ошёнидан судралиб чиққан чавандоз шу чайлани ўзига ватан тутган. Неча вақтдирки, невара-ни айтмаганда исми одам билан гаплашмайди. Кун-дузлари сояни итга бермайди. Кечалари эса киприк қоқмайди.

Ўғли келди. Ўтинди...

Келини келди. Ёлворди...

Қизи келди. Йиғлади...

Бозирган чол ўзини мисли кўлвор чоғлади. Мезон қуёшида тобланиб, шамолига кўкрак кермоқчи бўлди.

Үйига қайтмади...

Кўкламдан мезоннинг адодигача пайкалу қишлоқ орасида шу жинқарча сарсон, Майдақадам сарсон.

Чолнинг айтарга баҳонаси бор – пиёз мезонни ема-са, шунча тоат-ибодат бир пул. Чириб кетади. Гап пи-ёзда ҳам, мезон шамолида ҳам эмас, ўғлининг зуваласи бўшлигию келиннинг бироз уқувсизлигидан!.. Бўлмаса куш чўқимайдиган, жонлиқقا эт битирмайдиган аччиқ пиёзнинг бошида нима бор, бу “иткасал”га!

Ўтган қишида Бозирган чол неварасига тўй бериш тараддуудида эди. Оғзидағи тишидай сийраклашиб қолган узангидошларини бозорда кўрадими, мозорда кўрадими, дўқ уриб: “Неварамга тўй бераман! Кўпка-риси катта бўлади! Отга қарашинг!..” дер, бу гапларига кўнгли тўлмай: “Улларни ҳам олиб келинг! Ота қадр-донларни топиштириб кетайлик! Тил топишса, оға-ини бўлиб қолар. Топишмаса, укасининг қорнига!” дея қўшимча қиласарди. Унинг бу гапларини қайта-қайта эшитиб безор бўлган чолларнинг айрими ўзини га-рангликка солиб қолганди.

Чавандоз бир сафар ўзини гарангликка олган Таш-ман туйанинг қулоғига:

– Бозирган ўзи битта тўй беради, катта, – дея қичқирди.

- Хў, боди. Қулоғимни тешдинг-ку! Сен неварамга тўй бераман деганингда, менинг тишим чиққани йўқ эди, – деб милкини кўрсатди Туя.

- Юким ерда қолди-ку, ошна! Шу йил қор тушсин, тўйни бошлайман, – деди Бозирган ошнасидан ранжиб.

Чолнинг юрагини ҳаприқтириб келган қишининг аввалида кампири унинг тонгдаю шомда, кундау тунда тайинлаб келган калимасини канда қилди. Кўзигул Бозирганга маҳрам бўлиб, айтганини бажармаган бўлса, шу бўлар, яна билмадик. “Ортимда қоласан”, деганига қарамай, жонини Жабборга топширди-қўйди.

Неваранинг тўйи қолишга қолди. Аммо кўп ўтмай элни: “Бозирган чол уйланармиш”, деган гап оралади. Улус чавандознинг бошини икки қилишга кўпам шошмаган. Гўё Кўзигул кампирнинг кўкаришини сабр билан кутган, кўкламга илҳақ бўлгандек кўринади. Кун қизиган сари гап-сўзлар урчиди...

Чавандоз уйланса уйланибди-да, шунга нима: осмон узилиб ерга тушармиди?! Кампири ўлиб уйланганлар Қизғалдоқда камми?! Биргина Ҳайит ланги учинчи хотини ҳам жувонмарг кетганидан кейин уйланмаган, уйланолмаган. Негаким, оғзига кучи етмаган икки-уч кампир жаназада ўтириб, ёмон бир матал тўқиган. Изига ўзлари тўқиган маталдан чўчиб, бундай бўлса: “Лангида хотин турмайди”, деб лаб тишлиган. Кампирлар лаб тишилагандан сўнг қайси аёл юрак бетлаб Лангининг ўнгиридан тутсин. Уйи синган аёл бордир, аммо жондан тўйгани, жонидан тўйгани йўқ!..

Яна Ҳалдав посон уйланганидан сўнг соқолини анбарлаб арига талангани-ю, Орол карга ўғиллари қолиб, қизи хотин топгани ҳам бор гап. Яна...

...Яна Эсонбой оқсоқол икки ўлиб, уч уйланган. Эсонбой оқсоқолнинг “ўлиб-тирилишлари” ва уйла ниши Бозирган чолнинг кечмишига соя солмайдиган маҳшар қадар давом этадиган гурунг. Ундан кўра хо-

тинининг жойи совимай туриб уйланган Толмас морбоз эл ичра машхур, музофотда донгдор.

Толмас морбоз чўгирма телпак кийганича бор экан. Эл оғзига элак тутди. Дангалини айтсак: “Мисқол девдай йигитнинг умрини ўғирлади-я!”, “Мисқол тумса”, деганларнинг оғзига чўгирамаси билан урди. Мисқол ўғилли бўлиб, чилла тутди. Қолаверса, Морбознинг қулоғи том битганида, оғаларидан кўра Авазнинг: “Тўрт кунлик меҳмоним отам! Меҳмон бўлиб тўймаган, дунёю қўтирда ҳеч вақони кўрмаган, армонлари бағрин тиғлаган... отам-ов, отам!” деганлари элнинг эсидан чиққанича йўқ.

Гўяндаларнинг гурунг беришича, Аваз қўшиғини кўнгил учун айтмаган. Ҳар “отам-ов, отам!” деганида сабзи тишлиған. Билингки, отасини йўқлаётган Авазнинг уртида сабзи бўлган. Ундан ранжиган аканинг кўкайига шу гаплар келди: “Ўв-в энаси қисир! Энам отамнинг қўйнида йўқ эди. Мен отамнинг эсида йўқ эдим. Нега бунча зор қақшайсан?! Мисқол макрзанинг арзандаси! Отам ўлган бўлсаям, сенинг бошингни силайдиган Макрзан бор-ку! Энамнинг қора босиб ўлганини билсанг, юрагинг ёрилиб ўлар экансан! Эй, садқайи эна кет!...”

Аммо тилига кўкайидаги эмас, кибри кўчиб, томоқ қириб, укасига юзланганча:

– Хў-в, Аваз! Отамиз-ку ёшини яшаб, ошини ошаб ўтди. Бу ёшда кўчганники тўй! – деди.

– Сизларга тўй бўлса, тўйдир. Бизга аза, – дея Морбоздек босиб тикилди Аваз.

– Авазбой, майли, сенга аза бўлса, азадир! Лекин: “Армонлари бағрин тиғлаган...” деб бўзлаганинг нимаси! Отамизни доғда қолди, деб ким айтди сен тирмизакка! – деб ториқди ака.

– Эр етган кишига бирор айтиши шартми! Отам ҳар оқшом арғамчиқопини томорқанинг этагига қоқарди.

Кейин менга най чалдириб, теваракка мордек тикиларди. Мен най чалардим. Отам эса “Мен оёқ узатар бўйсам, сенинг ҳолинг нима кечади, Хунхорнинг сultonни!” дерди, – деб ер тепди Аваз.

– Хўп, майлига, сен сари борайлик, Авазбой иним, султон иним! Очдан ўлдингми! Бизни номусга қўйма... Ё сабзи е, ё отам де! – деди ака қаҳрланиб.

– Сабзимниям жиябераман, отам-ов, отам, деябераман! – дея акасига тиззинглади Аваз.

Боланинг бетгачопарлигидан ғазабланган ака қулоқ-чаккасига қўйиб юбормоқчи бўлиб қўл чўзди-ю, титраб кетди. Акага тикилиб турган кўзлар уканики эмасди...

Кўрққанидан майит ётган уйга юзланди. Дафъатан қулоғида отанинг хеш-ақрабларига айтган сўнгги гапи янгради: “Авазқулнинг бурнини қонатманглар!”.

“Армонлари бағрин тиғлаган!..” деб бўзлашда давом этди Аваз. Аканинг меҳри ийиб, уканинг бошини силай-силай, “Отам-ов, отам!” деб жўр бўлди. Ич-ичидан титраб, кўзларидан тирқираб ёш отилди. Чопонининг ўнгири билан улусдан юзини яширди ва Авазга деди: “Нима десанг ҳам сенга можна, Хунхорнинг сultonни!”

Чолни уйлантириш Қизғалдоқнинг эсида ҳам йўқ пайтда жинжаклилик: “Бозирган чавандоз соқолини боғлаб нон ёпармиш”, деб айтган экан.

– Чолнинг соқолини боғлаб нон ёпганини биринчи қизи эшитган. Келиб келинини қарғаган, сўнг ўғли эшитиб ҳайрон бўлган. Бозирганинг ўзи эшитиб, “Шундай дейишибдими-я, қисталоқлар”, деб қаҳ-қаҳ отиб кулган ва индамай уч-тўрт кун ўғлининг оғзига қараган. Ўғли тиш ёргмагач, чол тўнини тескари кийиб олган, – деди билгичлар.

Чавандознинг нон ёпган-ёпмаганини ўғлиям, қизиям билмайди. Гапнинг ростини қайнота-келин ҳеч кимга айтмади.

Бозирганинг назарида, атрофидагиларга бир бало бўлган. Худди у сағир қолгандек, ачиниб қарашади. Юпатиш учун нималарни дир ўйлаб топади. Ўғли ишдан кеч қайтса ҳам, унинг олдига киради, у ёқ-бу ёқдан гапирган бўлади. Ҳеч гап топмаса: “Экология ёмон, иқлим ўзгариб кетди, ҳозирги келинлар нозик”, деб дийдиё бошлайди. У туғилганда онаси азоб тортмагандек. Гўё отасига шулар қизиқдек.

Авваллари саломини эплаб беролмайдиган келини ҳам энди унга матал айтади. Ҳай-ҳай демаса, бозорга борганию бодини кўрганидан бошлайди. Бир гал шундай ҳам бўлганди:

- Эртага ис куни, – дейди келин қайнота ўтирган сандалнинг бир кунжагига ўзини уриб.
- Шундаймикан? – дейди чол саноқдан адашгандек.
- Бозорга боргандим. Мой олдим, – дейди келин қойил қилгандек сандалга чуқурроқ кириб.
- Яхши-да, яхши-да, – дейди чол кумуш қошларини силаб.
- Бозор қуйиб кетибди, – дейди келин бамайлихотир, – мой одамнинг хунига teng!

Қайнота чуқур уҳ тортди. Тишни-тишга босгиси келди. Бундан сўнг яна шу тахлит суҳбатларга чидай олмаслигига кўзи етди. Сандалдан чиқиб ўтириди.

– Бозорда сенга бало борми?! Эшчи мой олиб келмай номаъқулнинг нонини ейдими? – деб товушини баландлатди қайнота.

Келин ўзини эшикка урди. Чол унинг ортидан: “Яна бозор борсанг, бил, қани, Бозирганинг хунига қанча мой берар экан”, деб қолди.

Келинидан ранжиганиданми ё бошқа бир саббаданми, негадир хаёлига раҳматли кампири келди. Муштдек момо эди. Ўзини ўтга-чўққа уриб пилдирабина юрарди...

Кўзигул кампирнинг ажойиб одатлари бор эди. Бундай одатлар... Фақат унга, фақат шу кампирга ярашарди. Чавандоз бирор-яримдан дили хуфтон бўлса, бас, тилини ютиб қўяди – ҳеч кимга лаб жуфтламайди. Охири бир куни ичи пишиб, завжасига ёрилади. Агарки у дилозор мардум хеш-ақрабларидан бўлса, албатта келиб Бозирганинг кўнглини оларди. Ёт бўлса-чи? Ёт бўлса ҳам, кампирнинг жавоби тайин эди. Чолни “қутирган түя қопганда” ҳам шундай бўлганди.

Ўшанда чол азбаройи гузарга Майдақадамга арқон олгани борганди. Нимага боргани ҳам ёдидан кўтарилиб, уйига қайтди. Майдақадамдан тушай деса арқон йўқ! Модани остонаяча ниқтаб бориб:

– Гунафша, – деди чол.

Отанинг овозини эшишиб ташқарига чиққан ўғил худди бошидан мушт егандек гангиб қолди:

– Падарига лаънат, макимия! Сен уйда курк ёт. Мени қутирган түя қопсин, – деди ота.

Эшчи ҳам анойи эмас. Майдақадамни миниб кўздан панароққа кетмоқчи эди, аммо чол кўнмади, устомонлик қилди. Ўғлини тақимига босиб сўккиси келди:

– Энанг йигирган калавадан олиб чиқ, – деди баттар тутақиб.

Майдақадамни невара миниб турди. Кампир, ўғил ва келин ип пишилди. Чол пишиб келаётган ипни эшди. Агарда кампир: “Ақрабнинг муддаоси ниш урмоқ, хоҳ дўст кўксига, хоҳ душман орқасига”, демаганида, ип пишигунга қадар Ташман Туяни ҳам, унга қўшиб ўғлини ҳам сўка-сўка Бозирганинг ўпкаси пишарди.

Чол кампирнинг гапидан сўнг юмшади, нафас ростлади. Аввал арқонни қулочлади. Кейин икки-уч қатлаб, оёғи билан босиб тортиб кўрди. Пишиқ арқонни маҳсисининг қўнжига уриб:

– Бир тўй берайлик, кўпкарининг завқига нортуюлар ҳам маст бўлсин! – деди.

Келин чолнинг бу итфеълини бугун кўргандек, лаб буриб нари кетди. Қирқ йилдан бери отанинг сўкишини эшитадиган ўғилга негадир шу тобда алам қилди.

– Соқолига оқ оралаб ҳам шу одатини ҳеч ташла-мади-да, момой?! – деди онасига.

– Энди, эски дард-да, болам, нима ҳам қилай...

– Мазаси йўқми?!

– Иткасал-да.

– ...

Арқоннинг бир учини ўғлига бериб, тортса ҳам бўларди. Аммо бундай қилмайди. Негаки, ўғлига ишонмайди. Тўю катта-а кўпкари беришнинг сабаби ҳам асл шу ишонмаслигиди! Кўнглидаги бир “аттанг” и борлигида! Чол кампирини ўзига қанчалик яқин тутмасин, бу “аттанг”ни унга билдирмайди. Бироқ... бироқ бу “аттанг” кўп йиллардан бери ич-этини ейди; ичига ҳам сифмайди, бўзлатади! Кексарган сари авжига олади.

Бир гал ошинаси Эсонбойга (ҳа, айтганча, унда оқсоқол – оқсоқол бўлмаган, эл қатори Эсонбой эди): “Зотимдан кўкрак кериб даврага кирадиган чиқармикан?” деган. Ошна ўзини эшитмаганга олган. “Чиқмайди”, деб Бозирганинг яна ўзи тирғалган. Эсонбой эса боз устига тиш ёрмаган. Чавандознинг марсингиси, йигитлик даврини эслаб мақтангиси келган, чоғи, боргапни ўзи айтган.

– Бўз йигитлигимда “Чавандоз” деб ном кўтардим. Элнинг олдидан ўтдим. Кўп сулув қизларнинг кўнглига ғулу солдим.

– Ҳа, шундай бўлганмиди, – дейди ошнасининг гуппайганидан завқланган Эсонбой.

– Кексалар: “Тулпор – биядан, алп – энадан! Пол-вон, келиннинг дуркунгинасидан олинг”, деса, ўйин билибман! Қўзисига, Қўзигулига ошиқ бўлибман, – деган виқор билан Бозирган.

– Отиям Кўзигулмиди? – дейди ошнасининг баттар завқи келиб.

– Шундай. Ҳар замонда зоту палагимни ўйлаганда оти эсимга келмаса, ёдимдан ҳам кўтарилаёзган.

– Нега?

– Шу қаллиқ ўйинга борганимда эрмакламоқчи бўлиб отини сўрагандим, “Гунафша” деди кўзлари жавдираб. Оддинлари ҳар Гунафша деганимда шу кўзларини кўргим келарди. Кейин ўрганиб қолдим.

– Илгари бир подшонинг арзандаси ҳам бақанинг кўзига ошиқ бўлган экан, – деб ўзини тутолмай кулади Эсонбой.

– Бас, бўлди қил! – дейди кулгига чидай олмай Бозирган.

– Бўлмаса, нега шалвирайсан! Ойпарчасини олганингда ёзиғинг бошқача бўлиб қолармиди? Девникидек гавдангга, мешдек қорнингга Қўзининг эркалиги сиғмабди. Ойпарчанинг эркалигига ёрилиб ўлар экансан, чавандоз, – деди ошна.

Шундан буён Бозирган ошнаси Эсонбой (йўқ, энди эл таниган Эсонбой оқсоқол) бор давраларда елкасими қисиб ўтиради. Бу гурунг олис замонда қолиб кетганига ишонмайди. Оқсоқол гапирганда оғзига термилиб туради. Худди унинг қаллиқ ўйинга борганидан айтиб қоладигандек туюлади. Кулганида-ку, минг ўлиб-тирилади. Бўлмаса, оқсоқол оғзига маҳкам одам. Гурунг бергани кўрган-кечиргани ҳам кўп. Барибир, баривир чавандоз ошнасидан “айтиб қўймасмикан” деб чўчийди-кўрқади. Қўркувки, “Ҳайит ланги ҳақидаги маталдек тус олса нима бўлади”, деб ўйлайди-да! Ланги ҳақидаги матални шу биргина Ланги билмаслигига фаросати етмайди.

Кампирни чиқарган куни ёмғир аралаш қор ёғди. Азада қари-қартангнинг кўпи қатнашмади. Қиш ўз оти билан қиш-да. Бир кун қор ёғса, икки кун қовоқ

солади. Кун йилт этса, Бозиргандан кўнгил сўровчилар келиб-кетиб туришади.

Чавандоз ўзини шу пайтгача қирқ йигитнинг бири чоғлаб, кексаликни бўйнига олмай келарди. Мана, кампири қайтиш қилганидан бери анча сезилиб қолди. Гарданини чўзиб гапирганди. Қиши ўчоги тор келди. Бурнига сув кириб, майшати танг бўлиб қолди. Таҳорат олай деса, сув йўқ. Ўзининг айтишича, “Олло демоқ осон бўлмаяпти”. Бир куни аччиқ устига ях сувдан ишлатганди. Тиш оғриғини топди. Сандалнинг бир кунжагида “Ихлос”ни зикр этиб ётганди, кун юмшаган экан, жағини боғлаб ҳовлига чиқди. Қараса, обтова тарновдан тушаётган сув билан тўлиб турибди. Товани олиб, ўчоқ боши томон борди. Ўчоқقا ўт қаланмаган. Аммо тандирда ўчаёзган чўф – иссиқ кул бор экан. “Обтобани қўйсам, асрга тайёр бўлади”, деб ўйлади. Товани жойлаштиргунча, тандирда бир кулчанинг синга бўлиб пишиб турганини кўрди. “Оламан”, деганди, кулча кулга тушди. Кейин бағрини тандирга босиб узалди, кулчани олди. “Пуф-пуф” қилиб кулдан тозалаётганди, унинг қилаётган ишига “ҳангманг” бўлиб қараб турган икки кампирга кўзи тушди. Уларнинг тикилиб турганидан хижолат бўлди. Нима қиларини билмай, кулчани тандир устида қолдирди. Катта-катта қадам босиб тиллахонага қараб юрди. Келини чиқиб, кампирларга эгалик қилмагунча кўзга кўринмади.

Уйга кирди. “Шу кунда кампирларга зарурмикан”, деди ўзига-ўзи. Хеш-акраблари орасида бундай қизаргани йўқ. Қуда-андаларининг ичидан излади, топмади. Бирини танимади, бирини эслади. Жинжаклидан, Ташман ошнасининг, шу ўзимиз билган Ташман туянинг синглиси. Дуркун қиз эди. Моядек кампир бўлибди.

Майдакадам қорни чизгандек, гурпиллаган тупроқни чизиб, чангитиб чайлага яқинлаган сари, тобора қишлоқдан узоқлашади. Невара олисдан чайлага термилиб келади. Бобо кўринмайди. Бола бундай пайт ўз билганича ўйин қиласди. Эшакка тескари миниб савалайди. Чоптиргиси келади. Майдакадам лақабига муносиб қолаверади. Бола моданинг устида тик туради. Қўлларини лангар қиласди. Бу ишидан ҳам кўнгли тўлмай, қўшиқ хиргойи қиласди:

“Минган отинг бўз бўлса...”

Бобо бунинг барини билиб ётади. Ҳар куни унинг келишини интиқ кутади. Қўшиғини эшитиш учун то чайлага етгунча бош кўтармайди. Боланинг келиб бажарадиган биринчи иши бобога “узум” беради. Кейин уйида асал борми-йўқми, ҳисобга олмай, асал еганидан гапиради. Бобоям бўш келмайди. Тарвуз ё қовун сўйиб беради. Доимги гапини такрорлаб қўяди: “узум”дан Эшчига ҳам узат, тили ёрилсин!”

Чавандознинг “Эшбойга тил битса! Ота, уйланасизми, деб сўраса”, дея ўйлаб ўғлининг йўлига тикилганида саратон тунлари узун, тонглари олис бўлди. Ўғлини кута-кута ота қушуйқу бўлиб қолди. Мана, кўз юмса ухлайди, ютинса уйғонади. Ухлайди-уйғонади – уйғонади-ухлайди...

Қани, энди унга тил битса! Бозирганнинг уйланишга чоғи ҳам йўқ. Аммо шу одамларнинг гап-сўзи босилармиди?! Гап-сўзи босилмасаям майлига! Шу момоқиз жуссасидан домангир бўлиб кетмасмиди? Ҳеч бўлмаса, ҳеч бўлмас, “Остонам совчи кўрган”, деб ўзини овутармиди. Қани, энди Эшбой эшчи тиш ёрса! Бу гапни дамғирдалик қилмай, чавандоз айтса ҳам бўлади. Аммо Эшчи юрак бетлаб боролмайди, дея хавотирланади. Гап унинг ўзидан чиқса, бориши мумкин. Чумчуқ бўлса ҳам нари-ку!

– Қани, Эшчига тил битса!

Бола кечаги, олдинги кунги, йўқ, аввалги кунги бобо ўргатган: "Бедананинг ётар жойи хас бўлар, Мезон кирса торғил морлар маст бўлар" қўшиғини айтмади. Бобо: «Чол ўлса қозон-қозон ош бўлар, кампир ўлса, баланд тоғлар паст бўлар», деб давом эттирмади.

Неваранинг қўшиғи бугун ўзгача эди:

“...ўнг жилови соз бўлса!”.

Бобо қўшиқни давом эттира олмади. Аммо олис йиллар ёдига тушди.

...Бола эди. Бобосининг бўз оти бўларди. Уни отаси ана шу бўз отга миндириб етаклаб юрарди. Бозирганинг отдан ҳеч тушгиси келмасди. Ўзи тушмагунча бобо ҳам туширмасди... Бозирган чол бола эди...

...Бозирган бола ширяланғоч бўз отнинг устида. От уни олиб қочяпти. У бўзнинг ёлидан маҳкам тутганча дод солиб боряпти. Чоллар томларнинг устида ўтирибди. Кампирлари кўчада урчиқ йигиряпти. Норғул-норғул йигитлар томга соялайди. Бозирган уларнинг жуссасидан қишлоқдошларига, хеш-ақрабларига ўхшатди. Аммо танимади-таниёлмади. Барчаси тинимиз гапиради. Гапирганида уларнинг тили бир-бирига суворийнинг қиличидек тегади. Чарсиллайди, қайрапади. Бирор мардумнинг юзи кўринмайди...

– Бува, – деди Майдақадамдан тушмай невара. Бобо жим ётаверди. Бола такрор-такрор чақирди.

Бўз тиним билмай чопади. Бозирган от ёлидан янада маҳкам ушлайди. Қаршисидан бир гала бола кўринди. Ҳаммаси жинқарча – жинқарчанинг ўзгинаси! Улардан бири қўлоч ёзди, бўзнинг йўлини тусди.

Бола дафъатан онасининг: “Мезон ўтди. Шу ётиши бўлса, иткасал буванг чайлада ўлиб қолади”, деганини эслади. Чинқириб йиғлаб юборди. Ўзини чолнинг устига ташлади.

– Бува-а-а!

Улар ўпкасини боса олмасди.

Фозил ФАРҲОД



СИНИҚ ТАНДИР

«Эҳтиёт бўлинг! Биринчи йўлга Тошкент-Санкт-Петербург йўналишидаги поезд қўйилмоқда...» Сухандон қизнинг уч тилда янграган бу овози темир йўл вокзалига яқинлашиб қолганимизни билдиради.

Соат кечки тўққиздан ошган бўлса-да, вокзал олдида одам тирбанд: ким қайдан келган, ким қайга кетяпти. Синглум таътилга кетётганди, уни уйга кузатиш учун чиққандим. Бироқ кузатувчиларни ичкарига киритишмаётган экан. Хавфсизлик учун бўлса керак-да! Афсус, энди перрондан туриб хайрлашишлар, рўмол силкитишлар фақат бадиий асарларда қолади, шекили.

- Қиз бола қандай кўтариб киради бу оғир сумкаларни? - назоратчиларга берган биринчи саволим шу бўлди.

- Камроқ олсин эди. Ўзи кўтарадиган қилиб, - тўнғиллади улардан бири. Гапириш оҳангидан менга ўхшаган қанчасига бу гапни уқтирган кўринарди.

Қоним қайнади. Ўзимни зўрға босдим.

У муаммони ечиш учун юкни аравага ортиш кераклигини айтди.

- Юз йилда бир келадиган аравагами? - мен ҳам бўш келмадим.

- ...

Ҳартугул, арава тезда келақолди. Юкларни ортиб, синглим билан хўшлашдим. Уни кузатарканман, хаёллимда шундай фикр жонланди: «Ҳақиқатда вокзалда, шахримизда маданият шаклланибди. Юкларни арава манзилига элтиб қўйса-я!»

Поезд жўнашига ҳали анча вақт бор. Барibir ичкарига киритишмайди. Ўтиргандан фойда йўқ. Нима қиласман энди? Хонамга қайтаман. Шу мақсадда автобус бекати томон борарканман, яна бир арава йўлимдан чиқди. Устига текис қилиб учга кесилган тандир ортилганди. Ёнимдан ўтиб кетаётган аравакашнинг ортидан қараб қолдим ва ичимда такрорладим: «Маданият шаклланибди! Юкларни аравалар олиб юрса-я!»

Жилмайиб, йўлимга қараб борарканман, анча ортда қолган аравакашнинг қаттиқ-қаттиқ гапиргани эшитилди. Беихтиёр ортга бурилдим. Бинойидек кетаётган бояги аравакаш асабий тарзда жаврарди:

- Мени ишдан хайдалишимни хоҳляяпсизми, опа?
- Ахир, ахир, ўзингиз айтдингиз-ку! Ичкарига олиб кириб қўяман, деб. Жон ука, опкириб қўйинг! – ялинарди тандирнинг эгаси – истаралигина аёл.

Журналистлигим эсимга тушди. Уларнинг гурунгини эшитиб ортга қайтдим. Ишнинг ниҳояси қандай бўлиши қизиқтирди. Текин томоша бўлса, автобусдан қолсам, метрода кетарман. Ҳарқалай, у соат ўн иккигача ишлайди. Автобусларга ўхшаб белгиланган вақтидан аввал кетиб қолмайди.

Суҳбат авжига чиқди:

- Тўғри, лекин мана булар туришибди-ку! – ўзини оқларди аравакаш. – Боя раҳбаримиздан ҳайфсан олганим ҳам етар. Юзингиздан ўтолмай ортгандим, опа! Тағин шу ҳол такрорланса, иш чатоқ! Мени тушуняпсизми?

– Нима қиласман энди? Башқа аравани қаердан топаман? – йигламсиарди аёл.

– Ўзим топиб бераман.

– Пули-чи?

– Менга пулингиз керакмас. Ишимдан ажралиб қолмасам бўлди. Яқиндагина қишлоқдан келганман. Ишга зўрға жойлашдим. Ахир ёш болаларим бор. Худо хайрингизни берсин, жон опа... – аравакаш ялина-ялина тандирни аравадан бир бурчакка туширди.

Тандир эгасининг бир ўғил, бир қизи бор эди. Уларнинг сұхбатидан сўнг ҳаммаси ойдинлашди: тандирни узоқ юртлардан бирига олиб кетишмоқчи экан. Чамамда у ердагилар тандир нонини яхши кўриб қолишиган. Талабгорлар кўп бўлгани боис, улар ўша ердан тандирхона очиб, нон ёпиб сотишмоқчи шекилли.

«Қандай яхши, ҳам тадбиркорлик, ҳам ўзбек маданиятини чет элда тарғиб қилиш. Маданиятнинг ёйилишини қаранг, маданиятнинг!»

Хуллас, бор гап шу экан.

Сигарета чекиб, валдирашиб ўтиришган назоратчилардан иқкитаси шовқинни эшитиб, эринибгини бери келишди.

«Энди ростдан ҳам иш чатоққа ўхшайди!»

Нима гаплигини билгач, улардан бири папирос тутунини бор кучи билан ичига тортди-да, тандирга яқинлашиб, тутунни унга пуфлади ва изқуварлардай тандирни синчиклаб кўздан кечирди-да, ўгирилмасдан аёлга эшиттириб такрорлади: «Маданиятни тарғиб қилмоқчимиз денг, опа. Маданиятни четга олиб чиқмоқчимисиз ҳали? Миллатимиз маданиятини сотмоқчиман, денг?»

– Қанақасига... Ахир... – нима дейишини билмасди аёл.

– Мумкин эмас. Юрт тупроғини, маданиятини четга олиб чиқиши, – сигаретини тағин ичига тортди-да, тағин тандирга пуфлаб пинак бузмади назоратчи.

– Нега ука? Биз... биз... ёмон ниятда олиб кетаётганимиз йўқ-ку. Курол яроғ, гиёҳванд модда бўлмаса...

– Ҳали шунаقا денг? Кўрамиз, қанақа қилиб олиб кетаркансиз?

– Нималар деяпсиз, ука? Худо хайрингизни берсин, жон ука. Унақа деманг. Ахир биз яхши ният билан...

– Хўш, майли! Буни ҳам қўя турайлик! Тандирингизнинг паспорти борми унда?

– Қанақа паспорт?

– Ҳужжат, опа! Ҳужжат! Ҳужжат бўлмаса, иложи йўқ! Бугун бутун дунёда ҳужжатсиз юришнинг имко ни йўқ-ку! Давр талаби шундай. Хавфсизлик!

– ...

– Шунинг учун, опа, гап шу! – дея назоратчи сигаретини қолдиғигача тортиб-тортиб, ахлат қутиси рўпапрасида турган бўлса-да, уни йўлакча четидаги гуллар устига чертиб юборди ва истеҳзоли тўнғиллади:

– Хих, маданиятни тарғиб қиласмиш.

– Жон ука, гиргиттонингиз бўлай. Шугинани ўтказиб беринг. Паспорт бўлиши кераклигини билмаган эканман. Агар билганимда тўғриламасмидим, ука, – ялина бошлади аёл.

– Мумкин эмас, дедимми, мумкин эмас! Вақтида қилиш керак эди бундай муҳим ташкилий масалаларни.

Вокзал ичкарисидан сухандон қизнинг овози тағин янгради: «Дикқат, дикқат! Тошкент-Сантк-Петербург йўналишига йўловчиларнинг чиқиши эълон қилинади...»

– Ана, ана! Поездингизга йўловчилар чиқа бошлашди. Аттанг! Аттанг! – бошини сарак-сарак қилди назоратчи қутидан янги сигарет оларкан. – Бу ёғи неча пулдан тушди. – Папиросни тутатиб ичига чуқур-чуқур тортаркан бироз ўйланиб, аёлга юзланди. – Хўш-хўш! – Атрофга бир аланглаб олгач, аёлга юзини яқин-

лаштириди ва тутунни осмонга қараб пуфлаб, пичирлади, – Агар ўтказиб бердигам, дейлик. Бундан бизга нима наф?

– Фойда дейсизми? Ахир битта мусулмонга яхшилик қиласардингиз-да!

– Тушунмади, шекилли! – деди назоратчи қиқирлаб шеригига юзланаркан. Индамас шерикка тил битди:

– Муллажирингдан гапиряпмиз, опа. Бўлмаса, ҳозир поездингиз к-е-т-и-б қолади!

Аёл хижолат бўлиб, каловланиб турганди поездга одам чиқарилиши такрор эълон қилинди.

– Ихим, ихим, – томоқ қирди сигарета чекаётган назорачи. – Кўрдингизми? Ҳозир поездингиз ж-ў-н-ай-д-и, опа. Бўлинг тезроқ!

– Майли, укалар, жонларингиз омон бўлсин! Пул бўлса, пул-да! – муаммоси ечилишини билгач, баланд овозда гапириб юборди аёл.

– Секинроқ! «Қулоқ»лар эшитади, – дея чекаётган назоратчи атрофга аланглаб олди ва ҳамма йўловчилар келиш-кетиш ташвиши билан бандлигини кўргач, атрофга қарашини тўхтатмасдан гапида давом этди. – Маданиятимизни пулга сотишяпти, деб ўйлашмасин тағин.

Унга тескари томондаги ўриндиқда ўтирганим учунми, у мени пайқамади. Мени кўриб қолишидан чўчиб, портфелимдан журнал чиқардим-да, ўзимни ўқиётган кишига солдим: «Ана, энди янада хавфсиз!»

– Қанча сўрайсиз, ука? – аёл ҳам дангалига кўчди.

Журнал ортидан секин мўраладим. Назоратчи ялтонг-ялтонг қилиб боз атрофга қаради ва аёлнинг қулоғига яқинлашиб шивирлади:

– Юз!

Аёл назоратчиларнинг муддоага қўчганини кўриб, хурсанд бўлди-да, пул олиб келиш учун болаларининг

олдига шошди. Болалар шоша-пиша сумка ва чўнтақларидағи пулни чамалай бошлишди. Улардан роппа-роса юз минг сўм чиқди. Аёл суюниб назоратчиларнинг олдига борди. Назоратчи бошини яна сарак-сарак қилди-да, қиёфасига жиддийлик ниқобини кийиб:

- Бўлмайди, бўлмайди, иложи йўқ!
- Ахир ўзингиз айтдингиз-ку юз, деб!
- Кўкидан, хоним!
- Нима?
- Гўллигини қара? – шеригига пичирлади тиржайган назоратчи. – Ҳозир ҳамма ҳисоб-китоб кўкида бўлишини ўша ёқларда ишлаб юриб наҳот билмасангиз?
- бетамизлик қилди у аёлга бақрайиб. – Ахир сиз юрт маданиятини четга олиб чиқиб кетяпсиз-а! – деди-ю, энсасини қотириб ортга тисарилди.

– Бор пулимиз шу экан, ука. Тўғри тушунинг, вазиятнинг бундай бўлишини билмагандим. Шунинг учун ортиқча пул олиб чиқмаганмиз.

– «Акалар»ни рози қилишим учун бу пулингиз урвоқ ҳам бўлмайди, – деди назоратчи йўловчилар орасидан уларга эътибор бераётганлари ҳам борми-йўқлигини ахтариб. – Яхиси, тандирингизни бу ердан четроққа олинг! – Боя ҳалим бўлиб турган назоратчи бирдан тўнини тескари кийди. – Яхшиликча кетинг деяпман, опа. Ўз оёғингиз билан кетмасангиз акт тузаман. Менга пора тиқишитиряпти, дейман.

Аёлнинг боши ҳам бўлди. Иши битмаётганидан юраги эзилиб, кўзларида ёш қалқди. Бориб болаларини қучоқлади ва энди унга ҳеч ниманинг фарқи йўқдай назоратчиларга қараб қичқирди:

– Шу норасидаларнинг ризқини қийдингиз-а! Отаси вафот этгач, ўша ёқларга ишлагани кетгандим. Бўлмаса зарилмиди менга бегона юртларда юриш. Азбаройи болаларимнинг келажагини ўйлаб, аёл бошим билан шу ишларни қилдим. Ҳалол нон топиб еяпман,

болаларимга ҳам шуни ўргатяпман. Ахир мен ўғрилик ё жиноят қилиб пул топаётганим йўқ-ку! Тандирни эса улар бегона юртларда ўз юртини, маданиятини унутиб қўйишмасин, ота Ватанини эслаб юришсин, деб олиб кетаётгандим...

Аёл йифлади. Ўтган-кетгандар боя унга ҳайрон қараб ўтишган бўлсалар, энди кўрганларнинг раҳми келарди. Ҳатто бир-икки кишининг кўзида ёш қалқди. Назоратчилар бу ҳолдан сергак тортиб, жойларига бориб туришди.

Аёл йифидан тўхтади. Болаларини қушишни бас қилиб, тандир томон бораётгандаги бошидаги рўмоли сирғалиб ерга тушди. Ярми ҳаёт ташвишларидан эрта оқарган соchlари уни янада аянчли кўрсатди. Буни сезса-да, эътибор қилмай худди телба сингари тандирни қўли билан сийпалай бошлади. Сўнг бошини у ёнга-бу ёнга ташларди. Бу ҳолни кўпчилик кузатарди-ю, бироқ бирор киши олдига бориб, уни юпатишга ҳадди сиғмасди. Ҳатто болалари ҳам жим.

Ёмғир томчилай бошлади. Аёл ўзини тандирдан нари олди. Йўлакча четидаги гуллар экилган жойга борди ва тупроқдан нимадир қидирди. Қўлига илашган катта учта ғишт бўлагини олиб ўрнидан турди. Тандирни уч маротаба айланди. Ундан узоқлашиб, қўлинини осмонга қўтарди ва бир бўлак ғиштни тандирга қаратса ирғитди. Мамоқалдироқ гумбурлади. Энтикиб қўйдим. Бир бўлак тандир чил-чил бўлди. Кузатаётгандар бундан сергакланишди. У яна қўлинини кўкка қўтариб, иккинчи бўлак ғиштни тандирга қараб отди. Тағин чақмоқ чақди. Қўлимдаги журнал ерга тушиб кетди. Иккинчи бўлак тандир чил-чил бўлди.

Бу ҳолдан энди кўпчилик хабар топишган ва бояги беғам назоратчилар аёлга қараб кела бошладилар. Аёл учинчи маротаба қўлинини осмонга қўтарди ва сўнгги ғишт бўлагини тандирга сермади. Ҳавода учив келган

ғишил гўё менинг кўкрагимга келиб тегди ва тандирга қўшилиб юрагим чил-чил бўлди.

Ёмғир шаррос қўйди. Аёл ерга ўтириб хўнгради. Болалари ҳам бир-бирининг пинжига тиқилишиб йиғлашга тушишди. Энди юраги сел бўлган муштипар ва ивиётган тандир тепасида анча одам йиғилишибди. Назоратчилар нима учун аёлнинг олдига келганини эсидан чиқариб, нима қилишини билмай туриб қо-лишган, аёл эса азадаги хотинлардек хўнграб-хўнграб йиғларди. Беихтиёр менинг ҳам кўзларимда ёш қалқди. Ердаги журналимни олиб ўрнимдан қўзғалдим. Бу ҳолатни қандай қилиб қоғозга туширишни ўйлаб бо-рарканман, боя учга кесилган тандир ўрнида асрлар силсиласидан яrim-ёрти шаклда бизгача етиб келган миллатимнинг маданияти ёмғирда эриб, йўлка чети-даги ариққа томон оқаётгандай, оппоқ соchlари тўзи-ган аёл эса унга аза тутаётгандай эди...

Вокзалдан тобора узоқлашарканман, сухандон қизнинг овози қулоғимга элас-элас эшитиларди: «Эҳтиёт бўлинг! Биринчи йўлдан Тошкент-Санкт-Петербург йўналишидаги поезд жўнаб кетмоқда...»

Санжар ТУРСУНОВ



СЕНИ ЯХШИ КҮРАМАН

Бугун ҳарбий хизматга келганимга эллик икки кун бўлди. Адашмасам, бу – еттинчи мактубим. Ҳисоблаб кўрсам, сенга ҳар ҳафта битта мактуб битибман. Баъзан ўртоқларим:

– Қизиқсан-а, бир йил кўз очиб юмгунча ўтиб кетади. Нега энди мактуб ёзаверасан? Хат ёзиш урф эмаску... – дейишади.

Балки хат ёзиш урфмасдир, бироқ кимгадир дилидаги сирларни, дунё гўзаллигию чексизлигини сўзлаб бериш ҳам анъана-ку. Шундай эмасми? Ўртоқларим ҳазиллашади. Аслида уларнинг ўzlари ҳам бир неча марта мактуб битганига гувоҳ бўлганман.

Хатимни олдингми, деб сўрамоқчисан-а? Ишонасанми, йигирма марта ўқиганим эсимда... кейин... ёдлаб олдим. Шамолни соғинмадингми, деб сўрабсан? Соғиндим. Айниқса, сенинг соchlарингни ўйнаган шамол бу ерда ҳам бор экан. Улар қулогимга сирли ва юракни титратгувчи сасларингни олиб келади. Мен улардан сенга соғинчли саломлар юбордим.

Санобар! Биласанми, эсга олганда юракни жуншибашга келтиргувчи исмлар бўлади. Сенинг исминг мен учун соф муҳаббат ва улғайишнинг иккинчи номидир. Биламан, бу гапларимга кўрсаткич бармоғинг

билин қулгичларингни ушлаганча куляпсан. Шунаقا кулганинг менга жуда ёқади. Мен нимаки ёзган бўлсам, эринмасдан ўқигин. Негаки, юрагим нимани буюрса, шуни ёзмоқчиман. Мендан сал нарида туриб мактуб ёзадиган йигитнинг исми Аброр. Айтишича, мактабда математикадан бешга ўқиган экан. Унинг фикрича, дунёдаги ҳар бир калом ҳисоб-китобли. Кулгили-я. Энди тасаввур қилиб кўр. Сен кимгадир ширин гапирдингу ундан худди шундай муносабат кутсанг. Ёки яна кимгадир “Сиз зўр！”, деб айтсанг-у, у зўр бўлмаса-чи? Майли, менимча, Аброрнинг гапини бундай тушунмаслик керак. Унда қандай дейсанми? Қара, сен кимгадир яхшилик қилсанг, ўша сен яхшилик қилган одамдан қайтмаса-да, бошқа бир одамдан, албатта, қайтар экан.

Ишонасанми, кўп вақтим бехуда ўтиб кетибди. Сен яхши биласан, қуёш терак бўйи кўтарилигандан кейин қўзимни аранг уйқудан очардим. Шунда ҳам онамнинг минг бир ялинишидан сўнг. Яна бир гап. Тегирмоннинг чап томонидаги сўқмоқда катта қоғозга “БМТ” деб ёзиб, тол соясида ўтирган Ашурмамат ака эсингдами? Ўша аканинг ишидан минг марта кулганимиз. Сен ҳам кулгандинг. Мактабдан келаётгандик, баҳор эди. Даражалар гуллаган, Ашурмамат ака ўша қоғози ёнида ухлаб қолганди. Сен ва бир неча дугонанг олманинг оппоқ гулини устига сепгандиларинг. Бечора бир қалқиб тушганди. Мен унинг нега бундай қилиб юрганини билардим. БМТ дегани: “Баққа мусор ташламанг” дегани эди. Негаки, одамлар тегирмон орқасидаги чиқиндиларини шу ерга ташлашарди-да. Ўша Ашурмамат ака кичкина одам бўлса-да, қалби жуда катта эканлигини армияга келиб тушундим. Бу ерда ҳамма томон озода, саришта. Яна бир нарсани тушундимки, одам тартибли бўлса, ҳамма иши, бутун ҳаёти тинч, осуда ва завқли ўтар экан. Бу ерда сахар ту-

ришга ўрганиб қолдим. Бир нарсани унутмаслигингни истайман: эрта бир кун турмуш курсак, асқотади. Инсон инсон бўлиши учун, аввало, йўлини тоза тутмоғи керак экан. Йўл тоза бўлдими, қолгани ўз-ўзидан озода бўлиб кетавераркан. Мен йўл деганда умр йўлини назарда туяпман.

Ҳар сафар озода биноларни, бир-биридан тартибли аскарларни кўрганимда Ашурмамат ака эсимга тушаверади. Агар уни кўриб қолсанг, менинг номимдан салом айт. Хавотир олма, иккимиз бир-биrimизни яхши кўришимизни у киши билади. Ўзим айтиб берганман. Жаҳлинг чиқмасин, севиб қолган одам шодлигини ким биландир баҳам кўрмаса, юраги ёрилиб кетади, ахир!

Зўр одам бўлдингми, депсан. Биласанми, зўр одам бўлиш қийин экан. Лекин йўлимдан қайтмайман. Ҳайитой буви айтганди: болаликда қилинган орзу, келаҗакнинг кўзгусидир. Шу гапи ҳамиша юрагимда.

Эсингда бўлса керак, болалигимизда Яккатол боғининг йўлида ўтиргандик. Беш ё олти ёшда эдик. Ўша кунги суҳбат ҳамон қулоғим остида. Қалбимга ўша пайт биринчи марта оташ тушган экан. Кунлар, ойлар, йиллар ўтиб у катта гулханга айланди. Сени соғинганимда, ўша суҳбат эсимга тушади.

- Сенга самолётлардан хатлар юбораман.
- Ёзишни билмайсан-ку.
- Ўрганаман-да.
- Қачон?
- Самолётга минганимда.
- Самолётга қачон минасан?
- Ўн йилдан кейин...
- Ўн йил?
- Ҳа. Кеча-чи, дадам битта китоб ўқиб бердилар. Бир паҳлавон иккита одамни елкасига миндириб девор устидан югуаркан.

- Зўр одам бўлса кераг-а?
- Ҳа. Жудаям зўр одам экан.
- Усмон маълимдан ҳам зўрми?
- Ҳа. Мен катта бўлсан шундай одам бўламан.

Шу сұхбат юрагимга орзу уруғини қадади. Ўшанды биринчи бор зўр бўлишга сўз бердим. Бу сенинг олдингда, ўз олдимда, умуман, еру осмон, тоғу тошлар олдида биринчи сўз беришим эди.

Ўша кунги гапларинг қанчалик кулгили бўлмасин, мен учун ҳозир ҳам жиддий сұхбат эди. Усмон маълим... Жисмоний тарбия ўқитувчиси. Ака-опала-римиздан эшитганимиз учунми, у бизга зўр бўлиб кўринган-да.

Мени соғиндингми, депсан. Уялган бўлсанг керак, шу жумлаларни устидан чизиб қўйибсан. Бир амаллаб ўқидим. Юрагимда какликлар сайрагандек бўлди. Ўзими худди баланд тоғда ўтиргандек ҳис қилдим. Кимдир сени соғинса шунаقا бўлса керак-да, чунки мендан тўрт ёш катта Умид aka ҳам гоҳида барча билан қайта-қайта кўришиб қолади. Шунда ҳазилкаш Жамшид:

- Янгадан хат келган бўлса керак, – дейди.

Ҳали уйланмаган. Менимча, хат севган қизидан келса керак.

Хурсанд одамнинг қулгиси ҳам бошқача бўларкан. Яйраб-яйраб куламиз. Умид aka ҳам қорнини қучоқлаб кулади. Буни ўз кўзинг билан кўрсайдинг...

Ҳа, соғиндингми, деб сўрабсан. Соғиндим. Жуда-жуда соғиндим.

Бу ерда ҳам қишлоғимизнинг шамоллари кезиб юраркан. Ҳа, ўша Бўзтепадаги шамол. Сени билмадим-у, мен ўша дамни эсласам, юрагимда отлар чопади: дукур-дукур.

Бўзтепа. Қишлоғимизнинг энг чиройли жойи. Сенга минг марта айтганман. Ўша тепалиқдан қуёшнинг чиқишию ботиши кафтдек кўриниб туради. Агар

вақтинг бемалол бўлса, тонг отишини томоша қилиб яйрасанг. Кейин кун ботишига термулиб олис-олисларга қараб хаёлларга толсанг, юрагинг бир қулоч ўсади. Сен билан атиги бир марта боргандим. Улоқчанг йўқолиб қолган экан. Эсингда-я? Куляпсанми? Ўшани қидириб боргандик. Қуёш ботар пайт. Ўша лаҳза ҳаётимнинг дафтарига олтин ёзув билан битилган. Шамол соchlарингни ўйнар, бошимиз устида қалдирғочлар учарди.

Икки кун олдин шоирлар келишди. Хабаринг бор, шеърлар ёзиб юардим. Маза қилдим. Бир шоир шундай деди:

- Ватанинни барча яхши кўради. Ҳисобчи ҳам, фермер ҳам, қурувчи ҳам, ер юзида қанча касб соҳиби бўлса ҳаммасининг қалбida ўз Ватани бор. У отасидек суюнчиқ, онасилик мөхрибон, акасидек елқадош, укасилик эркароқ, опа-синглисилек мунис... Шундай экан, шоирлар ҳар доим Ватан ҳақида ёзиши керак. Уларга ёзиш имкони берилган. Улар шундай ёзишлари керакки, бошқа касб эгалари ҳам “И-е, менинг дилимдаги гап-ку”, десинлар.

Санобар, менинг ҳам қалбимда ўз Ватаним бор! Шуни топиб айтгани учун энтикиб кетдим. Яна бир шоир Ватан ҳақида шеър ўқиди. Битта ривоят ҳам айтиб берди. Жуда қойил қолдим... Нега дейсанми? Эшитсанг биласан.

Бир одам ўғлининг елкасига қўлини қўйиб:

- Ўғлим, ким зўр? – дебди.

- Мен зўрман! – дебди ўғил.

Ота яна сўрабди:

- Ўғлим, ким зўр?

- Мен зўрман! – дебди ўғил ўйлаб ўтирмаи.

Ота ўғлининг жавобидан қониқмабдими, сал оғрингандек бўлиб, эшик томон равона бўлибди. Эшикка етгач, яна бир сўраб кўрай-чи дебди:

- Ўғлим ким зўр?
- Сиз зўрсиз, ота! – дебди ўғил.
- И-е, бу нима деганинг ўғлим. Икки марта сўраганимда мен зўрман дединг, энди...
- Ота, – дебди ўғил, кўзи ёшга тўлиб, – икки марта сўраганингизда қўлингиз елкамда эди. Учинчи марта эса елкамда ҳеч нарса йўқ эди. Фарзандни елкасида отасини қўли бўлса, зўр бўлади.

Шоир акамиз сўзининг сўнггида шундай деди:

- Сизу бизнинг ота-онамиз – шу Ватан. Менинг ти-лагим битта: ҳеч қачон Ватанимизнинг қўли елкамиздан тушмасин. Биз зўр бўлиб юрайлик.

Ахир, ўзинг яхши биласан-ку, мен доим зўр бўлиши орзу қилардим. Шу орзу мени бу ерга – юраги ботир йигитларнинг маскани бўлмиш ҳарбий хизматга олиб келди. Шу ният бутун ҳаётимни бошқариб боришини сен ҳаммадан яхши биласан-ку. Айни шу ривоятни эшитганимдан кейин қалбимда мен исмини билмайдиган туйғулар пайдо бўлди. Қадам олишларимда салобат сездим. Ҳар лаҳза елкамда кимнингдир қўли бордек улғаявердим. Одам улғайганини ўзи сезса ғалати бўларкан: худди дараҳтдай гулласанг. Зўр-а. Ҳа, юрагим катталашиб бормоқда. Жуда катта, Бўзтепа-нинг тоғидан ҳам катта...

Момом ҳақида ҳам ёзиб, мени яна хурсанд қилдинг. Сен қизга ҳеч ақл битмади-да. Кап-катта қиз момонинг кўз ўнгига дараҳтга чиқасанми? Мени ҳам дараҳтга чиқар деб тўғри айтибди, момом.

Момом ҳақида сенга бир гап айтиб берайми? Сен ўшанда ундан ранжигандинг. Тўғри, кўп ранжигансан, мен охиргисини, хизматга кетишимдан бир кун олдинги воқеани айтяпман.

Момом оилада кенжা қиз бўлган. Энди уч ёшга кирганида катта акаси йигирма икки ёшга тўлган. Ўша акаси армияга кетиб, қайтмаган. Уни ўша ёқдан

урушга олиб кетишган. Момонинг ота-онаси “Ана келади, мана келади”, деб боласининг дийдорини қиёматга қолдириб, бу дунёда ўтиб кетишган. Шу воқеа сабаб, билсанг керак, бирорта фарзандини қишлоқдан чиқармаган. Армияга боришига-ку, асло унамаган. Шунинг учун барча амакиларим бир маҳаллада яшашади. Бири учувчи бўлишни орзу қилган экан. Ҳозир ҳам “Ўзим-ку, бўлмадим, лекин ўғлим, албатта, учувчи бўлади”, дейди. Қишлоғимизда Анзират деган бир кампир бўлган экан. Шу момонинг икки ўғли учувчи бўлади. Уруш пайти самолёти билан портлаб кетади, момо телба бўлиб қолган экан. Эри бир куни болалинг келади, мана кўрасан деб уни овутармиш. Момо қачон деса, қачон мустақил бўлсак дер экан эри. Сен билан биз эслолмаймиз, айтишларича мустақиллик бўлган йилда осмонда ўзимизнинг байроғимиз нақши туширилган самолётлар ўтади. Шунда бобо: “Кампир, болаларинг қайтди”, дейди. Ўлим тўшагида ётган момо ўрнидан туриб осмонга қарайди. “Қани, болалирим, улар самолёт-ку”, дейди.

– Ўзимизнинг самолётимиз, – дейди бобо.

Момо бир оғиз гапирмайди. Шу кеча омонатини топширади.

Буни сен ҳам эшитгансан, эслатганим сабаб – шунга ўхшаш воқеалар момонни қўрқоқ қилиб қўйган. Ахир, узоқ йил қалбида сақланиб келаётган қўркувдан қутулиш осон эмас-ку.

Момон менинг хизматга боришимга ҳам тиш-тирноғи билан қарши бўлди. Барча амакилариму аммаларим орага тушиб, бир амаллаб кўндиридик. Аввалги хатингда момонни хурсанд бўлганини, ҳозир армия яхши экан деб алқаганини ёзгандинг. Энди яна момондан хафа бўлишинг мумкинми? Йўқ, асло!

Шодини танийсан-а? Тошкентда ўқияпти-ку, ўша. Менга бир вақтлар бир гап айтганди. Сени яхши кўриб, севишимни айттолмай юрган кунларим.

– Севган одамнинг юрагида олов бўлади, Бобур жўра, – деди у. – У олов лаҳза сайин алангаланиб бора-веради. Агар вақтида айтилмаса, қулга айлантиради.

Шодининг шу гапидан кейин сенга яхши қўришимни айтгандим. Ўшанда ростдан ҳам юрагимдаги олов ўрнида гуллар пайдо бўлганди.

Сенга яна бир гап айтаман. Менинг юрагимда, бутун жисмимда ҳозир ҳам олов бор. Биласанми, бу олов қачон пайдо бўлди. Қасамёд қилган куним. Ҳа, ўша куни шапкамни осмонга отарканман, худди юрагим осмонга чиқиб кетадигандек ҳаприқар, еру кўқда юраклар учиб юргандек туюлади. Ўша кунги оловга шоир аканинг ривояти яна мой сепди.

Аввало, сени менга учратган тақдиримга раҳмат. Сени дунёга келтирган ота-онангга раҳмат. Сен билан менинг киндик қонимиз тўкилган қишлоғимга раҳмат.

Сени тишинг тушган кундан бошлаб яхши қўраман. Ўша Яккатол боғидаги йўлда қилинган орзудан бошлаб яхши қўраман.

Аввал тоғни, қишлоқни, сени яхши қўрдим. Сен туфайли ҳаётни, дунёни, еру осмонни яхши қўрдим. Ҳамма яхши қўришларим йиғилиб-йиғилиб улкан муҳаббатга айланди.

Сени, мени, барчани кафтида кўтариб юрган она заминга, бошимизда қуёш нурию ёмғир, қорини сочган осмонга, шу замин, шу осмонга-да ватан бўлган Ўзбекистонни яхши қўраман.

Мен зўр одам бўлдим. Ҳа, елкамда Ўзбекистоннинг қўли турибди. Бу қўл елкамда экан, бу дунёда мендан зўр одам йўқ.

Санобар, бир гапимни унутма: одамнинг юраги ботир бўлса, у енгилмас экан. Менинг юрагим буюк Ватанни сева олган ботирга айланди.

Нодирабегим ИБРОҲИМОВА



ВАТАНГА ҚАЙТИБ

Самолёт ўз вақтида ерга қўнди.

Билагидаги соатга қараб қўйган Дилмурод ним жилмайди. Вақт – ким учундир тенгсиз неъмат. Унинг бир лаҳзасини ҳам фойдали ишга, ҳеч йўқ фойдали ўй-хаёлларга бахшида қилиш ҳам мақсадингиз сари яқинлаштиради.

Дилмурод парвоз давомида кўзларини юмганча хаёлида пишиб келаётган режалар кетма-кетлигини тақсимлаб чиқди. Энг аввало, ватанининг ҳавосидан тўйиб симиради. Йўқ, унутмаган. Қуёшнинг заррин нурлари юзларини қитиқлашини тасаввур қилди. Баҳор қуёши мусаффо бўлади. Танингизга хуш ёқади... Ғайратингиз тўлиб-тошиб, яна мақсадингиз сари дадил одимлайсиз.

Аэропорт анча ўзгариб кетибди. Ривожланган мамлакатларники каби замонавий, шу билан бирга миллий руҳ ҳам сезилади. Ўзбекча сўзларни эшитиши билан қалби сурурга тўлди. Ўзи топа олишига кўз етса ҳам, аэропорт ходимидан сўрашга жазм қилди:

- Кечирасиз, яқин орада тамаддихона борми?
- Албатта, жаноб, – йигит унга манзилни батаф-сил тушунтирди. – Юртимизга хуш келибсиз, – деди гапи сўнгига.

Наҳотки, кўринишим ажнабийга ўхшаса, хаёлидан ўтказди Дилмурод. Ёки ўз тилида ғализ сўзлармикин? Йўқ. Ўзбек тилидаги адабиётларни овоз чиқариб ўқишни, айниқса, хориждаги ўзбек дўстлари билан учрашиб туришни канда қиласди.

– Мен ўзбекман, – деди аллақандай ғурур билан.

Сўнг шошилмай аэропортдан чиқди, гарчи вақтнинг қадрига етса-да, ҳозир шошилишни сира истамас эди. Ерни авайлаб босар, осмонга, қуёшга, оппоқ момиқдек булутларга қараб қўйишни унумасди. Осмон ўзгармайди, ер ўзгармайди, деди ичидা. Ҳамма нарса ўзгариши мумкин. Ҳатто инсонлар ҳам. Аммо аждодларимиздан қолган она замин ҳамон ўша. Тупроқ иси ўша, қуёш нурлари ўша... Қачон бўлса ҳам, қандай бўлса ҳам сени бағрига олади, итармайди.

Дилмурод айтилган тамаддихонага кириб келди. Очиқкан бўлмаса-да, ачиққина кўк чой ичиб, седанали бўрсилдоқ нон егиси келарди. Болалигида шакар чойга тандир нон ботириб ейишлари кўз олдига келди. Хорижда ватанини соғинган пайтлари шундай тамадди қиларди ҳам, аммо таъми ўхшамасди. Ич-ичидан тошиб келаётган завқини яширолмай ҳаяжон билан буюртма қилди.

Патир иссиққина эди. Чойдан секин хўплади, йўқ, лаби куйишини ўйлаб эмас, таъмини янада яхшироқ туйиш учун. Нонни кўзларига суртди. Аскарлар каби бир четидан тишлиди. Уни қизиқиш билан кузатиб турган хўранда ва хизматчиларга эътибор қилмади. Энди унга барибир, устидан кулишса ҳам майли! Ахир у ватанида! Буни энди теран ҳис қилди. Анча вақт дезраза ортидаги манзарага тикилиб хаёл сурди. Майли, бир дам бўлса-да ширин хаёллар... истаклар... орзулар.

Телефонини созлагач, қўнғироқ қилди.

– Мен келдим. Яхши, ўзингиз-чи? Айтилган жойда бўламан...

У телефонни ўчириб, ширин энтикди. Ниҳоят, қиз билан учрашади. Биринчи марта. Аэропортда кутиб олмоқчи эди, аммо дарсдан қолмасин деб Дилмурод кўнмади. Унга қачонлардир интернетда сирдош дўст топасан дейишса, ишонмаган бўларди. У меҳр кўзда деб ишонар ва виртуал муносабатлар самимий эмас деган холосада эди. Лекин Дилобарнинг кўзларига кўз тушмаган бўлса-да, кўнгли кўнглига тущди. Бу дўстликми, ё бошқача туйфуми, ҳали йигит ўзи ҳам англамайди. Бунинг устига, қизнинг суратини ҳам кўрмаган. Ўзидан бир неча ёш кичиклигини, олийгоҳда ўқишини билади, шунингдек, ички олами ҳам ўзига жуда яқин, қандайdir оҳанрабоси бор. Агар шу қиз бўлмаганда, балки, Дилмурод қайтмаган бўларди...

“Нега биз тарафларга келмайсиз? – деганди охирги мактубида қиз. – Ҳеч бўлмаса саёҳатга келинг”.

Дилмуроднинг ҳеч қачон қайтмайман деган қатъий аҳди бир оғиз сўз билан қуёшда қолган муз каби эриб кетишини ўйламаган эди. Ҳа, саёҳатга боради. Соғинч азоби тошдек оғирлашиб кетди. Бўшатмаса бўлмайди. Дилобар шунчаки баҳона бўлди, аслида, ўзи ҳам учишга шай турарди. Эртасига ёқ ҳамма ишларини ҳамкорига топширди-да, бир ҳафталик саёҳатга отланди. Энди фирма анча оёққа туриб олган, бир ҳафта усиз ҳам кун кўра оларди.

Дилмурод такси ушлаб, манзилни айтди. Бу ерни бежиз танламаганди. Болалиги ўтган жойлар. Ҳар бир қарич ери ёдиди. Кўзини юмиди ҳам топа олган бўларди. Лекин... айтилган жойга тушгач, адашмадимми, дегандек атрофга яхшилаб қаради. Хотираларида турган эски пастак уйлар ўрнида кўп қаватли бинолар, дўконлар, оғислар қад ростлаган, анҳор устидан эса замонавий кўприк қурилганди. Янги ўтқазилган баҳор гуллари зангори, сарик, пушти рангларда товланади, баргларига иниб турган шабнам эса йилт-

йилт қиласы. Эхтимол, бошқа бирор давлатта саёхатта борганида, манзарадан, албатта, баҳра олган бўларди. Лекин ҳозир эсанкираб қолди.

Йўлакдаги ўриндиққа ўтиргач, соатига қаради. Беш дақиқа аввал келибди. Қизлар барибир кечикиб келади. Унгача айтадиган сўзларини ўйлаб турса ҳам бўлади... Аммо бир дақиқа ўтмай унинг қаршисида бир қиз пайдо бўлди.

– Ассалому алайкум, Дилмурод ака. Хуш келибсиз...

Дарҳол овозидан таниди. Ҳарҳолда, улар телефонда сұхбат қуришарди. У доим Тошкентни таърифлаб дилини қитиқлар, йигит бўлса тадбиркорлик фаолияти ҳақда зерикарли маъруза ўқирди.

– Яхшимисиз, Диlobар? – йигит ўрнидан турди. Кўл узатиш-узатмасликка иккиланиб қолди. – Дарслар тугадими?

– Ҳа, – у кўзларига қуиилиб келаётган ёшларни секин артди.

– Тинчликми? – сўради ҳайрон бўлганини яширамай.

– Бунчалик тез етиб келасиз, деб ўйламовдим, – қизнинг овози титрарди. – Бу учрашувни узоқ кутгандим. Шунга...

Дилмурод ўнғайсизланиб, кўзларини олиб қочди. Қизлар билан қандай муомала қилишни билмасмиди ёки она тилида бемалол гапириб кетишга қийналдими, ўзи ҳам тушунмади.

– Ўтиринг, – деди ўриндиққа имо қилиб. – Бу ерлар ўзгариб кетибди. Болалигимда бутунлай бошқача эди.

– Сиз ҳали бутун шаҳарни томоша қилсангиз, сира кетгингиз келмай қолади, – қувноқ оҳангда гапиришиди уринди қиз.

– Эхтимол.

Ўриндиққа ўтиришди. Иккиси ҳам анҳордаги оқ-кушларни томоша қила бошлашди.

– Ота-онангизни эслайсизми? – савол берди қиз.

Дилмурод сұхбатлари бу томонга бурилишини кутмаганди. Тұғри, қызға үз ҳаётини сўзлаб берган, лекин била туриб унинг ўтмишини титкилаётгандек, ниш ураётгандек туюлди.

– Нега сўрайapsиз? – деди озроқ асабийлашиб.

– Қўшни қизни-чи? – саволга савол билан жавоб берди у.

Пешонаси терлади, Дилмурод дастрўмол излаб қўлини чўнтағига солди. Чўнтағида эмас экан. Яна-да асабийлашди. Ахир доим чўнтағида туриши керак эмасмиди?

– Аввал бирор меҳмонхонага жойлашганимдан сўнг кўришсак бўлар экан. Йўл чарчатди, чоғи.

– Дилмурод ака, менга қаранг, – Дилобар елкасига қўлини қўйди.

Ғайришуурый равишда дастрўмол ҳақда ўйлашни тўхтатиб, йигит қархисидаги инсонга боқди.

– Мен сизга бегона эмасман, – деди қиз.

– Биламан.

– Йўқ, сиз ўйлагандан ҳам яқинроқман.

– Пайқаяпман.

– Нималарни ҳис этяпсиз?

Дилмурод ўйчан ҳолда бир нуқтага тикилиб қолди. Ҳис этаётгандари шунчалик кўп эдикни, тартибга келтиролмасди. Ҳаммаси үз ўрнида, кетма-кетмаликда бўлишига ўрганган йигит яна беихтиёр соатига қаради.

– Тушлик вақти бўлибди. Балки бирор ерда ўтириб, бафуржга гаплашармиз, Дилобар.

– Ҳозир томофимдан ҳеч нима ўтмайди, – қиз маҳзунлашди.

Дилмурод ортиқ чидай олмади.

– Тушунмаяпман, сизга нима бўлди? Биз ахир... сиз жуда қувноқ ва... бари бошқача бўлишини кутгандим.

– Дилмурод ака... – Дилобар кутилмаганда кўзига ёш олди. – Ўн беш йил, ниҳоят, учрашдик.

Дилмурод бир сўз демай, оғир ютинди. Бўғзига нимадир қадалиб унинг ҳам йиғлагиси келди.

– Мен... мени танимадингизми... – қиз йиғи аралаш пичирлади. – Қўшни қиз... Дилош дердингиз. Менга боғингиздан... гуллар узиб берардингиз.

Дилмуроднинг онгига нимадир чарақлаб кетди. Юраги гуп-гуп уриб, оламга жаранг сочди. Нима... нималар деяпти бу қиз?

– Қанақасига? – деди уни ўзидан нари қилиб. – Менинг ундан қўшним йўқ... тушуняпсизми, ҳеч киммим йўқ.

– Бор эди! Эслаб кўринг, бор эди-ку? Онангиз, дадангиз, бир синглингиз.

Дилмурод ўрнидан туриб яна асабий равишда чўнтағидан нимадир излай кетди.

– Илтимос, – қиз ҳам ҳаяжондан титрарди. – Эсланг...

Дилмурод хотиралар сандифини очишни истамай, шаҳд билан йўл сумкасини қўлига олди.

– Мен ортга қайтаман. Кўнглим билан ўйнашишга ҳаққингиз йўқ эди.

Йигит шаҳдам юриб кетди. Шошиб қолган Дило-бар ҳам ортидан чопди.

– Тўхтанг! Яна йўқолиб кетасизми? Сиз ҳам дадангизга ўхшаб бераҳммисиз?! Онангизнинг руҳини чирқиратиб...

Дилобар нишонга урганди. Йигит турган ерида қотиб қолди ва кутилмаганда ўзини ерга ташлаб, бoshини қўллари орасига яшириб хўнграб йиғлаб юборди. Дилобар дарҳол унинг елкасини ушлади.

– Сизни топганимда кетманг, Дилмурод ака. Сўз берганман, топаман деб...

Дилмуроднинг кўзларига ниҳоят дўйстрўмол тегди. Дилобар авайлаб гулли дастрўмолда унинг юзларини артарди.

- Дилош... синглимнинг қалин дугонаси эдинг...
 - Ҳа, мен, менман ўша.
 - Нега айтмадинг? Вақтлироқ?
- Қиз маъюсланди.
- Келмайсиз, деб қўрқдим.
- Дилмурод қаддини тутиб, катта йўлга имо қилди.
- Қўнимгоҳ топайлик.
 - Меҳмонхона деманг факат. Бизниги борамиз...
 - Йўқ, йўқ, – йигит шошилиб унинг гапини бўлди.
- Мен ўйлаб олишим керак... чарчадим.
 - Хўп, – қиз унинг ҳолатини тушунишга уринди.
- Чиндан ҳам ўйлаб олишлари керак. Ҳали олдинда қанча саволлар турибди. Хотиралар, бир-биридан айри тақдирлар...

* * *

Дилмурод онасининг чеҳрасини яхши эслайди. Кўзлари киртайиб, пушти лаблари нимтабассум қилишга урингандек турарди. Қонсиз ёноқлари, ўсма сурилган қошлари, эрта ажин тушган пешонаси кўз олдида турибди. Күш уйқу эди, Дилмурод кечалари кўзини очганида онасининг сергак ётганини кўрарди.

- Ухлайвер, болам, – дерди бошини силаб.

Дилмурод совуқ қотганча кўрпа билан бошини ўраб оларди. Ташқарида қор, совуқ, уй ундан ҳам соvuққа ўхшарди. Онаси амаллаб ёқсан ўтин аллақачон ўчиб бўлган. Тонг бўзариши билан яна ўтин олиб келади. Бироз исиниб нонушта қилишади. Ишқилиб, нон бормикин, деган хаёл Дилмуроднинг уйқусини қочирди. Бўлмаса яна қўшнидан сўрашга тўғри келади. Йўқ, бу сафар Дилмурод чиқмайди. Синфдоши Дилобардан

уялади. Ана, Нигора синглиси чиқсан. Кичкина бўлса нима бўпти, гапиришни ўрганволди-ку. Ҳар кун “ая, нанна”, деб пилдираб юради.

Дилмурод онасини қучоқлаб олди. Иссиқ тафтидан бадани илиди. Лекин синглиси ғингшиб қолди, онаси нариги тарафга ёнбошлади. Кўкрак тутди, шекилли, пишиллаб эма бошлади. Унинг қорни тўяди, ўйлади Дилмурод. Агар нон бўлмаса, нонушта қилмай кўявераман, деган қарорга келди. Мактабга борса, пистачи холаси бир нима беради. У Дилобарнинг ойиси. Хах, ўзимнинг куёвимдан қанд ўргилсин, деб уялтирадио, аммо қўнжини бир нималарга тўлдиради.

Ювош сигирлари эса анчадан бери кўринмай қолди. Сутдан ҳам маҳрум бўлишди. Дилмурод онасидан сигир ҳақда сўровди, аёл индамади. Дилмурод ўзича фаҳм қилди: дадаси олиб кетган... Дадаси кўп нарсани олиб кетади. Баъзан бир нималар олиб келади ҳам. Лекин келадиганидан кетадигани кўп. Ўзини уч-тўрт кунда бир кўради. Кейин мактабдан қайтишда кўча-кўйда ҳам кўп учратади. Мактабда менинг ота-онам деган иншо ёзишганида дадасининг қаерда ишлаши ҳақда кўп ўйлади. Онаси уй бекаси бўлсада, тикиш, тўқиш қилиб озроқ пул топарди. Дадаси ҳам пул олиб келиб туради. Қўйни пулга тўлиб келган кунлари зиёфат бўларди уйда. Ҳамма ошналари йиғилади, тонггача байрам қилишади. Лекин қаерда ишлашини билмади. Онаси доимгидек синиқ жилмайди.

Шу хаёллар билан кўзи илингган Дилмурод тонгда базўр ўрнидан туриб, ошхонага мўралади. Онаси ни-мадир пиширяпти. Оғилхона тарафда дадасининг қораси кўринди. Қўй етаклаб олган. Демак, дадаси бугун ишлаб келибди!

Дилмурод қувонганча онасини қучоқлаб олди. Аммо аёл хурсанд эмасди, кўз ёшларини дарҳол артиб, ўғлининг бошини силади ва титроқ овозда:

– Қовурдоқдан тез еб ол, – деди, – кейин мактабингга шошил. Синглинг ухляптими?

– Ҳа. Дадамнинг ёнига борсам майлими? Энди қўй боқарканман-да. Баҳор келса, болалар билан ўтлашибга обчиқаман.

– Майли...

Севинганча шаталоқ отиб оғилхонага чопди.

– Ассалому алайкум, дада.

Эркак ортига ўгирилиб ишшайди.

– Ҳа, ота ўғил. Кўрдингизми, сизга нима олиб келибман.

– Ҳа, – Дилмурод қизиқиши билан шохдор оқ қўйни кузатди. – Баҳайбат...

Эркак унинг елкасига уриб қўйди. Бола унинг тиртика тушган қоши, дўрдоқ лаблари ва қип-қизил лунжига қараб меҳри жўшиб кетди.

– Раҳмат, дадажон. Кеча овқат емагандик, сизни роса кутдик.

– Ана, келдим, истаган нарсангни олиб е, – у чўнтағидан пул чиқарди.

Дилмурод апил-тапил кийиниб мактабга йўл олди. Бу пулни Дилобарнинг ойисига беради. Ахир қарзлари кўпайиб кетган. Холаси ҳисобламаса ҳам, Дилмурод дафтариға ёзиб қўйган. Бу пул етади. Бувиси касал ётибди, Дилмурод берган пулга дори олишса, албатта, тузалиб кетади. Кейин яна кулчалар ёпиб беради.

Аммо пистачи қўшни пулни олмади, қайтиб боланинг чўнтағига солиб қўйди.

– Буни-чи, ўғлим, онанг қийналганда ўзига берасан. Асраб қўй. Ун оларсизлар...

Дилмуродга бу гап ҳам жўяли кўринди. Бир ҳафтадан сўнг дадаси келтирган нарсалар тугайди. У ўйланганча партасига ўтирди. Ёнига қаради, Дилобар ҳали келмапти. Уйқучи, ҳар куни кеч қолади. Бир неча

марта нон сўрагани учун шум қизча дарсларини ҳам килдиририб олган.

Дилмурод бугун баҳтиёр эди. Бундай баҳтли кунлар эса тансиқ эди.

* * *

– Дилобар, – меҳмонхонага киришгач йигит қизга ўгирилди. – Сиз... сен боравер. Эртага кўришамиз.

Қиз унга хавотир билан назар ташлади.

– Кетиб қолмайсизми?..

– Йўқ, – Дилмурод қизнинг дастрўмолини кўрсатди. – Бу менда-ку, кетмайман.

Дилобар синиқ жилмайди. Худди онаси каби. Дилмуроднинг юраги яна симиллади. Оғир қадамлар ташлаб, хонаси томон йўл олди. Дилобар унинг ортидан қараб қолди. Сўнг автобус бекатига бориб анча вақт хаёл суриб қолди. Дилмуродни яхши эслайди. Уни охирги марта кўрганида ўн ёшларда эди, ҳам синфдоши, ҳам кўшниси эди. Доим унга эргашиб мактабга бориб қайтарди.

Бир куни қайсиdir фанни тушунмай, Дилмуродникига чиқди. Хонтахтага ўтириб унга обдан масалани тушунтираётган пайтда Дилмуроднинг дадаси гандираклаб уйга кириб келди. Кийимлари йиртилган, лабларидан қон оқарди. Дилмуроднинг онаси қўрқиб кетиб унга пешвоз чиқди, суяб уйга олиб кирди, шошиб сув олиб келди. Лекин дадаси уларни силтаб ўшқириб берди:

– Ҳамманг кет! Сенларни боқаман деб! Лаънатилар... – деди дағал товушда. Ҳеч бири жойидан қимир этмаганини кўриб баттар ғазабланди:

– Йўқол! Бўлмаса... – у аёлнинг ёқасига чанг солиб остоноага итариб юборди. Дилобар қўрқиб кетди. Дилмурод дадасининг қўлларидан ушлади, лекин уни мушукдек отиб юборди. Дадаси ҳеч нимани билмай улар-

ни дўппослай кетди. Аёл болаларини ва Дилобарни икки қанотига олган күшдек питирлаб кўчага отилди. Ўзларини Дилобарларнинг очиқ дарвозасига уришди. Икки аёл тонггача дардлашиб чиқишиди. Дилмурод эса қизнинг юзига қаролмасди, ўзини ухлаганга солди.

* * *

...Эзгин ҳолда уйга кириб келган Дилобарни кўриб онаси пешвоз чиқди:

- Келдингми, қизим. Дилмурод... у ҳам келдими?
- шошганча оstonага кўз ташлади. - Ё кўришолмадингми?
- Кўришдик, ойи. У меҳмонхонага жойлашди.
- Уйга олиб келмапсан-да. Ўзимча... дастурхон ту заб ўтирувдим.

Дилобар меҳмонхонага кириб камтаргина тузалган хонтахтага қаради. Онаси пазанда. Йўқдан бор қиласди. Бўғирсоқ, кўк қатлама, холвайтар тайёрлабди. Дилмуродни бошқача яхши кўрарди, балки ўғли йўқлиги учундир. Ҳозиргача хотирлаб кўзига ёш олиб юрарди. Яқинда Дилобар уни интернетдан топганини айтганда, юраги нақ тўхтаб қолай деди. Тириклигини билгач, узоқ йиглаб шукrona айтди.

- Ўзи соғ-саломатмикан? – онаси Дилобарнинг елкасини енгил силади. – Айтдингми ҳаммасини?
- Ҳали гаплашиб улгурмадик. Аммо қўшниси эканимни билди. Гарангсиб қолди. Эртага кўришамиз.
- Майли. Шунисига шукур. Раҳматли қўшнимнинг руҳи энди тинчийдиган бўлди. Айтганча, қабрига олиб боргин... Дуои фотиҳа қилиб қўйинглар.
- Хўп бўлади, – Дилобар ҳаяжонини яшириш учун ошхонага ўтди.

Юрагига қулоқ солди: нималар деб уряпти? Кимни деб? У ўша озфингина қўшни болакайни бугунги Дил-

муродга солишириб кўрди. Гўё бошқа инсондек. Ди-лобар ҳам ўзгарганми, нега йигит тезда таниб олмади? Йўқ, нигоҳлар барибир ўзгармайди. Ҳа, ғамгин кўзла-ри ўша-ўша. Онаси вафот этганида қотиб қолган мунг сира кетмапти. Ўшанда Дилобарни қучиб роса ўкраганди. Кейин... йўқолиб қолди. Бир кечадаёқ. Ўсмир йигитчани Қўйлиқ бозорида арава тортиб юрганини кўрдик, дейишли. Бирор поездга илашиб четга чиқиб кетди, деди. Дадасининг эса иши бўлмади. Синглиси-га жабр бўлди. Пиёниста отанинг қўлида қолмасин деб уни етимхонага бериб юборишмоқчи эди. Аммо Дилобарнинг онаси уни-да ўз фарзандидек кўрарди. Тurmуш ўртоғи билан келишиб, асрраб олишни ихтиёр қилишиди. Дилобар билан эгиз қизлардек улғайди. Ни-горани ўтган йили турмушга узатишиди. Акаси топил-ганини эшитса, армони қолмаса керак. Дилобар эса келган совчиларни рад этди. У... кимнидир кутарди.

Дилмурод қизнинг келишини кутиб ўтирумади: саҳарлаб қабристонга йўл босди. У қаерда бўлмасин, онасининг руҳига фотиҳа ўқиб юрди. Тўлиқиб кетса-да, қабрига келишга жазм қилмади. Уни нима ушлаб турарди? Бугун ўйлаб қараса, ўтмишни барибир ўз-гартиrolmas экан. Кетиб чакки қилганми? Сингли-си учун ҳам қолиши керак эдими? Дарвоқе, у ҳозир қайларда экан? Дадаси-чи?..

Онасининг қабрини адашмай топиб келди. Қаров-сиз қолган деб ўйлаб эди. Йўқ, гўё келишини сезган-дек атрофи супирилиб, саришта қилиб қўйилган. У қўлини илиқ тупроқقا теккизди. Кўп йиллардан бери йиғламаганди. Йиғламайман, деб аҳд қилганди. Аҳди бузилди. Бундан зарра афсусланмади ҳам, юрагидаги тошлар қулаётгандек бўлди: ўзини енгил ҳис қилди. Онасининг руҳига тиловат қилди.

– Дилмурод ака, – орқасидан Дилобарнинг овози эшитилди. У аллақачон шу ерда ҳозир бўлиб, йигитни

кутиб турганини Дилмурод пайқади. – Бу мактубни кейинчалик Нигоранинг нарсаларини йиғиштириб ўзимизнинг уйга олиб кетаётганимизда топиб олган-дик. У сизга аталган экан. Ниҳоят, омонатни етказдим.

Дилмурод титроқ қўллари билан қиз тутқазган эски хатжилдни олди. Ёлғиз ўқиши истаган эди, лекин ўйлаб қараса, ёлғиз бўлмагани дуруст экан. Дардни кўтаришга шерик бўлгани маъқулмикин? Нозик жуссали шу қиз кўтара олармикин? Назарида, шунча йилдан бери дардига шерик бўлишни истаган инсонни у яқинига йўлатмай келган. Энди эса...

“Ҳаётим тугаб бораётганини сезяпман, ўғлим. Унгача бу мактубни битиб сенга беришим керак. Биласман, ўлимимда отангни айблайсан. У сен ўйлагандек ёмон инсон эмасди... Сен туғилганингда жуда суюнган. Касалим ҳақда бирорга айтмадим. Ўсимта анча катта, дейишди. Кўз олдимдан сира кетмаяпсизлар. Энди бу оиланинг каттаси сенсан. Даданг менсиз ҳароб бўлади, унга яхши қара. Синглингни бошқаларга хўрлатиб қўйма, ўзинг ота бўлиб турмушга узат. Ўйимизни ташлаб ҳеч қаерга кетма, болам. У ерда чироғимни ёқиб ширин оила қур, дадангнинг хатосини тақрорлама, ичкиликдан, ҳаромдан нари юр. Биласман, сен яхши инсон бўлиб етишасан. Қаерда бўлсанг ҳам қалбингда бўламан. Тақдирга аччиқ қилмай, баҳтли бўлишга ҳаракат қил, Дилмуродим. Муродингга етиб юр, соғ бўл. Онанг”.

Дилмурод яна ўсмир йигитчага айланиб қолди. Ҳа, дадасини айбламаслиги керак, синглиси ҳам қаровсиз қолмасин. Йўқ, бу ерлардан қочиш қароридан кечиши керак. Эҳхе, не азоблар турибди олдинда? Қочиб кетганига қанча пушаймонлар бўлди-ку? Лекин... муродига етди, охир. Йўқчилик балосидан қутулди, омади келди, обрў топди. Аммо, афсуски, ўзини баҳтли ҳис қилолмади.

– Дадангизни, синглингизни кўришни истайсизми? – кўнглини уққандек савол берди қиз.

Дилмуроднинг ичидагироқ ёнгандек бўлди.

– Ҳечдан кўра кеч... сиз уларга кераксиз, – Дилобар давом этди.

– Сенга-чи? – деди у беихтиёр. Кейин ўрнидан туриб қизнинг қўлидан тутди. – Кетдикми?

– Қаерга?

– Ҳаётимизни қуришга. Она юртимда. Барини бошидан бошлашга доим имкон бор-ку, тўғрими?

Дилобар ним жилмайди. Ерга тикилди. Қуёшнинг илиқ нурларимикин, юзини қизартирди.

Тонг оппоқ бўлиб отмоқда. Худди ўн беш йил аввалгидек. Фақат бу тонг унга қалбини қайтариб берди. Йигит бу гал келажак сари ғазаб ва нафрат эмас, меҳру муҳаббат билан қадам ташлади.

Жавлон ЖОВЛИЕВ



БУХОРО, БУХОРО, БУХОРО...

Ўша йили қиши жуда совуқ келган экан-да! Эс-эс биламанки, бирга ўйнайдиган серкиприк афғон болаларининг киприклари бир-бирига ёпишиб, қиров тушгандай оқариб қоларди. Худди ҳозирги қорбоболарнинг ясама киприкларини эслатарди. Мен афғон болалари билан тез тил топишиб кетганман. Гарчанд улар мендан бўйчан, бунинг устига, бир-икки ёш катта бўлишса ҳам. Синглим Ойшабиби эса уйдан чиқмасди. Уйда отам бухороча танча қурганди. Шунинг атрофида турли латта-путталардан нимадир тикиб ўйнаганлари эсимда... Онам эса куну тун акам билан овора. Акам зотилжам билан оғригани учун бизни ёнига қўйишмасди. Синглим Ойшабиби билан дера-за дарчасидан чўпдай озиб кетган, рангпар, кўзлари киртайиб, сўлғин боқувчи акамга соатлаб тикилиб турардик. У ҳам бизни кўриб «яхшиман» деган маънода қоқшол қўлларини кўтариб силкиб қўярди. Тез орада акам тузалиб, чопқиллаб кетишига шубҳа қиласди.

Отам бозорда ҳаммоллик қиласди. У гоҳ-гоҳ оппоқ, майин бир ширинлик олиб келгани эсимда. Жуда мазали, тилда эриб кетарди. Унинг номини ҳозиргача аниқ билмайман. Аммо онам биринчи марта ширинликни кўрганда йиғлаб юборганди. Шунда у пайтлари

Ойша онамнинг тиззаларига ўтириб, жажжи қўллари билан юзларини силар, кўзёшларини артиб қўярди.

- Нега йиғлайсиз?
- Бухорони эслатди, қизим.

Ўша пайтларда энг кўп эшитган сўзим Бухоро эди. Бухоро, Бухоро, Бухоро... Хаёлимда бу жой осмонларда, оппоқ булутлар орасидаги ялтироқ тошлардан қурилган сарой, дунёдаги барча эртакларнинг тугайдиган манзили эди. Бухорода туғилган бўлсам ҳам, эсимни Қобул яқинидаги қишлоқда таниганман... Шу ерда отам сафар пулларини қайсиdir қаллобга бой бергагу, биз камбағаллик кўчасига ирғитилганмиз.

Энг ёмони – акам касал бўлиб қолган эди. Мен унинг соғлом пайтини қанчалик эслашга уринмай, эслолмайман. Фақат бир куни у йўталганча (ўша пайт ҳам озиб-тўзиб кетган эди) уйимиздан чиқиб кетгани ёдимда. У ишга кетаётиб, бизни ўпиб қўйганди. У ўша пайтларда анча улуғ одамдек кўринар, онам ҳам, отам ҳам унга ишонарди.

Онам акамнинг олдидан бери келмасди. Унга кўп суюқлик ичирап, терларини артар, оёқ-қўлларини уқаларди. У бизга, акангнинг касали юқумли, деб уқтиради-ю, ўзи унинг юз-кўзларидан босиб-босиб ўпарди. Онам ҳам ёш, ўша пайтлар бор бўлса, ўттиздан эндинина сакраган жувон эди. Қоп-қора соchlари узун, қошлари қалин, кўзлари меҳр билан боқувчи, оппоқ юзларида кулгичи бор бухоролик аёл эди. Мен билан Ойша онамга, акам эса кўпроқ отамга ўхшарди. Унинг кўзлари маллатоблиги эсимда. Биз Ҳожи Аҳмад деган савдогарнинг икки хонали пастқам уйида ижарага турардик. У ҳам бизни қўллаган. Айниқса, акамга даво бўладиган тансиқ меваларни бир ёқлардан топтириб келарди.

Аммо акам қишдан чиқмади. Бизни у билан хайрлашгани ҳам қўйишмади. Онамнинг ўкириб-ўкириб

йиғлаганини эшитиб, бир бурчакда қунишиб ўтирадик. Мен у пайтларда ўлим, ўлиш сўзларини эшитгандим-у, унинг таг замирини тушуниб етмагандим. Мен акам ўлади-ю, биз соғинганда қайтиб келади, деб ўйлардим. Бир ҳафта ўтди, бир йил ҳам ўтди, аммо у қайтиб келмади. Бир қуни онам чопонимизни кийдириб (ўзиники жуда юпун эди) акамнинг олдига олиб борди. Биз акамизни кўрамиз деб қувнар, осмонларга учардик. Ўша қуни атрофни қалин туман қоплаган бўлиб, ўз кавушларимизни ҳам аниқ-тиниқ кўрмасдик. Осмондан бир нималар ёғар, аммо чопонимиз нам бўлмасди. Кейин кўз олдимиизда дўппайган тупроқлар пайдо бўлди. Туртиниб-суртиниб кета бошладик. Ниҳоят, онам тўхтади. Кўзларини бўртиб турган, ён атрофига қалин ёғочлар қўйилган қора тупроқдан узмасди.

– Бу ерда аканг ётиби, – деди онам.

– Қани-қани? – дедик биз акамнимас, тупроқ уюмини кўриб, хаёлимда ҳозир тупроқ кўтарилади-ю, ичидан акам, усти-боши чанг бўлиб чиқиб келадигандай эди.

– Акам совуқ емайдими? – деди Ойша.

– Йўқ! У иссиқда ётиби, – деди онам ва ҳўнграб йиғлаб юборди.

– Кўрқяпман, – деди Ойша.

Онам Ойшанинг бу гапидан кейин йиғламади, аммо анча вақтгача онамнинг елкалари учиб турди, ҳансираши босилмади.

Биз ҳам йиғладик. Мен ўша пайтлар беш-олти ёшларда эдим. Акам ўлиб, мен катта фарзанд бўлиб қолгандим. Аммо онамни қандай овутишни билмас, кўз ёшимни тиёлмасдим.

Бу кўзёшлари ҳеч қачон эсимдан чиққан эмас!!!

Эҳ, Онажоним!

Онамнинг қулгиларидан кўра, йиғисини кўп эслайман... У анча навқирон бўлса ҳам, соchlарига оқ

тушган, негадир умуман қулмасди. Акам ўлганидан кейин бутунлай тунд аёлга айланди.

Отам туну кун ишлаб, қорнимиз зўрға тўядиган таом олиб келарди. Оёқлари оғриб, оқсаб юрар, қўллари ёрилиб, ириб кетгандари эсимда.

Қишлиар ўтаверди, баҳорлар ўтаверди, аммо онамнинг кўзёшлари адо бўлмади. Ҳовлимиздаги ўрик гуллади. Онам буни кўриб яна йиғлади.

– Она, нега йиғлайсиз?

– Бухорони соғинидим, – деди Онам.

Айтишларича, бобомиз – онамнинг оталари Бухородаги энг бой одамлардан бўлган. Онам ўша фаровонликда ўтган кунларни жуда кўмсаб эслар, эслаб яна...

– Уйимга кетгим келяпти! Уйимга!..

– Бухоро қандай жой ўзи? Нега бунча йиғлайвера-сиз? Айтинг, она... Бухоро қандай жой ўзи?

– Йиғламайдиган жой, болам, йиғламайдиган...

Ҳар куни шу аҳвол эди. Бирон кун йўқ эдики, онам Бухоро учун, бевақт ўлган акам учун йиғламаган бўлса! Йиғлаганда ҳам эзилиб, кўзлари ёшга қорилиб, хўнграб-хўнграб йиғларди. Бухородаги қариндошлири, катта боғ ҳовлиларини эсларди...

Онамнинг эслаб азобланмаслиги учун Бухородан олиб келган ҳамма нарсаларни яшириб ташлардим. Ҳатто ярим ой шаклидаги тахта тароғини ҳам. Аммо бу ҳаракатимнинг ҳеч фойдаси тегмади. Онамга ҳамма нарса Бухорони эслатар, осмонда учеб ўтган қалдирғоч ҳам, мусичанинг аҳмоқона “ку-ку”лашлари ҳам, аффон шамолининг кўпириши ҳам Бухорони ёдга колар ва онам бечора йиғлайверарди.

Бу ғамлар навниҳол онамни адо қилди. Отам уни чалғисин дедими, ишга қўйди. Уй-ичидаги юмушларини мен қиласиган бўлдим. Аммо бир қора кунда ип-газлама тўқийдиган заводдан онамнинг ўлигини олиб келишди. Онам ҳам сил бўлган экан...

Бизга онам билан хайрлашишга ҳеч ким тўсқинлик қилолмади. Мен онамнинг юзларини ўпаётганимда, Ойша унинг совиб ултурган пинжига ётиб олганди. У онамнинг қўлларини силар, уни ҳеч кимга бермайман деб бўзларди. Онам уйғонса, мени ўпиб қўяди, дерди. Мен синглимни қўрганим сайн ўкириб-ўкириб йиғлагим келар, аммо отамни ўйлаб ўзимни бо-сардим. Ойша онамнинг қўйнидан чиқишни истамай, “менга онамни тирилтириб бер”, дегандай илтижоли термилиб турарди.

– Онам қачон туради?
 – Кейинроқ, Ойша! Сен нариги уйга бор!
 – Қачон турасиз, она, гапиринг, гапиринг! – дея онамнинг оппоқ юзларига жажжи лабларини босарди.
 Онам жуда гўзал бўлиб ётарди. Бухоронинг гўзали, париси...

Ойша ўлим нималигини сезиб турса-да, буни тан олгиси келмасди. Ойшани онамнинг бағридан юлиб олишганида, у шунақангни чирилладики, бу овоз кўксимга энг даҳшатли, энг аламли, энг дардли азоб бўлиб, қўзғалмас қозиқдек қоқилиб қолди.

Жойингиз жаннатдан бўлсин, Онажон!!!

* * *

Дунёда нима кўп – касал кўп, дунёда нима кўп – бало кўп. Қадамда дуч келади, қадамдан ушлайди. Айниқса, беватан бўлсанг, мусоғир бўлсанг, балолар қадам олишингни пойлаб ҳам турмай босиб келаверкан... Аммо не бўлганда ҳам, биз акам учун, онам учун яшшимиз, нафас олишимиз керак эди.

Ўша қора кунларда биз ўзимиз учун бир таскин топдик. Бу таскин бизни онамнинг ортидан қора ерга кириб кетмасликка ундарди. Бу олий таскин Бухоро деган сўз эди.

Отам онамнинг жойларини жаннатдан тиларди, биз Ойша билан онамнинг жойи Бухоро бўлсин, деб дуо қиласдик... Чунки ўша пайтларда мен учун энг ёруғ, энг тиник, энг тинч жой Бухоро эди... Ойша менга кувлик қилиб савол бериб қоларди:

- Онам Бухорога кетган бўлса, қачон келади, ака?
- Бухорога борган одам келмайди. У осмонларда, булутлар орасида, уйлари олтиндан, егани асал, ҳолва, шашлик!
- Нимага онам билан акам бизни ташлаб кетди? Бухорода бизга жой йўқми? У ерда нима бор ўзи?
- Ватан бор.
- Ким?
- Ватан.
- Ким у?
- Мен уни билмайман. Отам билади, онам, акам, билади. Уни танийди. У Бухорода яшаса керак...
- Бўлмаса, биз ҳам кетайлик Бухорога... Кетайлик!
- Ҳозир кетолмаймиз.
- Нимага?
- Отам қўймайди. Лекин, албатта, бир кун кетамиз.
- Йўқ! Бугун кетамиз, бугун, ака...

Шундан сўнг Ойша ҳар куни “Бухорога кетамиз”, деб туриб оладиган бўлди. У ҳар сафар хархаша бошлаганида отам ҳам кўзига ёш олиб, эзилиб-эзилиб титрарди. Падаримнинг йиғлаётганини кўриб, мен биринчи марта ишга чиқишим кераклигини англағанман. Ўша пайтлар етти-саккиз ёшли болакай эдим. Мусофирик одамни тез ўстиради, тез катта қиласди.

Мактабни ташлаб, акам бир пайтлар ишлаган заводга ишга кириб олдим. Отам у ерда ишлашимни хоҳламасди. Чунки пахта заводида болалар шафқатсизлик билан ишлатилар, иш учун эса уларга арзимаган чақа-танга бериларди. Аммо шу пулларсиз Бухорога қайтиб бўлмаслигини билардим.

Бетон девор билан ўралган завод ичида улкан станоклар гувиллаб айланар, улар тонналаб пахтани ютиб юборар, биз барини кўриб турардиг-у, пахтага қўшиб бизларни ҳам эзиб, ўлим томон тортиб кетаётганини билмасдик. Тинмай ишлар, ишлар ва яна ишлайверардик.

Заводнинг эгаси биз томонга қадам ҳам босмасди. Уни фақат узоқдан кўрардик. Бир куни унинг ити цех дарвозаси ёнида пайдо бўлиб, таққа тўхтаб қолди. Оппоқ жунлари тароқ билан тараалгандай ҳилпираварди. Итдан қандайдир атирнинг ҳиди келарди. Негадир барча болалар ишни унутиб, дарвоза олдида турган итга қараб қолганди. Биз итни, ит эса исқирт болаларни томоша қилмоқда эди. Толалар чиялашиб, тиқилиб, станоклар азобдан чийиллаб юборганда ҳам биз итдан кўз узмадик. Юз-кўзимиздан бизни таниб бўлмас, фақат қорачиқларимизгина тирик одам эканлигимизни билдириб нур сочиб турарди. Шу сўлғин ва умидсиз нигоҳлар билан оппоқ бўйнига кумуш медальён боғланган кўпакка болаларча беғуборлик билан тикилиб, исқирт хона ва аламларни бир дам эсдан чиқариб, баҳтли болалар каби ўй сурини истаб қолгандик. Кўпак қондай қизил тилини осилтирганча, кирсамми-йўқми, дегандай иккиланиб турарди. Охири, у бурилиб, кўм-кўк майса қопланган хиёбон томон чопиб кетди. Биздан жирканди, шекилли...

Мен бу ерда тўққиз ой ишладим. Тўққиз ой ичида 14 бола ишдан кетди. Билардикки, улар нафақат ишдан, балки бу ёруғ оламдан ҳам кетишганди.

Бу ерда кўп ишлашнинг охири сил, сил эса мени акам ва онамнинг олдига олиб кетишини билардим. Шунинг учун инглиз тилини ўрганишни ва тозароқ бўлимга ўтишни истардим. У ерда ойлик ҳам, иш ҳам дуруст эди. Бунинг учун инглизча оддий сўзларни билишнинг ўзи кифоя. Кечалари ухламай инглиз ти-

лидаги барча ҳарфларни ёд олдим. Кейин дуч келган газеталарни ўқий бошладим. Буни кўпчиликка билдирамасдим. Чунки болаларнинг кўпи ўта мутаассиб фикрлар билан улғайган, ғайридинларнинг тилини ўрганишни исташмас, буни макруҳлик, диндан қайтиш деб билишарди. Бунинг учун сил бўлиб, ўлиб кетишга ҳам тайёр эдилар. Мен инглиз тилини ўлмаслик учун ўргандим. Бундай ҳолда тил ўрганиш осон кечади, устознинг ҳам кераги йўқ.

Бир ойлар ўтиб танловда қатнашдим ва яхши балл тўпладим. Мени итхонага, хўжайнинг итига масъул қилиб қўйишиди. Мен энди уйга кам борар, итхона ёнида ухлардим. Ёз кунлари осмонда чиққан тўлин ой ёруғида бир пайтлар ошхона қошидан топиб олган Жек Лондоннинг “Мартин Иден” романини ўқиб ўтирадим. Кейин ҳисобласам, бу китобни 68 марта ўқиб чиққан эканман. Бу китоб менга нафақат инглиз тилини ўрганишимга, балки матонатли, чидамли, кучли бўлишимга ҳам сабабчи... Мен бу китобни ўқир эканман ўзимни итхона қошида, бетонга тўшалган шолча устида эмас, кенг ва ёрқин океанда баҳт томон сузиб кетаётган улкан кемадаги кудратли ва эркин инсон сифатида ҳис қиласдим. Бу менинг аҳволимдаги болалар учун жуда қимматли туйғу.

Адабиёт менга кучли бўлишни ўргатгани учун мен ундан доим қарздорман. Ҳозир ҳам.

Хўжайн ҳар сафар ит билан сайдига чиққанида менга чақа-танга туҳфа қилас, бу эса бир ойга бориб ойлигим баробарида пул йиғилиши учун қўр бўларди. Бунинг ярмини такаббур ва ўлгудай қўпол иш бошқарувчиси олиб қўяр, қолганини отамга берардим. Пуллар Ойшабиби синглимнинг ўқишига сарфланарди.

Бир куни хўжайн Жек Лондоннинг китобини овоз чиқариб ўқиётганимни кўриб қолди. У олдимга келиб, ҳайрон бўлиб менга қараб турди. Айнан ўша

маҳал қориндор, юзлари шишимол иш бошқарувчи кириб келди. У менга: «Хўжайин инглиз тилини бузиб гапирадиганларни жуда ёмон кўради, оғзингдан бир оғиз сўз чиқмасин», деб тайинлаганди. Менинг инглизча гапириб қўйганимни билиб иш бошқарувчи шунчалик қаҳрли қарадики, итнинг қозиқ тишларида титилиб кетадиган колбасадек янчилиб кетай дедим. Чунки унинг болаларни ваҳшийларча қийнашини ҳамма биларди.

Хўжайин менга кулиб қаради. Аммо ундан ҳамма нарсани кутиш мумкин эди. Айби қидирилган одамнинг ҳар қадамида гуноҳ.

Эй... мусофирикда улғайган мен каби болалар учун бундай хўрликлар биринчиси эмасди. Шунинг учун қўрқув, ҳадиксираш, ҳаммадан ўзимни паст тутиш каби ўйлар, хоҳламасам ҳам, бўйим билан бирга юрагимда ўсиб борарди. Чунки мен беватан, қулоқ (Ўтган асрнинг 1929–1933 йилларида мустабид шўро тузуми ер эгалари, бой, ўртаҳол деҳқон ва чорвадорларни “қулоқ – муштумзўр” номи остида синф сифатида тугатиш сиёсатини олиб борган) қилинган оиланинг фарзанди эдим. Буни афғонлар ҳам, инглизлар ҳам, дунёдаги барча одамлар ҳам яхши билишига ишончим комил эди. Улар менинг мусофири эканлигимни пешонамга қарабгина эмас, узоқдан соямни кўриш билан билар ва хўрлашга арзидиган одам пайдо бўлганидан суюнишади деб ўйлардим.

– Инглизча равон ўқиркансан! Қаерда ўргангансан?

Мен саволга жавоб берайми, йўқми, деб иш бошқарувчига қарадим. У ҳамон кўзларимга қаҳр билан тикилиб турарди. Довдираганимдан фойдаланиб, ўзи жавоб берди.

– У қаердан ҳам биларди, жаноб! Бу бир келгинди бўлса...

- Йўқ, билади! Биласан-а?
- Йўқ-йўқ!
- Э-э, сайраб туриб, тил билмайман, дейишингни қара! Қизиқ-ку! Юр-чи, мен билан.

Мен умримда бундай ҳашамдор уйга кирмагандим. Оғзим ланг очилиб қолди. Уйга киришим билан атиргул ҳидига ўхшаш бир ширин ифор димоғимга урилди. Кир оёғим билан унинг оппоқ эроний гиламларини босайми-йўқми деб, иккиланиб туриб қолдим. Хўжайин менинг билагимдан ушлаб, уйга имлади. Ичкаридаги оппоқ ҳайкаллар, чиройли вазалар, шоҳона суратларга маҳлиё бўлиб, гандираклаб, бошим айлануб кетди. Руфларнинг хонадонига биринчи қадам қўйган Мартин Иден ҳолига тушгандим, гўё.

Мен шунда ўзимнинг ямалган, йиртиқ эгнимга қарадим, уялдим. Буни сезган хўжайин уй хизматчисини чақириб, мени ювинтиришни буюрди. Хизматчи менга қовоғини эмас, оппоқ тишларини кўрсатиб табасум қилди. Ваннахонага олиб кириб, ҳамма жойимга оппоқ қорга ўхшаш нарса ишқаб ташлади. Бутун танам яйрагани рост. Аммо ҳамон қўрқар, у мени ювинтириб, кейин ўлдирмоқчими, деб ҳам ўйлардим. Чўмилиб бўлгач менга янги кийим беришди. Бу кийимда мен бутунлай бошқа болага айлангандай эдим. Шоҳона либосларни кийиб, яйраб кетдим. Ўлимни ўйламай қўйдим.

Жаноб мени кутиб турган экан, иккинчи қаватга бошлади. Унинг ортидан боряпман-у, вужудимни яна қўрқув қоплади. Боя мени чўмилтирган одам ҳам кўзимга шубҳали кўриниб кетди. Аммо жаноб иккинчи қаватдаги тахтали эшикни очганда ҳайратдан тошга айландим. У ердаги китоблар менинг ҳайрат оламимга сифмасди. Мен китобларни кўздан кечиарканман, ҳаётимдан ўлим ҳам, қўрқув, очлик, ишсизлик ҳам – бари-бари лаҳза ичидаги йўқолди. Онам эсимга

тушиб кетди. Фақат у менинг бахтиёргимни сезиб, кўриб тургандай эди.

Хўжайин исталган вақтда бу ердан китоб олишим мумкинлигини айтди. Кейин жойига қўйиб қўйсам бўлгани экан. Бор-йўғи шарти шу!

Мен энди ҳар куни, бўш вақтим бўлди дегунча китоб ўқир, газеталарни вараклардим. У ерда мен тушунмайдиган тиллардаги китоблар бисёр эди. Мен ўзбек, форс, афғон ва инглиз тилларида ёзилган китобларни ўқир, аммо кўпига тушунмасдим. Бу мутолаалар мени иш бошқарувчининг зуғумидан ҳам кутқарди. У менинг китоб ўқиб ўтирганимни кўрганида, кўрмасликка олиб ўтиб кетадиган бўлди.

Мен тинмай китоб ўқирдим. Тиббиёт, бизнес, тарихга оид китобларнинг жиннисига айландим. Психологияга муҳаббат қўйдим. Шундай қилиб, итбоқар бўлиб ишлаган олти йилим ҳаётим пойдеворини илм билан кўтаришга имкон берди. Бу орада отам Оишани куёвга узатди. Синглим ҳали ёш эди. Аммо куёв Бухородан келган, биз каби ўзбек оиласи бўлгани учун отам совчиларга йўқ деёлмади. Куёвнинг ёши синглимдан 12, мендан 10 ёш катта эди. Йигит кўп йиллар бухоролик қиз ахтариб, уйланмай юрган экан. Куёвнинг ёши катта бўлса ҳам, давраларда мендан юқорига чиқмай ўтиради. Улар кўп ўтмай Оишани олиб Туркияга кўчиб кетишли. Мен батамом ёлғизланиб қолдим!

Шу йили хўжайин Англияга кетадиган бўлди. У мени ҳам ўзи билан олиб кетмоқчи эди. Аммо бахтсиз ҳодиса юз бериб, цехга ўт кетди. Иш бошқарувчи ҳам, хўжайин ҳам, унинг ити ҳам ҳалок бўлди. У ерда ишлайдиганлардан 38 та бола тирик қолди, холос.

Бу фожиадан кейин бу ерда қололмаслигимни билдим. Қандай қилиб бўлса ҳам, Европага кетиш учун йўл қидира бошладим. Тилни яхши билганим учун мени бир овропалик савдогар ишга олди. У газ-

лама савдоси билан шуғулланар, газлама орасига эса турли оғуларни жойлаб Эронга, у ердан Европага ўтказарди. Ўта паст одам бўлиб, арзимаган пул эвазига мени эшақдек ишлатарди. Унинг фирмаси орқали четга чиқиш мумкин эканлиги учунгина, тишимни-тишимга қўйиб, қулай вақт келишини кутиб юрдим. У кечаси билан ухламай ҳисоб-китоб қилишга мажбур қилар, бунинг учун ойига 25 доллар берарди, холос.

Мен кутган вақт бир йилдан сўнг келди. У пайт мен 18 ёшда эдим. Савдогарнинг эронлик хотини туғадиган бўлиб, Европага мени жўнатадиган бўлди. Чунки мен ҳисоб-китобга унинг ўзидан ҳам пишиқроқ эдим.

Шундай қилиб, йўлга отландим.

Туркияга етиб боргач, унинг газлама орасидаги барча оғуларини балчиққа улоқтирдим, сўнгра қиммат газламаларни сотиб, Италияга, у ерда озроқ ишлагач, анча йўл босиб Англияга етиб бордик. У ерда икки ой туриб, АҚШга кемада жўнадим.

АҚШга кириб келганимда тушлик қилишга ҳам пулим йўқ эди. Ўлгудай оч эдим. Неча қунлар плакатларга тўла кўчаларда иш қидириб, итдай изғиб юрдим. Қаҳратон совуқ, муттасил очлик ва уйқусизликдан кўзларим қизариб, юзларим кўкариб, ғалати доначалар босиб кетди. Ўша қунларнинг бирида Худойимнинг ўзи мени кекса Ричерга дуч қилди. У менинг товуқдай ҳамма ёқقا сочиб, бетартиб ахлат титишимни кўриб, жаҳли чиқди. Кекса Ричер менга бу “соҳа”нинг ҳам ўзига хос сирлари борлигини айтиб, қайси халтани очишни-ю, қайсиларига умуман тегмасликни, бу бефойда эканлигини ўргатди. Уйсизлигимни билиб, кулбасидан жой берди. Кекса Ричернинг на хотини, на болалари бор эди. Ичкилик туфайли яқинлари уни ташлаб кетишган. У туни билан ичар, ҳўнграб йиғларди. Аммо тонгда тетик турар, ҳеч нима бўлмагандай мен билан бирга “ишга” отланарди. Биз кун бўйи ахлат

идишларни титиб, кечаси анча-мунча “бойиб” кулбага қайтардик. Аммо тонгларнинг бирида кекса Ричер уйғонмади. Қабр тошига ўзи васият қилган: “Кекса Ричер сизларни жуда яхши кўради” – деган сўзларни ёздириб қўйдим. Кекса Риче қачонлардир хотини ё фарзандлари уни ахтариб келишига ишонарди.

Шундан сўнг бор пулларимни йиғиб, кекса Ричердан мерос қолган кулбани ҳам сотиб, ўз савдо ишларимни бошладим. Аммо рақобатчилар мени “янчиб” ташлашди. Олти ой ўтмасдан банкрот бўлдим, бу ҳам етмагандай, ҳам уйсиз, ҳам бир чақасиз қолдим. Бироқ хорлик устун келган кунларда ҳам орзуларимни ўлдирмадим, уларни асраб-авайладим, курашдим. Отам бу пайт Ойшаларнинг Истанбулдаги уйига қўчиб борди.

Кейинчалик очган цехим ҳали бир ёшга тўлмасидан банкротга учради. Банклар қарзини сўраб қўймасди. Мен эски ишимнинг азасини тутмай, янги иш бошлар, бири бўлмаса, бири мени бой қилишига ишонардим. Энг охири, реклама қоғозлар ишлаб чиқарадиган кичкина типография очдим. У ҳам беш ойдан сўнг касодга учради. Ҳатоларим устида қаттиқ ишладим. Ўқиган китобларимдан олган хulosаларимни амалда қўлладим.

Мен яна реклама қоғозлари билан шуғуллана бошладим. Аста-секин мижозларим сони ортиб борди. Мен эса туну кун меҳнат қилар, ишхонада ухлаб, шу ерда тамадди қилардим. Ва ниҳоят, биринчи марта ўзимнинг корхонам учун ишчи ёлладим – улар Ҳиндистон ва Хитойдан келган талаба йигитлар эди. Биз учаламиз тинмай меҳнат қилиб, ҳафтасига 50 доллар оладиган ишимизни, ҳафтасига 50 минг доллар оладиган катта фирмага айлантирдик.

Биз биринчилардан бўлиб, бозор телевидениесини ривожлантиришга ҳаракат қилдик ва бунинг учун

катта кредит олиб, иш бошладик. Бу “ТВ-бозор” менга кутилмаганда улкан бойликни, қудратни олиб келди. Аммо шунда ҳам мен ҳали мақсадимга етмаганимни билардим. Биз двигателлар ишлаб чақиришни бошладик ва тез орада дунё бозорига чиқиб бордик. Иккинчи йилданоқ жаҳон бозорида бизнинг двигателларга талаб ошиб, 20 дан ортиқ мамлакат билан шартнома имзолашга эришдик. Бу битимларни тузиб, Флорида даги вилламга қайтган куним онам Бухородан олиб келган тароққа қараб ўкириб-ўкириб йиғлаганман.

У пайтга келиб турк хотиним менга тўрт нафар ўғил тухфа қилганди. Отам неваралари бағрида, яхши кунларимни кўриб бандаликни бажо келтирди. Болаларим ўзбекча, туркча билишади, аммо инглизча ёзишади, гаплашишади... Мен эса... Мен...

* * *

Мана, неча йиллар ўтиб, ниҳоят, қартайиб-чуртайдаган пайтимда Бухорога – ота ватанимга келдим! 90 йил ўтиб...

Эй Бухоро!!! Мана, мен! Мана, мен!

Сенинг ўғлинг, фарзандинг, 90 йил ўтиб бағрингга келди!

Нега шу пайтгача қайтмадим? Олий орзуйимни, онамнинг, отамнинг армонини нега шу пайтгача бажармадим? Нимага? Хаёлимдаги, орзуйимдаги, ўша булутлар орасидаги гўзал, мўъжизали Бухорони йўқотиб кўйишдан қўрқдимми?!

Биласизми, келиш тугул, мен харитадан Ўзбекистонга қарашга ҳам қўрқардим! Ўйларим сароб бўлиб чиқишидан қўрқардим, Бухоро йўқ бўлиб чиқишидан қўрқардим. Эҳ... Бу ерга келиб акамни, онамни тополмасликдан қўрқардим! Ахир, улар мен учун шу маҳалгача Бухорода эдилар, Бухорода...

Эй Бухоро! Бундан 90 йил аввал қувғин қилинган ўғлинг келди... Миллионлаб сургун қилинган фарзандларингдан бир вакил бўлиб келди... Очликдан, қувғинлиқдан, тутқунлиқдан, хорликдан, зўрликлардан ўлиб кетмаган, барига чидаган боланг келди. Утирик!

Ватан нималигини билмай кетган чақалоқ, онаси, акаси, ўтмиши, ватанини қидириб келди. Эй отаорт, биласанми, қанчадан-қанча одамлар сенга етолмай, сени бир бора кўришга зор бўлиб, беватан, бекафان ўлиб кетдилар. Улар бир бора Ватаннинг мусаффо ҳавосини сипқариш учун, бир марта кўхна ғиштларингни силаш учун жонларини беришга ҳам тайёр эдилар.

Худо уларга қанча кўз ёш берган бўлса, сен учун тўкишди, қанча сўз берган бўлса, сени дуо қилишди. Эй Ватан, Ватан, сен уларни унутмадингми? Мени танияпсанми?!

Менинг икки куним бор. Бир йилнинг фақат икки кунида менга ҳеч ким иш ҳақида гапирмайди, чунки шу кунларда мен байрам қиласман! Ўша кунлари менинг уйим олдида бева-бечоралар учун эҳсон берилади. Хайрия акциялари ўтказилади, миллионлаб пулларни улар учун сарф айлайман. Ҳар йили шу икки кун келишини кутиб яшайман. Бу кунларнинг бири – 24 июль. Ўша куни менинг «Мовий кўзли бургутлар» деб номланган двигатель заводим ишга тушган ва мен бу кунни азобларим ариган, иродам ғалаба қилган, акам, онам, отам ва синглимнинг орзулари ушалган кун сифатида нишонлайман.

Иккинчи куним – 2 июнь! Нью-Йорк осмонида, БМТ биноси олдида озод ва ҳур Ўзбекистон байроғи ҳилпираган кун!

Ўша куни мен «Мовий кўзли бургутлар» заводимнинг филиалини Японияда очиш учун битим имзолашга кетаётгандим. БМТ қароргоҳи ёнидан ўтаётиб кўзим

Унга тушдию қотиб қолдим. Кўзларимдан ёш отилиб чиқиб кетди. Покистонлик шеригим ҳайрон бўлиб нималар деганини эслолмайман... У йўлнинг ўртасида тушиб, қаерга кетиб қолганимни ҳам билмай қолди. Ўша куни БМТ осмонида бир улкан, ёруғ, нурли ҳисларга тўла халқимни кўрдим. Мен ўзбекча гапирганча, тиз чўкиб йиғлар, ўткинчиларнинг туртишларию елкамга тасалли учун кўл чўзишларига парво қилмас, онамга ўхшаб ўкириб-ўкириб, елкаларим учиб-учиб, бақириб-бақириб, силтаниб-силтаниб йиғлардим. Шунча йиллик мусофирилгим, онам, акам, миллионлаб сургунга учраган халқим вакиллари учун йиғлардим.

Байроқ тепада эди, осмонда эди, аммо у шунчалик менга яқин эдики, унинг майнин толалари юзимни силяр, кўзёшимни артарди... Эҳ, Ватаним!

Бу Ватан байроғи эди..

Мен ватанимнинг нафасини туйгандай, Бухорони кучгандай бўлдим...

Отажон, Флоридадаги сиз ётган қабрнинг тупроғидан олиб келиб Бухоро узра сочяпман. Бу тупроқ ота-боболарингиз тупроғи билан қовушади. Бахтиёрмисиз, ота? Мана, ватанинг тупроғига, чангларига – аждодлар хокига, шамолларга қўшилиб учинг! Миноралар устидаги лайлаклар билан бирга парвоз қилинг, Отажон!

Она, мен бекорга шунча вақт кутган эканман. Эртароқ бу ерга келсам, бу тупроқни кучсам бўларкан... Сизнинг Бухорога кетганингизни билардим-у, у ердан тополмасам нима қиласман деб ўйлардим. У ерга борсам, болаликдаги беғубор тасавурларим тўзғиб кетишидан, шубҳалар орасида қолиб кетишидан қўрқардим. Бекор қилган эканман! Нега бунча кутдим?

Бухорода экан ҳамма-ҳаммаси... Барчаси менга, болаларим, невараларимга ўхшаркан – юз-кўзи, қошу қўзи... Болаларим...

Онажон, акажон, Бухоро минорасига чиқиб, сиз ётган Афғонистон тарафга қараб турибман... Тинч ётибизми? Энди хурсандмисиз?

Мана, орзуларингиз ушалди, 90 йил ўтиб бўлса ҳам! Орзулар ўлмайди, ўлмайди... Дарёлар оқишдан тинмаганидек, шамоллар, нурлар, гуллар, баҳорлар мангу яшнаганидай чин орзулар ҳам ўлмайди, онажон! Осмондан гоҳ қор, гоҳ ёмғир ёғаверганидай, ой-юлдузлар мангу боқавергандай, қишида учиб кетган қушлар, баҳорда қайтгандай мен ҳам қайтдим, қайтдим!!!

Дунёда нима кўп – зулм кўп, бало кўп, жазо кўп! Аммо бегуноҳ инсонни мажбурлаб, ўзи туғилган жоийидан, ўзининг элидан, ўзининг нонидан, ўзининг сувидан, ўзининг дараҳтларидан, ўзининг дарёларидан, ўзининг мозоридан, ўзининг меҳробидан, ўзининг осмонидан айириш, жудо қилиш дунёдаги энг катта гуноҳ, даҳшат ва шафқатсизларча қилинган ваҳшийликдир!

* * *

Сизни топдим, она! Бозорда кўрдим! Дўппи сотаётган экансиз! Ўхшатдимми дедим, йўқ, қуиб қўйган ўзингиз... Кейин қишлоқларда ҳам кўрдим! Бухорода бир эмас, кўп экансиз, Онажон! Ҳа, аниқ сиз!

Акамни ҳам кўрдим! Айниқса, новвой йигит акамга Ҳасан Ҳусанига ўхшагандай ўхшайди. Қойил!

Лекин алдаган экансиз, она, алдаган экансиз! Бухоро қандай жой деганимда: «Йифламайдиган жой» дегандингиз... Мен келганимдан бери йиғлаяпман... Сизни кўриб, акамни кўриб, Бухорони кўриб...

Мана, мен келдим, Бухоро!!! 90 йил ўтиб...

Байрам АЛИ



РИЗОЛИК

Бу воқеага кўп бўлган эмас, олти йил бурун, атиги олти йил бурун бўлиб ўтганди. Эл ичра тирик афсонага айланган шундай бир одамнинг икки кундан бери оғзи кўпириб, мислсиз қийноқлар ичидан жон талашиб ётишини кўрган одам ишонгиси келмайди. Ахир муқаддас китобларда юзи ойдин, элнинг ияқ суюган устунлари эмас, юзи туман, қилмиши қора одамларнинг қийналиб жон бериши ёзилган эмасми?!

Олти йил бурунги ўша эрта баҳорда Шералибой учта хўқиз сўйиб элга катта кўпкарили тўй берган, кўпкарига ўн икки вилоятдан энг номдор чавандозлар карвони оқиб келганди. Мусобақа майдони созланиб, томошаталаб эл-улус йиғилаётган бир пайтда эса осмон бағри идраб кетди-ю, шаррос ёмғир қуя бошлади. Орадан кўп ўтмай ер тойғинчоқ бўлди, кўқдан челаклаб қуяётган ёмғир лою лойқаларни оқизиб Бобуртепа қирларини тарам-тарам қилиб юборди. Аммо чопони этакларини ёмғирпўш қилган халойиқ ўзларини панага тортишни истамас, ҳамма бетоқат бўлиб ўйин бошланишини кутарди.

Кўпкарини шайтон чиқарган, деганнинг маъниси шу – отини даврага солган чавандоз зотининг ёмғир тугул дўй ёғсаям эти жунжикмайди. Иссиқ-совуқни, хавф хатарни илғамайди чавандоз зоти, эси-дарди

улоқ айиришда бўлади. Бу сафар ҳам шундай бўлди! Баковул улоқни ташлаши билан чавандозлар тулпорлари туёғидан шилта отишиб лойни лой, кўлмакни кўлмак демасдан от чоптириб кетишиди. Бироқ оқибат шу бўлдики, баковул кетма-кетлик билан ташлаган биринчи, иккинчи, учинчи, ниҳоят тўртинчи улоқни ҳам меҳмон чавандозлар айиришиб, воҳалик томошабинларнинг дами қайтибгина қолди.

Ҳамма норози, ҳамма аламзада эди. Қўлини ювиб қўлтиққа урган айримлар «битта оркаш чавағонинг қолмабди, шўринг қурсин, аҳли Қашқа!» дея, бешинчи бор ташланган улоққа қарамасдан томошани тарк этишга шайланиб ҳам қолишиди.

Кўқдан ёғилаётган шиддатли ёмғирга ичдан ўрлаётган номус аччиғи қўшилиб қўзлари шамғалат бўлган эл, айни шу лаҳзада Шералибойнинг навқирон оти “Кобра”ни миниб даврага кирган чавандозни пайқамай қолди. Ҳеч кимнинг сергак тортишига имкон беришни истамаган чавандоз ҳам улоқ талашаётган отлар уюрига илоҳий бир шиддат билан шамолдай елиб кирди-ю, даврани ёриб чиқиб кетди. Тек чиқмади, шу чиқишида улоқни тақимига босиб чиқди!

Кўпкари томошасига яқин йиллардан бери қизиқиб қолган ёшлар билмаса ҳам, ёши бир жойга борган томошабинлар бу усулни, аниқроғи бу усулни қўллайдиган, назаркарда чавандозни яхши билишарди.

– Сафар бобода кетди! Улоқ ўзимизнинг Сафар чавандозда кетди! – бақириб юборди шундайлардан бири. Аммо бунга ақл бовар қиласими: Сафар чавандоз қачонги Сафар чавандоз, ёши етмишга яқинлашиб, кўпкарини аллақачонлар тарк этиб кетган бўлса?!

Йўқ, “Кобра” бўйинин гажак қилиб майдон гирдидан қайтиш қилганда, бошқалар ҳам оппоқ соқолли кекса чавандозни танишди! Танишди-ю, узоқ пайт

иичига ютган нафасларини баралла қўйиб, ҳайрат ва ҳаяжондан айқириб юбориши.

Тақимиға босган улоқни майдон марказига келтириб ташлаган кекса чавандоз эса на томошабинларнинг олқишига, на баковулнинг эътирофига қулоқ солди. Қандай шиддат билан даврага кирган бўлса, шундай шиддат билан кўз илғамас ёқларга от чоптириб кетди. Афтидан, у фарзандлари ва ёш чавандозлар қолиб, шу қартайган ҳолида майдонга киришга мажбур бўлганидан номусда эди...

Мана бугун ўша шамол шиддатли назаркарда, ўша элнинг тиргаги, ўша ор ва номус яловбардори ранги гоҳ қўкариб, гоҳ бўзарганча тил-забонсиз кўзи очиқ ётибди...

Чавандозга “иймон уюриб”, жонни эгасига осон топширишда ёрдам берадиган дуолар билан дам солиб чиққан Носир қори уйдан чиқди-ю, ҳовлида тўпланган қариндош-уруғ орасидан катта ўғилни имлаб чақирди.

– Отангизнинг пири ким эди? Бухоролик Камолиддинхонми?

- Ҳа, қори ака. Хабар қилганмиз, йўлда эканлар.
- Тезроқ келсалар яхши бўларди. Отангизнинг бир илинжи борга ўхшайди... Ҳарҳолда, жон беришга бу қадар қийналган одамни мен олдин кўрган эмасман.
- Ўзимиз ҳам шунга ҳайронмиз, қори ака.
- Ё отангизнинг тилла-милласи бормикан? – шошиб сўради Носир қори. – Тилласи бор одам ўлаётиб тилдан қолиши ҳақида эшитгандим.
- Қизиқмисиз, – катта ўғил асабийроқ жавоб қайтарди. – Отамда тилла нима қилади? Ундан кейин, тиллалари бўлган тақдирида ҳам ажал домига тушишларидан олдин биз ўғилларини чақириб, бўлиб берган бўларди!

– Бу гапингизда ҳам жон бор. Сафар чавандоздай одам дунёнинг молини кўзи қиймай бу даражада жон талашишига ўзимнинг ҳам ишонгим келмайди.

Носир қори қайтиб уйга кириб кетгач катта ўғил ўзига савол назари билан тикилган нигоҳларга парво қилмасдан, ҳовлининг бир четига бориб ер чизганча қотди.

Колган фарзандлар ёшовраган кўзларини арта-арта бурчак-бурчакларда тимирскиланар, ўзларича ҳовлини йифиширган бўларди. Ҳеч ким бир-бирига ба-ландроқ овоз солиб гапирмас, имкон қадар бир-бirlарининг юзларига қарамасликка тиришишар, икки кундан бери оиласда мужассам азадорлик кайфияти барваста ака-укаларни чўқтириб, ҳалитдан рухларини синдириб бўлган эди. Одатда муқаррар хавфни кутганда одам зоти шундай аянчли қиёфага киради.

Шу пайт “ғийқ” этиб кўчада тўхтаган машина овозидан ҳамма сергак тортди. Айнан шу товушга жуда-жуда интизор турган катта ағил қўли билан қолган иниларига “ишларингни қиласверинглар” ишорасини қилди-ю, илдам одим отиб дарвоза сари юринди. Бу фурсатда эса кўк жийда кийиб, бошига оқ салла ўраган, ёшига нисбатан анча ўқтам кўринувчи Камолиддинхон дарвозахонага кириб бўлганди.

– Эшон бобо, пиrim... – гуё ўз отасининг бағрига отилгандай келиб ўзини унинг бағрига ташлади катта ўғил, меҳмоннинг елкасидан тавоб қилишга тутинди.

– Оғирми?.. – катта ўғилнинг қўлларидан тутиб тинчлантирди Камолиддинхон.

– Оғир, эшон бобо... Икки кундан бери на у ёқлик, на бу ёқлик бўлолмай жон талашяптилар. Ўзлари ҳам қийналиб кетди...

Камолиддинхон катта ўғил билан биргама-биргра чавандоз ётган хонага кириб борди. Айни пайтда ча-вандоз нафас олишга қийналиб хириллай бошлаган,

Носир қори унинг лабларидан тошиб чиқаётган оқ кўпикни артиб олмоқда эди. Носир қори билан енгилгина сўрашган Камолиддинхон арабий дуоларни ўқий-ўқий чавандознинг қошидан ўтирди.

– Мурид, нима бўлди сизга... мурид... – дея унинг пешанасига кафтини босди.

Сўнг отаси тортаётган азобга гувоҳ бўлиб қафасга тушган бўридай жонсарак турган катта ўғилга ўгирилиб қаради:

– Отангизнинг оти қаерда?

Фикрини тезда жамлаб ололмаганиданми, ўғил отасининг ёшлигидан ўзига ҳамроҳ билган, чавандозлик қилган сўнгги йилларида кўпкарига солмай қолган бўлса-да, лекин ҳамиша миниб юрадиган кекса отни қаерда эканини эслолмай иккиланиб қолди.

– От?! От... Чўпонлар билан бирга кетган, – деди кейин. – Отамнинг тоби қочиб бошлагач, қарашга қийналдик...

– Тез топиб келинг!

Отасининг пирига ихлоси зўр бўлган ўғил бошқа гапни кутмасданоқ уйдан отилиб чиқди.

Катта ўғил юк машинаси билан чўпонлар чайласига яқинлашганда, чавандознинг оғир ётгани даргини эшигтан чўпонлар бирин-кетин югуриб йўлига пешвоз чиқишиди.

– От қани? Отамнинг улоқчи оти қани? – ўғил машина моторини ўчирмасдан сўради улардан.

– Қўтонга боғлаб ташладик. Икки кундан бери қутриб, тушовда турмайди!

– Ечинг! Тез чиқаринг кузовга!

Чўпонлар отни илдамлик билан машина юхонасига чиқариб, боғлашди. Улар от нимага кераклигини сўрашганда эса бунинг нима учунлигини ўзи ҳам билмайдиган ўғил лом-мим демади.

У юк машинасини гувиллатиб ҳовлига кириб келиши билан Камолиддинхон деразани очиб юборди. Отни юкхонадан тушириб, тезроқ дераза қархисига олиб келишларини буюрди. Бироқ чавандознинг фарзандлари етаклаган кекса от аввалига хуркиб деразага яқин келишни истамади. Бир мунча қистовлардан сўнггина деразага яқинлашди-ю, оддин Камолиддинхонни, кейин оғзидан кўпик келиб аянчли бир аҳволда ётган эгасини кўрди ва шу заҳоти ортига тисралиб кетди. Даҳшатдан кўзлари ола-кула бўлганча бурун катакларини кериб бетоқат депсина бошлади.

– Кишна, жониворгина, кишна... – чавандознинг пешанасига кафтини босиб турган Камолиддинхоннинг кўз ёшлари соқоли сайин оқиб тушди. – Одамнинг зўри жон топширяпти, нега кишнамайсан? Афтидан, эганг шунча ёшга кириб, сендан содиқроқ дўст топмаган кўринади...

Шу пайт бетоқат депсинаётган от олд оёқларини осмонга кўтариб бемисл алам билан кетма-кет кишнаб юборди-ю, Камолиддинхон Сафар чавандознинг аста бўшашиб, осилиб қолган жағини дока билан боғлашга тушди.

МУНДАРИЖА

Шукур Холмирзаев		Улугбек Ҳамдам	
Кўк денгиз.....	3	Ватан ҳақида қўшиқ.....	213
Ўткир Ҳошимов		Лола Ўроқова	
Ўзбеклар.....	25	Ўғил бола.....	227
Эркин Аъзам		Абдуҳамид Мухторов	
Навоийни ўқиган болалар.....	47	Ҳайдаркўл хаёллари.....	235
Хайриддин Султон		Олимжон Давлатов	
Онамнинг юрти.....	63	Ўттиз иккинчи ҳикоя.....	245
Неъмат Арслон		Холида Бозорова	
Раз қизи	72	Боботуркий.....	253
Хуршид Даврон		Бахтиёр Нуриддинов	
Амир Темур ўғлиниң ўлими ҳақида ривоят.....	82	Бошпана.....	262
Назар Эшонқул		Файрат Сайдуллаев	
Шамолни тутиб бўлмайди.....	119	Дараҳт.....	270
Абдуқаюм Йўлдошев		Анвар Суюнов	
Биз ўтган йўллар.....	131	Ота уй.....	274
Собир Ўнар		Нурилла Чори	
Бир ўларман чавандоз.....	144	Ташвиши ийӯқ одамлар.....	286
Луқмон Бўрихон		Фозил Фарҳод	
Ўтирик.....	152	Синиқ тандир.....	298
Баҳодир Қобул		Санжар Турсунов	
Тановар.....	158	Сени яхши кўраман.....	306
Исажон Султон		Нодирағим Иброҳимова	
Мен, онам ва Ўрта ер денгизи...180		Ватанга қайтиб.....	314
Наби Жалолиддин		Жавлон Жовлиев	
Ватан.....	192	Бухоро, Бухоро, Бухоро...	328
Қўчқор Норқобил		Байрам АЛИ	
Ватан нима?.....	208	Ризолик.....	345

Адабий-бадиий нашр

ОРЗУЛАР ХИЁБОНИ

(Ҳикоялар)

Мухаррир *Дилрабо Мингбоева*
Бадиий мұхаррир *Фаррух Эрматов*
Мусаҳдиқ *Дилфұза Маҳмудова*
Саҳифаловчи *Ғиёсiddин Ўнаров*

«ADABIYOT NASHRIYOTI»

Нашриёт лицензияси: № АА 0043. 27.01.2020

100129, Тошкент, Марказ 15. 1/90.
 (+98) 128-30-04.

Босишига 2021 йил 18 мартда рухсат этилди.
Бичими 84x108 $\frac{1}{32}$. Офсет босма. "Cambria" гарнитураси.
Шартли босма табоги 13,44. Нашриёт босма табоги 11,25.
Адади 1000 нусха. Буюртма №

«AZMIR NASHR PRINT» МЧЖ босмахонасида чоп этилди.
100200, Тошкент шаҳри, Адҳам Раҳмат кўчаси, 10-уй.